



ЗУЛФИЯ

АСАРЛАР

ИККИ ТОМЛИК

Гафур Гулом номидаги Адабиёт ва санъат нашриёти
Тошкент — 1975

ЗУЛФИЯ

ИККИНЧИ ТОМ

ДОСТОНЛАР

ТАРЖИМАЛАР

Гафур Гулом номидаги Адабиёт ва санъат нашриёти
Тошкент — 1975

38
3—91

3 $\frac{70403-000}{352(06)-75}$ 129—75

ДОСТОНЛАР



УНИ ФАРҲОД ДЕР ЭДИЛАР

*Артист Қобил Қори хотирасига
багишланади*

I

Осмон тиниқ. Тоғ оралаб ел
Ўйнар эди субҳидам енгил.
Тоғ бошида ярқиради қор,
Этагида яшнарди баҳор.

Шу тоғлардан, тошлар ёнидан,
Қисматга ёр ошиёнидан
Кўзгудаги қизни этиб ёд,
Чиқиб келар шаҳзода Фарҳод.

Кўзида ишқ, мардона қадам,
Иzlар эди дардига малҳам.
Қалби тўла орзу билан оҳ,
Кутар эди Ширинни нигоҳ.

Ёр висолин излаб баҳодир.
Тогни талқон қилишга қодир.
Саҳроларга оқизса дарё,
Ширин унга боқса бир қиё.

Ери юрти мўл бўлса сувга,
Шунда етар Фарҳод оҳуга.
Севги берар Фарҳодга қудрат,
Қудратига кўзгудан сурат.

Ширин бўлиб келар бу ерга,
Ой жамолин очар бу эрга.
Эл ерига жон берибсан дер.
Сен халқимга нон берибсан дер.

Ошиқлигин қиз билса зора,
Дардларига бўлса у чора.
Шунинг учун тогни ёрар мард,
Шунинг учун қўшиғида дард.

Куйларди у хуршид юзлидан,
Кўзгудаги оҳу кўзлидан,
· Кўшиқ айтар севган дил тинмай —
Жаранглади олов тўла най.

Бу дилором ширин овоздан,
Ишқли дилдан янграган создан
Маст бўлгандай йигит ёнида
Елиб юрди майин шаббода.
Гул ғунчаси қўшиққа мафтун
Бўлиб кўксин чок этди бутун.

Хушбўй ҳидин таратди райхон.
Тўлиб кетди атирга ҳар ён.
Кўйни тинглаб соч ёзди толлар,
Тебранишиди нозик ниҳоллар.

Бу куйчига тан бериб, буткул
Қўшиғини унуди булбул.
Кўйни тинглаб симобдай чашма
Жилваланиб қилди карашма.

Авжга чиққач Фарҳод навоси,
Куйга тўлгач боғлар ҳавоси,
Бош кўтариб майса ётоқдан,
Қулоқ солди оҳулар тогдан.

Фарҳод кўзда маржон-маржон ёш,
Тош устига қўйганида бош,
Тошлир болиш бўлайин деди,
Гуллар кўрпа солайин деди.

Чўллар очмак истади чаман,
Атир сочмак истади тикан.
Висол топмай чекканда азоб,
Бағри куйиб бўлганда кабоб,

Тутмак истаб майли пиёла
Водийларда очилди лола.
Атрофини ўраган ҳаво
Бўлсам, деди дардига даво...

Охир ғамгин қўшиқ ҳам тинди,
Гўё тоғдан акс-садо келди:
«Эмиш юртинда Фарҳод исми
Бунда тоғ қазувчидир,

Матои ҳуснин олмоққа
Келибдур, де бу бозора».
Жаранглади тоғларда бу куй,
Ширин юрган боғларда бу куй.

Булбул қилди бу куйни хониш
Ва қуёшдан ёғилди олқиши.
Такрор этди зилол япроқлар,
Такрор этди тоғлар, тупроқлар...

Кўп ёғилди олқиши ҳар ёндан,
Дили тўла шод ҳаяжондан
Таъзим қилиб артист турарди,
Ёш юраги баҳтли уради...

Парда тушди... муҳташам залда
Янграб кетди қарсак барала.
Ташлай берди қизлар гулдаста,
Саҳна гулга тўлди бирпасда.

Икки юлдуз чақнаб кўзида,
Зўр ҳаяжон сезиб ўзида
Табассум-ла ташаккур изҳор
Этди Қобил Қори санъаткор.

Кўп ёғилди ҳар ёндан олқиши,
Кетган эди табиатдан ҳуш.
Офарин деб қари-ёш қолди,
Офарин деб тоғ-тош қолди...

II

Гўзал эди ҳаёт баҳордай,
Баҳордаги тоза наҳордай.
Осойишта гулларди турмуш,
Қуриш, ўсиш, илгари юриш
Завқи билан яшар эди халқ,
Ижод, бахтга бўлгудайин гарқ.

Бахтнинг тоза шу осмонида,
Гўзал баҳор наҳор онида
Офат каби босиб келди ёв
Фашист бўлди орзуларга ғов.

Ақл, юрак, санъат, истеъдод,
Ҳаво, тупроқ, сув — бутун ҳаёт,
Ҳаёт учун отилди жангга,
Жонни тикиб она-Ватанга
Жўнай берди ишчи, пахтакор,
Жўнай берди олим, санъаткор...

Шунда бизнинг Қобил Қори ҳам,
Лаббай дея юрт чақирган дам,
Санъатига деди: «Яхши қол!»
Жангга кирди қўлида қурол.

III

Ўз ҳушига келгандан кейин,
Қобил Қори кўз очиб секин,
Атрофига ташлади назар,
Тирик жондан кўрмади асар.

Ҳа, жангда у, жанг майдонида,
Совуқ қурол ётар ёнида.

Лекин ҳозир ёнар мисли ўт,
Ҳайқириқдан кучлироқ сукут
Олиб келгач кураш нафасин,
У кўтарди оғир танасин.

Бош кўтариб қаради узоқ,
Унга таниш жонажон тупроқ —
Украина ери бепоён
Боқар эди ғамли, меҳрибон.

Аллақайда гумбурлайди тўп,
Узоқларда ўт ёнарди кўп.
Чекиларкан душман, беомон
Ўт қўйганин англади шу он.

Дейди: ерда, осмонда олов,
Ҳанча ерга ўт қўймадинг ёв!
Ҳалбим ўтин учли тиллари,
Украина сарин еллари —
Тутинг менинг икки қўлимдан,
Қолмай қасос, кураш йўлимдан! —

Интилади олдинга томон,
Ёв ўқидан азоб чеккан жон
Имкон бермас олға юришга,
Душманига ўқин узишга.
Кўкрагини ўпирган олов
Азоб берар унга беаёв.

Ёш юраги ҳаёт истайди,
Қони қасос томон қистайди.

Аммо, мана, қаршидан ўлим
Унга қараб ушла,— дер,— қўлим!
Оғир азоб сезиб ўзида,
Ғазаб ёнди шаҳло кўзида.

Қобил Қори оташга тўлиқ
Кучин йигиб янгратди қўшиқ:

«Азиз Ватан, жонажон Ватан,
Керак бўлса қурбон жону тан.
Бахт, эркимиз қолсин деб элда,
Мұҳаббатинг, қудратинг дилда
Кўрсатамиз курашда сабот,
Ёвдан сени қиласиз озод.
Халқим учун, санъатим учун
Яна жангга кираман бу кун!»
Дея бошин кўтарди азот
Қобил Қори — қаҳрамон Фарҳод.
Қимиirlашга йўқ эди мадор,
У атрофга ташлади назар.

У бегубор осмонга боқди,
Гўё сирли кўзгуни топди.
Кўзгу мисол зангори осмон
Она юртин қилди намоён.

Қарписида турган ўлим ҳам,
Гойиб бўлди кўзидан бир дам.
Мана, она юрт Ўзбекистон,
Халқи, дўсту ёри қадрдон.

Мана уйи, ҳовли, гулзори
Ва меҳрибон онаизори,
Отасининг нуроний юзи,
Иўлларига интизор кўзи.

Гул ичидан кўйлаги атлас,
Лаби ёқут, кўзлари нарғис
Ёри майин қилиб табассум
Унга боқиб ишқли ва маъсум —
Ҳаётимиз сақлаб қол, деди,
Дўстлар учун қасос ол, деди.

Гўё ўзин саҳнада кўрди,
Фарҳод бўлиб тоғларда юрди.
Аста ўтди ташланган гуллар,
Чапак чалган қизлар, булбуллар,
Балиқ сузган у олтин булоқ,
Ширин наҳри, Фарҳод қазган тоғ.

Кенг пахтазор, водий, боғ, бўстон
Бари бўлиб бир Ўзбекистон —
Гўё унга багишлади куч,
Деди: — Уч ол, душмандан ол ўчи!

Вужудида ҳарорат ортди,
Хаёлинин жанг ери тортди:
Бўстон эмас вайронлик, даҳшат,
Кўз олдидан ўтди беадад.
Қора дорга осилган аёл,
Олтин сочи ёзиқ тол-тол,
Баданида қамчининг доғи,

Ерга тегмай чўзиқ оёги
Чайқалади тутунли елда,
Бошсиз ётар гўдаги ерда.
Шаҳар, қишлоқ кўринди вайрон,
Днепрнинг тўлқинида қон.

Буғдоизорнинг олтини ўтда,
Саҳналарнинг тили сукутда,
Сукутида янграб зўр қасос
Деркан:— Эй дўст, биз-чун ол қасос!
Узоқлардан келаркан фарёд
У бошини кўтариб кушод:

— Йўқ, бу куйган далалар ҳаққи,
Бошсиз қолган таналар ҳаққи
Яксон қилмай душманни тамом,
Бари учун олмай интиқом
Мен ўлимга бўлмайман рози!—
Деди, ғазаб тўла овозин
Олиб кетди узоққа шамол.
Кўзин юмди бедармон, беҳол.

Бир дам юмди кўзини, аммо
Оғир бўлди дард чекмак танҳо.
Қадрдон юрт кўкига боқди,
Гёй тиниқ кўзгуни топди.

Душман пайҳон қилгаи дала, қир,
Шу кўзгудан ўтарди бир-бир.
Ўртоқлари мардча қилар жанг,
Мана ёвнинг ҳоли бўлиб танг
Қочиб борар халқнинг ўчидан,
Совет жангчисининг кучидан
Босқинчи ёв ўлган беҳисоб.
Кўринади кўзига шу тоб
Тепасида бир гала қузғун
Базм қуриб қилади ўйин.

Қизил байроқ, қасос йўл бошлаб,
Найзаларда зафар ярақлаб
Бораётган полкини кўрар,
Ва мардона халқини кўрар,

Халос шаҳар, қишлоқлар ўтди,
Озод қизлар унга гул тутди,
Қобил Қори тинч, лекин базўр
Кўзин узиб кўзгудан мағрур
Жангчиларни кўрди бошида,
Командирин кўрди қошида:

У тутган сув ҳаёт бахш этди,
Ўлим гёё нарига кетди.
Жанг зафари руҳим этди шод:
— Украина тупрогин озод
Кўриш, дўстлар, тилагим эди.
Кўрдим!
Зафар бизники энди,
Жон дўстларим, хуш қолинг,— деди
— Мен учун ҳам ўч олинг,— деди.
— Мен ўлимдан асло қўрқмайман,
Лекин яшамоқни истайман.
Ҳаёт яхши, кураш ҳам яхши,
Она тупроқ, қуёш ҳам яхши.
Озод юртда берганим-чун жон,
Кўз юмаман мағрур, беармон.
Қолди ёrim, отам ва онам,
Қолди севган қўшиқларим ҳам.
Мана, тураг қаршимда ўлим,
Лекин қўшиқ тилайди кўнглим.
Куйлай, дўстлар, тингланг сўнгги бор.
Сўнgra, майли сиз айтинг такрор.

«Озод элда яшардим озод,
Севги билан бахтиёр эдим.

Гоҳи Мажнун, гоҳ ботир Фарҳод
Бўлиб элу халқقا ёр эдим.

Санъат эди дилим банд этган,
Саҳна эди жонажон уйим;
Санъатимга чанг солгач душман
Жангга кирди юрагим, куйим.

Санъатимни севгандай севдим
Сени, Ватан, курашдим сен-чун.
Тупроғингни қоним-ла ювдим,
Аյмадим жонни эркинг-чун.

Мен ўламан, аммо дўстларим,
Евдан сени қиласиди озод.
Украина ерига яна
Баҳор кириб бўлади обод.

Азиз халқим, фарзандлик ҳаққи,
Курашингта руҳим-ла ёрман.
Душманини енголган халқим
Зафарида, бағрида борман...»

Санъаткорнинг нафаси тинди,
Халоскорнинг нафаси тинди.
Дўстлар сокин этганида бош
Шарқ томонда кўринди қуёш.

Сукунатни бузиб ел-шамол,
Тинган куйни айлади такрор.
Тилга кириб гўёки ўрмон
Такрорлади қўшиқни шу он.

Такрор этди у куйни дарё,
Ёв қонига бўялган гиёҳ.

Такрорлади тошлар, тупроқлар,
Такрорлади жангчи ўртоқлар.

Такрор этар тоғлардаги қор,
Такрор этар келганды баҳор...
Шундай яшар асрлар бўйи,
Ҳалок бўлган санъаткор куйи.

Сокин оқар дарё лабида,
Бир туп кўум-кўк арча тагида
Қабр тураг. Бошидаги хат
Марҳум эрдан беради дарак:

«Бунда ёвни қириб беомон
Ватанга жон берган қаҳрамон —
Жангчи Қобил Қори ётади».
Тонглар уни эслаб отади.

Секин елиб майин шамоллар
Шарқдан Ғарбга эсган замонлар
Келтиради райҳон бўйини,
Лайли, Шириналнинг куйини.

Кўп юлдузлар ой билан тунда
Келиб, майин әгилиб шунда —
Салом айтар она элидан,
Ширин калом ўзбек тилидан.

Бошида ой тўкиб кумуш ёш
Секин қайтар келсин деб қуёш.

1943

ИККИ ЎРТОҚ

Уфқ олмиш пушти ранг,
Тоғ узра чиқар қуёш.
Қир кенг — кўз илгар аранг,
Пахта очилган қийгос.

Белга урар ғўзалар
Чайқалар худди денгиз.
Қайнаган оқ кўпиклар
Ичра сузар икки қиз.

Бири Гулшанхон — дилкаш,
Қамсухан ишга чечан.
Бири Ойша — шўх оташ,
Ёш келин — гапга печан.

Ойшахон тез ва шаддод,
Гулшан туйғун, раҳмдил —
Иккиси қалин ўртоқ,
Үртадан ўтмайди қил.

Очилган бўлиқ пахта,
Оқ енгдай ҳар бир чаноқ,
Дала қизгин меҳнатда
Байрамдай қизлар хушчог.

Пахта жадал терилар,
Дам сайин ошар суръат,
Нақадар жонга ёқар
Ел силаб тонг пайт...

Ойша ростлаб қаддини,
Атрофга ташлади кўз.
Бўшатиб этагини,
Дўстига бошлади сўз:

— Гулшан, далани қаранг,
Йигитлар тутиб кетди.
Нуқул гўдаклар билан
Қолган кунлар ҳам битди.

Қарайман-да, қувнайман,
Ичга сифмас қувончим.
Кўкрагим бўлар баланд,
Зўр бўлгандай суянчим.

Биласиз, бу қаторда
На акам бор, на иним.
Туғишгандан ҳам яқин
Бариси жоним, таним.—

Деди-ю дуррасини
Силкиб ўради бошга,
Ва хумор назарини
Ташлади ёш қуёшга.

— Асти қўйинг, минг шукур,
Тугади офат — уруш.
Халқни айтинг, шундай зўр
Йилларда берди туриш.

Энди бағримиз бутун,
Эркаклар қайтди элга.
Йигламайсан жигар хун,
Васваса тушмас дилга.

Эшик тиқ этса сени
Босар эди ваҳима.
Қўшнинг олса шум хабар
Бағринг бўларди қийма.

Қийма бўлгандай дили,
Чимрилди Гулшан қоши.
Атрофда дала ели,
Тинч ҳаётнинг қуёши.

Порларди тоғлар оша,
Олиб кетгандай дардни.
Ўртогига шўх Ойша,
Деди тўкиб этакни:

— Чунки ўртоқ ҳаммамиз,
Бир элнинг йигит-қизи.
Кийган ва еганимиз,
Бир элнинг нони, тузи.

Хирмон томон йўл олди,
Гулшан жўяқ ичидан.
Кўркам силкиниб қолди,
Оқ пахталар кетидан.

Интилар кўкка қуёш,
Ортар ерда ҳарорат.
Терар йигит, қари-ёш,
Ҳаммада зўр маҳорат.

Теришади, пахтанинг
Ўсар тоғдай хирмони,
Ялласи йигитларнинг
Жарапглатди самони.

Гулшан секин ростлар қад,
Юзи бўлар гул мисол.
Вужудини муҳаббат
Урагандай тинглар лол.

Ўзи сезмай, назари
Сузиб кетди йигитга.
Хотира эмас энди,
Ишқ қиласар бағрин тилка.

Ишқнинг гўзал ўтидан
Чимрилган қора қошлиар,
Қалбдаги янги куйдан
Оташ бўлган қарашлар.

— Қаранг, унинг овози
Бунча жозиб бўлибди.
Урушда чиқиб ғози,
Сухсур каби тўлибди.

— Комилми?
— Йўқ, Тўлаган.
(Яширмоққа шошди қиз.)
— Тўлаганмас куйлаган,
— Мени чалгитмоқчисиз,

Бу Комил — кулиб боқди,
Ойшахон ўртоғига.
Бу қараш лола тақди
Гулшанинг яноғига.

Жўяқ оралаб ўтиб,
Ойша келди яқинроқ.
Гулшанни қўшиқ тутиб,
Олиб кетганди йироқ.

Муҳаббатнинг сирини
Қилас әкан тамошо.
Гулшан қалби сирини
Ойша қилади ишо:

— Айтманг, чин гап турганда
Менга кўрган тушингиз.
Ишқ денг, уни кўрганда
Оғиб кетар ҳушингиз.

— Ҳуш ўлсин дарров оғса,
Жилла ҳам ундан эмас.
У қаҳрамон, биз эса...
Биздайларни тенг демас.—

Ғунчадай дудогига
Чиқиб эрка табассум,
Қаради ўртоғига
Ҳам маъюс, ҳамда маъсум.

Қучоги тўлган пахта,
Ўпар оппоқ иягин.
Гулшан хаёлчан, шахдам
Тўкиб келди этагин.

— Гулшан, ёш қиз эмассиз,
Гапингизга туз қўшинг.
Биламан, камтаринсиз,
Аммо нолишни қўйинг.

Комилjon сизга хуштор,
Мендан сўранг сиз уни.
Юармиш тунлар бедор,
Поччангиз айтди буни.

Кеча сиз қилганда рақс,
Ўзим кузатиб турдим.
Гўё олмасдан нафас,
Лол қолганини кўрдим.

Мен ҳам гар йигит бўлсам,
Танлардим сизни ёлғиз.
Сизнинг чирой кимдан кам,
Товусдай кўркам қизсиз.

— Жилла ҳам ундаи эмас!
— Луқма ташламанг мундог.
Бир кўрган қиласар ҳавас,
Қиз деган бўлар шундог.

Бу йил колхозда қай қиз.
Сиздан кўп терди пахта?
Ҳатто районга раис
Телефон қоқди бу ҳақда.

Қаҳрамондан каммисиз?
— Биз ҳаммамиз шу зайл!
Сиз, Ойпош-чи?
Йигитлар,
Биздан ўзмоқчи бу йил.

— Майли, ўзсин! Улар ҳам
Ўзимизнинг юзимиз,
Бизнинг колхоз шундог деб
Гердаямиз ўзимиз.—

Ойша этагин тўкиб,
Тепиб босди қанорга.
Тера-тера сўзлади,
Гулшан чўмди хаёлга.

— Ўқигансиз, оқ кўнгил,
Орқангиз тўла кокил.
Бу кокилдан узилиб,
Қайга ҳам кетар Комил.

— Қўйинг шу гапни, Ойша,
Пича олинг қўшиқдан!
...Қуёш тераклар оша
Шуъла сочди уфқдан.

Бутун звено шунда...
Табелчининг вақти чоқ.
Ялтирас хирмон кунда,
Тоғдай юксак, қордай оқ.

Жийдазор йўл оралаб,
Қизлар кетди уйига.
Шарқдан оқшом мўралаб,
Ўрмаларди қуийга.

Шом ортидан тоғ ошди,
Ўн беш кунлик тўлин ой.
Кенг водийга нур сочди,
Ҳосилга бўлсин деб бой.

1946

МУШОИРА

Гўзал тупроқ узра қўйилди оқшом,
Кундуз олар дам,
Жўшқин мушоира этади давом,
Дўстим, кел сен ҳам!

Бунда узоқдаги дўст бўлар яқин,
Санъат, маҳоратнинг байрами бунда.
Қоғия, сўз, мисра баҳслари қизгин,
Юраклар даврага киради бунда.

Қай дил чамани бой, жозиб нафаси,
Кимнинг фикри ўткир, тиран, бокира?
Бу гурунг — шоирлар мусобақаси —
Шарқ шеърий чамани, бу мушоира!

Ҳинд тупроғи узра қўйилиб оқшом,
Кундуз олгач дам,
Жўшқин мушоира этади давом,
Дўстлар бўлиб жам.

Юраклар жўр экан, овоз ҳамоҳанг.
Зарра эҳтиёж йўқ муҳташам залга.
Бу шеър bogiga гўзал, ранг-баранг
Қўшиқ солиб келган ҳар шоир дилга,

Нил қудратин жўшиб куйлар бир шоир.
Ўзгаси Ганг мисол қилас замзамя

Фақат манго нусха ажойиб чодир
Бу гўзал даврага ажиб бошпана.

Бенгал кўрфазидай кўк эди оқшом,
Атрофда табиат оларди нафас,
Ранг-баранг чироқлар шуъласи бесон —
Осмон кўзларида этар эди акс.

Салқин соҳиллардан эсган шаббода
Гоҳ олиб келарди гуллар бўйини.
Гоҳ ҳинду қиз куйин, гоҳ яқин боғда —
Сайраган анвои қушлар куйини.

Лекин ҳоким эди даврада илҳом
Ва жасур қалам.
Жўшқин мушоира этарди давом,
Дўстлар бўлиб жам.

Ўзбек супасидай саҳнада гилам
Чироқда ёнарди гёё камалак,
Меҳру муҳаббатин кўтарди баҳам
Ҳақиқат ва нурга интилган юрак.

Саҳнага чиқарди сипо ва вазмин
Чинор ҳам, ниҳол ҳам шеър чаманидан.
Кекса-ёш отаю фарзанддай яқин
Еима-ён дўстликнинг бу байрамида!

Шарқнинг ҳам бузилмас одатлари бор,
Ҳиндлар удумига қиласиз амал.
Чордона қурамиз меҳмон ва мезбон
Камалак ранг гилам узра bemalol.

Пойгакда ечилган хил-хил пойафзал,
Менинг назаримда ўзи бир дунё.
Ҳар бири ўзида меҳнат ва гўзал
Эли тупроғини келтирган гёё.

Ажиб Ҳиндистоннинг моҳир, миришкор
Косибин санъатин қилиб намойиш —
Ҳиндлар сандаллари тизилган қатор.
(Сандал дараҳтидан ясалган эмиш.)

Жуда соз! Албатта кийиб бирини,
Сафарга дўстлар-ла мен ҳам чиқаман.
Ҳар қўлга тутқазиб халқим меҳрини,
Буюк Ҳиндистонни яёв кезаман!

Хитойнинг бежирим, Боғдоднинг пухта
Оёқ кийимлари турар ёнма-ён.
Қарайман, Цейлон бор ва бошқа жуфтда
Эрон косибининг санъати аён.

Мўгулча этиклар Панжоб кафшига
Эртак сўзлагандай эгилиб турар...
Қўзлар қувонади инсон ишига,
Шод этар тупроғу меҳнат ва ҳунар.

Сўнгра теваракка сездирмай секин
Мен ҳам ўз туфлимга ташладим кўзим.
Ёмон эмас, Аҳмад, моҳир, камтарин
Ватандоп, ишингга олқиши ўқидим.

Биламан, сенинг ҳам бунда дўстинг бор,
Балки Бомбейда у, балки Кашмирда.
Қаерда бўлмасин худди сен мисол
Яшайди даврада янграган шеърда!

Чодир ичи гавжум, кўзлар мунтазир,
Микрофон олдида давра соҳиби:
Кумушдай сочига жилваланаар нур,
Қўзида ёшликнинг сўнмас ёлқини.

Неларни кўрмади бу кўзлар? Юртда
Кўз ёши дарёдай оққанин эслар,

Ирода ва умид тобланиб ўтда,
Қари ҳақсиазликни ёққанин эслар.

Энди Ҳиндистони устида офтоб,
Шунинг-чун ёш, дадил, мунааввар боқар,
Бизни шеър баҳсига қиласи хитоб,
Қўшиқ юраклардан дарёдай оқар.

Гўзал таржимондир зангори оқшом,
Хар юрак ҳамдам.
Бизнинг мушоира этади давом,
Дўстим, кел сен ҳам!

Мана, мусиқадай, севгидаи майин,
Даврага киради Панжоб булбули.
Нафис сатрлари ёниқ ўтдайнин,
Жасур жаранглайди оналик дили.

Шеър ўқийди Непал, Вьетнам, Хитой,
Рус, тоҷик ўқийди шеърини сарбаст.
Қора алангладай соқолли сигхлар
Қордан оқ либосли бенгаллар, ҳиндлар,
Завқидан тебраниб нақ тўлқинли сой,
Тингларди ҳаяжон оғушида маст.
Қўшиқ-чи?

Гоҳ кураш,

гоҳ қиз севгиси,
Гоҳ кўқдан ион кутиб кўр бўлган нигоҳ,
Гоҳ гўдак кулгиси, гоҳ банаң иси,
Сурмали кўзларнинг нози бўлиб гоҳ;
Гоҳ бўғиқ ҳақиқат дод, ҳайқириғи,
Гоҳи юлдуз каби йироқ, ёрқин баҳт.
Қулликка санчилган газабнинг тифи,
Гоҳ эрк тантанаси берган адолат —
Осиё, Африка картаси бўлиб,
Ҳаёт аламига, баҳтига тўлиб,

Кириб келар эди дилдан дилларга.
Еллар мисраларни диллардан юлиб —
Миллион йўллар билан бутун элларга.
Кетарди гўё бир самимий сайёҳ,
Елқин қанотида дўстлик ва меҳр.
Гўё шарқликларнинг баҳтига гувоҳ,
Ғарбни чорлар эди даврага шеър.

Эй латиф, фусункор ҳинд оқшомлари,
Не сеҳр бор эди зангор қўйнингда?
Тимгловчи ва шоир ҳаяжонлари
Бир улкан қалб бўлиб тепар тўлқинда.

Янги куй, янги ўй олиб шоирлар,
Даврага келарди, келарди ҳамон.
Дилларни пайвандлар эди сатрлар
Дўстлик, қардошликтининг кўпригисимон.

Ёру биродарнинг меҳрига сероб.
Юракдай даврамиз борар кенгайиб,
Жафокаш қонига солиб офтоб,
Кўзида қалбининг оқлиги ёниб —

Африка фарзанди ўқийди шеър,
Ирмоқдай қуилар тинчлик сўзлари.
Ором оғушига кирган бўлар ер,
Ерқинроқ чақнайди кўк юлдузлари.

Сен эрмак эмассан, сен нон, сен ором,
Орзу покиза.
Сен Ҳаёт! Ҳаётни куйла сен мудом,
Эй, мушоира!

Сен чорла, овозинг эшитсин жаҳон!
Шеърнинг уриб турган юраги бўлиб,
Ҳаётнинг энг ажиб куйига тўлиб

Даврамизга кирсин ишчи ва дехқон,
Ҳаёт санъаткори энг оддий инсон.

Балки у шеър ёзиб, ўқимаган ҳам,
Ижоднинг лаззатли дарди бегона.
Кураши — қалбида қайнаган илҳом,
Китоби — эркка ишқ, орзу ва ғоя.

Майли, ўрин олсин, бу шонли сафдан,
Шоирлар куйига бўлсин ҳамовоз.
Меҳнат-ла яратган саодат, баҳтдан
Нақл этган мисралар кенг қилсин парвоз.

Ҳаёт гўзаллиги шеъриятининг
Ёниқ нафасига тўлсин бу жаҳон.
Хавфдан халос бўлган башариятнинг
Қўшигин тўқисин озод, тинч инсон.

Даврамиз меҳрга тўлиқ бир олам,
Дўстлар бари жам,
Буюк мушоира этади давом,
Келингиз, сиз ҳам!

ВОДИЛ ЮЛДУЗЛАРИ

Меҳмон тунда келиб тушди Водилга,
Сойда шарқирап тун.
Барг-ла ўйнар тун,
Йўлин, кўзин тўсиб:
«қол,— деб,— шу ерда»,
Қуюқ тун ороми қамради бутун.

Сүнмас түп чақмоқ,
Сингари чақмоқ
Боқди юлдузлар...
Рашқдайин ёнди,
Дилдай ўт олди
Меҳмонда күзлар...
Уйқу дорисини ютмади.

Бедор
Тун товушидан сүрди манзара, күй, ранг,
Көрли, қорсиз тоғлар, минг йиллик чинор,
Терак, ўрикларда ўрмалади тонг.
Уфқа асир,
Тұнар серсең
Меҳмонда күзлар...
Учын сузгандай,
Гулхан түзгандай,
Еғди юлдузлар...

Сайёр ел чайқабми, тун бўлиб даво,
Гўдакдай ухлади, уйғонди меҳмон.
Ер зилол, тонг зумрад, шуъла ранг ҳаво —
Оқар меҳнат, шодлик кундузи томон.—
Кекса, бола, ёш,
Қалбида қуёш,
Буғдой ранг юзлар...
Айтмоқ бўлиб сўз,
Меҳмон ташна кўз
Таржимон излар...
Гўё шаҳар кезар қишлоқ оралаб,
Ажиб тараққиёт ярашиқ, ўтроқ
Бу — меҳнат ўғлига ҳайкал.

Улугбек

Фарзандин кафтида кўрсатди қишлоқ:
Зафарга чорлаб,
Кўксига порлаб
Чақнар уч юлдуз...
«Ер, меҳнатга мадҳ,
Қўшиқ бўлган баҳт!»
Дер меҳмонда кўз...

Қалб қуш каби учар далалар томон,
Қанча қабр, жон ухлар...

Унар нон, номус

Ҳар қарич тупроқда!..

Кундузги жаҳон:

Ғўза, дехқон, суръат — нақ қайноқ оғуш
Қучди меҳмонни,
Қўйди чол нонни,
Чой тутди қизлар...
Ҳар қиз кўзида,
Саҳар кезида
Ёкқан юлдузлар!..
«Шу битта колхозми, бир иқлим водий?
Ҳамма ёғи ғўза, этаги дарахт.

Лекин қайга кетди, одам авлоди,—
Меҳмон ҳайрон: «Деҳқон ишлайди қай вақт?

Чол даласидан,
Нақ бобосидан
Кӯз олмай сўзлар...
Меҳмон завқ тўлиб,
Дил қулоқ бўлиб,
Тинглайди кўзлар...

— Бу ерми? Бир нигоҳ овлардай майдон.
Икки минг гектар бор пахтазор ўзи
Уй-жой,
бог, буғдоизор, чорвага яйлов...
Бир иқлим дедингиз, хуллас, колхозни,—

Лиқ тўлган шийпон,
Ёздан юз алвон
Иигитлар, қизлар.
Бири очар баҳс,
Бири тушар раҳс
Чизиб ўт излар.

Далага ёйилди бугунги деҳқон,
Машина ва тупроқ кирди измига.
Офтоб кезиб кекса қонида меҳмон
Эргашди миробнинг тезкор изига.
Гоҳ жарга тушар,
Гоҳ сапчиб жўшар
Сув мисли шўх қиз,
Дилга ўт ташлаб,
Ўз йўлин хушлаб
Оқар рашкли, тез...

Миробга сув бакор. Меҳмон олди дам.
Бошда ёнар ғуж-ғуж юлдуздай олча...

Қизлар хайр-хўшга келишиб оқшом,
Меҳмонга тутдилар шоҳи рўмолча:
Ҳар тўрт уфққа,
Нозикдан уқа
Тикибди тўрт қиз,
Меҳмон дер:
 кўкда,
Кўзда,
 кўкракда,
Туҳфада юлдуз.
Меҳмон жўнаб кетди шу тун Водидан
Гўё сойларда кун, баргни ювар кун,
Йўлларига тўшаб ойнинг нуридан,
Оқ йўл тилар қишлоқ,
 либоси оқ тун.
Сўнмас тўп чақмоқ;
Сингари яшиноқ
Гул силтар қизлар.
Меҳмон кўзидаӣ,
Дўстлик сўзидаӣ
Чақнар юлдузлар...

6. VII. 65. Водил.

СУРОҚЛАЙДИ ШОИРНИ ШЕЪРИМ...

Янги туғилган сой лабида яйраб,
Табиатга уйғун ўлтирамиз хуш.
Биздан минг тош юксак тоғлари ўраб,
Мени құчған борлық гүё фаромуш.

Үйларим кезади Шоҳимардонда...
Ҳозир:

бир қучоғ гул, дилда эҳтиром,
Күтарилдим шоир ухлоқ юксакка,
Устоз руҳга шеърим,
қалам ва илҳом,
Шаъним-ла бош әгиб турдим мен
якка.

Мен якка.

Шоирдан ўзгаси унут...
Долғали асримиз шонли йилларин
Тўлқинида гүё оғир бир сукут.
Тингладим Ҳамзанинг тирик юрагин.

Барча шеърни бирдан ўқидим гүё,
Барча мусиқаси бирдан этди маст.
Туман, чанг, гулдурак жала ва зиё
Қўйнида серташвиш боқди баланд-паст.

Назаримда: Ҳамза ниҳол теракдай,
Иродадай, ҳақдай, интилиш бўлиб,

Эгик қад, ночорга синмас тиргакдай
Юpar илҳом,
кураш,
йўларга тўлиб.

Назаримда: ўйчан,
тетик ўт нигоҳ
Шеър терар атрофдан,
борлиқни куйга
Солар,
ҳар қанотли, мулки инқилоб
Янги қўшиқ кирав ҳар фақир уйга.

Қўшиқ ўтли издай қолар ёнгали,
Қўшиқ янги чинор кўчатисимон,
Келинсимон қолар илдиз ёзгали...

Тугён чангалида сир Шоҳимардон...
Шоир юрав тоғлик чиройга шайдо.
Лекин чимирилган қош,
кенг пешонадан
Боқар янги дунё:
кураш,
ўт, нидо:
— Ленин нури ёнсин ҳар хонадонда!..

Ленин нури оққан шеърдай ёрқин дил,
Мақбарадан оғир, ғамгин чиқаман.
Атроф нур қўйнида, куй учар енгил,
Шоир орзусидай паст-баланд чаман,
Ҳамза шеъри каби шу ерли сулув
Тўп сайёҳга сўйлар қайгули достон.

Тинглар узоқ-яқин:
қай қўл,
не оғу

Нурнинг оқимиға ташлади арқон...
Сўнг қиз сайёҳларни музейга бошлар:
Музейда: на қадим мумёли жасад.
На сарой, тахт учун кесилган бошлар,
На қалқон бор,

на бир шоҳона ясан:

Бунда: Ҳамза,

Совет

ва Шоҳимардон.

Шоҳимардонга илм, мактаб, маърифат,
Совет қонунича — ер олсин дехқон,
Совет қишлоғида гулласин санъат.

Ҳамза — қўшчиларнинг қизғин баҳсида,
Ҳужум гулханида нутқ сўзлар шод.
Куйбишев ёнида,

кураш постида

Ҳамза қўшиқ тинглар, шеър қилар ижод...
Ажнабий сайёҳлар тинглаб ҳикоя,
Суратлардан ўқир жанг тўла китоб:
Зулмат, хурофотдан эркни ҳимоя,
Ўзи

Осиё-чун буюқ инқилоб...

Бунда Ҳамза!

Бунда Совет Шоҳимардони,
Ҳамзага фикрдош,
жангдош содиқ дўст,
Халқ ғазабин сели, нафрат бўронин
Қаърида ютилди фитна номли мушт.

Лекин тупроқсимон авлод ва авлод
Қалбида қолади нақ сўнмовчи ўч,
Мана бу эзгулик,
виждондай қурбон,

Аршидан қуламас Олой каби куч —
Хамза Ҳакимзода!
Сулув овози,
Зилзиладан сўнгги ғулувдай тинди,
Гўё ҳамма дилдан фарёд парвози
Алам, сукут бўлиб хонага инди.

Гўё жанглар ўтган жароҳатли ер,
Гўё қора чақмоқ уриб кетган тог.
Гўё ҳалокатдан ҳайрон бир тақдир,
Қўлида сўнгги шеър,
лабда алвидо —
Бўлиб боқар жасад суратдан.

Девор
Довулга маёгин бермаган денгиз
Сингари чайқалар,
Яширин ёш қатор
Кипригидা ёниб ҳазин сўзлар қиз...

Мардлик, мангуликдан нақл этди сулув...
Қўзларим кезади Шоҳимардонда...

Шоир дили ҳозир тўйкан шеърдай сув
Тоғ бағридан силжиб қуйилар сойга.

Сув тошлар тагидан, қоя бошидан
Томар суюқ шиша каби муз, шаффоф.
Нақ қўл-ла тутгудай тоғ қуёшидан
Куйиб дейман қўлимда китоб.

Йўқ!
Ҳар нур томирида ором тўкилар,
Ҳар хилватда лагерь,
сайхонда ҳордиқ.
Қорлар кўрпасидан нафис гул кулар,
Ҳамзаобод бўйлаб юар ҳур шодлик.

Қалбим сўроқлайди Шоҳимардондан...
Тупроқ!

Бош әгаман ҳар бир заррангга,
Лекин таъна билма, дил қиласа сўроқ,
Кўксинг жой инсонга,

хоин,
кун,

тунга,

Меҳр, дард, қудратнинг даҳоси сиёқ

Мудом уйгоқсан-ку,
айгоқсан мудом!

Наҳот шоир, сенга эди ёт тақдир?

Еки ҳиммат, шафқат эзгуликка ром,
Онадай меҳрдан гоҳ-гоҳ сен басир?

Нечун ёрilmадинг ёв оғидан,
Қаърингга ютишдан қилдингми ҳазар?
Бўрини ҳайдаш-чун ҳаёт боғидан
Бўrimас, жасур, соғ қўл керак баъзан.

Тоғлар!

Бўй ўлчашга ўчдай туриб тик,
Пешанам олдидан кўкка чўзиб бош,
Шамолга, уфқа девор ургандек,
Истайсиз елкада ухласа қуёш!

Қўрқоқ подшонинг тош қўрғонидай,
Кармидингиз, ерда кўчганда бўрон?
Шеъриятга ваҳшат чанг солганида,
Нечун ўсмадингиз мисоли қалқон?

Ҳамма вақт бедор сув!

Куйдор шалола.
Сен бу тупроқда жонсан,

ҳаётсан,
қўшиқ,

Қўшиқ булоғини қилиб ҳимоя,
Нечун кўкка ўрлаб бўлмадинг тўсиқ?

Оқ сув билан Кўк сув икки қўл бўлиб,
Оқ сув билан Кўк сув қиргоқни бузиб,
Нечун оч гирдобра ютмади ёвни?
Қадрдан чинорлар кемадай сузиб,
«Аврора» бонгидай нур қўлин чўзиб,
Соҳилга әлтарди у беаёвни!

Шамол-чи!

Жаҳонда энг дайди еллар,
Осмон қулаб қолди гафлатда наҳот?
Нега жар солмадингиз!

Тошлар,

харсанглар

Егилмас әдими ёвга нақ Фарёд?

Чўққида,

этакда,

горда ухлоқ тун.

Уйғониб кетгандир бу фалокатдан?

Тонгда,

даҳосидан жудо, бағри хун

Халқ ларзага келди зўр ҳалокатдан...

* * *

Ғуссали хаёлда атроф кезаман...

Ана, эл ҳордиги теварагида
Минг йил илгаридай тоғ, тош ҳукмрон.
Лекин янги уйлар деразасидан
Тўрпардалар паға оқ булутсимон.

Гулдурак, қуёшга ҳилпираб боқар,
Софлом, кучга тўлган Ватан ўғлидай,
Беғулув чиройи кўз-кўз қилгудай
Ҳамзаобод сойлар сатҳида оқар.

Томчилар, нақ кичик қуёшдай чақнар,
Ҳатто гўдак кўзи каби ҳар чечак.
Маъсум, дадил боқар тоғ этагидан,
Ҳаёт гўё қайноқ тоза бир юрак.

Бутун мамлакатнинг қалбига ҳамзарб
Яшнайди шу бир кафт жанг, шон тўлиқ ер.
Меҳр чўққисида ухлайди Ҳамза,
Мамлакатни бедор кезиб юрар шеър...

Ҳамза номли колхоз, Ҳамза мактаби...
Эл қайта тирилтиб олди бағирга.
Шоирни ўлдириб сўнгги кўприкни
Бузган қотиллари ботди қаърга.

Бутун табнатда, дилда ором, нур...

Ҳаво шеъриятдай маст этар мени,
Қуёш томчиларга лабим тутаман.
Кечки шеърхонликка ирмоқдай нурли
Янги ҳамзаларни чанқаб кутаман.

13—23 август, 1965.

ҚУЕШЛИ ҚАЛАМ

ХАЁЛ ҚАНОТИДА

Иўл узоқ, йўл яқин, бошсиз, сўнгсиз йўл,
Бири тор, бири кенг равон ва сўқмоқ.
Тинглаб кўр, қаричи минг эртакка мўл,
Туғилмоқдай фарздир бирини ўтмоқ.

Йўл... Тупроқ чеҳрасин кесган соңсиз йўл,
Йўл демак борлиғи издир беҳисоб.
Йўлларсиз коинот — мисоли бир чўл,
На кураш, на зафар, на ҳақ, на сароб.

Йўл демак, ўтилган бир умр демак,
Ҳеч бири муқиммас тупроқ сингари.
Лекин замон ўта борлиғи ҳикмат
Биз-ла келаётган кимлар йўллари?

Ҳа, шундай йўллар бор тўлиқ изларга,
Замонлар тўфони кўмишдан ожиз.
У тирик! Жаҳонни очар бизларга
Эзгулик меҳроби қаршисида тиз —

Чўккандай киприк-ла суртиб ҳар чангин,
Даҳолар олдида бош эгамиз лол.
Тирик юрагига кирганинг сайин,
Гўзалроқ, яқинроқ сенга истиқбол.

* * *

Биз ҳам йўлда... Қуёш, тупроқ васлидан
Қизийди орқада, олдимизда йўл.
Гўзал бўлиб кетмиш тупроқ аслидан
Уруғ сочиб ўтгач меҳнат номли қўл.

Йўл равон, пўлат из сингари текис,
Икки ёғ навбаҳор бўёғига мўл.
Ортда қанча юкли, юксиз қолган из,
Олдда борлиғи сир, босилажак йўл.

Нақадар фусункор кўрилажак кўрк!
Дамлар ҳам одимлар қайноқ кундузга.
Очиқ деразадан ел билан кўм-кўк
Осмон отилади машинамизга.

Бизнинг машинамиз уфқ ва қуёш,
Елу юракларга киришга шошар.
Муazzам адига сафарда йўлдош
Бахтидан қувончим аршидан ошар.

Сафар! Оз кездими адиг ҳаётда,
Қишлоқлар, шаҳарлар, элларга сафар.
Мудом шай сайёҳдай — хаёл-қанотда
Тақдирларга сафар, дилларга сафар.

Юриб олов кафтда ёнган тупроқда
Адиг дил иситар нурни қидирди,
Олтин юдий кезиб ҳоргач, булоқда
Сув қолиб, гўзаллик, шодлик шимириди.

Ҳар сафардан ортиб-тортиб келганин,
Фақат қаламига этди ҳадия,

Ҳеч кимса билмади қалам билганин
Неча бор севилиб, ёнди хуфия.

Бир дамда неча бор чиқди сафарга,
Неча эл-ла бирдан қилди у сұхбат.
Минг тоиға урди ўзин асарға,
Гоҳ уруш, гоҳ яраш, гоҳ бўлиб турбат!

Фақат ўзи эзгу бу сирдан огоҳ,
Езишга ўлтиргач қылгани сафар,
Гоҳ аниқ сўз излаб, ранг, жон излаб гоҳ,
Сафар қила-қила ёзди у асар...

Ҳа, адид сафарда! Учар гиламдай,
Машина елади равон изида.
Далалар яшнайди боғи эрамдай
Табиатга шайдо адид кўзида.

Бу йирик кўзларнинг теран нигоҳи
Терган бўёқларнинг жилваси не тус?
Учқур хаёлларнинг олов қаноти
Қай аср, қайси давр дамига тўқис,
Уни фақат адид ўзи қиласар ҳис.

Ҳамиша осойиш, салобат сиймо,
Биламиз, жаҳонни қамрашга қодир.
Ким билади, шу он — тез оқар дарё
Каби не хил хаёл ва неча тақдир —

Завққа солиб ўтар нотинч фикридан,
Асабин савалар не истак дарди?
Йўл, фақат йўл тутар қалам зикридан,
Йўл босилган сари — нари кетади.

Ўйлар билан дил ҳам отилажакдай,
Адид ўлтиради кўксини қучиб.

Уфқда мўъжиза очилажакдай,
Машина елади қуш каби учиб.

Мотори гувиллар, ғувиллар шамол,
Кичик даврамизда буюк сукунат.
Балки янги ҳислар қайнашидан лол
Адиб боларилик қиласи мөхнат?

Фақат чуст дўпписи остидан тошган
Кумуш ҳалқалардан оқиб тушар тер
Ва унга қўшиғин кўтариб шошган
Каби икки ёндан чопиб келар ер.

Ер адиб сингари тинимсиз ишда,
Бунда чексиз ғўза, у ерда буғдой.
Унда боғ, бу ёқда жийда кумушда,
Бедазор, полизда сабза бир чирой.

Ер барин кўксисида қуёшга тутиб,
Багишлаб ётибди ўзидан камол.
Ишчи ер дилига қулогин тутиб,
Адиб гўё ундан олади мисол.

— Ойбек ишлаляпти! — дейди, баҳтиёр.
Хотини адибга қиласи имо.
Тақдир адибига ҳамдам этган ёр
Қаламдай вафодор, илҳомдай зебо.

Виждонидай тоза, ҳаётдай доно,
Серташвиш умрининг мунис ҳамдами.
Лочиндай ўғиллар ва қизга она,
Ҳорганда тилию ишчи қалами.

Эридай заҳматкаш, эридай танти.
Фан ва шеър, гўзалик ошиғи олим.
Кимё илмининг юлдузларидан
Бири бизнинг азиз Зарифа хоним.

Адиб сўзи етган ҳар бир овулда
Ажабмас, топилса унинг шогирди.
Иккиси гўзал байт қўши мисрасидай,
Ишқда, ишда, баҳтда умр кечирди.

Ҳа, адиб ерсимон бетиним ишда,
Ҳар босилган йўлдан илҳом теради.
Яна қай куй, ният, куртаги нишда,
Кўзида бўстонми, ё ўтмиш дарди?

Ўтмиш ўз юкидан қаддини букиб,
Ҳамон ўлжга олар биздан дамларни.
Битмас ғазнасига ғаввосдай чўкиб
Адиб тинмай терди жавоҳирларни.

Бугун Бухородан қалбини излар,
Излар минг йўлларга кирган хаёлин,
Ким билар, бу тупроқ нелардан сўзлар,
Кимлар ечиб берар чигил саволин.

Гарчанд дарслигидай таниш Бухоро,
Титди мудроқ, уйгоқ кекса, ёш бобин,
Зиндонида титраб, минорлар аро
Кезди ва ахтарди дилга хитобин.

Ҳақу ҳақсизликнинг талашларидан
Ҳолдан кетган нордай чўккан қасрлар,
Кўз ёш тепчиб чиққан шўрҳак тошлардан
Аждод заковати ўчмай асрлар —

Ўта мўлтирашиб боқар адибга,
Боқар нураб кетган арк кўҳна давлат.
Адиб қўйл меҳнати, санъати — зебга
Ҳарблар суягидан қурилган савлат.

Шуҳрат қолдигига боқади тақрор:
Қон ёнар, ёқуттур қон жилвасидан,
Ҳар гиштидан тирик боқади меъмор,
Ҳокимлар-чи, замон оч тевасида —

Утмиш карвонининг йўлида унут.
Саройлар, тупроқ ранг уйқуда мудрар,
Адиб юрагига солиб янги ўт
Қамчи буқолмаган тақдирлар судрар.

Аркка кўтарила... Қадамлар оғир,
Оёққа ёпишган ботмон тош гўё.
Ўтган икки минг замонда, ахир
Қанча ҳоқон, кибор, қанча қул, гадо.

Донг солиб, дод солиб, учиб, судралиб
Ўтмадими бу тим, бўум-бўш йўлакдан?
Сийқаланган гиштлар машъум йилтираб
Ҳароратинг ютар тортиб юракдан...

Аркка кўтарила ғусса каби жим,
Кўҳна деворлардан уфуради муз.
Шодлигимиз ютиб қултум-бақултум
Обхоналар боқар нақ ўйилган кўз.

Обхона, обхона, эй мудҳиш кунжак,
Балки эзгулик-чун қурган эдилар?
Узоқлардан келган мусофири жиндак
Бўлса ҳам тапнасин босар, дедилар.

Бунда сув сақламоқ, ҳаёт сақламоқ,
Демак, боқийликни қилганлар ардоқ.
Лекин амирликнинг тождори олчоқ
Бутун эзгуликка согландай сиртмоқ —

Сени асл бурчинг — ҳаётдан тортиб
Олдию, айландинг қамоқхонага.
Мангу тавқи лаънат юкини ортиб
Кириб бўлармиди нур замонага?

**Қолдинг бешафқатлик, қўрқоқлик, таҳқири,
Ҳақсиэлик тимсоли бўлиб, шумшайиб.
«Агар бўлмагандан Ленин, Октябрь,
Бир даҳо бу гўрда кетарди чириб»**

Уйлар адиб ёниб, кўзи қовжираб,
Дарра зарбин сезар ўз кифтларида.
Гўё Айний кўзи боқар жовдираб
Қабиқ обхонанинг зах шифтларидан.

Вужуди оғриқда, жони қийналиб,
Жунжикиб қўлларин сунар қўлтиққа.
Йирик, доно кўзлар мунгга айланиб,
Тўкилмаган ёшга тўлади лиққа.

Шу кун қанча кезди, кўрмади қанча.
Кўзидан кетмади Айний кўзлари.
«Ҳеч ким бу зинданда ёнмади унча
Ва ўқдай тешмади ҳеч ким сўзлари.

Ҳаёти, қалами, коми — жасорат,
Қуллар юрагининг ошкор Фарёди.
Сўнгги исён қони, илк эрк, саодат
Шодликка ҳамдам-ди улкан ҳаёти» —

Уйлади. Сўнг сўнгсиз учрапув, баҳслар
Чуқур хотиралар бари жонланиб
Гўё ғолиб Айний ёзиб, шодланиб,
Сўник Арк устида этарди парвоз.
Гўё дерди: «Мавзу ётар тахланиб,
Ёзинг, Ойбек, қанча ёзсангиз ҳам оз!»

Оқшом ҳориб қайтди меҳмонхонага.
Икки қиз ва йигит кутарди уни.
Институт залин тирбанд тўлдирган,

Суюкли куйчига илҳақ ўлтирган
Сонсиз мухлислар-ла шеърхонликда
Жаранглаб кечага шўнғиди куни.

ЯРАТИШ ДАРДИ

Бирдан уфқлардан боғларга кириб
Йўлни кесиб чиқди осмон ранг дарё.
Адіб хаёлидан далани сурисб
Ҳис тўлқини инди танига гўё.

Ва у ўз кўксини қучди маҳкамроқ,
Учмоқ истагандай қўзғалди хиёл,
Йўқ! Борлиқ энтикар унга яқинроқ!
Севинч-ла тамшанди. Ким билсин, хаёл

Янги қаҳрамон-ла учраштиридими,
Ё сув парисига қилди рўбарў?
Ё қуёш билан қўл ушлаштиридими,
Ё тоғлардан тушди олдига оҳу?

Кенг яғрин, мош-гурунч қўнғироқ сочда
Сездим ёйилганин янги ҳаяжон.
Адіб рафиқаси бу янги мавжда
Кўрди чоги унга таниши бир жаҳон:

— Ойбек ишлалајти! — деди бахтиёр
Ва азиз сиймога қилди ишора.
Қарайман: чиндан ҳам илҳом дарди ёр
Вужуди ўз қалби сочган зиёда.

Мен ҳар калимани термоқ бўламан,
Салмоқли, бўёқли, сиёқли бари.
Камёб шоҳидликдан бахтга тўламан,
Онгда туғилишин янги асарнинг.

Водий кесиб чиққан осмон ранг дарё
Сомон йўли каби ёстанди йўлда,
Унда қуёш ёнар нақ гўзал рўё,
Парча-парча олтин ҳар оч тўлқинда.

Яқинлашган сайин қамашади кўз,
Яқинлашган сайин салқин олар тан.
Яқинлашган сайин ҳар зарра-юлдуз
Тўзонин кўтарар бу ойна сатҳдан.

Зарафшон! Онани, ё севгилини
Нохос учратгандай адиб беҳад шод.
Учқур машинанинг тортмай тизгинин
Боладай сакрайди тоғдай улкан зот...

Зарафшон! Эй она тупроққа кўкрак,
Шоҳу гадога тенг кўксини очган,
Тупроқтириклиги, инсон тўқлиги
Водий гўзаллиги бўлиб зар сочган

Мен сени қўшиққа солмоғим маҳол,
Умринг, кучинг, кўркинг, меҳрингни бу он.
Ўзингдай абадий, гўзал, баркамол
Куйлаган-ку сени Ҳамид Олимжон!

Ойбек соҳилингда тураг чинордай,
Барча улканлигинг завқли нигоҳда.
Бир сўнгсиз карвонга тизилган нордай
Толларинг таъзимда тураг қирғоқда.

Бу икки қаламнинг санъатига лол,
Ёзганларин қайта-қайта ўқирман.
Қалбимни қийнаган, эркалаган ҳол,
Айтмасам бўлмасни мен ҳам тўқирман!

Адиб истаги-ла тўхтаймиз. Бирдан
Ер, қуёш, сув, ҳаво бизни қучади,

Дарё қўшиғидан, ел шивиридан
Тандан йўл ҳордиги тундай кўчади.

Шоир соҳилда тик.

Кенг кўксин керар
Табиатдан яйраб ичади ҳаво,
Хаёлин забт этар мунис сеҳргар
Сувдан келаётган фусункор садо.

Шоир соҳилда тик. Дарё нур ичра,
Баҳор тошмоқ бўлар қирғоқларидан.
Оқиндан тўлдириб қўшоқ ҳовучда
Тўйиб сув шимириар,
бармоқларидан —

Тоғлиқдан тушгандай тўкилади сув,
Ола чалпоқ нурда гавҳардай ёниб,
Кенг пешана, юзга ёйилар кулгу,
Гўё илҳом ичди ҳаётдан қониб.

Дарё ўз куйчисин тўлқин қўйнига
Олиб кетмоқ бўлиб жўшқин оқади.
Куйчи мафтун турар сув ўйинига,
Магрур акси ундан бизга боқади.

«Ичинг! — дейди менга ўрнини бериб,—
Ҳар дарё сувининг ўз баҳраси бор!»
Ҳозир устоз турган соҳилда туриб
Гўё имтиҳондан ўтмоғим даркор.

«— Ичинг!» — дейди. Мен ҳам нам қирғоқ
узра,
Мехробга киргандай аста тушаман.
Синчков нигоҳидан қимтиниб зўрга
Қўш ҳовучда шаффоғ баҳра ичаман.

«— Яхши, яхши!» — дейди тақрор ва тақрор,
Гүё сув ичмадим, гўзал шеър битдим.
Гўё ўзи каби эзгуликка ёр,
Гўё шогирдликнинг мактабин ўтдим.

Шодман: Адиб билан бир сув, бир тупроқ,
Бир элга фарзандлик ортирар фахрим,
Шодман: кезиб, сезиб сероб ва чанқоқ
Яратишнинг дарди, баҳтидир маҳрим.

Яна йўл! Орқада қолди Бухоро...
Наҳот адиб билан келмоқда шаҳар?
Наҳот фикри қалъя, қасрлар аро,
Низолар, курашлар маънисин чақар?

Ё мағлуб амирнинг олтин қалқони,
Ута олчоқ қалбин кўриб турибди?
Занжир узган қуллар, қурбонлар қони,
Нақ ўз томирида уриб турибди?..

Кўрдим, кураш, қирғин ва мушкул зафар,
Мардин, шоҳидларин ахтариб топди,—
Қанча дўстлар уйда кутганда маҳтал,
Унинг кўзларида оппоқ тонг отди.

Ҳикоя тинглади, музейлар кезди,
Кирди минг-минг ҳаёт, тақдир йўлига.
Шаҳар қалбин очиб:
— Ўқиб ол,— деди,
Берди ҳеч тушмаган қаламин қўлга.

У тинмай ишлади. Қари-қартангдан
Толмади неча кун ҳикоя тинглаб.
Ҳозир чиққан каби ўзи зўр жангдан,
Юзда йиллар изи — терда бўлди ғарқ.

Нақ кўзим олдида ўша қиёфа:
Ўкинч, изтиробли, заҳматкаш кўзлар.
Хит эди сўзлолмай. Нигоҳи ёна—
Ёна менга аччиқ ҳақиқат сўзлар:

— Булар сўзлаб берган ҳар бир ҳикоя,
Ўзи шундоққина олтиндай китоб.
Бунда ҳар не тубсиз ва бениҳоя
Жафо ҳам, даҳо ҳам, орзу, изтироб.

Ақлу заковати жаҳонни тутган,
Абу Али Сино, Маҳмуд Торобий
Ва қанча даҳолар шу ерда ўтган!
Ҳали очилмаган тарихнинг боби —

Озми бунда? Ахир, нега ёзмаймиз,
Халқига кўтариб чиқмайди қалам?
Ўтмиш карвонида сочиқ дуримиз,
Теріб, наҳот, дилдан бағишилаб малжам —

Қайта порлатувчи истеъдодлар кам?
Жуда кўп, Зуҳродай ёрқин истеъодод,
Юртим насли, назми тоза кўкида.
Ўтажак умрдан тиламай имдод,
Ёзиш керак ёниб ижод ўтида!

Кўрдим: фикрлашдан ёрилгудай бош,
Унут папиросни улаб чекканин.
Мовий тутун ичра мунис, кўмакдош
Хотини дафтарга хатлар чекканин.

Ҳориб, чарчаб, сайдага чиқса Бухоро
Оқ нурлар тўшади минг-минг чироғдан,
Гумбазлар, минорлар, қалъалар гўё
Афсонавий юртдай боқди йироқдан.

Олдида навқирон кучли йигитдай
Шодлик тирсиллаган бугунги ҳаёт,
Офтобга маҳлиё карвон булутдай
Оппоқ юксак уйлар!

Мисли оқ қанот

Ёйилган ойнабанд улкан бинолар:
Янги институт, янги фабрика,
Янги меҳмонхона, янги кинолар,
Янги тақдирлилар абадийликка
Олиб кирган ҳусн, янги жилолар.

Янги бахт, оразу-ла яшнаб, яшариб
Яна шуҳрат сочар мағрур Бухоро.
Янги авлод ўтмиш чангини артиб
Ҳамон яшрин ётган қатламлар аро.

Аждод даҳосини излашдан толмай,
Суяб, тиклаб, севиб қиласи ардоқ...
Адид боқар: кўкда юлдуз нақ олмос,
Ерда Ильич ёқсан сўнмовчи чироқ.

Ерда... яна қанча томир ёйилиб
Инсон учун ишлаб уриб турибди.
Ўзбек юрагининг оташин олиб,
Ким ҳозир қайларга кириб турибди.

Ўлкамизнинг янги алломалари,
Бухорода очган ўзбек газимиз,
Бизга келган ҳурлик, толе йўллари
Билан борар дўстга нақ дил сўзимиз...

Кеча ва бугунни бирдайин қучиб,
Тонгга юрар уйғоқ Бухоро туни,
Машиналар кўча-кўйларин ювиб
Кундузга келиндай узатар уни...

Йўл давом этади. Адиб юзида
Қуёш чеҳрасидан ажиг рўшнолик.
Ортида ўлтириб йирик кўзида
Илҳом чақмогини мумкин кўрмоқлик.

Тарих жароҳати, халқнинг оғати
Ииқиқ салтанатнинг ғиштин ирғитиб,
Шаҳид, қурбонларнинг унут қоматин
Суяб олиб, қутлуг қонларин артиб
Бир роман ёзмоқчи!

Онгда ниш олиб,
Биз-чун янги асар топмоқда камол.
Дилга шунча довул, курашни олиб
Филдай тинч ўлтириш эмасми малол?

Бутун умр шундай, ярим аср шу,
Яратиш дардидан олдими ҳордиқ?
Ҳакимлар қўриқлаб, унуди уйқу,
Лекин у тиниқ ўй, қаламга содиқ.

Шундай салобаттда, шу саодатда,
Шундай камолотда кечирди умр.
Не ёзди: баҳтданми ё жаҳолатдан,
Барини ёритди қалбидаги нур.

НАВОИЙ ЮРАГИ УРИБ ТУРИБДИ

Чўли Малик кўксин кесиб тушган йўл,
Рўёдай бир янги дунёга чорлар.
Бугунги фикр, ижод, Меҳнат номли қўл
Бўлиб нақ кафтида кўтармиш шаҳар.

Навоий шаҳри бу! Мудом ёш, нурли
Бемисол, бетахлит шеър даҳосидай
Ўхшаши йўқ бу кўрк эркалаб кўзни,
Адиб асабини дўл шарросидай

Савалади минг хил туйғулар, ҳислар,
Босиб ўтди дунё хотира бирдан.
Гүё Навоий ҳам одимин тезлаб
Ҳузурига шошли мезбонлар билан.

Навоий байтма-байт ўтиб беш аср,
Юрар казо-казо ишчилар аро.
Ҳар уй дафтарида, ҳар куни минг бир
Тилда номи такрор оддий фуқаро.

Бу нурли, бу яхлит янги қасрда
Ҳоқон ҳам, вазир ҳам, фуқаро ҳам эл.
Ленин ижод этган бизнинг асрда
Инсон тақдиридай гуллаб кетди ер.

Шаҳар ёқиб, адид кезди пиёда,
Икки қўл орқада, одимлар тетик.
Қуёш, шаббодага мўл ҳар бинода,
Ёшлиқ ва баҳт ўзи уй хўжасидек
Чорлайди шоирнинг серзавқ нигоҳин.

Дейди:
«Замон ёзмиш азим, шаън достон,
Қадим санъатимиз ўчмас бўёғи
Янги камол, жилва касб этмиш чунон.

Ҳар биноси бир ҳалқ келинчагидай,
Бетакрор зеб билан дидинг этар хуш.
Анав кўкнинг мўъжаз беланчагидай
Шўх бино болалар боғчаси эмиш!»

Сўзлайди, кўради шоир вақти чоғ,
Кенг йўлларга уқа сонсиз ёш чинор.
Шаҳар этагида дала, дара, тоғ,
Оқ ўт билан ёнар чўққисида қор.

Адид атрофига боқару тўймас:
Ўнгда яшилланиб ўсар ниҳол боғ.

Чойхона, сувхона, гулхона — хуллас,
Қуёшдан қочганга мазгил ҳамма ёғ.

Кўсак шаклидаги биллур фаввора,
Ёмғирида ўйнар болалар тужғон.
Қай гигант комбинат, қай фабрикада
Не неъмат яралур худди бу замон.

Бориб кўролмади. Лекин қудратин,
Савлатин, давлатин сезиб турибди.
Қайтарканмиз дейди ўзича секин:
«Навоий юраги уриб турибди...

Санъатли, меҳрли, кучли одамлар
Чўлдан юлиб қурмиш жаннатдай макон
Ва яшар меҳнатда ва саодатда
Муносиб ўз улуғ номига инсон...»

ДАРЕДАЙ УИГОҚ

Йўл!
Бу тиним билмас сайёҳ Қаршини,
Толлимаржон ГЭСин зарур кўрмоғи.
Ахир буюк мардлик, меҳнат-ла даштни
Ҳаётга олмоқда шонли авлоди...

Кездириб, кўрсатиб, сўзлаб бердилар,
«Чарчамасин» дея жонимиз ҳалак.
Каналлар ўтказиб, шаҳар қурганлар,
Ҳар бири унга бир жаҳон очгандак.

Ҳайрат, ҳаяжонлар қалбини қучиб
Тинглайди, кўзида илҳом ёниши.
Қучгандай истиқбол режадан кўчиб,
Тезлашар қон, онгда адид юмуши.

— Домла, энди бизда сизнинг ихтиёр! —
Дейди мезбон.—

Иш бас, оласиз ором.
Бир ерга борамиз!

«Яна ҳойнаҳой
Серҳашам хонада минг турли таом...»

Мезбон соҳибимиз сезгир, аллома,
Даштни ўзлаштириш ишларига бош;
— Ҳар ГЭСнинг тарихи ўзи жангнома,
Қураётир қардош халқлар елкадош.

Сиздай мавлонолар қаламга олиб,
Бу куннинг нафасин қолдирса мерос,
Тенгсиз бу мардликни қонларга солиб
Ёшлиарда аждодга оширса ихлос.

Сергап бўлиб кетдим, узр! Марҳамат,
Машинага чиқинг, узоқмас манзил...
Ераб:

Кенглик билан тиллашиш одат
Булар узоқмасми, қаерда ахир?

Обдан мўл йўл босиб қўш машинамиз,
Икки қўнғиз каби қўнди дарага.
Қафасдан чиққандай яйраб кетамиз,
Гўзаллик ва ором сингиб танага.

Ўзбек тупроғининг бир кафт ям-яшил
Бепоён кенглиги ипак тўлқинда.
Денгизда сузувчи бир қайиқ шакл
Мазгил тайёrlашган мезбонлар бунда.

Оқ кигиз, серқавиқ гулдор кўрпача,
Ястиққа ёнбошлаб чўзилди меҳмон.
Чарчоқ ажин бўлиб ўраган кўзда
Бепоён, бегубор, безавол осмон.

— Гапиринг, гапиринг! — доно ҳамроҳга
Юзланиб ҳикоя кутади меҳмон.

— Домла, мен ҳам мафтун бу оромгоҳга,
Нутқни директор ўртоққа бериб,

Сиз шарофат мен ҳам бўламан воқиф,
Машҳур совхозлари сир-асоридан!

Директор ўртоққа бу ҳазил ёқиб
Табассум-ла бизга боқади зимдан:

— Нутқ бўлса қочмас.

Овқат мунтазир,

Эрталабдан буён йўлда кўзимиз.—
Синдириб офтобдай иссиқ нон,

патир,

Шопириб-шопириб қуяди қимиз.

Йўл-йўл дастурхонда яхна гўшт,
асал,

Қурт, ровоч, хилма-хил узум, бўғирсоқ...
На йўл ҳордигидан, на дардан асар,
Ҳар неъматдан тотар шоир кўнгли чоғ.

Тинглаб, узоқларда қўйлар маърашин,
Нордон ровоч чайнар юзи бурушиб.

Танлаб нақ қамчидай серсув баррасин
Хотини ва мени қистайди «Енг!» деб:

— Олинг, енг, бундай зўр даво йўқ тибда!
— Қайси дардга даво? —

Сўрайман кулиб
Кутаман не жавоб бўлар адиддан.

— Қоласиз ўн саккиз ёшли қиз бўлиб.

— Агар ўн саккизга қайтсан, мабодо
Шу Саксон дарада қолиб кетардим.—

Дедиму, қайдандир келгандай садо
Ўзим, нақ ўзимда уйғонди раддим.

Нима, кечирганим, кўрганим, севгим,
Дардим ва бахтимдан кетаман нари?
Ғўр, думбул фаслдан бошлайман йўлим,
Яшайман бутунлай бошқа сингари?

Йўқ, устоз, қайтмайман ўн саккиз ёшга,
Гарчанд шафақ яқин, шу ёшда қолай!

Адид жимиб тўнар узоқ қуёшга,
Қимиздан олган кайф заррача қолмай.

Ноқулай жимликни кўтарар мезбон:
— Олинглар, мана бу «қора жанжал»дан.
Шоир яна кайфга қайтгандай шу он
Дейди:

— Ўзбек халқи шоир азалдан.

Узум — «қора жанжал», юрак — қабутар,
Саҳро — Толлимаржон, қишлоғи — Водил.
Ҳаётни хаёл-ла безаб нақ заргар
Гўзаллик яратиб келар минг-минг йил.

Сиз бўлса шафақдан...

Қўйинг бу гапни!—

Икки бармоқ билан олиб косани
Бир варакайга оқ сипқарди қимиз
Мен нозик қалбига солганим дардни.

Суғуриб олмоққа қолгандан ожиз,
Дейман:

—Оқ симоб ранг булутдай силжиб,
Биз томонга келар қўйлар галаси.
Сой оқар банорас каби эшилиб,
Унда лов-лов ёнар лола даласи!

Сурувни нигоҳ-ла меҳмон тусмоллар:
— Қанча қўй совхозда? — Мезбонга боқар.
Директор сўзлайди.

Рақамлар,
Сонлар,

Қудрат, тўкинлиқнинг наҳрида оқар:

— Ўзбек қоракўли, биласиз, тилло,
Жаҳон бозорининг бўрки аталур.
Шоир дейди:

— Ҳа, шу тилло соҳиби
Бобо чўпон Ватан кўрки аталур.

У чўпонни чорланг, отамлашайлик:
Келватига қаранг, қудратли бургут,
Қанча фидойилик ва ҳотамтойлик,
Виқор, ишонч ва баҳт — худди она юрт.

Чўпон икки қўллаб кўришиб, шундоқ
Адаб қархисига одоб-ла чўқди.
Суҳбат, қимизхўрлик,

ширин хушчақчақ
Дамлар ҳамма дилни янгилаб ўтди.

Адаб тинглар, сўпар, куларди хушбахт,
Одам ҳам, тупроқ ҳам ўҳшаб баҳшига,
Унга шивирларди қўшиқ,
табиат

Бағишларди тамом янги нашида.

Илҳом бўронида боқарди серзавқ;
Атроф ўтаётган кун шуъласида
Бутун ўзга кўркка кирганди бу вақт:
Мен тасвиридан ожиз латифлашган ранг
Кўқат нафасида бокира жаранг
Бор эди дара-ю, ел нағмасида,

— Тўхтатинг,— дер менга,— дамлар суръатин,
Сиз аёл, аёлга нелар тиз чўкмас?
Ёраб! Бу биҳиштдай жойлар суратин
Урол Тансиқбоев чизмаса бўлмас!—

Илҳом савалаган тани салқин оғушда
Илоҳий чироидан борлигида кайф:
— Кўрмасам кирмасди ақалли тушга
Уйқу гафлатида ўтган умр ҳайф.

— Домла, ўзингизга қилдингиз туҳмат,
Қачон ухладингиз?

Ўчириб чироғ.

Бир дам мизғиб олиш наҳотки гафлат?
Дейди:

— Яшаш керак дарёдай уйғоқ.

Саксон дара!

Яна саксон йил севиб,
Кезсам, билсам она ерни нақ дехқон,
Кексалик ва дардни бир ёққа қўйиб,
Тўйиб-тўйиб ёзсан қолмасди армон...

Завқданми, афсусдан лаблари қуриб
Ичар кўклам бўйи анқиган қимиз,
Мезбонлар сийлашар минг таом қўйиб,
Ҳикоя тинглаймиз, шеър ўқиймиз.

Наздимда ҳамманинг танида баҳор,
Фақат инсонларга мушарраф ҳузур.
Адиг чеҳрасида мавж уриб наҳор
Қўзғалади бирдан, сўрайди уэр:

— Зиёфат-чун раҳмат!

Бу баҳри кабир,
Яшил тўлқинида сузуб қолайлик.
Унда эшак йўртиб борар бир кампир,
Бир нафас тўхтатиб гапга солайлик.

Булар бари билгич!
Ийгитдай илдам,
Бош яланг, тўш яланг тушади йўлга,
Сув кечётгандай ташлайди қадам
Ёзувчи қалбига, қўр берар дилга.

Ортидан борамиз, қомати филдай,
Кўринар кенглиқда яна улгайиб.
Кампирнинг ёнига бориб, ўғилдай,
Суҳбат бошлаганди қуюқ сўрашиб.

Кампир тетик, қотма, чайир жуссаси
Қизил мурсагини илиб тургандай.
Енида тўлмаган баҳор ғунчаси
Қизча — Ҳурилиққо сеҳрлангандай

Кўзин узмай туарар шоир юзидан,
«Ким эди бу яқин таниш, бузруквор?»
Фикрин қийнаганин уқиб кўзидан,
— Бу Ойбек домла-ку! — дейман сервиқор.

Кўзи офтоб чўккан чуқур чашмадай
Тиниқ учқун билан ёниб кетади.
Дўлти лабда кулгу соф карашмадай
Энтикиб шодлигин баён этади:

— «Қутлуғ қон»,
— «Навоий»...
«Қизлар» достони...
Ҳаммасини ёзган домлами чиндан?
Нигоҳ-ла әркалаб Ҳурилиққони,
Адид ўй суради, ё ёзар зимдан.

Ҳурилиққо юзи, кулгичларида
Учқун сочажакдай қайнайди севинч,

Тим қора, қирқ кокил уч-учларида
Ача тақиб қўйған кўзмунчоқлар зич.

Ёмон кўздан «асраб» бодраб туришар...
Ойбек домла завқдан кулади қотиб.
Қиз нақ ёзилажак қўшиққа ўхшар,
Келажакка кирар оқ тонги отиб.

Улғайиб уфққа оқади офтоб,
Қайноқ пешонани ялар салқин ел,
Нигоҳ етганича дара-ку атроф,
Яқинга ўхшамас булар борар ер.

— Узр,— деди шоир,— биз йўлдан қўйдик,
— Ҳечқиси йўқ, болам.

Хозир қирқим пайт.
Биз ҳам уй ичи-ла қирқимда әдик,
Жўнадик, қилай деб бир қошиқ овқат.

Юринглар, бизга ҳам бўлинглар межмон,
Чўпонча қуртова қилиб берамиз.—
Қизча ҳам илтижо қиласди чунон.
— Раҳмат, Ҳурилиққо, атай келамиз.

Раҳмат!

Она, энди сиз ишни қўйиб,
Жужуқларга сўзлаб ўлтиринг эртак!
Кампир кулар тишсиз оғзини юмиб,
Кўзлари милтиллар сўнувчи чўғдак...

Мана, кетиб борар қамти ёнма-ён,
Кеча ва эртадай ача, эвара.
♦Кўрсам қандай экан қиз яшар замон,
Бизнинг кураш, меҳнат берур самара...»

ОЙБЕК ИШЛАЯПТИ!

Афсус, Шаҳрисабзга етолмади у,
Пачкамар ҳавзасин кўрмоқ эди фарз.
На илож?

Эрта Май.

Қизил майдонда
Тепчиған шодликни кўрмаса бўлмас.

Билар, катта қутли уйи тўрида
Байрам дастурхони очилмас усиз,
Ойбек сулоласин уч бўғинида
Шодлик бошланмайди уни таъофсиз.

Сўнг ишга... нақ дарҳол тўхтовсиз ишга,
Қалбни ағдар-тўнтар қилди шодлик, дард.
Мияни пармалар, сигмайди ичга,
Айтмоғи,
битмоғи,
ўйламоғи шарт.

Дўстлар хўшлиашди, кўксида қўли.
— Раҳмат, раҳмат! — дейди.—
Хайр, боринглар!..
Азим Тошкентига чорлайди йўли,
Унга дўстлар тилар хайрли сафар.

Икки қўл орқада, одимлар вазмин,
Хиёл букчайгандай кўринди қадди.
Балки ёзилажак насрми, назм,
Энг азиз юк бўлиб босиб турганди?

Адиб учди жуфтин қанотга олиб,
Қучди оғушига соф осмон, қуёш...
Мен бирдан жунжикдим ҳувиллаб қолиб,
Кўзгамас, ҳалқумга қалқиб келди ўш.

Ёш!

Нега ёш қалқди?

Нени сезди дил?

Қай машъумлик ялаб ўтди шодлигим?
Нега баҳор тўла қалбим кетди зил,
Кўрдимми олдинда йўлин озлигин?

На чарчашни билди.

На дарддан зорни,

Шунча йўлни ўтди завқда,
мехнатда.

Бугун эрта учун багишлаб жонни,
Яна солиб дилга неча замонни,
Юк, иш ортди, кирап ҳар бир муддатга.

Йўқ, йўқ, умрин ярми олдинда ҳали,
Арслон келбатида қудрат ва илҳом.
Дилдираган жонда қанча асари
Етилмоқда — бизга қиласи инъом.

Дарду кексаликни бир ёққа қўйиб,
Тўйиб-тўйиб меҳнат қиммоқчи ҳали,
Ҳамма кечинмани қайтадан туйиб,
Қаламга шивирлаб бермоқчи ҳали.

Ахир тинмай кезиб, севиб улгурди...
Афсус!.. Улгурмади қоғозга тўкиб,
Тўкилмоққа тайёр юрагин дури
Наҳот қолаверди тубига чўкиб?

Йиқилди яна бир чўнг улкан чинор,
Адаб, маърифатнинг ёрқин қасрида.
Ҳали Ғафур Гулом, Шайхзода, Қаҳҳор
Догида дилимиз йиғлашда-ку зор,
Наҳот етим қолдик яна ўлим қасрида?

Ажал ҳасад каби болтасин урди,
Ҳаёт, хаёл қурган йўлини тўсиб,
Ношуд заиф бизлар термулиб турдик,
Кўзимизда машъал бораркан сўниб,

Тибнинг казо-казо кекса-ёши,
Жонига жонларин қилдилар пайванд,
Ўлим—ўлим экан, бераҳм тоши
Энг айёр жаллоддай унсиз берди панд.

У ҳатто ажал-ла қилмади талаш,
Аршидан қулади учқур илҳоми.
Гарчанд ҳаққи эди яшаш ва яшаш,
Гарчанд қалбда тигиз умиди, коми.

Ҳеч қачон, ҳеч нарса талашмади у,
Ҳаёт неъматидан беҳад бахтиёр,
Қалб унdagан йўлдан адашмади у,
Бир дилни ранжитиб бермади озор.

Беозор йиқилди, кирди сукутга,
Мия, юрак, қонда абадий уйқу.
Қандай сигди экан совуқ тобутга
Шунча теран, қайноқ хаёл ва туйғу?

Ётибди, яшариб, яна улғайиб,
Беҳад азиз неча соатли меҳмон,
Эвоҳ! Қалбдан узиб, куйиб, ўртаниб
Нечун топширилар тупроққа инсон?

Ўлим вужудига солган музлардан
Кулгандай ҳаётга демай алвидо,
Катта меҳнатдан сўнг бир дам мизғиган
Сингари безавол тинч эди сиймо.

Езилажак роман, айтилажак сўз
Жаранглаб боқарди доно манглайдан.
Фикр тифизликдан таранглашган юз
Сўзловчи сукутни олди қайлардан?..

Гўё давом этар йўлда серпарвоз,
Ёрқинроқ порлайди тасвирларда ранг.
Гўё ҳамма ёқдан беради овоз
Ҳар китоб, ҳар мисра, ҳар сўз бир жарап.

Давом этар йўлда адид ҳаёти...
Йўл... йўл мўл, дарёдан кетган ирмоқдай
Ўғилларда, қизда пўлат қаноти,
«Бобоҷон»и дилин тутиб маёқдай
Неваралар бошлир шу йўлдан йўлни.

Буюк бу уйқуни этаркан ардоқ,
«Ойбек ишлайпти!» дейди насллар...
Ўз кўркини кўриб тасвирларида
«Ойбек ишлайпти!» дейди асрлар...

20 февраль, 1970 иил.

ЗАЙНАБ ВА ОМОН

(Ҳамид Олимжоннинг шу номли достони
асосида ёзилган либретто)

ҚАТНАШУВЧИЛАР

З а и на б — Анор холанинг асрори қизи, колхоз звено бошлиги,
19 ёшлардаги гўзал қиз.

О м о н — Колхоз тракторчиси, 24—25 ёшларда.

Ҳ у р и — Зайнабнинг жонажон ўртоги, колхоз звено бошлиги,
шўх, хушчақчақ қиз.

С об и р — Москвада ўқиб келган агроном йигит.

Р а и с — Колхоз рапси, 60 ёшларда.

Э р г а ш — Колхозчи, хушчақчақ йигит.

А н о р х о л а — Зайнабни тарбия қилган 56 ёшлардаги аёл.

Н осир ота — Собирнинг отаси.

Ш а р в о н х о л а — Собирнинг онаси.

Р и х с и б у в и — Эскиликка берилган колхозчи аёл.

Колхозчи қиз-йигитлар, кексалар, болалар, чолғучилар, раққос
ва раққосалар...

БИРИНЧИ ПАРДА

БИРИНЧИ КҮРИНИШ

Баҳор. Зайнабнинг деразалари боққа очилган хонаси. Бог, бопла-ри оқ пушти гулга кўмилган, қийгос очилган ўрикзор. Дераза олдида чироқ нурида Зайна б ишқий ҳаяжонда мактуб ёзмоқда.

З а й на б

Сени бир вақт, сени кўргандан буён,
Менинг кўзларимга уйқу бегона.
Сенга кўнгил, кўнгил қўйғандан буён,
Хаёл сенга шайдо, гўё девона.

(Хатни кўздан кечириб)

Ёзолмадим, йўқ, ёзолмадим.

(Мактубни йиртиб ташлайди. Яна ёзишига тутинади)

Севдим сени жондан, севгим ошкора
Этмайин деб изҳор, қилдим кўп хаёл.
Ўз ишқингдан, эй ёр, сўз очсанг зора,
Дедим, кунлар, ойлар, ортиқ йўқ мажол.
Юз ўгирма, дардим баён этсам, оҳ,
Эзгу соф қалб билан севаман сени.
Нетай соф қалб билан севаман сени.

Зайна б севги билан маст. Илк тонг, ҳамма ёқда тул, нур.
Зайна б бахтиёр. У бутун гўзалликни, табиатни қучгандай.

Баҳор келиб ҳусни ортган кенг боғлар,
Элим баҳти балқиб ётган тупроқлар,
Бирга униб-ўсан дўйстлар, ўртоқлар.

Қизлар (акси садо)

Ўртоқлар.

Зайнаб

Дилда кулган муҳаббатми ё баҳор?

Қизлар

Муҳаббатми, ё баҳор...

Зайнаб

Хаёлимда фақат сен Омон,
Юз кўрмасам менда йўқ чора.
Топиб бер деб дил қилар тугён,
Нетай кўрсам, дил бўлар пора.

Ўн тўққизга тўлганда қиз сайрарми,
Йўлдош топиб дил чамандай яшнарми,
Ишда ҳормай, куйда толмай яйрарми,

Қизлар (акси садо)

Яйрарми...

Зайнаб

Қанот берган муҳаббатми, ё баҳор?

Қ и з л а р

Ҳам муҳаббат, ҳам баҳор...

З а й н а б уйга кириб кетади.

Ҳ у р и (киради)

Сайра, сайра ишқинг боғида,
Очил раъно гулдай сен қийғоч.
Яйра, яйра ўт қучогида,
Гўзал шодлигига қўйнинг оч,
Беишқ ҳаёт — бегул бир баҳор,
Ҳаёт кўрки — тоза муҳаббат.
Ишқни асло рад этма, зинҳор,
Жондан севмак, севилмак — зўр баҳт...

Ҳ у р и столдан З а й н а б ёзган хатни қўлга олади, қизлар ишга кетаётиб киришади. Уйдан чиққан З а й н а б ни хор билан ўрайдилар.

Қ и з л а р

Колхозда кўп йигитлар, гўзал, қаҳрамон,
Сиз танлаган бахтиёр, нодир йигит ким?!
Кўксингизга ишқ гулин тақиб, ўртоқжон,
Дилга баҳор бахш этган қодир йигит ким?!

З а й н а б

У бир қуёш, у бир тонг, гўзал бир достон,
Айтай десам тилим лол, ким, у йигит ким?!

Қ и з л а р

Айтинг, айтинг, бўлиб ўт, ўртагувчи жон,
Кўзга уйқу бермаган ботир йигит ким?!

Ҳизларга қўшилиб Зайнаб, Ҳури шод хуррам далага чиқиб кетадилар. Дам ўтмай саҳнага қўлида ҳозиргина териб олинган бир даста лола билан Омон киради.

О мон

Ахтарар кўзим куну тун сени,
Толпинар дилим, сенга қуш каби.
Яшнар дилимда ишқинг гулзори,
Сўнмас ўтингда ёнганим сари.
Ийллар ўйимда танҳо сен ўзинг,
Туним ёритар меҳрибон кўзинг.
Қўрмасам юзинг, тоқат йўқ менда,
Қалбимга бахш эт, бир ором ўзинг.
Ахтарар кўзим куну тун сени,
Толпинар дилим сенга қуш каби...

Омон лолаларни секин Зайнаб деразасига қўйиб чиқиб кетаётганди, иккинчи томондан Носир ота кўринади. У Омонни кўриб капалати учтиб кетади.

Носир ота

Куппа-кундуз туш кўрганга ўжшайман,
Бу ким? Омон? Омон? Нияти ёмон.
Анор, Анор!..

Анор хола (киради)

Вой, келинг, ассалом.
Қани, қуда, киринг ичкари.

Носир ота

Йўқ, кирмайман, хафаман сиздан,
Қизингизни бир йигит оздирди йўлдан.

А н о р х о л а

Вой, у ким экан?

Н о с и р о т а

Битта келгинди.

А н о р х о л а

Вой, шўргинам...

Н о с и р о т а

Бу қиз бизни қўйди уятга.

А н о р х о л а

Не қилай, не дейсиз?

Н о с и р о т а

Бошлансин тўй сўзсиз,
Етар эрта-индин деган сўз. Хўш?

А н о р х о л а

Мен ризоман.

Н о с и р о т а

Ҳа, баракалла,
Тез кунда тўй бўлар, худо хоҳласа.
Хайр!

А н о р х о л а

Хайр!

Н ос и р о т а чиқади.

П а р д а

ИККИНЧИ КҮРИНИШ

Ез. Дала шийпони. Пахта даласида қиз-йигитлар ғўзани чеканка қилиб юришибди. Улар анча узоқдан хор билан ўтадилар.

Й и г и т -қ и з л а р

Ватан бўйлаб ер устида кулганда офтоб,
Азиз диёр кўкси нурга бўлганда сероб,
Пахтазорлар, дилбар қизлар, мард йигитларнинг
Мехнатдан яшнаганин қилинг томоша.

Й и г и т л а р

Санам қизлар қўлларида яшнайди колхоз,

Қ и з л а р

Шўх йигитлар меҳнатидан кузда ёрқин юз,

Й и г и т -қ и з л а р

Деҳқон ҳосил кўтарганда элда тўкин куз,
Пахта, буғдой карвонини қилинг томоша.

Й и г и т л а р

Ҳормай ишланг, чечан қизлар, далангиз чорлар,

Қизлар

Толмай ишланг, мард йигитлар, далангиз чорлар.

Йигит-қизлар

Үз еримиз, ўз элимиз, халқимиз чорлар,
Ғайрат тўкиб роҳатини қилинг томоша.

Йигит-қизлар даланинг иккинчи томонига ўтар эканлар,
Зайнаб улардан ажралиб қолади. Унинг кўзлари Омонни
бекарор ахтаради.

Зайнаб

Барча йигит майдонда,
Сарвари қайда экан!
Дил ахтарар ҳар ёндан,
Дилбари қайда экан!

Ишлайману, толмайман,
Мұхаббатинг қонимда.
Сенсиз нафас олмайман,
Сен меҳнатим, шонимда.

Чопиб келаётган Омон Зайнабни кўриб тўхтайди.

Зайнаб ва Омон дуэти

Омон

Тоза кўнглим гавҳари, кўзим қароси, ассалом,
Эй ҳаётим зийнати, дилнинг давоси, ассалом.
Ой жамолингни кўриб, лашнабди боялар нур тўлиб,
Қуш навоси, тог ҳавоси дилни чорлар сен бўлиб,
Эй азиз, жон офати, ҳам роҳати, кел, ассалом,
Кўрмасам йўқ тоқатим, васлингга зор дил, ассалом.

З а й на б

Софиниб кўрмоққа зор эрдим туну кун, ассалом,
Шодладинг кўнглим уйин, эй мард баҳодир,
ассалом,
Баркамол бўйинг кўриб, яшнабди боғлар нур тўлиб,
Қуш навоси, тоғ ҳавоси дилни чорлар сен бўлиб,
Эй азиз, жон офати, ҳам роҳати, кел, ассалом,
Кўрмасам ийк тоқатим, васлингга зор дил, ассалом.

О м о н

Хўш, айтольдингми опангга, Зайнаб?!

З а й на б

Айтольмадим, Омон!

О м о н

Менинг ўзим бораман.

З а й на б

Ийк, ийк!

О м о н (*ўзича*)

Демак, севмай қолди у мени.

Танаффусга занг урилиб, ҳамма ҳор билан саҳнага кириб кела
бошлайди. О м о н ўзики четга олади.

Ҳ а м м а

Ою қуёш, кексаю ёш пахтакор, пахтакор,
Ҳар дам ўсиб қулф уради пахтазор, пахтазор.

Ким олдинда, ким орқада, ким оқсоқ, ким илғор,
Ҳосил учун тортишувда ким ўзар, ким ўзар.

Қизлар

Қуёш билан бирга турган ўзимиз, ўзимиз.

Игитлар

Ойдай сизни қувиб юрган ўзимиз, ўзимиз.

Зайнаб

Қувиб етинг!

Қиз

Етолмас!

Зайнаб

Қувиб етинг!

Қиз

Етолмас!

Игитлар

Ким етолмас, етолмас, ким етолмас, етолмас?

Қизлар

Ҳа, ҳа, ҳа, ҳа...
Билакда куч, юракда ўт ҳормадик-толмадик,
Ҳури бошлиқ йигитлардан қолмадик, қолмадик.

X а м м а

Ким олдинда, ким орқада, ким оқсоқ, ким илғор,
Ҳосил учун тортишувда ким ўзар, ким ўзар!

X у р и

(Үз иигитларига жиҳддий)

Ҳа, ҳа, ҳа... Хўш, шоввозлар!

Й и г и т

Ўзмасак, биз йигит әмас, шер әмас, шер әмас,
Ким олдинда, ким орқада, ким оқсоқ, ким ўзар.

Йигитлар ялласи, қиэлар ўйини бошланади.

Й и г и т л а р

Ўйнанг, ўйнанг, ўйнанг, ўйнанг ёр, ўйнанг.
Ўйнанг, эй шўх жонажонлар, ўйнамоқ чоғи букун.
Бу ажиб қўлларда обод юртимиз боғи бу кун.
Меҳнатингиз әлда достон, санъатингиз бебаҳо,
Багримиз куйдирса, майли, ишқингиз доғи бу кун.

Р а и с

(У ўйин вақтида кирган эди)

Эй ҳорманглар, дўстларим!

X а м м а

Бор бўлинг, раис ота!

Р а и с

(Хурига)

Нега хафа кўринасан, сен қизим?

Ҳ у р и

Ишламайман бундан кейин йигитлар билан.

Р а и с

Нима учун?

Ҳ у р и

Зарра ўт йўқ юракларида.

Р а и с

Сен бошлиқсан, сабабчи ўзинг.

Э р г а ш

(Хурига тегажаклик қилиб)

Олма гули нопармон, илфорлар шоду хандон,
Ҳурихонга қарасам, дилхонам бўлар вайрон.
Вой,вой жоним,
Ночор ҳолим,
Ваъдам эрдай,
Чеҳрам шердай,
Ногаранг така-тум,
Ишда йўқ унум,
Куйдим, ўлдим.

Ҳамма кулади. Ҳ у р и яна тажаиг.

Раис

Тўғри танқид, қабул қил, Ҳури,
Ибрат олинг Омондан.

Ҳамма

Омондан?!

Раис

Мен нақл этай...

Ҳамма

Қани ота, муштоқмиз.

Ҳамма раис атрофини ўраб ўтиради. Раис ҳикоясини бошлайди.

Раис

Кеч тун эди. Қушлар ҳам тинган,
Саҳро қора либос кийинган.
Сойларда тун, водийларда тун,
Яироқларда, яйловларда тун,
Гулдурайди бир нарса фақат,
Нур ўпқини қўйилар фақат.
Тинмай кезар қудратга тўла,
Тун қўйинига солар ғулгула.
Кеч тун бағрин мардларча ёрган,
Кенг далага пўлат от солган.

Рихсибуви

Е худойим, нима у?

Xури

Ким у?

Раис

Сизга айтсам, сирни дўстларим,
Бу полвон тракторчи...

Xамма

Омон!

Раис

Ха, Омон!

Xури

Раис отам тасвирга уста.

Зайнаб (ўзича)

Омон, азиз Омон!

Раис

Шу тун юмшатмаса ғўза тагини,
Шаббодадан қотарди тупроқ.
Ғўза етиларди кечикиб.

Xамма

Тўгри!

Раис

Бундай полвон озмас колхозда.
Мана Зайнаб, эл ичра донгдор,

Ундан Ҳури қолишмас зинҳор,
Ҳар йигит мард, ҳар қиз сергайрат,
Жон куйдириб қиласи мөхнат,
Олдиндамиз ҳозир районда.
Шу суръатни бермасак қўлдан,
Бизницидир марра!

Ҳ а м м а

Бўлинг хотиржам!

Р а и с

Демак, эрта суғорасиз ғўзани.

З а й н а б

Хўп, отажон.

Раис кетади. Ҳури далага ўтади. Шу вақт иккинчи ёқдан
Омон кўринади.

Қ и з л а р

Омон, салом Омонга!

З а й н а б (шод)

Ботирим Омон!

О м о н

Демак, шодсан?

Й и г и т л а р

Ҳорма, Омон!

Бирдан Ҳури нинг қўнгироқдек овози эшитилади. Ҳамманинг дикқати ўшанга жалб бўлади. У келаётган Шарвон хола ва Носир ота нинг қўлидан телеграммани олиб қувонгэн эди.

Ҳури

Дугоналар, беринг суюнчи!

Шарвон хола
Салом қизлар!

Қизлар

Салом!

Ҳури

Суюнчи!

Дарё тўлиб сув оқар, шошар,
Сувда акс этар толлар.
Дилда шодлик лиммо-лим тошар,
Сиз бехабар, ўртоқлар.
Яна колхоз шуҳрати ортар,
Келар олим-ҳамқишлоқ.
Бизга илм сирларин очар,
Серҳосил бўлар тупроқ.

Зайнаб

Қувончларинг қалбимга зийнат, ким келармиш?

Омон

Тез айт!

Ҳури

Истаса, тошдан бизга
Пахта олишга қодир,

Мадад бўлиб колхозга
Келар агроном Собир!

О м о н

Суюнчига биз қарздор, тилингга шакар.

З а й на б

(Ранги ўчиб)

Шодлигинг-ла сен урдинг дилимга ништар.

О м о н

Нима бўлди, Зайнаб?

З а й на б

Хеч гап.

О м о н

Қон қолмади чеҳрангда?

З а й на б

Йўқ, йўқ.

Ш а р в о н х о л а

Ҳой яхшилар, қулунтойим келмоқда!

Н о с и р о т а

Собир келмоқда.

З а й на б

Собир келмоқда!!.

Р и х с и б у в и

Э р г а ш

О м о н

Собиржон келмоқда!

Ш а р в о н х о л а

Н ос и р о т а

Собир билан тўй келмоқда уйимга.

Р и х с и б у в и

Собир билан тўй келади уйига.

Ҳ а м м а

Тўй келади, тўй келади!

Ҳ у р и

О м о н

Тўй келади.

Ҳ а м м а

Тўй келади, тўй келади!

З а й н а б

Шўримга!

Н о с и р о т а

Ш а р в о н х о л а

Р и х с и б у в и

Бирга бўлинглар тўйга!

Қ и з л а р

Тўйга!

Ҳ а м м а

Тўйга!

О м о н

Тўйга!

Ш а р в о н х о л а

Р и х с и б у в и

Нега севинмайсан, Зайнабхон, тўйга?

Э р г а ш

Нега севинмайсан, Омон?

З а й н а б (кампирларга)

Бу гапларни қўйинг!

Шарвонхола

Риҳсибуви

Айтайлик бир сир.

Қизлар

Қандай сир?

Риҳсибуви

Шарвонхола

(Қизларга)

Зайнабнинг қулогин тишлаган Собир.

Носирота (*Омонга*)

Сен кимсан... Зайнабнинг әгаси Собир.

Қизлар (*Зайнабга*)

Қулогининг қай ерини тишлаган Собир?

Омон

Севганинг бор экан, билдим, бевафо!

Носирота

Эркаклар

Тўй бўлсин, қилайлик бир кайфу сафо!

З а й и а б

Куйганим билмасдан қиласан жафо!
Қилма жафо!

О м о н

Сен бевафо!..

Х у р и

Э р г а ш

(Омонга)

Куйганин билмасдан қиласан жафо.

Х а м м а

Тўй бўлсин, қилайлик бир кайфу сафо!

П а р д а

ИККИНЧИ ПАРДА

УЧИНЧИ КҮРИНИШ

Ез фасли. А н о р холанинг ҳовлиси. А н о р хола янги совчиларни кузатмоқда.

А н о р х о л а

Зайнаб ҳали ухлар эди бешикда,
Беш ёш Собир ўйнар эди эшикда.
Ота-она, уруғ-аймоқ кенгашиб,
Нону патир синдирилган унашиб.
Тақдир экан, тангри қўшган азалдан,
Йўқса, қизни аямасдим сизлардан.
Яхши боринг!

С о в ч и л а р

Хайр (*кетадилар*).

С о в ч и л а р чиқади. Букун Собирникидан маълум оши келади, аёллар шунинг тарафидида. Эрагаш самовар билан машгул.

А н о р х о л а

Қиз бўй етса, совчи босар уйини,
Мен ўстирдим гулга ўлчаб бўйини.
Елғизгинам жигаримнинг ёдгори,
Зайнабойнинг кўтар бўлдим тўйини.

Меҳнатидан эл оғзида овоза,
Шодлигимдан қушлар олар андоза.
Тириклигим танҳо кўрки шу тоза,
Зайнабойнинг кўрап бўлдим тўйини.

Эшикдан бир неча кекса аёл: бири ҳасса тутган, паранжига, иккичиси тугун кўтарган, саватларда ноз-неъмат, замбилда ош ва бошқа нарсалар билан кириб келади.

М е ҳ м о н л а р

Эшик очинг, қуда чаққон,
Қизингизга келди тўй.
Букун давлат сизга боққан,
Молга тўлар ҳовли-уй.

М е з б о н л а р

Хуш келибсиз, кулбамизга,
Қадамларга ҳасанот.
Үйимизнинг тўри сизга,
Садқа жон, ҳурматли зот.

М е ҳ м о н л а р

Очилибди боғингизда
Бир муаттар тоза гул.
Остонангиз супурмоққа
Бўлиб келдик сизга қул.

Ҳ а м м а

Қани тўрга, буюрсинлар,
Кўкка етди бошимиз.
Мунтазирдир сизга кўзлар,
Дастурхонда ошимиз!

Кўришиб, аёллар айвонга ўтадилар.

Кекса аёл

Омин, тўй устига тўй бўлсин,
Бало-қазо йўқ бўлсин!

Ҳамма

Омин... омин! Оллоҳу акбар!

Анорхола

Хуш кўрдик.

Меҳмонлар

Хушвақт бўлинг!

Анорхола

Турсуной, сиз ёзинг дастурхон!

Аёл

Хўп бўлади.

Анорхола

Чой бер, Эргаш!

Эргаш

Ҳозир.

Меҳмонларга дастурхон тортилади.

Мебонлар

Олинглар, олинглар!

А н о р х о л а

Дастурхонга қаранглар!..

Р и х с и б у в и

(Келтирилган бўғчаларни очиб)

Бай...бай...бай!

Нуқул асл, қимматбаҳо мол.
Ун сидирға кўйлак, беш рўмол.

Х о т и н л а р

(Мароқ билан қўлга олиб)

Вой, буюрсин-эй...

Р и х с и б у в и

Бу бош-оёқ кийим Анорга,
Бу зеби-зийнат келинпошишага.

Х о т и н л а р

Вой, буюрсин-эй...

Р и х с и б у в и

Пальто, костюм, туфли амиркон!

Х о т и н л а р

Тўй берибди тўкис, бир жаҳон.

Шарвонхола

Собиржондан эл-юрт миннатдор.

Риҳсибуви

Зайнабхонга у чин харидор.
Харидори йигитларнинг султони ўғлон,
Кўкси илм хазинаси, дур кони ўғлон.
Қулочини ёёса, қучар еру осмонни.
Пахта илмин билган, элу юрт жони ўғлон.

Ҳамма

Ғоз сингари қўна олар олтин кўлларга,
Сув оқизар, пахта экар қақроқ чўлларга.
Пари қизлар сув сепади юрган йўлларга,
Московларда ўқиб келган билимдон ўғлон,
Зайнабхонни шайдо қилган ўзига ўғлон.

Бираёл

Ҳа, Зайнабхон-чи?.. У ҳам қизлар сараси.

Мечмонлар

Елкасини тутган кокил тол-тол,
Оқ юзига чирой тушган қора хол.
Шаҳло кўзи далаларга боққанда,
Ғўзаларга қўли гавҳар таққанда,
Уни кўрган ҳар юракда ишқ бўлар пайдо!

Ҳамма

Собиржон ҳам шу гўзалга бўлган минг шайдо!

Р и х с и б у в и Ш а р в о н х о л а билан А н о р х о л а н и
четтга олиб.

Р и х с и б у в и

Нима дейсиз, махфий никоҳ ўқитсак,
Шаръий йўлни тўғрилаб қўйсак?

А н о р х о л а

Бу яхши гап... аммо Зайнабхон,
Эрга тегмайман, дейди ҳамон.

Ш а р в о н х о л а

Вой, бу қизнинг нози.

Р и х с и б у в и

Ҳа, ростдан
Иситтирдик қизни Собирга.
Мана иситилган чой ҳам қанд.
Буни кийса.

Ш а р в о н х о л а

Зийнатни тақса.

Р и х с и б у в и

Тўй куни бу қанд чойни ичса.
Апоқ-чапоқ бўлар, худо хоҳласа.

Ш а р в о н х о л а

Қиз жон-жон десин Собирга тегса.

Э р г а ш

(Үргатага тушади)

Ха... ҳа...ҳапшу,
Олма гули нопармон, лаблари хандон-хандон,
Урфу одат йўлида қанчалар қурбон, қурбон.
Чилвир соchlар,
Қалам қошлар,
Юзлари ойдай,
Сўзлари мойдай
Қизлар ўлди,
Очиlmай сўлди.

Р и х с и б у в и

(Тумтайиб)

Бунча гапинг муздак!

Э р г а ш

Сизлар-чи, ҳазон урган куздак.

Заҳарханда билан чиқиб кетади. А н о р оқлиқ, сарполар чиқариб,
Р и х с и б у в и Шарвон хола ва бошқаларга тақдим қилади.

Р и х с и б у в и

Қани, омин!

К а м п и р л а р

Қўша қарисин!
Серфарзанд, сердавлат бўлсин!

Ҳ а м м а

Оллоҳу акбар!

М е ҳ м о н л а р

Яхши қолинглар!

М е з б о н л а р

Яхши боринглар!

Медмонлар тарқай бошлайдилар. Зайнаб, Ҳури кела туриб ўзларини четта оладилар. Шарвон хола кета туриб Анорга сўзлайди.

Ш а р в о н х о л а

Тўй ўтгунча кўчага чиқмасин Зайнаб!..

Ҳамма тарқалади. Зайнаб, Ҳури киради.

Ҳ у р и

Салом, холажон!

А н о р х о л а

Кел, Ҳурихон, ўтирикайвонга!

З а й н а б

(Сарполярни кўриб, ҳайрон)

Не гап, опа?

А н о р х о л а

Бир иш қилдим, бўлмагил хафа.

Ҳ у р и

(Сарполарга назар ташлаб)

Булар нима?

А н о р х о л а

Сарполар қизга.

(Зайнаб олдига ёйиб ташлайди)

З а й на б

Айтувдим-ку, йўқ, йўқ, деб сизга!

А н о р х о л а

(Қизни эркалаб, юпатиб)

Үн тўққизга тўлди ёшинг,
 Гул юзинг бор, қалам қошинг,
 Икки бўлса ёлғиз бошинг,
 Армоним шу, болажоним.
 Эрга тегмоқ тақдир иши,
 Тўй опангнинг кўнгилхуши.
 Еш бошингга толе қуши —
 Қўнди, шод бўл, болажоним.

З а й на б бурилиб, уйга кириб кетади.

Ҳ у р и

Хола, қизга совчилар келса,
 Қиз ризосин олмоқ бўлмасми?

А н о р х о л а

Зайнаб чиқмас менинг сўзимдан,
Биз чиқдиқми она измидан.
Ўн бешимда бердилар әрга,
Чимилдиқда кўрдим әrimни.
Рўзи азал қиз тақдирига
Езгани шу әкан тангримни.

Ҳ у р и

Ўтмишдаги ҳамма бахтиазлик,
Хўрликларнинг боиси шудир.

З а й на б

Опа, кечдим шу саодатдан!

Ҳ у р и

Энди янги одат керакдир.

А н о р х о л а (*Xuriqa*)

Ахир, менда бир андиша бор,
У Собирга фотиҳа бўлган.

Ҳ у р и

Ахир қизнинг хоҳлагани бор.

А н о р х о л а (*zaҳri uchib*)

Хоҳлагани бор?!
Ор әмасми, ошиқ-маъшуқлик?
Гуноҳ фотиҳани бузмоқлик.

Ҳ у р и

Севги қиласар ҳамма ишни ҳал!

А н о р х о л а

Ким экан ул Собирдан афзал?

З а й на б

Собир гүзал, олим ҳам доно,
Хурматлидир халойиқ аро.

А н о р х о л а

Балли, шундай!

З а й на б

Лекин опажон,
Ўзгани дер юрак бу замон.

А н о р х о л а

Ким экан у?

Ҳ у р и

Сўйла, Зайнабхон!

З а й на б, Ҳ у р и, А н о р х о л а триоси.

З а й на б

Озод ўсдим, ишқим эркин изҳор этсам мен,
Озод ўсдим, ишқим эркин изҳор этсам,
Сиз инсофни тарк этманг.

Ҳ у р и

Озод ўсди, ишқни изҳор этса,
сиз инсофни тарқ этманг.

З а й н а б

Бахтим учун кир одатни поймол этсам,
опажоним, қаҳр этманг.

Ҳ у р и

Урф-одат деб хор этманг!

А н о р х о л а

Бахтинг учун урф-одатни,
худо муҳри фотиҳани рад этма!

З а й н а б

Омон, Омон танлаганим,
шу колхозда ишлаб топган эътибор.

Ҳ у р и

Омон, Омон танлагани,
шу колхозда ишлаб топган эътибор.

А н о р х о л а

Муносибмас сендай қизга ундей безот ҳам
беор

Зайнаб

Омон, Омон — шу армоним, танҳо ўша,
мен у билан бахтиёр,

Хури

Танҳо ўша Омон билан Зайнаб бўлар бахтиёр.

Анор хола

Беном, безот бир беор.

Анор хола

Ортирганинг шуми колхозда?
Беномус қиз, қилдинг шарманда!

Хури

Асло гуноҳ эмас муҳаббат.

Анор хола

Қизгинамни бузган сен!

Хури

Рахмат!!!

Зайнаб

Опа!

Хури

Энди қизлар қулдай сотилмас,
Энди 'тақдир ўтга отилмас!!

А н о р х о л а (Ҳурига)

Йўқол уйимдан, бахти сиёҳ!

З а й н а б (ўртага тушиб)

Ҳурида йўқ заррача гуноҳ.

Ҳ у р и

Борай, раис бўлсинн хабардор!

А н о р х о л а

Бор, айта қол!

Ҳ у р и

Этолмайсиз севгини поймол. (Кетади)

А н о р х о л а

Кўрмай асло, юзингни, йўқол!
(Зайнабга) Ҳозир айт!
Ё мени де ёки Омонни!

З а й н а б (Икки ўт орасида изтиробда қолди)

Мен йигитга сўз бераркан, ҳеч гуноҳим йўқ бу кун,
Сиз дилим мулки ва дилдордан узолмайман кўнгил.
Қиз ҳам одам, мол эмас, севгига ҳаққи йўқ наҳот?
Бахту шодлик қотили одатдан излайму најжот?!
Меҳрибоним, икки оташ ичра жоним ташламанг.
Иккингиз жондан азизсиз, кўзларимни ёшламанг.

А н о р х о л а

Унут, жон болам, ўшал Омонни.

З а й на б

Бу мушкул, опа!

А н о р х о л а

Севма ёмонни!

З а й на б

Қўйинг опажон, ўшал Омонни,
Сиз севолмаган ўшал ёмонни.

А н о р х о л а

(қаҳр-газабга тўлиб)

Мен қуваман, болам демайман.

З а й на б

Майли!

А н о р х о л а

Бошимни қаратдинг ерга!

Энди юзинг кўришилик маҳол.

Даргоҳимдан чиқиб кет! Йўқол!

З а й на б нинг кийим-бошларини, китобларини деразадан ҳовлига иргитиб ташлайди.

З а й на б

Оҳ, қадрдон даргоҳингиз мен етимга берди
жон
Қувдингиз, йўқ чора менда, хуш қолинг,
жон опажон!
Хуш қолинг, жон опажон!..

П а р д а

УЧИНЧИ ПАРДА

ТУРТИНЧИ КҮРИНИШ

Тун. Зарафшон дарёсининг соҳилига яқин сўқмоқ йўл.
Даражатлар орасидан узоқда ой нурларини тўлқинга қамраб
оқаётган кенг Зарафшон кўриниб турибди. Кўнда юлдузлар
чарақлади. Уркачли оқ булатлар уларни сийнаб сузиб ўтади.
Баъзан узоқда кўкнинг гулдураши эшитилиб турибди. О мон
бекарор, ҳаяжонда ўзига ўзи сўзлади.

О мон

Қайда экан Зайнаб бу соат?
Мен ҳеч нарса англолмай қолдим.
Бир учратсам, очиқ сўзлашсам.

Секин ария бошлайди.

На бўлғай бир нафас мен ҳам ёноғинг узра хол
бўлсам,
Лабинг япроғидан томган мисоли қатра бол бўлсам.
Боғингга мен қўниб, булбул каби хониш қилиб тунлар,
Ўпид ғунчангни очмоқликка тонг чоги шамол бўлсам.
Бўйингни тарқатиб, оламни қилсан маству мустағриқ,
Ўзимнинг санъатимга сўнг ўзим ҳайратда лол бўлсам.
Бошим ҳеч чиқмаса майли, маломат бирла бўхтондан,
Фидо жонимни қилдим йўлингга, майли, увол бўлсам.

Вафо кутдим, топдим мен жафо,
Оҳ... қийнади, бағрим қилди қон.

Наҳот шунча тоза, мусаффо
Қиз севгиси, ваъдаси ёлғон!
Кўнглим бовар қилмайди зинҳор.
Наҳот қушдай учди муҳаббат,
Пати қолди қўлимда, холос?

(Ҳаяжонли.)

Мен Зайнабни топмоғим
даркор.
Ҳури

(Киради)

Омон! Қани Зайнаб?!

Омон

Сен айт, қайда у?!

Ҳури

Сен деб уйдан қувилди Зайнаб.

Омон

Оҳ, қайдасан вафодор Зайнаб!

Ҳури

Үйда ҳам йўқ, шийпонда ҳам йўқ!

Омон

Ўзим топаман. (Чиқади.)

Ҳури

Мен раис отамни топаман.

У каским чиқиб кетади.

Зайнаб

Руҳи тушган, чуқур ички кечинмалар, ишқий түғёнлар азобидай
ҳориган Зайнаб паришонҳол ария айтиб саҳнага киради.

Парчалар қайғу дилим, қайларга кетди шодлигим,
Бир умр ҳис этмаган оташда қолди борлигим.
Не маломат ҳам ғазаб остида қолди бу бошим,
Бахту шодликлар тўлиқ кўздан оқиздилар ёшим.

Соф муҳаббат ҳам вафони билдилар ор ҳам гуноҳ,
Кимлар англар кўнглимни, мен кимдан излайман
паноҳ,

Парчалар қайғу дилим, қайларга кетди шодлигим,
Не қилай мен, изтироб, оташда қолди борлигим.

Зайнаб ҳорғин, ўзи билан ўзи сўзлашади.

Қайда экан Омон бу соат?
Балки мендан юз бургани рост.
Наҳот қушдай учди муҳаббат,
Пати қолди қўлимда, холос...

Шамол, бўрон кучайиб, ёмғир ёға бошлайди. Гувиллаган бўрон
ва шамол аралаш гўё Аинорнинг чўзиқ қарғишилари эшитил-
гандай. Бу — Зайнаб нинг руҳий ҳолатида акс этади.

Аинорхола

Ё мени де ёки Омонни!

Аксисадо

Ёки Омонни.

Зайнаб (ўзича)

Нетай, тикдим йўлига жонни.

А н о р х о л а
Йўқол... кўзимдан, беор!

А к с и с а д о
Беор!
З а й н а б (*қулоқларини беркитади*)
Беор... шарманда... беор, шарманда,

А н о р х о л а
Йўқол... кўзимдан йўқол... шармисор!

А к с и с а д о
Шармисор.

З а й н а б
(*юзларини бекитади, табиатдаги туғён яна кучаяди.
У бошини азот кўтаради.*)

Ёфмоқда бошимга лаънату нафрат,
Қайда қолди. Омон, қайда муҳаббат?
Юз ўғирди опам, юз ўғирди ёр,
Оҳ, нақадар дунё қафас каби тор.
Дунё менга тор.
Ҳамма орзу-тилак бўлди поймол.
Эй азиз дарё, кел бағрингга ол.
Кел, бағрингга ол.

У кескин қирғоқча чиқади, ўзини сувга ташламоқчи бўлади.
З а й н а б н и ахтариб юрган О моннинг овози эшигилади. Бу
азиз овоз З а й н а б га ҳаёт бағишлайди. О мон шошқин
кириб келади.

О м о н
Зайнаб! Зайнаб?! Азиз Зайнабим!

З а й н а б (чўчиб қарайди)

Омон!

Табиатда ором, юлдузлар чараклаган, ой осойишта сузади.

О мон

Зайнабим!

Не бўлди?

З а й н а б

(Ўпка аралаш)

Сиз бағиртош, бераҳм!

О мон

Бўлган гапнинг барин эшитдим.

З а й н а б в а О м о н дуэт айтиб, дилларини изҳор қиласидилар.

О мон

Азиз Зайнаб, кечир мени,
Мен сабабман азобингга.
Кўп жафога қўйдим сени,
Ўзинг бергил жазо менга!

З а й н а б

Не кунларни кўрди бошим,
Сен ҳам отдинг маломатга.
Тўксалар ҳам қонли ёшим,
Содик қолдим муҳаббатга.

**О м о н
З а й на б**

Бу қуёшми, ё муҳаббат,
Шуъла сочган йўлларимга...

З а й на б

Икки қалбда бир гўзал бахт,
Ишонмайман кўзларимга.

О м о н

Бахтиёрман, жоним, бўл шод!

З а й на б

О м о н

Ажратолмас бизни ҳеч зот!
Ажратолмас бизни ҳеч зот!

Икки ёшининг лирик гўзал дақиқаларини узоқдан эшигилган
ғовур-ғувур бузади. Бу хавфдан икки ёш ўзини, муҳаббатини
қутқариш учун дарҳол чиқадилар. Чақмоқ, гулдурак кучаяди.
Рихси буви, Анор хола икки қиз билан шошқин, ҳая-
жонда саҳнага кириб келадилар.

Р и х с и б у в и

Қ и з л а р

Кўринмайди. Кўринмайди, кўринмайди...

А н о р х о л а (Rixxi buviga)

Қайдасан, Зайнаб?!

Р и х с и б у в и (жеркиб)

Ҳаммасига ўзингиз сабаб!

Қ и з л а р

Бу иш бўлди жуда аломат!

Р и х с и б у в и

Юз бермаса бирон фалокат!

А н о р х о л а

Шўрим қурсин, билса қудалар.

Р и х с и б у в и

Қиз номини олмайди тилга.

А н о р х о л а

Вой мен ўлай... бўлдим шарманда.

Қ и з л а р

Сувга ўзин отган бўлмасин?

А н о р х о л а

Оҳ, қаранглар, шўрим қурсин! (*Ўтириб
қолади*)

Қ и з л а р

Қарайлик, юринг!

Р и х с и б у в и

Лаънат дейди элу халқ сизга! (*Чиқа бошлайди*)

А н о р х о л а

Тез топайлик, элтайлик уйга!

Лекин уларнинг олдидан Носир ота билан Шарвон хола
ҳам чиқади.

Н ос и р ота

Ш а р в о н х о л а

Қани ўзи, қаерда Анор?

Р и х с и б у в и

Мана у!

Н ос и р ота

Р и х с и б у в и

Ш а р в о н х о л а

Тўйни олдинг, сен тўнаб бизни,
Сўнг Омонга оширдинг қизни.

А н о р х о л а

Худо урсин, ният шу бўлса!

Носир ота
Риҳси буви
Шарвон хола

Бу кунга сен ўзинг айбдор!
Сен ўзинг айбдор!

Анор хола

Шўр қисматим қилди гуноҳкор.

Риҳси буви

Ҳа, қиз қочган Омон уйига.

Носир ота

Шарвон хола

Омон уйига?!

Анор хола (*ийғлаб*)

Бўлдим шармисор.

Риҳси буви

Шарвон хола

Бу қиз бўлди бадном, беномус, беор.

Шарвон хола

Эндиликда у шарманда қиз,
Келинликка ярамас ҳаргиз!

Анор хола

Майли... уни тирик кўрсам бас!

(Кидириб чиқиб кетади)

Носир ота

Йўқ!.. Бу мумкин эмас!

Носир ота, Шарвон хола, Рихси буви триоси.

Носир ота

Шаъним учун бу зўр бир ҳақорат.

Шарвон хола

Шаънинг учун бу зўр бир ҳақорат.

Рихси буви

Шаънинг учун бу зўр бир ҳақорат.

Рихси буви

Носир ота

Ошиқ-маъшуқликка соламан горат.

Шарвон хола

Собир топмас саодат!

Носир ота

Шарвон хола

Рихси буви

Масхара бўлмоқ энди етар, бас!

Агар Омондан мен ўч олмасам!

Носир ота

Қизни Собирга агар қўшмасам.

Рихси буви

Агар Омондан мен ўч олмасам.

Шарвон хола

Қизни Собирга...вой ўлмасам,

Носир ота

Мен Носир эмас, мен Носир эмас...

Рихси буви

Мен Рихси эмас, мен Рихси эмас!

Шарвон хола

Муносиб эмас, муносиб эмас!

Носир ота

Мен Носир эмас, мен Носир эмас...

Парда

ТҮРТИНЧИ ПАРДА

БЕШИНЧИ КҮРИНИШ

Илгор колхознинг каттакон бугун катта тўй. Пахта очилган. Бу ҳам тўйга яна тантана қўшади. Қуз, мевалар гарп пишган. Токдаги ранг-баранг узумлар кўзни олгудай. Ҳамма ёқ чўгдек гиламлар билан безатилган. Колхоз раиси Зайнаб ва

Омосининг тўйини ўтказмоқда.

Ногора, карнай, сурнай садолари остида парда очилади. Ҳар томондан гурас-гурас меҳмонлар келмоқда, уларни раис бошлиқ мезбонлар кутиб олиб, маҳсус жойларга ўтказмоқдалар.

Раис

Хуш кўрдик, азиз меҳмонлар

Ҳамма

Хушвақт бўлинг!

Раис

Тортинг дастурхон.

Ясанган йигитлар саватларда, патнисларда узум, олма, нок, беҳи... турли-туман мева-чевалар кўтариб киришади ва ёзилган дастурхонларга қўйиб, рақсга тушиб кетадилар.

Овозлар

(Рақс ораларида) Балли!..

Ҳ а м м а

Балли!..
Камол топинглар!

Рақс орасида Ҳ у р и анча маъюс А н о р х о л а н и б о ш л а б
киради.

Ҳ у р и

Ҳали бундай тўй бўлмаган колхозда.

Э р г а ш

Тўй бўлмаган колхозда.

А н о р х о л а кўз ёшини артиб, сўридаги аёллар ёнига ўтиради.

О в о з л а р

Баракалла!.. (*рақс давом этаётир*)
Кам бўлманглар жаҳонда!..

Йигитлар рақси ниҳоясига етади. Бир неча ўғил ва қиз болалар
Эргашни ўртага тортадилар.

Б о л а л а р

Сувдан кўтардим кўза,
Кўзада олтин ғўза.

Э р г а ш

Сувдан кўтардим кўза,
Кўзада олтин ғўза...

Кўзаю ғўза қўлимда, яллоли бобо, ялли.
Узумзорлардан шинни,
Чиннкорлардан чинни
Шиннию, чиннию, кўзаю ғўза қўлимда яллоли
бобо, ялли!

Соатга олдим занжир,
Боглардан тердим анжир,
Занжиру, анжиру, шиннию, чиннию, кўзаю гўза
қўлимда, яллоли бобо, ялли,
Тўқувчи қиздан газмол,
Сотувчи қиздан дазмол,
Газмолу, дазмолу, занжиру, анжиру, шиннию,
чиннию,
Кўзаю гўза қўлимда, яллоли бобо, ялли!

Ўрмонлардан арча,
Бофандалардан парча,
Арчаю, парчаю, газмолу, дазмолу, занжиру,
анжиру,
Шиннию, чиннию, кўзаю гўза қўлимда, яллоли
бобо, ялли!
Чўпонлардан айрон,
Гулзорлардан райҳон.
Айрону, райҳону, арчаю, парчаю, дазмолу,
газмолу,
Занжиру, анжиру, шиннию, чиннию, кўзаю
гўза қўлимда,
яллоли бобо, ялли.

Б о л а л а р

Келяпти, келяпти, келин-куёв келяпти!

Ёшлар, аёллар қатор тизилиб келин-куёвни кутадилар. Келин-
куёв ёнида, қизлар олдида ёр-ёр айтиб Ҳур и яшнаб келмоқда.

А ё л л а р

Дарёларнинг ул юзидан келган сизми, ёр-ёр.
Тўлин ойдай яшнаб кетган Зайнаб қизми, ёр-ёр.

Болалар ва кексалар, қизлар ва йигитлар келин-куёв устидан
гул япроқларини сочадилар.

Иигитлар

Тўлин ойдай қиз ёнида куёв поччам ёр-ёр,

Ҳамма

Бошларидан ўзим эккан гулдан сочсам ёр-ёр.

Хури

Дарёларнинг ёқасида бир жуфт каптар ёр-ёр,
Шодликларин ёзсак бўлар дунё дафтар ёр-ёр.

Иигитлар

Қизлар

Колхозимга кўп ярашган тўйларингдан ёр-ёр.
Бир-бирига монанд келган бўйларингдан ёр-ёр!

Куёв билан келинни махсус тайёrlанган жойга ўтқазадилар.
Ҳамма раис ота ва куёв-келинни табриклаб хор айтадилар.

Ҳамма

Энди ҳорманг, эй тўйбоши,
Раис ота, тўй муборак!
Ярқираган баҳт қуёши,
Гўзал келин-куёв муборак!

Раис

Бахти кулсин тўлин ойдай,
Умр кўрсин болу мойдай.

Xамма

Ўғил кўрсинг қулун тойдай,
Гўзал келин-куёв муборак!

Ҳамма хор бошлайди, раққоса ва раққослар ўйинга тушиб
кетади.

Куйланг дўстлар, тўй букун, нурга тўлиқ
давримиз.
Дилда қувонч ва тўлқин, баҳтга тўлиқ бағримиз,
Меҳнатимиздан обод, жондан азиз гул диёр,
Бунда муҳаббат озод, севишганлар баҳтиёр.

Ҳамишалик бир баҳор, бу ўлкада гул очар,
Дўстлигимиз кун мисол, баҳт йўлига нур сочар.

Сўнмасин ҳеч офтоб, шодликка тўлсин замон,
Шу баҳтимиз, халқимиз, ишқимиз бўлсин омон!

Анор хола бир чеккада ўтирган эди. Ҳури билан Эргаш
Анорни Зайнаблар томонига олиб кела бошлайди. Зайнаб
ва Омон шод, дарҳол ўрнидан туриб, опаси олдига келиб
этилади. Шу вақт кириб келган Рихсибуви билан Шаррон
хола газабда бир чеккадан кузатиб туради.

Зайнаб

Азоб бердим, афв этинг, опа!

Омон

Кўкка етди бошимиз, опа!

Анор хола

Энди толеингиз бўлсин ёр!

За́йна́б ни қу́чиб пеша́насида́н ўпа́ди ва кўришиш учун
Омо́н ми́нг кифти́га жимги́на қўлини қўйганда, бирда́н
Шарвон хола ўртага тушади.

Шарвон хола

Хой... (*Анор холага*) Сенда борми, зарра диёнат?

Рикси буви

Фотиҳага қилдинг хиёнат!

Анор хола

Эй, дилхиралик қилманг, тақдир шу экан!

Шарвон хола

Сиз ҳам, раис ота, уялинг халқдан, ҳа, қўрқинг худодан.

Рикси буви

Ҳа, ҳа... уялинг халқдан, қўрқинг худодан!

Аёллар

Ёмон бўлди...

Эркаклар

Ёмон бўлди... бўлди ёмон.

Аёллар

Шўрли Зайнаб, шўрли Омон...

Р а и с

Дўстлар, тинчланинг!

Ш а р в о н х о л а

Қиз боши боғлиқ, тез тўйни тўхтатинг,
тўйни тўхтатинг.

Р а и с

Тўхтата олмайман.

Ш а р в о н х о л а

Р и х с и б у в и

Дарҳол тўхтатинг!
Носир ота, Собир истайди шуни, истайди шуни!

Э р к а к л а р

А ё л л а р

Наҳот Собир истайди шуни?

О м о н

Тўхтата олмас, ҳеч ким бу тўйни!

Шу вақт Собир кириб келади. Ҳамма ҳайрон. Шарвонхола,
Рихсибуви шод, Зайнаб ва Омон ҳаяжонда, раис
Собир сўзига мунтазир.

Ҳ а м м а

(бирин-кетин)

Собир келди, Собир... Собир келди!

Шарвон хола

(Собир ёнига қириб)

•Гўдаклиқдан номзодим
Зайнаб менинг ёрим»де!

Собир

Кимни мафтун этмас бу жамол,
Жамолига ҳатто офтоб лол.
Кўзларидан боққан муҳаббат,
Багишлайди йигит дилга баҳт.
Озод юрак, қонун ҳам озод,
Қиз Омонни севар умрбод.
Икки қалбда кулмаса баҳор,
Чечак отмас муҳаббат зинҳор.

Афв этингиз, азиз меҳмонлар!
Қариндошлар йиғсинлар эсин,
Энди инсон севги, орзусин
Ўйин, мазах бўлгани басдир,
Қиз ҳам одам, ул мол әмасдир!

Шарвон хола

Риксибуви

Ё, алҳазар!

Ҳамма

Балли!

Шарвон хола

Ҳой ўғил!

Ҳамма

Собир ҳақ галирди!

Рикси буви

Шарвон хола

Тавба қил!

Шарвон хола

Рикси буви

Бу не бало, ё парвардигор!..

Собир

(Зайнаб ва Омонга)

Хоҳишингиз бўлмасин увол,
Севгингиз-ла бўлинг бахтиёр!

Ҳамма шод, Зайнаб ва Омон хомуш, саломга эгилади.

Зайнаб

Омон

Унутмаймиз илтифотингиз!

С о б и р

Бахт-саодат тилайман қалбдан.

Э р г а ш

Яшанг, Собиржон!

X а м м а

Танти йигит!

Р а и с

Валломатим!

(Құчоқлайди)

X а м м а

Собир — мард йигит!

А ё л л а р

Москвада ўқиган билимдон!

Ш а р в о н х о л а

Ҳой, бетавфиқ, девона ўғлон!

Р и х с и б у в и

Ҳув, ақлдан озган девона. (*Чиқади.*)

Шарвон хола

Сендай ўғлим йўқ, йўқ минг бора. (Чиқиб кетади.)

Собир

Хой она... (Чопиб она ортидан чиқади.)

Раис

Муродингга етдинг, азиз Зайнаб ва Омон!

Хури

Муродингга етдинг, азиз Зайнаб ва Омон!

Раис

Тўйни эттиринг давом!

Ҳамма

Тўйни эттиринг давом!

Ҳамма раққосаларни рақсга таклиф қилиб хор бошлайди,

Ҳамма

Шод яшанг, бахтия яшанг, шод яшанг!

Ёнди қиз ёноқлари баҳт билан
Ўт Омон нигоҳлари баҳт билан!

Раис

Ҳури

Битди бутун оҳлари баҳт билан.

Ҳамма

Битди бутун оҳлари баҳт билан.
Шод яшанг, баҳтли яшанг, шод яшанг!

Игитлар

Ишқ тўла қалбларда тўй,
Гул баргидай лабларда тўй.

Ҳамма

Қўлимизда яшнаган,
Пахта очилган қирда тўй.
Шод яшанг, баҳтли яшанг, шод яшанг!
Колхозимиз эркаси,
Зайнаб, Омон аҳдида тўй.
Шод яшанг, баҳтли яшанг, шод яшанг!
Икки ёш севги билан баҳтиёр,
Дилда йўқ қайғулардан бир ғубор.

Раис

Партия, давлатимиз сизга ёр.

Xамма

Партия, давлатимиз сизга ёр.
Шод яшанг, бахтли яшанг, шод яшанг!

Зайнаб

Омон

Бу қуёшми ё муҳаббат,
Шуъла сочган йўлларимга...

Xамма

Бахтиёр шодон яшанг,
Келин-куёв — Зайнаб, Омон!!!

Парда

ТАРЖИМАЛАР



9 зуифиз. II том

РУС АЁЛЛАРИ

КНЯГИНЯ ТРУБЕЦКАЯ*

Поэма

(1826 йил)

БИРИНЧИ БУЛИМ

Енгил, гўзал, шинам ва пухта
Ясалганди чанаси жуда.

Ота-граф синааб неча йўл,
Қилди шахсан бир ўзи қабул.

Олти нафар қўштирди тулпор
Ва ичига ёқтириди фанор.

Естиқларин ўзи тузатди,
Айиқ терисини тўшатди.

Дуо ўқиб қайта ва қайта,
Үнг бурчакка хоч осди ота.

Лекин ҳўнграб йиглаб юборди,
Шу кун оқшом қизи жўнарди...

I

«Қону қардош бир бутун қалбни
Бўлмоқдамиз икки тенг пора.

* Княгиня Екатерина Ивановна Трубецкая сургун қилинган зари Сергей Петрович Трубецкой (1790—1860) орқасидан 1826 йилда Сибирга бориб, ўша ерда 1853 йилда вафот этган.

Не қиламиз, ота, бу дардни,
Қайғунг жонга бўларми ора?
Бизнинг танҳо кўмакдошимиз
Энди узоқ... Хуш қол, отажон,
Қизингга сен фотиҳа бер тез,
Сафаримга жўнайин шодон!

II

Дийдор кўрмоқ борми тақдирда,
Худо билар! Умид йўқ, ҳайҳот.
Хуш қол, лекин тутгин хотирда,
Меҳринг дилда яшар умрбод.
Узоқ элда унутмам асло,
Ота, сўнгги ўғитинг мутлақ.
Йигламайман, менга ҳам аммо,
Осон эмас сендан айрилмоқ!

III

Худо шоҳид!.. Найлайин бу чоқ,
Яна юксак, яна ҳам мушкул
Бурч чорлайди... Отам, алвидо!
Кўз ёшларинг беҳуда буткул!
Йўлим олис, йўлим серзаҳмат,
Даҳшатлидир тақдирим менинг,
Лекин кўксим мисоли пўлат...
Фахрлангил — мен сенинг қизинг!

IV

Сен ҳам хуш қол, севимли ўлка,
Алвидо, эй бебаҳт Ватаним!
Подшоларга шум уя бўлган,
Хуш қол энди, машъум шаҳарим!
Венеция, Лондон ва Париж,

Римни кўрган сайёҳ назарин
Кўркинг-ла ром қилмасанг ҳам ҳеч,
Мен севардим сени, шаҳарим!

V

Қучоғингда кечди бахтиёр
Ҳаётимнинг ёшлик чоғлари.
Базмларинг севдим беғубор,
Сайргоҳим эди тоғларинг.
Жондан севдим оқшом онлари
Мовий Неванг хушвоздини.
Зилол қирғоқ, кўркам майдони
Ва қаҳрамон Чавандозини...

VI

Ҳеч әсимдан чиқмас... Авлодлар
Сўзлашарлар биздан ҳикоя...
Сен-чи, сенга бўлсин лаънатлар,
Мен кадрилга тушган шум хона,
Оҳ ўша қўл, ҳароратли қўл*,
Ҳамон қўлим ёқар оташда...
Тантана қил...

• • • • • • • • • • • • • • • • • • •

Осойишта, енгил ва пухта
Чана давом этади йўлда.

Қора либос, ўликдай бетус
Княгиня ўлтирас ёлғиз.

* Трубецкая Қишки саройда берилган базмда Николай I билан танцага тушганини хотирлайди.

Отасининг котиби шошиб
(Савлат учун крестлар осиб),

Хизматкор-ла олдинга чопар,
Қамчи ўйнаб, «Чу!» деб жар солар.

Қолиб кетган пойтахт ортда,
Аммо ҳали йўл олис олдда.

Қаттиқ совуқ... Княгиня ҳам
Станция келган он, шу дам.

Тушиб фармон беради ҳар гал:
«Алмаштиринг отларни жадал!»

Навкарларни сийлайди чунон,
Сахийлик-ла сочади червон.

Йигирма кун йўл юриб оғир
Етолдилар Тюменга охир.

Яна ўн кун мушкул йўл босиб,
Енисей яқин қолганда, нолиб,

Котиб деди Княгиняга:
«Шоҳ ҳам бундай юрмаган сира!»

* * *

Олға! Фусса билан тўлди дил,
Борган сари йўл сермашаққат.
Орзу, ором билан кечган йил,
Ёшлик тушга киради фақат.
Бойлик, ҳашам! Баланд ва кўркам
Уйи боққан Невага томон,
Зиналарга тўшалган гилам,
Эшигида икки шер посбон.
Қатта хона безатилган хўп,

Чироқларнинг нурига чўмган.
Музикаю шодликка тўлиб,
Болаларнинг базми қизиган!
Мана, бир жуфт олтин сочига
Қизил лента қўшиб ўрдилар.
Гўзал гултож тақиб бошига,
Ноёб либос кийинтирилар.
Ота кирап — нуроний, оқ соч,
Ҳузурига чақирап қизин.
«Катя, бунча сарафанинг соз,
Мафтун қиласар ҳамманинг эсин!»
Қиз қувончи ошар минг карра.
Кўз олдида айланади шан:
Қўнғироқ соч, бажтиёр чеҳра
Болалардан яралган гулшан.
Ясанишган болалар гулдай,
Улардан ҳам ўтган кексалар.
Лента, жиға ёнади ўтдай,
Фарчиллайди баланд пошиналар.
Озор билмай беташвиш, бегам
Сакраб ўйнар болалар шодон.
Худди қушдай шўх болалик ҳам
Учиб ўтар... Сўнг... Үзга замон,
Үзга базм, үзга севинчлар...
Тушга кирап: ҳузурида тик
Нималардир сирли шивирлаб
Иши уқтирас чиройли йигит...
Базм ортидан базм берилар,
Базмларнинг бекаси ўзи.
Бунда мансабдорлар, элчилар,
Жамиятнинг барча юлдузи...

«Жоним, недан чеҳрангда андуҳ,
Юрагингда қандай алам бор?»
«Кибор оламидан ҳорди рух,
Юр, гўзалим, кетайлик дарҳол!»

Мана, дили сайлаган билан
Жўнаб кетди узоқларга у.
Кўз олдида ажойиб гулшан,
Қадим Румо бўлар рўбарў...
Она юртдан узиб хәёллар
Чиқмасайдик узоқ сафарга,
Гар бўлмаоа шундай айёмлар
Солар эдик нени хотирга?
Зериктирувчи шимолни ўтиб,
Учмоқдамиз жанубга томон.
Ҳеч ким бизни олмайди кутиб.
Эркимизга бўлмас ҳукмрон.
Дил хушлаган дўстла шу соат
Боримизни кўрамиз баҳам.
Бу кун маъбад қилсак зиёрат,
Эртасига бирон муҳташам,—
Сарой ёки музей, вайрона
Зиёратгоҳ бўлар... Қандай бахт!
Ўйларингни танҳо, ягона
Севганингга сўйлайсан хушвақт!
Гўзалликлар этади мафтун,
Йўлга солар жиддий ўй, фикр;
Тушкунликка гарқ бўлиб бутун,
Ватиканни кезасан дилгир,
Сени қучар ўлик бир дунё
Ва тириклар бўлади унут.
Лекин уни тарқ этиб, зиё
Тўла олам кўрганинг минут,
Ҳайрат сени ўтар бегумон,
Кўз олдингда жонли бир ҳаёт:
Уста куйлар, отилар фонтан,
Майса узра ўтлар эшак, от.

Савдо-сотиқ қизиб бозори,
Минг оҳангда солинади жар:
Келиб қолинг, садафнинг сози,

Бор яхдак сув, чиганоқ, гавҳар!
Тўйса жаннат кўриниб дунё,
Рақсга тушар оч-яланғочи,
Кампир ўтар қўйиб зўр бино,
Румо қизин қоп-қора сочин.
Борган сари ортар ҳарорат
Ва қора халқ шовқин солади.
Сен излайсан кўланка, роҳат,
Маъбад паноҳига олади.
Тириклилик ташвиши узоқ,
Бунда яшар ҳаловат, ором.
Яна юрак жиддий ва қайноқ
Хаёлларга бўлар шу он ром.
Шифтларидан авлиё, малак,
Фаришталар сурати боқар.
Мармар девор... Оёқ ости нақ
Ҳақиқ асл тошлардан ёнар...
Қандай гўзал дengиз шовқини,
Соатларча ўтирасан лол.
Руҳинг енгил, ўйлар тўлқини
Мавж уради онгда bemalol...
Кўрингунча уфқда офтоб
Сўқмоқ йўлдан чиқасан тоққа —
Нақадар соз, зумрад тонг! Шу тоб
Тоза ҳаво олар қучоққа.
Жануб кунин иссиғи ортар,
Майсаларда ёнмайди шабнам.
Шамсиядай дарахтлар тортар
Соясиға, юр, олайлик дам!..

Жануб берган гўзал хотирот
Юрагига солган чуқур из.
Сайру суҳбат, ишқ тўла ҳаёт
Унут бўлмас умрда ҳаргиз.
Княгиня топалармикан
Ўтмишнинг у орзу-хаёлин,

Сўнгра тутиб қололармикан
У кунлар-чун тўккан кўз ёшин!..
Ғойиб бўлди у дилхуш рўё...
Тангри ўзи унугтган дунё
Манзараси кўзи олдидан
Саф-саф бўлиб ўтарди гўё.
Мана хўжа, золим, бешафқат,
Ана меҳнат букчайтган дехқон.
Бирисига ҳокимлик одат,
Иккинчиси — муте, қул инсон.
Дала, чаманларни яшнатган
Оч бурлаклар кирап тушига.
Волга бўйин оҳ-зори тутган
Оч бурлаклар кирап тушига.
Даҳшатларга юраги тўлиб
На таомни билди, на уйқу.
Ҳамроҳини саволга кўмиб
Ошиқарди билмакликка у:
«Сўйла, наҳот бор ўлка шу жил,
Тўқликтан йўқ заррача нишон?»
«Очлар, қуллар ютидир бу эл!» —
Жавоб қилди ҳамроҳи шу он...
Уйғонди — туш ўнг келди, ҳайҳот!
Тангрим! Нима жаранглар унда!
— Кучер, тўхта, отларни тўхтат,
Кишанларнинг зори бор бўнда!
Оҳ, маҳбуслар тўдаси ўтар!..
Юрагими сиқиб дард, азоб,
Кияягиня пуллар узатар.
«Рахмат, оқ йўл!» — бўлади жаноб.
Сўнгра узоқ-узоқ вақтгача
Хотирида қолар юзлари.
Ўйларини қуволмас асло,
Зарра юмилмайди кўзлари.
«Балки эрим ўтгандир бундан?..
Бу даргоҳда йўқдир ўзга йўл...

Изларини бўронлар кўмган,
Тезроқ ҳайда, ямшчик, илдам бўл!»

* * *

Қақшатади совуқ... Чўл, яланг
Кетган саринг шарқ томон узоқ.
Уч юз чақирим йўл босиб аранг
Учратасан шаҳар ё қишилоқ.
Қоп-қорайиб турған уйларга
Қувонч тўла ташлайсан назар.
Леким эли кетган қайларга,
Итлари ҳам кезмас дарбадар?
Қиши барчани уйларга қувган,
Чойхўрликидир ягона эртак.
Солдат, йўлчи кечар, узоқдан
Занг уради курант ҳам бирдай.
Дарчаларнинг ойнасида муз.
Жомеда бир милтирас чироқ,
Қамоқхона хўмраяр ёлғиз.
Ямшчик силтаб қамчисин тезроқ —
Ҳайдар... Учиб шаҳардан нишон,
Энг сўнгги уй бўлади ғойиб.
Ўнгда дарё, тоғ, тунги осмон,
Сўлда ўрмон ётар қорайиб...

Ўйдан ақл гангиган, хаста,
Ўйқу бермас хаёллар бироқ.
Дилда ҳасрат, ўй ҳар нафасда
Алмашинар чақмоқдан тезроқ:
Киягиня гоҳ ёру дўсти,
Гоҳ турмани кўрар дафъатан.
Худо билар, недир боиси
Ўйлаб кетди шу ҳолни бирдан...
Ўйлади у: юлдузли осмон
Қум сепилган саҳифа фақат.

Ой-чи — қизил сўргич босилган
Юм-юмалоқ муҳрдир албат...

Тоғлар ортда қолди. Уфқа
Туташ кенглик, йўқдир поёни.
Ҳаёт оти ёт бу тупроқда,
Учратмайсан ўсган гиёҳни.
«Тундра шу!» — қиласи баён
Ямшчик — саҳро арслони бурят.
Княгиня тўниб нигорон,
Аlam ичра ўйлар шу соат:
«Келар хасис ва очкўз инсон
Шу ёқларга олтин ахтариб.
Олтин ётар дарёда пинҳон,
Ботқоқликлар тубига кириб.
Дарёлардан олмоқлик маҳол,
Саратонда ботқоқлик мудҳиш.
Баттарроқдир ер остида ҳол,
Яна оғир кондаги қул иш.
Унда ҳоким қабр тинчлиги,
Қилча нур йўқ қоронғи, зулмат.
Лаънат бўлсин о, қуллар эли,
Нечун сени кашф этди Ермак?!»

* * *

Навбати-ла секин чўқди тун,
Кўк юзига яна ой болқди.
Княгиня ухламай бу тун
Оғир хаёл қўйнида оқди.
Кўзи кетди... Боз қучди рўё:
Гўё тураг қалъя бошида.
Кўз олдида шаҳри муҳайё,
Ҳаёт қайнар ичи-тошида.
Улкан ва кенг майдони сари
Чопишади сўнгсиз оломон:

Мансабдори, поп, савдогари,
Жарчилари шошар шу томон.
Турли-туман шоҳи ва баҳмал
Чакмон, пӯстин кийганлар юрар,
Майдондаги полкларга жадал
Янги полклар келиб қўшилар.
Йиғилишган мингдан ҳам зиёд
Солдат: «Ура!» қичқирап бот-бот.

Гоҳ шовқинлар, гоҳи эснар халқ,
Ниманидир кутар бариси.
Не воқеа юз берар — бефарқ,
Аранг англар юздан бириси...
Лекин кулиб мийигида гоҳ
Француз, пойтахтлик сартарош
Кезар, айёр югуртиб нигоҳ,
Бўронларга әди у йўлдош*...

Полклар етиб келиб, полкларга:
«Таслим бўл!» деб қиласи хитоб.
Таслим сўзи ётдир мардларга,
Найза билан ўқ бўлар жавоб.
Кирар даҳшат солиб шу маҳал
Бедов отда жасур генерал,
Учиришар отнинг устидан.
Яна бири келиб яқинроқ,
Дейди: «Айбингизни ўтди шоҳ!»
Ўлдиришар уни ҳам тездан.
Бир қўлда хоч, бир қўлида туғ
Митрополит бўлар намоён:
«Тавба қилинг, ёронлар, улуг
Шоҳимиздан тиланглар эҳсон!»

* «Бўронга йўлдош» — 1789 йилги француз буржуа революциясининг шоҳиди дейилмоқчи.

Чүқинишиб тинглашар сўзин
Ва сўнг иноқ қилишар хитоб:
«Бизни алқаб, жўнаб ҳол секин,
Не бор сенга, чол, бунда шу тоб!»

Шундан сүнгра түгриланиб түп,
Подшю ўзи буюар: «Оч ўт!..»

Княгиня кетиб ҳушидан,
Йиқилади қалъа устидан.

Күз олдида уаун, қоронғи,
Моғор босған ер ости йұлак.
Хар әшікда туради соқчи,
Хамма әшік құлғ тақа-тақ.
Худды тұлқын шовлаши мисол
Овоз келар ташқи томондан.
Ичкарида жаранглаб қурол
Ярқирайди ёнған фонардан.
Әшитади қадамлар сасин,
Гулдурашин тинглайди узоқ
Ва соатлар уради зангин,
Бақиришар соқчилар айғоқ...

Шунда оқсоқ, мүйловдор бир чол
Келар, қўлда бир шода калид.
«Юр мен билан, эй шўрли аёл,—
Дейди секин.— Бўлма ноумид.
У саломат, тирик, безарар,
Олиб борай, юр, ҳузурига...»
Ишонч, имон бир дунё қадар
Княгиня тушди йўлига.

Йўл юришар узоқ... Ва сўнгра
Фарчиллайди эшик. Шу замон —
Пайдо бўлар у... Тирик мурда,
Кўз олдида азиз, жонажон!

Кўкрагига босиб юзини,
Княгиня сўрарди тақрор:
«Ололаман сенинг ўчингни,
Нима қилай, айт! Қудратим бор!
Томиримда кезар жасорат,
Пок кўксимда ишқим яшайди!..
Елворайми?..» — «Борма, муҳаббат
Жаллод дилин юмшатолмайди!»
«Оҳ жонгинам! Сен нелар дединг,
Эшитмадим сўвларингни, оҳ!
Гоҳ бу машъум соат урар занг,
Шум соқчилар қичқиришар, гоҳ!..
Ўртамиизда буларга не бор!..»
«Саволларинг, азизим, маъсум»...

«Муддат битди. Айрилмоқ даркор!»
Деди ўтладаги шу машъум...

* * *

Княгиня қаттиқ чўчиdi,
Атрофига қаради хомуш.
Музлатарди даҳшат дилини,
Кўрганлари бари әмас туш!..

Ой сузади осмон аршида,
На кўрки бор, на сочар шуъла.
Қора ўрмон ётар чапида,
Тўлғанади Енисей ўнгда.
Зулмат! Олдда кўринмас бир жон,
Ямшчик мудраб әгарда ухлар.
Оч бўрилар ўрмон ортидан,
Юракларни тимдалаб увлар.
Дайди шамол гувлар дарёда,
Сув кўксини уриб кетади.
Кимдир бирор узоқ-узоқда,

Ет бир тилда қўшиқ айтади.
Мардлик шавқ-ла янграйди равон.
Жарангловчи бегона шу тил,
Бўронзада чағалоқсимон
Юракларни қилади чил-чил.
Киягиня жунжиди... У кеч
Қаттиқ совуқ қақшатарди жон,
Ҳоргин, чарчоқ танасида ҳеч
Курашмакка қолмади дармон.
Етолмасман, дейди манзилга —
Тушунчаси даҳшатга маҳкум.
Қистамайди отларни нега —
Ямшчик қўшиқ айтмай қолди жим?
Олдда борган тройка ғойиб...
«Тирикмисан, ямшчик, сезгир бўл!
Жимсан, гафлат келдими ғолиб?!»
«Қўрқманг, эски ошнадир бу йўл...»
Учадилар... Музли ойнадан
Кўринмайди теварак-атроф.
Оғир тушни қувар миядан,
Қилолмайди, аммо бартараф.
Хаста аёл иродасини
Бир нафасда туш этар мафтун,
Кўчиради сеҳграр каби,
Уни ўзга оламга бутун.
Ўзга олам — унга ошно,
Аввалгидай баҳш этар ҳузур,
Эрка тўлқин, майин, хушҳаво.
Ёрқин қўёш сошиб илиқ нур,
Қаршилайди муニс дўстсимон...
Қайга боқса шу бўлар такрор:
«Бу ер — жануб! Бу — жануб томон!»
Нигоҳлари тўнар баҳтиёр...

Булутсиздир зангор осмони,
Водийлари чечак қўйнида.

Сахий қуёш сочар зиёни...
Бутун тоғ, тош, сув ўйинида
Бир қудратли кўрк, чиройдан из,
Шодиёна бутун тупроқда.
Унга қуёш, чечак ва денгиз
Куйлар яккаш, «Сен жануб ёқда!»
Тизма тоғлар ва мовий денгиз
Ора чўқкан водий устидан
Киягиня учар қушдан тез,
Дил танлаган эркаси билан.
Пояндоздир чиройли боғлар,
Дараҳтларнинг томар шарбати,
Шохларида мевалар порлар:
Қизил, пушти, заъфар, новвоти.
Яшил барглар ора кўринар
Кўм-кўк осмон, сувнинг зилоли.
Денгиз бўйлаб сузар кемалар,
Елканлар-ла ўйнар шамоли.
Узоқларда кўринган тоғлар
Ғойиб бўлар осмон кўксидা.
Қандай ажиб тоғда бўёқлар!
Ҳозир эди ёқут тусида,
Энди қорли чўққилар бутун
Олмос каби сочади учқун...
Мана, борар юк ортган хачир,
Тақинчоги гулу қўнғироқ.
Орқасидан борар ёш хотин
Қўлда сават, бошида гултоҷ.
Хотин дейди уларга: оқ йўл!
Тоза, маъсум, чиройли кулиб,
Қучогига ташлар даста гул,
«Бу ер — жануб! О, бу ер—жануб!»
Бу — қора тўр юони қизлари
Ва сарғаймас гуллар ўлкаси...
Ана! Нафис куй овозлари...
Жим! Эммакда тун музикаси!..

«Бу әл жануб! О, бу ер жануб!
(Унга куйлар шу баҳтиёр туш.)
Яна ҳамроҳ ўзинг севган дўст,
Яна озод, мисоли ҳур қуш!..»

ИККИНЧИ БУЛИМ

Осоийшта, енгил, мустаҳкам,
Чана тинмай тун-кун мунтазам —

Икки ойга яқин босди йўл,
Лекин ҳамон олдинда йўл мўл.

Иркутска қолганда яқин,
Хаста, ҳорғин кўрди ҳамроҳин.

Базўр кутди икки кун. Сўнг тез
Княгиня жўнади ёлғиз...

Иркутскда Княгиняга
Пешвоз чиқди шаҳар ҳокими.
Суяқдай қоқ, таёқдай тикка,
Соч-соқоли оппоқ қор каби.
Хиёл очиқ пўстин кўксидан
Кўринарди мундир, крестлар.
Бошидаги қалпоқ устида
Хўроз пати майин ҳиллирар.
Не учундир сўкиб ямшчигин
Княгиня томон у шошди
Ва чананинг кичик эшигин
Унинг ўзи изват-ла очди.

К н я г и н я

(Бекат хонасига кира туриб)

Нерчинска! Отлар қўшилсин!

Губернатор

Атай сизга чиқдим мен пешвоз.

Княгина

Фармон беринг, талабим бўлсин!

Губернатор

**Ўтинаман, сабр этинг бир оз,
Йўлларимиз хийла мушкулроқ.
Дам олмаклик сизга фарз, зарур.**

Княгина

**Манзилимга қолмади узоқ.
Етоламан, Беҳад ташаккур!**

Губернатор

**Ҳар на деманг, саккиз юз чақирим,
Княгиня, йўл оғир даҳшат.
Бундан бу ёқ одимма-одим
Ортар йўлда жавф-хатар, заҳмат.
Икки оғиз сўз айтмакни дил
Ҳамда бурчим қилар тақозо.
Мен графнинг роса етти йил
Хизматларин келтирдим бажо.
Бу — саодат! Отангиз мумтоз
Ақл ва зўр қалбнинг эгаси.
Миннатдорлик ва комил ихлос
Билан энди умрим ҳаммаси
Қизларининг амрига тайёр.
Бу содиқ қул кутади фармон!**

К н я г и н я

Даркор әмас, ҳеч нарса зинҳор.

(Даҳлиз эшигини очиб)

Тайёрмасми чанамиз ҳамон?!

Г у б е р н а т о р

Бўлмагунча мендан бир буйруқ,
Бермайдилар отларни сизга.

К н я г и н я

Фармон беринг! Сўрайман, вақт зиқ.

Г у б е р н а т о р

Бир чигал бор... Шу кунлар бизга
Юборилмиш сўнгти почтадан
Қоғоз...

К н я г и н я

Қандай, унда бор не сир,
Қайтмоқ даркор әмасми, йўлдан?!

Г у б е р н а т о р

Балли, мақбул, энг тўғри тадбир.

К н я г и н я

Ким юбормиш, не ҳақда? Отам
Кузатди-ку ўзи сафарга?!
Хазилими ёки чинакам?
Ким отамни қиласар калака?

Губернатор

Тасдиқлашга қилмайман журъат.
Лекин манзил олис ва оғир.

Княгиня

Нега даркор сафсата, бу гап,
Бўлмадими от йўлга ҳозир?!

Губернатор

Йўқ, мен ҳали фармон бермадим.
Княгиня, бунда мен султон.
Хўш... Ўтиринг! Мен ҳали дедим,
Отангизга эдим қадрдон.
Гарчанд граф... Сизнинг сафарга
Марҳамат-ла берди ижозат.
Жўнашингиз бўлди зўр зарба...
Уйга қайтмоқ соз бўлур ғоят.

Княгиня

Йўқ, йўқ, бир йўл қилдимми қарор,
Бажармайин тинмайман зинҳор.
Отамни мен, мени нақадар
Отам севар, барини изҳор
Этмоқлигим сизга не даркор.
Яна юксак, яна муқаддас
Бурч чорлайди, қилмасдан абгор
Отлар беринг менга шу нафас...

Губернатор

Барисига етади ақлим,
Сизга қиммат ҳар бир дақиқа.

Аммо сизга аёймас балким,
Олдда кутар қандай саҳифа?
Беҳосилдир бизнинг бу қитъа,
Сиз борар ер ундан ҳам қашшоқ,
Баҳорининг ҳаёти қисқа,
Қаҳратони узундан-узоқ.
Балли, йилнинг саккиз ойи қиши,
Наҳот сизга маълуммае ахир?
Тамғасиз бир инсонни топиш
Унда маҳол. У ҳам тошбагир.
Атроф тўлиб дайдиб кезади,
У ерларда қочқинлар фақат.
Маъдан конлар жаҳаннам таги,
Маҳбусларнинг ҳаёти даҳшат.
Эрингиз-ла рӯбарў туриш
Бир нафас ҳам бўлмайди насиб:
Казармада қарииди турмуш
Қвас ичиб, турма нонин еб:
Беш минг сургун тўйиб жонидан
Кун ўтказар яниб тақдирин,
Жанжал бошлаб ётган жойидан
Ўлдиришар тунда бир-бирин.
Суд қилишар шаддод, бешафқат,
Жаҳонда йўқ ундан мудҳишироқ.
Княгиня, барига шоҳид
Бўлиб яшаш муносиб наҳот?
Тополмайсиз унда лутфикор.
Ҳеч ким сизга қилмас раҳм, шафқат.
Эрингиз-чи, банди гуноҳкор,
Нечун у деб чекасиз заҳмат!

К н я г и н я

Қўрқинчлидир, биламан аммо
Қўрар куни менинг эримнинг.
Уникидан бўлмасин аъло,
Майли, қолган ҳаётим менинг!

Губернатор

Сиз у ерда кўрмайсиз ҳаёт,
Иқлим сизни қиласар жувонмарг,
Уқтиргим фарз эрур ғоят,
Зинҳор-зинҳор бу йўлдан борманг.
Тавба! Наҳот ўша мамлакат
Лойиқ бўлса қадамингизга.
Оғзингиздан чиққан буғ шу пайт
Айланади қор билан музга!
Зулмат, совуқ йил бўйи ҳоким,
У ерда ёз кўрмайди умр.
Ботқоқликдан бурқиб бетиним,
Кўтарилар заҳарли ҳовур.
Юз кечаю кундуз қоронги
Чулғаганда еру осмонни,
Шум ўлкадан ҳаттоки қўрқув
Ичра қочар ўрмон ҳайвони...

Кягина

Яшайди-ку инсон у юртда,
Ўрганарман мен ҳам бемалол.

Губернатор

Бу яшашми? Ёшлигингиши...
Азиз қизим, бир ёдга олинг!
Бунда она қиз туққан замон
Чўмилтирас қорнинг сувига
Ва гўдакни увиллаб бўрон
Аллалайди туни бўйига.
Ўрмон тўлиб ҳайвон бўкириб,
Уйготади уйқудан уни.
Эшик қоқар шамол қутуриб,
Алвастидай қоронги туни.

Кезиб тўқай, чўлу саҳрони
Насибасин шундан қидирар,
Бу ўлканинг ерли инсони
Табиат-ла жангда чиниқар.
Сиз-чи?..

К и я г и н я

Майли, ўлим ёзиқ қисматда,
Ҳеч нарсага йўқдир илинжим.
Жўнамоғим фарз шу фурсаатда,
Ҳузурида жон бераман жим.

Г у б е р н а т о р

Лекин сиз жон беришдан аввал
Зўр азобга келасиз дучор.
Мангут етган бошига завол,
Энди унга сиз берманг озор.
Ўтинаман, борманг у ёққа.
Осонроқдир танҳо бермак дош,
Оғир меҳнат етиб суюкка
Ҳорғин қайтиб ўша қайғудош
Турмасига келиб чўзилур.
Қаттиқ ион еб уйқуга кетар.
Борди-ю туш бахш этса ҳузур
Маҳбус ўзин султон ҳис этар.
У орзулар қанотларида
Учар дўсту қардош, сиз томон,
Уйғонади меҳнат тонгида
Руҳи тетик, дили беисён.
Борсангиз-чи?.. Унинг-чун бутун
Ширин хаёл бўлар бегона.
Сизнинг тўқкан кўз ёшга, ўзин
Гуноҳкор деб билар ягона.

К н я г и н я

Ҳаҳ! Бу сўзлар барини асраб,
Ўзга учун қилинг эҳтиёт.
Бу сиз берган азоблар қатра
Қўзларимдан оқизолмас ёш.
Этмак учун бурчимни адо
Мен юракда қилиб аҳд-паймон,
Эл, юрт, азиз отамдан жудо
Шошарканман севганим томон.
Наҳот кўз ёш олиб бораман,
Унинг мудҳиш турмасига, ҳеч!
Ғурурини сақлаб қоламан,
Багишлайман томирига куч.
Нафрат зўрдир жаллодимизга,
Ҳақлигимиз қилганмиз шуур.
Шунинг ўзи зўр таянч бизга!..

Г у б е р н а т о р

Гўзал хаёл, ажойиб ғуур!
Бу хаёллар беш кунлик фақат.
Бир умрга чекмайсиз-ку ғам?
Сўзларимга ишонинг, албат
Ҳаёт тусаб қоласиз сиз ҳам.
Бунда қаттиқ нон, турма, таъна,
Мұхтоҗлигу мангуллик зулм.
Унда ҳурлик, ҳурмат, дабдаба,
Ҳашаматли сарой ва базм.
Ким билади? Тангрига маълум,
Бир кимсага берарсиз кўнгил.
Қонун сизни қилмаган маҳрум...

К н я г и н я

Бас, ё раббий! Нақадар разил!

Г у б е р н а т о р

Ошкор этсам фикримни аён,
Жамоатга қайтингиз тезда.

К н я г и н я

Кўп ташаккур, ташаккур, эҳсон,
Олижаноб ўгитингизга.
Жаннат эди бир вақтлар у жой
Ўхшар эди гўзал рўёга.
Ғамхўр қўли билан Николай
Айлантириди тақири саҳрога.
Тириклайн чирири инсон жим,
Ер юзида юрган мурда ул.
Эркаклари бир тўда хоин,
Аёллари муте, аянч қул.
Не топардим у ердан? Риё,
Таҳқирланган номус ва ифлос
Мурдорликнинг безбет, беҳаё
Тантанасин ва разил қасос?
Йўқ! Кесилиб кетган ўрмонга
Мени тортмас ҳеч нарса унда.
Бир чоғ бошин чўзган осмонга
Дублар қулаб, қолгандир кунда.
Қайтиб бормоқ? Фитнаю бўҳтон
Машъум ишлар ичра әгмак бош?
Бир бор кўзи очилган инсон
Унда топмас паноҳ ва йўлдош.
Йўқ! Кўргим йўқ уларни асло,
Караҳт, бефаҳм сотқиндир бари.
Эзгулик, ишқ, ҳурлик жаллодин
Таъқибидан бўламан нари.
Гуноҳидан ўтиб рақибим,
Севгучимни қиласай фаромуш?

Губернатор

Үйлаб кўринг! Ахир, жон қизим!
Ташламоқни у билди-ку хуш.
Нечун уни севмак, оҳ-фигон?

Княгиня

Бас, генерал, жим бўлинг бир зум!

Губернатор

Томирингизда жасоратли қон
Кезмасайди бўлардим мен жим.
Ҳеч нарсага этмайсиз бовар,
Олга қараб қоқасиз қанот.
Балки сизни ор сақлаб қолар,
Гурурингиз бағишлар ҳаёт?..
Сиз-ку унга ақл, донг, бойлик,
Бокира қалб қилдингиз тортиқ,
Хотинимнинг не кечар ҳоли,
Демади, у ақалли! Ортиқ
Бўш ҳулёлар ортидан кетди,
Шу қисматга бўлиб мубтало.
Сиз-чи, унинг изидан энди,
Чопмоқдасиз гўё қул, гадо.

Княгиня

Йў? Эмасман ожиз қул асло,
Мен аёлман, хотинман, хотин.
Аччиқ, оғир қисматим, аммо,
Унга содиқ бутун ҳаётим.
Оҳ, ўзга бир хотин туфайли
Унутсайди эрим бу замон,
Топар әди қалб кучи, майли,

Унинг қули бўлмасга имкон.
Мен биламан, танҳо рақибим
Ватанига бўлган муҳаббат.
Керак бўлса, севгувчи қалбим,
Такрор-такрор афв этар албат!

* * *

Княгиня тугатар... Ҳорғин
Жимир бирдан ўжар генерал.
— Беринг фармон,— дер аёл тағин,—
Чанага от қўшсинлар дарҳол!
Бу талабнинг адоси оғир.
Ерга қараб қолар чол узоқ.
Хайрлашиб генерал охир,
Чиқиб жўнаб қолади шу чоқ.

* * *

Давом этди эрта ҳам шу ҳол,
Эшитгани бўлди насиҳат.
У мўътабар кекса генерал
Умидларин барин этди рад.
На ёлвормоқ, на-да эътиқод
Зарра келолмади кўмакка.
Ҳорғин, лекин мағрур, сервиқор
Юрди уйда у ёқ-бу ёққа.
Ва сўнг деди: «Афсус, мен кутиб,
Сизни халос этмакди бурчим.
Унутмангки, бу йўлни тутиб,
Борингиздан бўласиз маҳрум!»

«Йўқотгудек менинг нимам бор?!»
«Эр изидан қилмоқ-чун парвоз
Имзо чекиб давлат, эътибор,
Ҳақ-ҳуқуқдан кечажаксиз воз!»

Бу сўзларнинг тошдай ботишин,
Кутган эди генерал жаноб.
Мудҳиш оташ каби ёқишин
Кутган эди. Шу бўлди жавоб:
«Бошингизда сочингиз оппоқ,
Қилиғингиз боладан баттар.
Бизга вафо қилмайди ҳеч чоқ
Сиз атаган улуғ ҳуқуқлар.
Йўқ! Зарра йўқ, мен учун қадри,
Олинг, кечдим баридан шу он.
Чекай имзо, у ҳужжат қани,
От қўшишга сиз беринг фармон!»

Губернатор

Имзо чекмак бундай ҳужжатга?
Сизга нима бўлди? Ё раҳмон!
Бу демакки, бутун давлатга:
Отангиздан ўтмиш мол, унвон,
Бир кун умри бўлганда адо
Қолдиргуси мерос, ҳақ, маҳр —
Барисига демак алвидо?!

Қашшоқ бўлиб кўрасиз умр!
Зодагон деб атамас ҳеч ким,
Бутун мулкдан бўласиз жудо.
Йўқ, чуқурроқ ўйланг, мен кетдим,
Яна қайтиб келаман аммо.

* * *

Лекин қайтиб келмади шу кун.
Тун ер узра ёйганда чодир,
Княгиня бемадор, сўлғин,
Чол томонга жўнади охир.
Генерални дедилар бетоб,
Ҳузурига киролмади у.

Тузалгунча ҳасрату азоб
Ичра кечди беш кун серқайғу.
Кириб келди у олтинчи кун,
Этди кескин фикрини изҳор:
«Княгиня, менда сиз учун,
От беришга йўқдир ихтиёр.
Буюраман, этапга қўшиб
Йўллайдилар сизни у элга.»

К н я г и н я

Е раб, ахир ой-йиллар ўтиб
Мен етаман қачон манзилга?

Г у б е р н а т о р

Холингизни йўл қилмаса танг,
Нерчинска етасиз кўклам.
Соатига тўрт чақирим аранг
Боса олар кишанбанд одам.
Бир дам тўхтаб олар қиёмда,
Кун ботганда — қўяр тошга бош.
Довул кўчса чўл-биёбонда,
Бурканади қорга мисли тош.
Судралишга бўлмас ниҳоя,
Бири оғрир, йиқилар бири.

К н я г и н я

Англолмадим, сиз демиш боя
Этап деган сўзниңг таъбирин?

Г у б е р н а т о р

Бу — ашаддий ўгри, бошкесар,
Кишанланган маҳбус галаси.

Яроғ тутиб кузатиб кетар,
Казакларнинг бераҳм бандаси.
Қочмас кўзни қилиб шамғалат,
Бир арқонга боғланган бари.
Бошда яроғ ярақлар бот-бот,
Сургалади занжир сингари.
Этап — турган-битгани оғу,
Йўлда ҳалок бўлар неча жон.
Этап тузиб жўнатасан-у,
Конга ярми етмайди омон.
Ўлим топар бир пашшамисол,
Бу даҳшатнинг қишида йўқ тенги.
Наҳот сизга муносиб шу ҳол,
Княгиня, қайтинг сиз энди!

К н я г и н я

Оҳ, бас! Сиздан кутгандим буни,
Сиз... Сиз ёвуз! Бу қандай риё!
Ўтиб кетди бир ҳафта куним,
Одамларда шафқат йўқ асло!
Айтмадингиз нечун бир йўла,
Кетган бўлар эдим у нафас.
Фармон беринг, йиғсинлар тўда,
Менга фарқсиз, тез жўнасам бас!

Г у б е р н а т о р

Йўқ! Чанада борасиз албат,—
Қичқирди-ю, генерал шу вақт
Қўли билан ёпди кўзларин.
«Сизга шунча бердим мен азоб,
(Панжа ўта оппоқ мўйлабин
Ювар эди кўз ёши шу тоб.)
Афв этасив, қийнадим, лекин,

Азоб чекдим ўзим ҳам ёмон.
Йўлингизга ғов қўймоқ учун
Олган эдим мустаҳкам фармон.
Қанча ғовни қўйдим кетма-кет,
Мен кўрмаган қолмади чора.
Ёлғиз улуғ тангридир шоҳид,
Ҳақ олдида виждоним тоза.
Сургундаги ҳоким очликдан,
Эркин нафас бегона ҳаёт
Ва этапнинг даҳшатга тўлган
Қул меҳнатин тасвирлаб аён,
Қўрқитмоқчи бўлдим мен сизни,
Билмадингиз қўрқувни асло!
Кечмасинлар гуноҳимиизни,
Майли, бошим танамдан жудо
Бўлсин. Ортиқ бермайман азоб...
Истамайман қилмакни ситам.
Етказаман уч кунда шитоб.
(Чол эшикни очиб қичқирди)
Хой... Қўшинглар отларни илдам!

1871

ХОТИМА

Ким унутар машъум йиллар тарихин!
Ёт элларга бадарга эрлар изидан —
Кетган шонли хотинлар ажиб таърифин...
Сен у давр фожиасин кечир кўзингдан!
Эзгу ботирликлари юксак, беғубор,
Қувғинларга паноҳкор фариштасимон
Таянч, қудрат, куч бўлиб ўлмас,
 вафодор —
Оғир кунда бўлишди шулар намоён.
Балки ҳали қиссамиз қиласиз давом

Эл-юртдан кўнгил узиб қорли чўлларда
Ўлганлар хотираси ўчмайди тамом,
Мадҳ этилур бир чоғлар ўлмас куйларда
Нақадар жозиб, гўзал сиймолар! Инсон
Кўрганмикан ҳеч қачон бирон элу юрт
Тарихида бу сифат кўркни бир замон!
О, бу номлар тарихде бўларми унут!
Келажак шоирлари унутмас асло!
Тақдирини биз таъриф этган мард аёл
Баридан ҳам ёрқинроқ порлайди аммо.
У мудҳиш турма йўлин ўтди безавол.
Шафқат билмас одамлар рақобатлари
Йўлларига кетма-кет ғовлар ташлади.
Сололмади дилига ҳеч қўрқув-даҳшат.
Баридан ўтди илк бор шу ёш жасорат.
Ўзгаларга ботирлик учун очди йўл,
Қаҳрамонлик, шарафга даъват этди ул!

КНЯГИНИЯ М. Н. ВОЛКОНСКАЯ*

Бувимнинг эсдаликлари

(1826—27-йил)

I БОБ

Бор бўлгур неварадар! Букун ҳам яна
Ўйнаб сайдан қайтиб уйга эртароқ:
«Буви, зериқдик жуда! Ёғинли тунда
Суратлар осиг уйда ўтирган бир чоқ
Сўзлаб берган эдингиз қизиқ ҳикоя,
Эшитгандик зерикмасдан, жон буви, яна
«Шундай бир қисса айтинг» деб бениҳоя
Қистаб ўтиришарди теварагимда.
Дедим: «Ҳали сиз ёшсиз, эшитасиз хўп,
Менинг ҳикояларим бўлар кўп китоб.
Ҳали ўйинқароқсиз, улғайиб-ўсиб
Ҳаммасига тушуниб оласиз боб-боб!
Не бўлса, ёшингизга муносиб барин,
Ақлингизга таққослаб ҳикоя қилдим.
Боринглар, далаларни, шаҳар боғларин,
Кезинг, ўйнанг... Эз куни ўлтируманглар жим!»
Неварадар олдида қолмай деб қарздор
Эсадаликни ёзишга киришдим бу кун,
Айнан шулар учун ҳам таниш, дўсту ёр
Суратларин асрайман ардоғлаб бутун.

* Княгиня Мария Николаевна Волконская (1805—1863)—1812 йил Ватан урушининг қаҳрамони генерал Н. Н. Раевский-нинг қизи. 1824 йилда дескабрист Сергей Григорьевич Волконский-га (1788—1863) турмушга чиқади.

Мендан хотира қолур альбом ва чечак —
Синглим — Муравьеванинг* қабри гуллари,
Коллекция қилинган хил-хил капалак,
Чита ** табиатининг манзаралари.
Темир билак узукни қиласман ҳадя.
Дейман мұқаддас билиб ардоғланг шуни.
Боболаринг мен учун бир туғфа дея
Кишанидан ясаган сургунда уни.

Киевга яқин жойда, болажонларим,
Бир сокин қишлоқчада келдим дунёга.
Оиланинг әркаси, севгани эдим,
Наслимиз ҳам бой әди ва аслзода —
Отам яна күтарди унинг шуҳратин,
Ватанидан азизни билмаган ҳеч вақт,
Бу ҳаловат билмаган жанговар учун
Қиммат эди ботирлик келтирган шавкат.
Мўъжизалар яратиб курашларда у,
Бўлди ўн тўққиз ёшда полкка командир.
Жаҳонга машҳур қилган зафар гултожи,
Жасорат, мардлигидан нишон әди бир.
Форс, швед юришининг жангув жадали
Жанговарлик шонига дебоча бўлди.
Саркарданинг ҳеч ўлмас хотиралари,
Ўн иккинчи йил билан маҳкам қўшилди.
Бу ерда ҳаёт ўтди қаттиқ курашда,
Юришларда биз бўлдик ёнида ҳамдам.

* Александра Григорьевна Муравьева эри декабрист Никита Муравьев орқасидан Сибирга бориб, 1832 йилда ўша ерда вафот қилиди.

** Читада қамоқхона бўлиб, Сибирга ҳайдалган декабристлар ўша ерда яшар әдилар.

Унинг ҳаётин ўйлаб қўрқув, ташвишда
Ўтмаган кун бормикан ойда бир кун ҳам?
Смоленск шаҳрининг ҳимоячиси,
Олдда бориб ҳар хавфга бўларди қалқон.
Ўқ еб Лейпциг ёнида яна әртаси,
Кўксисда ўқ билан жанг қилди ёмон.
Ўлмаслигин нотиқлар этди мадҳия,
Ҳаёт йилномаси ҳам шундай қилди қайд:
Яшар экан Она юрт — буюк Русия
Саркардалар ичидаги яшар у ҳар вақт.
Хотирадан силинмас шуҳрати, шони!
Русия доҳийларин куйлаган замон
Жарагли мисраларда қайд этиб номин
Ҳурматин Жуковский қилганди баён:
Дашков ёнида шахсан жанг қилган ботир,
Ўғилларин курашга бахш этган ота —
Ватанпарвар отани нақл этди шоир,
Баҳодирлик кўрсатди беҳад жангларда.
Улкан-улкан жангларда катта бобонгиз
Ёлғиз куч-ла келдими рақибдан баланд?
Жасоратга жанговар заковатини
Дейдиларки, саркарда қилолган пайванд.

Уруш ташвиши билан хаёл паришон,
Оила ҳаётидан туради узоқ.
Жойи келганда қаттиқ. Нақ тангрисимон
Баркамол кўринарди онамга ҳар чоқ.
Ўзи ҳам онамизни севарди жондан,
Қаҳрамон отамизга бизлар ҳам мафтун.
Энди юришлар тугаб, қутулиб жангдан
Оилада хотиржам дам олди бутун.
Шаҳардан четда эди уйимиз у дам,
Болаларни инглиз аёлга бериб,
Дам оларди отамиз. Шу ерда мен ҳам
Бой дворян қизига не бўлса вожиб

Барини ўрганардим, тайёрлардим дарс,
Боғни көзіб ўйнардим, куйлардим шодон.
Овозимни эшитган қиласы ҳавас,
Отам ҳам севар әди тинглашни ҳар он.
Езувларин тартибга соларди аста,
Газета, журналларни қўймасди қўлдан.
Базм берар, ўзидай мўйсафид, кекса
Генераллар қадами тинмасди уйдан.
Бундай чоғлар баҳсларнинг бўлмасди сўнги,
Биз ёшлар-чи, танцадан тинмасдик бир дам.
У замонлар, жонларим, уйимиз кўрки,
Базмлар маликаси әдим, рост айтсан:
У хумор кўзларимда ёнган мовий ўт,
У кўркам қора-қўнғир узун соchlарим,
У қорача юзимда мисоли барқут
Шўх товланган қизиллик, гўзал қошларим.
Баланд бўйим, келишган нозик қомат, қад,
Мағруронга юришим — у замон бутун
Полкка яқин яшаган офицер, гусар,
Бор гўзал йигитларни қилганди мафтун.
Лекин хушомадларга қилмадим парво,
Яна мен-чун ғам еди отамнинг ўзи:
«Бўй етиб қолдинг, қизим, куёв ҳам аъло,
Лейпциг бўсағасида жанг қилган: уни
Шаҳаншоҳ отамиз ҳам этади иззат,
Мардлигини тақдирлаб қилди генерал.
Сендан катта... ва лекин ўқтам, азамат
Волконский! Шоҳ кўрик ўтказган маҳал
Кўрган эдинг сен уни... уйда неча бор
Учрашгансиз ва сайр этгансиз боғда!»
— «Ҳа, эсимда! Баланд бўй, хушқад генерал...»
«Худди ўзи!» — деди-ю кулди мийигда.
— «Шу қадар оз сўзлади, отажон, менга!»
Деёлдиму қизарип кетганим сездим.
«Сен у билан баҳтиёр бўласан!» — дея
Шарт ҳал қилди, бир сўзга журъатсиз әдим.

Икки ҳафта ўртада ўтар ва ўтмас
Сергей билан қовушдик ўқилиб никоҳ.
Қайлигим деб атаган кунлар ҳам кўпмас,
Эр деб атаб тўймасдан қолавердим тоқ.
Бир паноҳда яшаган кунлар бўлди кам,
Бир-бировни кўрмакка юрдик интизор.
Узоқ-узоқ қишлоқлар бўйлаб сочилган
Ҳарбий бригадалар қишиларди. Кўп бор —
Тез-тез Сергей бўларди уларга меҳмон.
Бу ўртада мен бўлдим тўсатдан бетоб,
Врачлар жўнатдилар Одесса томон.
Шифо берди ёз бўйи денгиз ва офтоб.
Шу қиши олиб кетмоққа келди Сергей ҳам,
Бирга кечди бир ҳафта шодлик, роҳатда.
Бош квартирда эдик... бизнинг баҳт, ором,
Тамом бўлди, биз яна қолдик оғатда:
Бир кун қаттиқ уйқуда эшитдим бирдан,
Сергей дер эди менга: (яқинди саҳар)
«Тур, жоним, калитларни топиб бер тездан
Ва каминга олов ёқ!» — Мен ташлаб назар
Чуқур ҳаяжон ичра кўрдим эримни.
Ранги оппоқ оқарган. Каминни ёқдим.
Стол яшикларидан қоғозларини
Бир-бир олиб ташларди оловга шошқин.
Апил-тапил бирига кўз югуртар гоҳ,
Гоҳи бирин отади ўқимай ўтга.
Мен ҳам кўмаклашардим жисмимда титроқ,
Қоғозларни итариб ўтга сукутда
Сўнгра деди: — Азизим, жўнаймиз ҳозир!—
Сочларимни силади ишқ, ҳаяжонда.
Нари-бери йигишиб бор-йўқни охир,
Хайр-маъзур қилмасдан жўнадик тонгда.
Уч кечаю уч кундуз тинмай босдик йўл,
Сергей хафа, қайгадир шошарди ғоят.
Етиб келгач отамнинг ҳовлисига ул:
Менга хайр, деди-ю кетди шу соат...

«Кетди!.. Нечун ранглари бу қадар оппоқ,
 Не ҳодиса юз берди шу бир кечада.
 Нечун рафиқасига бир сўз демаёқ
 Кетди... Ё раб, қолди не кулфат ичида!»
 Узоқ на уйқу билдим, на-да тасалло,
 Шубҳалар чангалида қийналди юрак.
 «Кетди у, жўнаб кетди! Яна мен танҳо!..»
 Қариндошлар йигилиб юпатар бирдак.
 Ишли одам, кутмаган бир хизмат чиқиб,
 Шошилинч кетган, дея юпатар отам:
 «Балки императорнинг ўзи чақириб,
 Бирон махфий иш билан жўнатган. Сен ҳам —
 Йигламоқни бас қилгин! Сафарларимда,
 Ҳарбий ҳаёт жафосин баҳам кўргансан.
 Биласанки, у қайтиб келар тез кунда,
 Қалб остингга бебаҳо гаров туттагансан.
 Ўзингни ардоқлашга мажбурсан сўзсиз,
 Сабр қилсанг ҳадемай келиб қолади:
 Хотин эрин сафарга кузатиб ёлғиз,
 Қўлда гўдакча билан кутиб олади!..»

Ҳайҳот! Сен айтганларинг келмади, афсус!
 Кўришмади шўрлик хотин билан уйида.
 Азиз, тўнгич ўғилчасин отаси — маҳбус
 Уйда эмас, ёт жойда олди қўлига.

Нақадар қиммат тушди менга тўнгичим,
 Роса икки ой ётдим оғир дард чекиб.
 Жоним азоб ичида, ўлган дил, руҳим,
 Кўрган кишим энага бўлди кўз очиб.
 — Келдими? — деб сўрайман, юракда қўрқув,
 «Мактуб борми?» — «Йўқ!» — жавоб бўлди
 сўроққа.

«Отам қани?» — «Жўнади Петербургга у». «Акам қайда?» — «Аканг ҳам келди шу ёқقا».

Менинг эрим келмади, мактуб йўқ ҳатто,
Отам билан акам ҳам жўнамиш у ён.
Мен ҳам онамга дедим: «Бас, етар кутмоқ,
Шунча кутдик. Мен ўзим жўнайман шу он!»
Бормасликка ёлвориб ялинди онам,
Қароримдан қайтмоққа йўқ эди қудрат.
У сўнгги тун... Бу тунда мен учун мубҳам
Юз берган ҳолнинг барин эслаб бир муддат,
Менинг эрим устига ҳалокат, гусса,
Солганини англадим қора бир кўлка...

Илк баҳор фасли эди. Дарёлар ўта
Тошбақа одим билан тушдим мен йўлга.

Мен етиб боргунимча кетдим мадордан
Ва отамдан сўрадим: «Қаерда эрим?!»
— «Эринг Молдавияда. У жангга кетган».
«Сизга хат ёзмайдими?» Отам маъюс, жим
Уйдан чиқди. Акам ҳам кўринмасди шод.
Хизматкорлар ҳаммаси сокин ва хомуш.
Дарров сездим: бир сирни қилиб эҳтиёт,
Яширишиб дилимни әтишмоқчи хуш...

Дейишди: Сен чарчаган ва ҳордиқ даркор,
Қўйишмади ҳеч кимни ёнимга яқин.
Атрофим ўрагандай пўлатдан девор,
Газета ҳам бермасдан эздилар бағрим.
Хаёл қилдим. Эримнинг кўп-ку қардоши,
Хат ёзаман ёлвориб, қилсинлар жавоб!
Ҳафта ўтди, жавоб йўқ! Ўтли кўз ёши
Рухсоримни қуидириб, қиларди хароб...

Оҳ, яширин аламлар туйгусидан зўр
Нима ҳам бор! Мен қатра тўқмасликка ёш
Қасам ичиб отамдан сўрадим чин сўз.
Жимдир падар. Жим атроф. Сукутдир йўлдош.
Шўрли отам, севгандан қийнайди мени.
Қизғангандан қиласи дилимни абор.
Билдим, билдим, оқибат барча бор сирни,
Нақ ҳукмнинг ўзидан ўқидим ахбор.
Фитначилар ичида Сергей ҳам бормиш,
Ағдармоқ бўлибдилар ҳокимиятни.
Қўшинларни тузишиб битганида иш...
Очилибди... унга ҳам қўйилган айбни...
Ўқидиму, гуриллаб айланди бошим.
Кўзларимга ишонмай қарайман такрор.
«Наҳот!» дейман,— ҳеч бовар бермайди ҳушим.
Сергейга шарафсиз иш келишмас зинҳор!

Мудҳиш ҳар бир у сўзнинг магизии чақиб,
Юз қайта ўқиганим ҳамон хотирда.
Отамнинг ҳузурига бордим мен чопиб,
Унинг доно сўзлари баҳш этди далда.
Енгил тортдим, елкамдан гўё тушди тош.
Аммо ўкинч шул эди Сергейдан фақат:
Нечун мени қилмади сирига йўлдош?
Ўйладиму, афв этдим уни шу соат:
«Қандай айтсин! Шу қадар ёш эдим у чоқ.

Ўғли ҳали қалбимнинг остида эди.
Ўртамизга тушганда бу аччиқ фироқ.
У ҳам она, ҳам фарзанд хавфида эди».
Мен ўйладим: «Гарчанд зўр бошга тушган
дард.
Лекин умид барчаси бўлганмас барбод.
Сибирь — даҳшат! Оҳ, Сибирь йироқдир беҳад,
Аммо унда ҳам инсон кечирар ҳаёт!»

Мен Сергейни эркалаш орзу ўтида
Туни бўйи тўлғондим, ёндим беқарор.
Наҳор чоғи кўзимни босган уйқудан
Руҳим тетик уйғондим, дардан бегубор,
Кундан-кунга ўзимни сездим саломат,
Танишларни кўришга толпинарди дил.
Опамни топдим, сўраб бор сирни, фақат
Жавоблари қилмади дардимни енгил.
Опам деди: «Шу ўтган кунлари бутун
Сергейни сақладилар турмада маҳкам.
На қардошу, на дўстни қўйишиди яқин,
Фақат кечак кўролди уни отам ҳам.
Сен ҳам кўра оласан албатта висол:
Ҳукм ўқилиб бўйнидан олишгач хочни,
Кийгизишиди маҳбуслик жандасин дарҳол.
Яқинларин кўришга рухсат беришди!..»

Барча тафсилотларин айтмадим... Ҳайҳот
Дилга солиб бир машъум, хавфу хатар из,
Қасос тилаб то ҳануз кўтарар фарёд.
Болажонлар, яхшидир билмасангиз сиз.

Опам билан йўл олдик эрим томонга,
Қўргонда «генерал»га учрашдик аввал.
Аммо қоронги бўм-бўш ва кенг бир залга
Бизни бошлаб йўл олди кекса генерал.

«Княгиня, шу ерда кутинг, келамиз!»
Дея чиқди бир дунё қилиб тавозе.
Интизор тикилардим эшикка ҳаргиз,
Хаёлимда минутлар соатдан узун.
Мана қадам товуши ҳам бўлмоқда ғойиб,
Изларидан учади менинг ўйларим.
Назаримда: бир шода калитни олиб,
Мана очди занг босган қулфни шу зум.
Бир темир панжарали ҳазин ҳужрада

Холдан тойиб, толиқиб маҳбусим ётар.
«Рафиқангиз келди...» дер. Таниш чеҳрада
Қони қолмай оқарар, титрар, жонланар.
Рафиқа... қулогига ишонмас асло,
Йўлак бўйлаб чопади мисоли шамол.
«Ана у!» дер генерал чол сертаманю,
Мен оқибат Сергей-ла кўришдим висол.

О, даҳшатли бўронлар ўтмапти беиз;
Манглайида бўлибди ажинлар пайдо.
Ранги худди мурданинг юзидай туссиз,
Кўзлари аввалгидай чақнамас асло.
Менга ошно, хаёлкаш, секин бир нигоҳ
Аввалгидан теранроқ ва дардли боқди.
Бир сония синовчан боқди-ю гўё
Шу қарашда қалбимни бехато топди.
Кўзлари шодлик ичра сочарди учқун,
Кўкрагига отилиб йиглардим ўзим.
Эрим бағрига босиб шивирлар секин:
«Бунда бегоналар бор, унутма, қўзим».
Яна шундай дер эди: гўёки, унга
Эзгулик итоатни лозимдир билмоқ.
Турмада кун кечирмоқ қийинмас унча,
Яна нималардир деб куч-далда бермоқ
Бўлар эди... Кузатувчи, аммо безовта
У ён-бу ён юради. Ўнгайсиз эди.
Сергей кийим-бошига қилиб ишора
Деди: «Маша, сарпо-ла табрикли мени»
Сўнгра секин шивирлаб: «*Тушун ва кечир!*»
Кўзларига ярқираб қуайлади ёш.
Шу он етиб улгурди жосус териб сир,
Сергей ёшин яшириб қуийи эгди бош.
Дедим барака: «Сени жандада бу хил
Кўярман деб хаёлга келтирдим қачон?»
Шивирладим оҳиста: «*Англайман буткул,*
Аввалгидан ортиқроқ севаман, ишон...»

«Не қиласай? Энди умр кечар сургунда,
 «(Тирикчилик жонимга теккунча бир кун)»
 «Тани жонинг соғ бўлса, ғам тортиш нега?
 (Бизларни ажратолмас ҳижрон ва сургун)».
 «Ҳали сен шундаймидинг!» — мамнун деди-ю,
 Юзларини ёритди иссиқ табассум.
 Дастрўмолин дераза узра қўйди у,
 Мен ҳам унинг ёнига рўмолчам қўйдим.
 Кетарканман мен олдим унинг рўмолин.
 Эрим қўлида қолди менинг рўмолчам.
 Бир йиллик ҳижрондан сўнг, кўрмак-чун висол
 Берилган бу бир соат жуда эди кам.
 Не қиласиз, не илож, тугади муддат,
 Бошқалар ҳам кутмоқда кўришмоқ дийдор.
 Каретага ўтқазиб мени серҳурмат —
 Яна оқ йўл тилади генерал кибор.
 Рўмолчадан мен топдим бир жаҳон шодлик,
 Ўлиб юзу кўзимга суртдим мен уни.
 О, рўмолча бурчига не сўз ёзиқлик,
 Ениб-титраб ўқийман энтикиб шуни:
 «Азиз дўстим, сен озод, қарғама, афв эт,
 Руҳим тетик ва севган рафиқамни ҳам
 Руҳан тетик кўришни қиласман умид.
 Хайр, гўдак ўглимга ўллаиман салом...»

Эрим қариндошлари Петербургда кўп,
 Ҳаммаси ҳам этувли, донгдор зодагон!
 Эримни қутқармоқни ўтиндим мен хўп,
 Уч кечаю уч кундуз тортдим ҳаяжон,
 Отам дерди: «Қизим, бас, чекма изтироб,
 Қилмаганим қолмади, фойда йўқ фақат!»
 Император ҳазратдан қилиб илтижо
 Йиғлаб ёлворди бари — бу чин ҳақиқат.
 Лекин унинг тош қалбин юмшатолди ким?..
 Эрим билан сўнг дафъа кўришдим дийдор.
 Уни олиб жўнашди... Танҳо йиғлаб жим

Қолищ билан дилимдан эшитдим бир зор:
Қололмайман бу ерда, қолмайман асло,
Шошмоқ керак у томон, маҳбусим томон.
Отам уйи нафасим бўғади гўё,
Бормоқ учун ижозат сўрадим шу он.

Болаларим, мен энди сўзлай батафсил,
Умидимнинг у машъум ғалабасини.
«Мен бораман» дедим-у, оилам аҳил
Кўндаланг қўйди йўлга раддиясини.
Парвардигор, не ишга бермадим бардош,
Не ғовларни ўтмадим, нелар кўрмадим!
Тўпланди ака-ука, қавму қариндош.
Киев ёнидан етиб келди волидам,
«Қилинг насиҳат» дея, буюрди отам.
Ялинмоқ ҳам, ёлвормоқ келмади бакор.
Тангри ўзи ярлақаб, менинг иродам
Барига ғолиб келди синмади зинҳор!
Дил йиглайди, кўзимда ёшдан йўқ асар
Яна дастурхон узра достон мен ҳақда
Оила жим. Гап ора сўрайди падар:
«Хўш, қароринг не бўлди?»— «Жўнайман, ота!»
Отам оғир сукутда... сукутда барча,
Йиғламоқдан юрагим эзилди оқшом.
Гўдагимни тебратиб ўйладим қанча...
Нохос отам ташрифи чўчитди тамом.
Дўйқ-лўписа кутгандим... Лекин паришон
Сўз бошлади, дил тўла меҳр ва ҳасрат:
«Қизим, ахир қилдинг-у бағримиэни қон,
Бу бетоле гўдакка йўқми ҳеч шафқат?
Жоним қизим, не кечар аҳволинг унда?
Бу қисматга ҳеч аёл беролмас бардош!
Ўзингни қурбон қилма, болам беҳуда,
У ерда тирик жонга гўр бўлар йўлдош».
Жавобимни кўзимдан қиларди фаҳм,
Пешанамни силайди эркалаб ўпиб...

«Кўрамиз!..» деди. Қаддин кўтарди расо,
Отам кўзида ёнди газаб учқуни:
Ўйламай «жўнайман»ни қиласан иншо,
Бир дам фикр қилдингми оқибатини!
Қайга, нечук? Бу ҳақда фикр этмоқ даркор,
Нелар дединг, жон қизим, билмайсан ўзинг.
Танангга ўйлаб кўргин, фикр этмай зинҳор
Наҳот бизни ўзингга рақиб деб билдинг?!
Ота-она душманми ва ёки нодон,
Ўз тенгингдай қиласан улар билан баҳс.
Юрагингга назар сол, фикр қил обдан,
Келажакка зийрак боқ, қизишмай бирпас,
Ўйлаб кўр! Эрта билан кўришамиз, хайр...»
Отам кетди даҳшатда, дардли, дарғазаб.
Мен-чи, санам олдига худди ўликдай
Йиқилдиму йигладим, чилпора юрак...

III БОБ

«Үйлаб күр!..» Мен тунларни ўтказдим бедор,
Күзимда ёш шашқатор қилдим ибодат.
Яратганни күмакка чақирдим зор-зор,

Кўлгина таҳсил олдим, уч тилда эркин
Сўзлай билдим, ўйнадим, танцага тушдим.
Зодагонлар, киборлар базмининг ёрқин
Шўх юлдузи мисоли ярқираб ўсадим.
Баҳслашардим мен жўшқин ҳар чоқ, ҳар бобда,
Музикани билардим, куйлардим гўзал.
Чавандоздек енгил, соз учардим отда,
Аммо лекин ўйлашни билмадим азал.

Фақат йигирма ёшга кирдим-у ахир
Идрок әтдим бу ҳаёт әмас ўйинчоқ.
Зотан, гүдак чоғда ҳам дил кетарди зил
Әшитилса гумбурлаб түп овози гоҳ,
Бекаму күст яшардик баҳтиёр, эркин,
Қаттиқ-қайрим бир сүз ҳам айтмасди отам,
Үн саккиз баҳоримда бўлдим мен келин,
Ҳеч нарса ўйламадим мен ўшанда ҳам...

Фикрлашдан толмади бошим сүнгги пайт,
Ёрилгудай ўртанди дард чангалида;
Муаммолар даставаъл ақлим этди забт.
Мудҳин фалокат аён бўлган онидан
Кўз олдимдан кетмади Сергей бир нафас,
Тутқунликда қийналган сўлғун ва бемор,
Шу ҷоққача менга ёт қанча эҳтирос
Менинг шўрлик қалбимга инъом қилди ёр.

Барча азобни тортдим, аммо баридан
Ожизалик туйғуси келди бешафқат.
Кучлиларга ёлвордим, сўраб тангридан —
Ёрга кўмак изладим... беҳуда фақат!
Ғазаб хаста кўксимни қиласди тилка,
Вужудимни ўрарди қайноқ ҳаяжон.
Толпинар, интилардим қучиб таҳлика,
Осойишта ўйлашга йўқ эди имкон!

Энди, шаксиз, ўйламоқ, фикр этмоқ даркор,
Отам шуни хоҳлайди, шудир хоҳиши.
Майли, менинг иродам ўзгармас зинҳор,
Майли, беҳуда, бўшдир фикрим, ўйлашим,—
Бурчим ота фармонни этмоқдир адо,
Ўйламоққа аҳд қилдим, жонажонларим!

Кекса отам дер эди: «Ўйла, биз ҳақда,
Эмасмиз-ку бегона биз сенга, қизим!
Ота-она ва ҳатто гўдак фарзандни
Бир андиша қилмасдан ташламоқчисан —
Нима учун?» — «Бурчимни этмак-чун адо». — «Не кунларга ўзингни банд этмоқчисан,
Азобами?» — Мен унда чекмайман азоб.
Мудҳиш азоб кутмоқда бу ерда мени.
Ҳижрон бағрим поралаб қиласди хароб,
Сизга итоат билан қолганим куним,
На кечаю, на кундуз топмасман ором,
Шўрли етим бошида мен тўкиб кўз ёш.
Ёлғиз эрим ҳақида ўйларман мудом,
Эшитарман беозор таънасин ювош.
Қайга бориб исноддан топарман омон,
Қайга бошим ураман халқнинг ҳукмидан?
Бевафо деб тўқирлар шаънимга достон,
Таъналарин ўқирман табассумлардан:
. Ҳашаматли базмлар очолмас дилинг,
Сенинг жойинг ҳазинлик чўйкан оч сахро -

Ҳорғин, тутқун турманинг кунжагида жим
Оғир ўйдан бир ўзи қийналар... танҳо
Суянчиқсиз... сен дарҳол ўша ёққа бор!
Озод нафас олурман унинг ёнида.
Шодлигига шериклик, тутқунлиқда ёр
Бўлмоқ бурчим!.. Ҳам шуни хоҳлайди худо.

Уэр этинг, азизлар! Дилем азалдан
Тақдиримни ҳал қилган, қарорим кескин,
Ишончим зўр — бариси қодир худодан,
Сиз-чи, раҳм ва шафқат қиласиз лекин.
Гар танламоқ фарз бўлса икки йўл холос:
Бири ўғлим ва бири тутқундаги эр.
Маҳбус томон еламан, мен унда даркор,
Ўша томон, у томон, юрак шуни дер!
Ўғлимни ўз оиласам бағрига олур,
Кўп ўтмайин у мени унутади ҳам.
Гўдагимга бобоси ўз ота бўлур,
Уни она меҳрига ўрайди опам.
Ҳали ўғлим жуда ёш улғаяр, бир кун
Мудҳиш сирнинг барчаси бўлади аён.
Ишонаман: у англар она туйғусин
Ва юракдан афв этар, комилдир имон.

Елғиз фарзанд десаму, қолсам бу ерда,
Сўрамасми сир унга бўлганда ошкор:
«Гариб отам ёнига бормадинг нега?»
Гина, таъна қилмоғи, ёзғириги бор?
Йўқ, йўқ, эрим дардига бўлмасам даво,
Тириклайн қабрга кирганим афзал.
Сўнг ўғлим нафратига бўлмоқ мубтало?
Йўқ! Нафрат истамайман асло, ҳеч маҳал!..

Балки, балки... Ё раббий! Ўйлаш ҳам даҳшат!—
Унутарман кўз очиб кўрганини яна?
Янги рўзгор ва әрга қилиб итоат

Ва бўлурман ўғлимга бир ўгай она?
Баттол она! Оҳ, жисмим куйдирмоқда ор,
Кечир, менинг эй азиз, шўрли бадарғам.
Мен унутай? Сени? Йўқ, ўйламоқ малол,
Сен қалбимнинг ягона севгани, эркам.

Ота! Қани билсанг, у, нақадар қиммат,
Оҳ, билмайсан уни сен! Кўрдим мен илк бор.
От устида ясанган сипоҳ, хушқомат
Полк олдида турарди. Гўзал ва кибор.
Қаҳрамонлик, шуҳратли ҳаёт қиссасин
Унинг жангчи дўстлари достон қилганда,
Чанқоқ, жону дил билан тинглаб ҳаммасин
Шу довюрак ботирга бўлдим мен banda.

Сўнгра... Сўнгра фарзандим отаси бўлди.
Яна ортди муҳаббат, севгим юракда.
Лекин бутун туну кун ҳижронда ўтди
Тирик эди у фақат жангда, курашда...
Сиз сўраманги, биз қайди кўришдик дийдор,
Қудратини кўрсатди тақдир ва қисмат.
Қалб севгисин энг тоза гавҳарин сўнг бор
Турма ичра топширдим унга умрбод.

Туҳмат, бўҳтон барчаси бекор, беҳуда,
Аввалгидай бенуқсон содиқ, соф эди.
Мен турмада кўраркан мудҳиш жандада
Нақ тангрини севгандай севдим мен уни.
Энди маъсум улуғлик порлаб юзида
Бир дам жилмай турарди кўзим олдида.
Машаққатлар гултожи ёниб бош узра
Барқ уараиди илоҳи ишқ нигоҳида.

Отажоним! Мен уни кўрмогим даркор...
Ҳасрати ғуссасидан бўламан ҳалок.
Сен ўз бурчинг ўтаркан аядингми жон,
Нақ шундай таълим бердинг бизга ҳам ҳар чоқ.

Қонли кураш, қирғинли жанг оловида
Үғилларин бошлаган қаҳрамон жасур, —
Наҳот энди бечора қизнинг жонига
Ора кириб кўрмайсан қарорин маъқул!
Шу хаёллар узун тун кечди бошимдан,
Отам билан сұхбат ҳам ўтди шу зайл...
«Ақлсиз қиз!» — деди у охир қошимдан
Кетар экан. Онамда заррача майил
Кўрганим йўқ. Ҳамма жим, ҳаммада алам,
Ога-иним, қариндош — барида сукут.
Оғир қунлар ўтиши мушқул бунча ҳам,
Бунча отам юзидан кетмайди булут.
На маслаҳат, на кўмак берар бир кимса,
Аммо мени босмади зарра ҳам мудроқ.
Яна мижжа қоқмадим тун узун кеча,
На чора бор, подшоҳга бўлдим хат ёзмоқ.
(Трубецкая Катяни йўлидан гўё
Қайтаришга берганмиш подшоҳ фармон.)
Юрап эди шундай гап, пешонам қора
Бўлмасайди шу тақлид. Қўрқардим ёмон.
Йўқ, бу шов-шув барчаси экан беҳуда,
Опам Катя Орлова* элтди мактубим.
Жавоб ёзмиш шоҳ ўзи, ташаккур, унда
Дилга дармон бахш этган эзгулик кўрдим.
Ҳазратлари мулойим, зебо ва дилкаш
(Шоҳ Николай ёзганди француз тилда)
Баён этмиш. Мен борар ўлкада яшаш
Амри маҳол. Даҳшатли ёвуқ у элда
Дагал, қўпол махлуқлар кечирар ҳаёт.
Мен-чи, ҳали жуда ёш, нафис бир ниҳол,
Моҳирлик-ла ишора қилмишки: ҳайҳот
Омон қайтмоқ у ердан мушқул ва маҳол.

* Екатерина Николаевна Орлова (1805—1885), генерал Раевскийнинг бош қизи, декабрист Михаил Федорович Орловнинг хотини.

Сўнг олий зот лутфи-ла кўрсатиб карам,
Жасоратим мадҳ айлаб қилмиш баҳтиёр.
Жинояткор эримни... афсуски, бу дам
Афв этишга бермасмиш бурчи ихтиёр.
Бизнинг юксак ҳис-туйғу муҳаббатни рад
Қилмоқ учун топмай куч бермиш ижозат.
Лекин бўлар кўп аъло: кетмай мен фарзанд
Билан қолсам.

Ҳаяжон жисмимни ғоят
Ўраб олди. «Жўнайман!» кўпданми юрак
Бундай шодлик-қувончга бўлганди макон?
«Мен жўнайман! Гап тамом, тез учмоқ керак!..»
Мен йиглайман, ибодат қиласман шодон...
Уч кун ҳозирлик кўрдим узоқ сафарга,
Кийим-кечак ғамладим, тикиридим пўстин —
Асл буюмларимни қўйиб гаровга
Сотиб олдим оддий, соз арава шу кун.
Қариндошлар ҳаммаси ҳайрон-ҳайратда,
Тарааддудим уларга кўринарди фол.
Ўйда ҳеч ким ишонмас... қувонч, ҳасратда
Сўнгги тунни гўдакка бериб бемалол
Танҳо қолдим. Ёнидан силжимай ўғлим
Кулгуларин сингдирмоқ бўлдим хотирга.
Эркаладим сўнг дафъа ва ўша машъум
Мактуб муҳрин ўйнадим у билан бирга.
Ва ўйладим: «Бечора, эй маъсум гўдак,
Сен билмайсан не сир бор ўйинчоғингда!
Бунда шўрлик қисматинг, бегуноҳ малак,
Бошингда онанг бўлмас турган чогингда!»
Юзим қўйиб оқ момик қўлчаларига
Қайғу-ҳасрат аламда йиглаб ёлвордим:
«Кечир, ўғлим, отанг-чун, отанг дардига
Даво излаб сени мен қолдирмоқ бурчим!..»

У қиқирлаб кулади, қаёқда уйқу,
Хатнинг кўркам конвертин ўйнаш билан шод

Катта алвон муҳрга толпинади у,
Ўйнаб ётди ўғлим...

Сўнг тонг ёришар чоқ
Пишиллаб ухлаб кетди, ширин гўдагим!
Юз рухлари гулсимон алвон тус олди.
Унинг азиз юзидан узмай кўзларим
Ибодатда ўтказдим тунни...

Тонг отди...

Бир нафасда сафарга бўлдим мен тайёр,
Арава шай... яна мен дил чекиб фарёд:
«Ўғлимга оналиқ қил! Ўкситма зинҳор!»
Деб опамга ёлвордим... Опам қасамёд
Қилди санам олдидা. Ҳамма жим, маҳзун,
Ҳамма сокин... Жудолик оқар сукутда.
Гўё бу кун мен ўлдим оиласам учун!
Тангрим... Санаб бўлурми машъум минутда
Қанча азизларимдан бўлдим мосуво?!

Ана, онам боши ганг, ўтирас хомуш,
Ҳамон идроки бовар қилмайди асло:
Унинг қизи кетишга жасорат қилмиш!
Отам қовоги солиқ, бош эгиб қуийи,
Бир чеккада ўлтирас на гап бор, на сўз.
Бўздай оппоқ юзидан ўқиши-чун ўйин
Саволомуз нигоҳлар қадалур ҳануз.
Аравага солинди сўнгги анжомлар,
Мен йиглайман, танамда битмоқда дармон.
Аранг ўтган минутлар берган азоблар
Оғир эди... Опамни қучдим. Мехрибон
Волидамни бағримга босдим сўнг дафъа:
«Паноҳида сақласин сизларни тангри!»—
Ўпдим оға-инимни. Улар отамга
Тақлид қилиб жим эди отам сингари...
Отам секин қўзғалди, қаҳру ғазаби
Қисиқ лаблар, юздаги ажинларида.
Сукут ичра қўлига бериб мен хочни
Хузурида тиз чўқдим, ялиндим яна:

«Кетмоқдаман, бир сўз айт, муҳтарам падар,
Тангри ҳаққи, ўз қизинг гуноҳидан ўт!..»
Мўйсафид жим ва ўйчан ташлади назар,
Жиддий, доно кўзида меҳр, алам, ўт.
Таҳдид билан қўлини кўтариб аста
Шивирлади (зўр титроқ босганди жисмим)
«Бир йилдан сўнг қайт уйга, унутма! Йўқса
Оқ қиласман!..»
Ё раббий... беҳол йиқилдим.

IV БОВ

«Хайрлашмоқ етар, бас, етар кўз ёшлар!»
Тройкага ўтиридим — учдим шу замон.
«Хайр энди, азизлар, қавму қардошлар!»
Ота уйидан чиқдим! Совуқ қаҳратон.
Уч кечаю уч кундуз юрдим тўхтамай,
Мен суръатнинг ортидан әргашиб кетдим.
У шифолаб дилимни доно табибдай.
Ҳадемай Москвага келиб ҳам етдим.
Қайин эгачим Зинанинг тушдим уйига,
Княгиня ёш эди, оқила, дилбар.
Қўшигини тинглаган — мафтун куйига,
Унга музика, санъат муқаддас гавҳар.
Ҳикоя мажмуасин қолдирди мерос,
Шоир Веневитинов ишқида шайдо —
Нозик латофатга бой, тўла эҳтирос,
Гўзал байтлар, мисралар бахш этди аъло.
Бир йил Италияда яшаб, «Кўзида
Жануб кўкин чиройин олиб келди у».
Шундай таъриф этганди ёниб кўйида
Юрган шоир бир ажиб шеърида эзгу...
Москва киборига малика эди.
Артистларга бўларди бир паноҳ мудом.
Зўр эди уларнинг ҳам ҳурмати, меҳри,

Шимол Кориннаси* деб бергандилар ном.
Йиғлашдик. Менинг машъум, қатъий қарорим,
Унинг ҳам юрагига келган эди хуш.
«Бардам бўл, эй гарифим, унут ғам, зоринг,
Қара, гулдай чехрангга булат ёйилмиш!
Қандай қилиб тарқатсам уни юзингдан?
Оҳ, сендан айрилмоғим нақадар қийин?
Жонгинам, кечга қадар бир оз сен ол дам,
Сўнгра оқшом бир катта базм қурайн.
Қўрқма, хуш келар нозик табиатингга,
Дўстларим янги әмас, бари қадрдон.
Дилрабо қўшиқларни айтамиз бирга,
Севимли пъесаларни қўямиз чандон...»

Оқшомгача шаҳарга тарқалиб кетди
Москвага келганим ҳақида достон.
Чунки ёшу қарининг оғзида эди
Эрларимиз тақдири худди шу замон.
Шунинг учун суд ҳукми чиққан чогида,
Ҳайрат, даҳшат ўради барчани дарҳол.
Шунинг учун Москва салонларида
Ростопчин латифаси бўларди такрор:
«Ямоқчи Европада бўлмоқ-чун боён
Исён кўтарса қилмас таажжуб ҳеч ким.
Бизда революция қилди зодагон,
Ямоқчи бўлмоқликни истаган балким?...»

Ҳамма оғзида достон бўлдим шу кунлар...
На фақат бир ёзувчи, шоир, санъаткор —
Йигилди барча машҳур хешлар, уруглар,
Қўш отли кареталар кўчада қатор.
Парикларин упалаб обдан сероро,
Потёмкин тенгқурлари бўлди намоён.
Саф тортиб сертавозе, сипо, боодоб
Таъзим ва иззатларин қилдилар баён.

* Коринна — қадимги юони шоираси.

Саройларда бир чоғлар сурган давр-даврон,
Мансабдор кампирлар ҳам очдилар қучоқ.
«Қандай қаҳрамонлик бу! Ажаб бир замон!..»
Бир мақомда бошларин чайқашар узоқ.
Москванинг зодагон, корчалонлари
Ва шаҳарда ўрнашган йўловчики бор,
Шу кеч бўлди Зинанинг азиз меҳмони.
Йигилди казо-казо артист, санъаткор,
Замонанинг энг донгдор, атоқли, мумтоз
Италян куйчиларин тингладим бунда.
Отамнинг ҳамкорлари, дўстлари ғаммоз,
Ғуссаю алам чекиб ўтирас шунда.
Мен интилган ўлкага кетган дўстларнинг
Туғишган, яқинлари шу ерда ҳозир.
Шу ерга келган сўнгги алвидо сўзин
Айтмоқ учун севикли ёзувчи, шоир:
Бунда Одоевский, Вязевский ҳам,
Аммам қизига ошиқ жўшқин, меҳрибон
Шоир ҳам шунда эди. Сўнгра эшитсам
Вафот этмиш у шоир бевақт навқирон.

Пушкин ҳам шунда эди... кўриб, бўлдим шод,
Оиласиз ёшлигин ҳамроҳи шоир.
Юрзуфда отам билан кечирди ҳаёт.
Менинг шўх ёшлигимнинг гувоҳи шоир.
У вақт сайр қилган эдик истаган қадар,
Гул сочишиб ўйнардик бир-биринига.
Уй ичимиз Қrimга қилганда сафар,
Пушкин ҳам ҳамроҳ бўлди оиласизга.
Зерикиш билмай йўл босдик, ниҳоят олдда
Тоғлигу, Қора денгиз бўлди намоён.
Бир дам бунда тўхташга амр этди отам,
Биз кенглиқда яйрадик, ўйнашиб шодон.

Энди ўн олти ёшга тўлгандим шу йил,
Еш бўлсан ҳам шўх эдим, чаққон ва бўйчан.

Оилани тарқ этиб құшсимон енгил
Үйнардим жингалак соч шоир-ла хурсанд.
Шляпа киймаганман, узун соч ёйиқ,
Тепамдан қиздирарди түшкі офтоб,
Мен денгизга учаман, қаршимда ёниқ
Жануб соҳили ётар чиройи яшнаб.
Атрофга түймай боқар күзларим хушхол,
Сакрайман, денгиз билан ўйнайман шодон.
Тошқин узоқ кетади, мен эса дархол
Чопиб, елиб бораман яна сув томон.
Тошиғни яна келаркан соҳилга яқин,
Тұлқинлар қатор-қатор оқаркан, мен боз
Қочишигә шошиламан дилларда ёлқин,
Тұлқин эса орқамдан қиласы парвоз!..

Пушкин узмай нигоҳин қараб турарди
Ва қуларди ботинкам ҳүл қилганимдан.
«Энагам келаётир, жим!» — дердим жиддий,
Оғим ҳұллигини яшириб ундан.
Сүнгра мен «Онегин»да учратдым барин,
Ажойиб мисраларни унга ўқидим.
Олов ўраб оларди ўқиган сайин.
Шод әдим... Бари ўтди. Энди қаридим.
Ұтди у ажиб кунлар... Яширай нега,
Пушкин менга ошиқдек күринди шу чоқ.
Дархақиқат, у күнгил қўймади кимга,
Кимни севиб қолмади у юрак қайноқ?!
Ўйлайманки, илҳоми қадар у замон
Әҳтирос-ла севмаган ҳеч кимсани у,
Юрагини банд этган дарду ҳаяжон
Илҳом эди ва унга бўлган ишқ — қайгу.

Юрзуф ажойиб макон — мисли гўзал bog,
Бу боғларнинг ичиди водийлар яшнар.
Денгизидан нарига чўккан Айиқ төғ,
Қоялар этагига ёпишиб қатор —

Татарлар кулбалари туарди ва ток
Занглари тиккаликка кетган чирмашиб.
Зилол колонналардай саф тортиб терак
Қимир әтмай туради түп-түп бўлишиб.
Ҳовли олдик бир баланд қоя остидан,
Юқориги хонага ўрнашди шоир.
У дер эди: — Мамнунман ўз қисматимдан,
Шу денгиз, шу тоғларга бўлибман ошиқ.
Пушкин сайр этарди ёлғиз ва танҳо.
Кезиб юрар эди у тинмай узун тун.
Тунлар денгиз соҳили бўлди сайргоҳ
У чоқ фикрини Байрон этганди маҳкум.
Пушкин Лена исмли менинг синглимдан
У инглиз тилидан кўп олар эди дарс.
Таржима қилган гарчанд Лена Байрондан
Ва шоирдан сир тутиб кўрсатган эмас.
Фақат менга ўқирди ўз машқин синглим,
Сўнгра йиртиб ташларди барин шу замон.
Лена ҳам шеър ёзишин уйдан аллаким
Бир кун келиб шоирга айламиш баён.
Дераза орқасидан парча ва парча
Қоғозларни тергандада сир бўлди ошкор.
Шодликдан таржимани мадҳ қилиб анча
Қиз шўрлинин қизартди шоир неча бор.
Машғулотин тугатиб бизнинг ҳовлига
Тушар эди қилмоқ-чун бир дам фарогат.
Тик, ям-яшил туарди айвон олдида
Шоирнинг содиқ дўсти бир туп сарв дараҳт.
Шоир тонгни кутарди сарв соясида,
Хушлашарди сафарга жўнارкан ҳар он.
Дейдиларки, ерлилар ҳикоясида
Кўринармиш Пушкиннинг излари ҳамон:
«Осмонга болқиб-болқиб чиқиш билан ой,
Дарҳол учиб келармиш шоирга булбул.
Куйларига маст бўлиб қолармиш тоғ, сой,
Борлиқ табиат жимиб тинглармиш буткул.

Халқ сўйлайди: «Сўнг булбул ҳар келганда ёз,
Боққа учиб келишни қилмабди канда.
Гоҳ чинқириб, гоҳ йиглаб куйи тўла роз.
Чақирибди шоирни ҳар гўзал тонгда.
Лекин шоир ўлмиш-у, қанотли куйчи
Келмай қопти... Ва шундан бери сарв дарахт
Етим қолиб қайғуга, аламга тўлди,
Ҳамсуҳбати шу дengиз бўлибди фақат...»
Пушкин шарафга кўмди бу сарв дарахтин,
Сон-саноқсиз сайёҳлар зиёрат қилар
Соясида дам олиб, хотира учун
Хушбўй, зилол шохидан синдириб олар...

Шодлик, севинчсиз бўлди бу сўнгги висол,
Чуқур қайғу-аламга чўмганди шоир.
Юрзуф... дengиз... ва унда кечирган гўзал
Болалик ўйинларин эслатди ҳозир.
Ҳазилкашлик одатин унутиб бутун,
Меҳр ва шафқат тўла мен-ла тортди кам.
Бегам ўтган ҳаётнинг дўстига шу кун
Ўгит бериб оғадай бўлолди малҳам!
Анча юрди хонада, менинг ёнимда
Қисматим юрагига солганди ташвиш,
Болажонлар, сўзлари бари ёдимда,
Ундей баён қилмоғим ғоят мушкул иш:
«Боринг, боринг! Сизда зўр қудратли қалб
бор.

Жасур чидам, бардошга бойсиз ниҳоят.
Ҳалокатли сафарда иқбол бўлсин ёр,
Маҳрумликлар қилмасин асло хижолат!
Ишонинг, дилингизнинг бундай мусаффо
Поклигига арзимас разил жамият.
Унинг пуч ташвишларин соф севги, вафо
Мардлигига олмаган баҳтиёр минг қат!
Бу жамият — ҳамманинг кўнглига урган
Бир маскарад — унда қалб тош бўлиб мудран.

Оташин ҳақиқатга совуқ уфурган
Муттасил манфаатдор муз ҳукм сурар.
Йилларнинг қудрати-ла кетар адоват,
Замонлар йиқиб ташлар кўҳна тўсиқни,
Қайтиб келар отангиз шуҳрати албат
Ва қадрдан боғларнинг соя-салқини!
Ҳориган кўнглигизга шифобахш бўлиб
Зангори водийларнинг кирар шарбати.
Сўнг ўтмишга боққанда ғууррга тўлиб,
Яна сизни яйратар шодлик нашъаси...

Аминман! Қайғунгизга хотима бўлур,
Ахир шоҳнинг ғазаби бўлмас умрга.
Лекин чўл, саҳроларда топсангиз ўлим
Чин қалбдан ташаккур-ла олурлар тилга:
Қаҳратон совуқ элнинг қорли чўлида
Покиза дил қудратин қилиб намоён,
Очилмай хазон бўлган севги йўлида
Мард хотиннинг сиймоси дилбар ва жонон.

Сиз ҳалок бўлсангиз ҳам, сиз тортган жафо
Достони юракларда тирик қолади.
Эвара, чеварангиз саҳаргача то
Дўстлари-ла сиз ҳақда суҳбат қиласиди.
Сизнинг ҳеч унуглилар қиёфангизни
Кўрсатурлар афсус-ла уларга бир чоқ.
Узоқда ўлган азиз аждод руҳини
Шод этмак-чун қадаҳлар кўтарурлар оқ!..
Саҳродаги қабрнинг ёғоч хочидан
Мармар тош мангуроқdir албат — бегумон.
Долгорукая олам хотиротидан
Кетмас! Аммо Бирондан* қолмади нишон!

* Княгиня Наталия Долгорукая (1714—1771) фельдмаршал Шереметовнинг қизи, Сибирга эри орқасидан сургунга кетган. Эрнст Бирон — замонанинг зайлι билан бўлиб қолган золим ҳоқим, малика Анна Иоановнанинг хуштори.

На дердим! Соғлиқ, құдрат берсін худойим,
Ұлмасак күришмоққа топармиз имкон.
«Пугачев»ни ёзишга амр этди шоҳим,
Пугачев қиинамоқда борлигим ёмон.
Шараф-ла адо этмоқ истагим ғоят,
Шу туфайли Уралга қиласман сафар,
Баҳор нафаси билан жүнасам, шояд
Яроқли маълумотни тополсам, жадал —
Сиз томон йўл оламан Уралдан ўтиб!..»
«Пугачев»ни ёзди-ю, биз томон аммо
Шоир қорли ўлкага келмади етиб.
Ахир қандай қилсін у ваъдага вафо?

Музика тинглар әдим юракда ғусса,
Қўшиқнинг ҳар сўзини иламан чанқоқ.
Ўзим қўшиқ айтмадим нетай мен хаста,
Бошқаларга ёлвордим, ўтиндим қайноқ:
«Ўйнанг, дўстлар, мен жўнаб кетаман тонгда,
Куйланг жоним, куйланглар, янгратинг созни.
Бу қўшиқлар қаёқда, музика қайдада,
Куйланг, куй барбод этсин дилдаги розни»

Ажиб, нафис оҳанглар қуийилди равон,
Кузатиш қўшиғи-ла битди зиёфат.
Оғир ўйсиз ҳеч кимни кўрмадим! Бирон
Кишини учратмадим беқайғу ҳасрат!
Кампирларнинг салқиган жиддий юзлари
Совуқ тақаббурлигин секин йўқотди.
Гўё ҳаёт жилваси сўнган кўзлари
Мехр, шафқат ёши-ла қайтадан ёнди.
Бор санъатин кўрсатди барча санъаткор,
Оқ йўл, бахтиёр сафар орзуси куйда —
Жарангларкан бу куйдан гўзалроқ не бор!
Хайру дуо сўзидан латиф куй қайдада!
Илҳом тўла созлари янграб бегубор,
Куйладилар кўзларда тўхтамади ёш.

Хушлашаркан ҳар бири қучоқлаб, такрор
Дерди: «Ҳар ерда бўлсин тангримиз йўлдош».

V БОБ

Қаҳратон совуқ, йўллар оппоқ ва текис,
Заррача булут йўқдир қиши осмонида.
Ямшчикнинг қошу соқол, мўйловлари муз,
Дир-дир титраб ўтирас соябонида.
Орқасида, кифтида, қалпоғида қор,
Бўғилар, отларини ундан илгари.
Чопар, чопар, отлари тинмайин зинҳор,
Йўтал бўғиб келарди тезлаган сари...

Одатдаги лавҳалар: кўркам бир чирой —
Сўлмас саҳро чиройи — бу рус ўлкасин,
Улкан соялар ташлаб қалин қарағай,
Салобат-ла шовиллар оғир ва ҳазин.
Яланглик мудраб ётар олмос чодирда,
Қор ичига кўмилиб кетмиш қишлоқлар.
Помешчик уйи яққол тураг адирада
Черков гумбази нурда ёниб ярақлар...
Одатдаги учрашув: арава сўнгсиз,
Худогўй кампирларнинг дайди тўдаси.
Тройкада, пар тўшак устида семиз,
Талтайиб ботиб ётар савдо тўраси.
Пошшолик араваси! Ўнлаб арава:
Үйиб ортилган тўрва, тугунчак, қурол.
Лашкарлар! Ҳали кўп ғўр, мўйлаби сабза,
Янги солдат эканин сезасан дарҳол.
Ўғилларин кузатар дехқон оила:
Оталар, волидалар, опа-сингиллар.
Ҳар томондан дод-фарёд келар: «Полкига
Олиб кетди, бўтамни, оҳ тошбағирлар!»

Ямшчиғи гарданига муштини ниқлаб
Фельдъегерь борар эди ортидан жадал.

Мана, йўл ўртасида товушқон кўриб,
Помешчикнинг овчиси қувди шу маҳал —
Чопқир отида сакраб ўтди чуқурдан.
Итлар билан талашиб кетди ўлжасин.
Бутун мулозимларин йигиб нарида
Помешчик чақиради този тўдасин.

Одатдаги манзара: худди жаҳаннам —
Станция тиқилинч — жанжал ва талаш.
Болалар қараб турар деразалардан,
Совуқ қотган товуқлар олишар яккаш.
Темирчи дастгоҳида от типирчилар,
Юз-кўзин қурум босган темирчи шу он
Қўлда тобланган тақа, дўкондан чиқар:
«Йигитча, от туёгин, тут, қани чаққон!»
Йўлимизда биринчи довонди Қозон,
Мусоғирхонага ўрнашдим кириб.
Деразадан боқдим-у бўлдим пушаймон,
Чуқур ўксиниб кетдим базмни кўриб!
Қаттиқ диванда ётиб сурман хаёл,
Янги йилга қолибди бир-икки соат;
«Қандай хурсанд одамлар, қандай баҳтиёр,
Барчасида озодлик, ором, фарогат.
Кулишар, ўйин тушар, қувнашар, мен-чи —
Ғамга кириб бораман, хайр энди, шодлик!»
Нечун бундай ўйларга эрк бердим, нечун?
Ешлик, болажонларим, ҳаммаси ёшлик!

«Трубецкая қайтарилди!» дейдилар, эй воҳ!
Чўчитмоқчи бўлдилар яна бешафқат.
Мен қўрқмайман, ижозат берган подишоҳ!»
Қани олға, урмоқда ўнни ҳам соат!
Мен отландим, «ямшчик ҳам бўлдими тайёр»
«Киягиня, яхшиси, тонг билан жўнанг.—
Назоратчи чол қилди эътиroz изҳор:
Қорбўрон бошланмоқда, бир нафас қаранг!»

— «Ох, ҳали кўп мени учун кўргулик азоб,
Жўнайман, худо ҳаққи, тезроқ, тез фақат!..»

Қўнғироқ жаранглайди, қоронғи атроф,
Масофа кечган саринг ортар мاشаққат
Жўякларнинг устидан тушган каби йўл,
Енбошлилар брезиллади чайқашдан буткул.
Қаршимдаги ямшчикни кўрмайман ҳатто,
Ўртамиизда қор тепа бўлганди пайдо.
Тройка зўр зарб билан тўхтади қалқиб,
Оз бўлса учиб кетар эди арава.
Ямшчик нолир: «Кутайлик шу ерда қолиб,
Дерди: «Йўлни йўқотдик, қолдик овора!..»

Йўл излашга ямшчикни жўнатдим дарҳол,
Соябон аравамни чипта-ла ёпдим.
Ўйлайман: саҳар яқин бўлса эҳтимол,
Соат пружинасини оҳиста босдим.
Соат ўн икки, мана эски йил тамом
Ва янгиси дунёга келиб улгурди!
Сал кўтариб чиптани қарайман, ҳамон
Авжга чиққан қорбўрон, совуқ уфурди,
Унинг қандай иши бор ғамимиз билан.
Янги йилимизга ҳам этмайди парво.
Эй бўрон, ваҳимангга дош беражакман,
Ўкириб инграшларинг ранжитмас асло.
Бордир бағримни эзган ўзга ташвишим,
Ўша билан курашга кирганман ёлғиз...

Янги йил-ла табриклаб қўйдим ямшчигим,
Деди: «Бор тунашга жой, ўша ерда биз
Тонг отгунча бўламиз!» Кўнмай на йўл бор?
Етиб бордик у ерга, мажруҳ ва бежон.
Ўрмон қоровулларин қилдик биз бедор
Ва ис бурққан печини ёқдик шу замон.

Ўрмончилар сўзлади мудҳиш ҳикоят,
Хотирамдан силинмиш барча эртаги.
Иссиқ чой яйратган тан истар фароғат,
Аммо ҳамон сердаҳшат бўрон ӣиглаши.
Қоровул чўқинди-ю ўчириди чироқ.
Ўгай ўғли Федяни олиб ёнига
Эшикка қўйди икки зўр харсанг шу чоқ.
— Нега? Нечун? — «Айиқлар тегди жонимга».
Сўнгра қўп-қуруқ ерга чўзилди келиб,
Чўқди сукутга бутун қоровулхона.
Кунжакдаги чиштага мен ҳам чўзилиб
Ўйлаб кетдим, ўйладим. Гўё афсона...
Шодлик, нурга кўмилиб ўтди хаёллар,
Ўтди байрам кунлари мисли бир китоб,
Ранго-ранг гул, чироғдан чарогон заллар,
Ҳадялар... Соглиқ учун ичилган шароб...
Жўшқин сўзлар ва ширин эркалиқ бари
Нақадар ажиб эди, нақадар азиз!
Нечун Сергей йўқ бунда? Сергейим қани?
Эсладим-у қолгани унут бўлди тез.
Дераза тикиллатди совқотган ямшчик,
Сачраб турдим. Ўрмонлик мажруҳ қоровул
Тонг билан бизни йўлга олиб чиқди тик.
Аммо берган пулимни қилмади қабул.
«Ҳожати йўқ, жигарим, йўлингиз қийин,
Тангри сизни сақласин ўз паноҳида!»
Қақшатарди қаҳратон. Юрганинг сайин
Ортар йўл мashaққати, ортар ваҳима.
Соябон аравамни беркитдим, қуюқ
Сим-сиёҳлик қўпларди ғуссамни зиёд.
Не қилай! Шеър ўқийман, айтаман қўшиқ,
Эзмас ахир бу азоб, алам умрбод!
Майли, кўнглим йигласин, ўқирсын шамол,
Қорбўрони яширсин йўлларим менинг.
Фақат олга, мен олга юраман ҳамон!
Уч ҳафталиқ йўл босдим шундай бетиним...

Пайқаб қолиб бир куни шовқин-суронни,
Хиёл очиб чиптами ташладим назар:
Йўлимда катта қишлоқ... Тутиб осмонни
Ловиллаб ёниб тураг кўркам гулханлар.
Қарасанг, кўз қамашар, эркак ва аёл,
Деҳқонлару солдатлар санқишар бунда.
Ийлқиларнинг уюри кезар бемалол.
Ямшчик деди: «Ҳудди шу станциядан
Кумушчилар ўтади. Кўрамиз биз ҳам.
Узоқ эмас, шу ердан ўтади карвон».
Сибирь ўз бойлигини кўрмоқда баҳам!
Бу учрашув дилимни қилди кўп шодон.
«Кумушчилар келгунча кетмайман, шояд,
Эрим ва дўстларимдан тополсам дарак.
Нерчинскдан... Унда бор офицер албат...»
Ошхонада ўтириб кутмагим керак.
Офицер йигит кирди папирос чекиб,
Назар ташлаб мен томон иргамади бош.
Мағрур нигоҳ, такаббур юрди гердайиб,
Гапирадим томогим бўғар эди ёш:
«Кўргандирсиз... Декабръ воқеасининг
Қурбонларин қисмати сизгадир аён?
Омонмилар, ҳоллари нечук уларнинг,
Айтарсиз эрим ҳақда хушхабар бирон?...»
Сурбетларча ўгирилди у мен томонга,
Башараси даҳшатли, совуқ, дарғазаб.
Ҳалқа-ҳалқа тутунни пуфлаб осмонга
Деди: «Соғлар, шубҳасиз, аммо уларни
Мен билмайман. Билишга эҳтиёж ҳам йўқ.
Озмунча кўрмадимми бу сургуналарни!...»
Болажонлар! Бағримга теккан каби ўқ —
Жимиб қолдим. Дилемни ранжитди бадбаҳт!
Нафрат билан мен боқдим. У чиқди мағрур...
Печь ёнида исиниб ўтирган солдат
Қарғаганим эшитди. Совуқ бир ғуур
Ёки ваҳший бир кулги эмас, мулойим

Қалбида сўз тепелди майин, меҳрибен:
«Варчаси соғ!», деди у,— «Мен ўзим кўрдим,
Благодат конида ишлашар омон!..»
Сурбет қаҳрамон яна кирганда мағур,
Соябон аравамга жўнадим дарҳол
Раҳмат сенга, эй солдат, минг-минг ташаккур,
Тортган оғу-азобим кетмади увол!

Тонгда оппоқ сахрога тўйиб боқаман,
Қулоғимга жаранглаб келар қўнғироқ.
Ғарип кичик черковга кириб бораман,
Худогўй оломонга сингаман шу чоқ.
Эътиқод-ла тингладим поп ибодатин,
Менга дуо ўқишини қилдим илтижо.
Ҳар ёқ сокин, оломон кетмас, тинглар жим...
Мени қайғу ва алам қиласди адо!
Худо, нечун бизларга бу қадар озор?
Нечун бунча кўмилдик лаънат, таҳқирга?
Кўпдан бери тўплангандан кўз ёш шашқатор
Тўкилди дарё каби оппоқ тош ерга!
Гўё ҳалқ ҳасратимни кўргандай баҳам
Сукут ичра қиласди тоат-ибодат.
Попинг мунгли товушида жаранглар алам,
Қувғинларга худодаи тиларди мадад...
Саҳро ичра йўқолган ғарип, эй маъбад!
Сенда кўз ёш тўкишдан ёч қилмадим ор.
Дуогўй, ғамзадалар бўларкан ҳамдард,
Ўлик дилга заррача бермади озор!..

Бизга дуо ўқиган Иоани ҳаврат,
Ибодатини жон-дилдан этарди адо.
Сўнг қамоқда поп бўлиб қилганди хизмат,
Туғишгандай меҳрибон эдик биз ҳатто.

Тун. Йўлимиз қиялик тоғ әди баланд,
Ямшчик отлар тизгинин ололмай тутиб

Олтой тогнинг энг юксак чўққиларидан
Соябон арава-ла йиқилдим учиб!

Трубецкая Иркутскда тортган азобин
Такрорлаши нақ ўшандай менинг бошимда...
Байкал. Кечув! Совуқнинг қутурган тоби
Муз жилваси ўйнайди оққан ёшимда.
Чана юрар йўл энди бўлганди адо,
Соябон аравамдан айрилмоқ маҳол.
Оҳ, нақадар ачиндим! Мен унда танҳо
Йиглар эдим, ўйлардим, суардим хаёл!

Аравада йўлнинг қори сезилмас экан,
Арава хаёлимни аввал банд қилди.
Лекин кўп ўтмасданоқ бўлиб чалажон,
Унинг лаззат, ҳузури роса билинди.
Очликни ҳам танидим шу йўлда бироқ,
Бироқ ҳеч ким қилмабди мени хабардор.
Беҳуда иш, бу ердан овқат изламоқ,
Ёлғиз Бурат почтаси бунда барқарор.
Қоқ қиласкан офтобда сўқим гўштини,
Тошчой дамлаб устига қуярканлар мой.
О, худо кўрсатмасин сизларга уни!
Ўрганмаган одамга қийин ҳойнаҳой.
Нерчинский ёнида бўлди зўр базм,
Уни мешдай савдогар мен-чун қурибди.
Иркутскда кўрибди мени ва шу зум
Орқамдан тушибди-да, етиб келибди.
Мўл, тўкин базм қурди, раҳмат, ташаккур!
Ҳаммоми соз! Чучвара бўпти бамаза!
Катта уйда, диванда жон топиб ҳузур,
Бутун базм ўлиқдай ухлабман тоза.

Билмайман олдда мени кутарди не фол,
Тонг' отиш-ла йўл олдим Нерчинск томон.
Трубецкая келмоқда! — ишонмоқ маҳол —

Етиб олдим мен унга. Кўрганим замон:
— *Улар Благодатда* — дедим хурсанд, шод,
Қучогига ташландим, йиғлайман фақат.
Үн икки чақиримда Сергей, азиз ёр.
Енимда менинг Катям, қандай буюк бахт!

VI БОБ

Ким бўрону ҳасрату қайғуга ҳамроҳ,
Йироқ йўлнинг фироқин кечирса танҳо,
Саҳро узра кутмаган дўстибаногоҳ
Кўз олдида офтобдай бўлганда пайдо.
Бизнинг тоза дилларнинг шодлигин англар...
«Оҳ, чарчадим, ҳоридим, Маша, йўқ мажол!» —
«Йиғлама, шўрлик Катя, бизларни сақлар
Дўстлигу ёшлигимиз балодан омон!
Бир қисмат иккимизни боғлади маҳкам,
Иккимизни алдади бешафқат тақдир.
Баҳтимни ютиб кетган даҳшатли оқим
Сенинг толеингни ҳам ғарқ қилди ахир.
Худди яшил чаманда сайр этган мисол,
Оғир йўлга кирамиз иккимиз ҳамдам,
Барчасига берамиз бардош bemalol,
Суяшиб бир-биримиз, бўламиз бардам.
Нимадан маҳрум бўлдик, азизим, сўзла,
Шуҳратпараст, манманлик ўйинчоғими?
Эзгуликнинг муҳташам йўли бор олдда —
Тангри танлаган ўша азизлар роҳи.
Таҳқирланган жафокаш эrimiz топиб,
Дилларига бўламиз малҳам, тасалло,
Илтижо-ла жаллодлар дилин юмшатиб,
Азобига тоқат-ла бўламиз даво.
Мудҳиш турма ичидаги бўлувчи ҳалок
У азиз хасталарга шифо излаймиз.
Тинчимаймиз, тинмаймиз, мусаффо ва пок
Севгимиз қасамини адо этмай биз.

Майли, бўлсин жонимиз, бутун боримиз
Севганимиз ва тангри йўлига қурбон.
Ишончим зўр, худо бор мададкоримиз,
Мушкул йўлни ўтамиз саломат — омон!..»

Табиат ўз жангидан кетгандай ҳолдан
Жимиди. Соф очиқ кун совуқ ва сокин.
Нерчинск бўсағасин қоплаган қордан
Чанада учиб кетдим мисоли чақин.
Рус ямшчик сўзлар эди сургунлар ҳақда:
(Барчасини танийди, ҳатто номба-ном)
«Конга олиб борарадим мана шу отда,
Лекин ўзга арава қўшардим тамом,
Туюлмасди йўл, чоги, унча ҳам оғир,
Кулишарди ўзаро ҳазил қилишиб.
Мен онам қилиб берган ватрушкаларин
Нонуштага емасдан бердим улашиб.
«Ол, йигит, бир кунингга яраб қолар, ол!—
Дея узатишди пул, олмадим зинҳор...»

Қишлоққа учиб кириб мисоли шамол,
Сўради: «Қайда тўхтай, жаноб хонимлар?»
«Сен тўғри авахтанинг бошлиғига юр!»
«Эй дўстларим, бўш келманг, бўлинг
сержуръят!»

Бошлиқ семиздан келган, жиддий ва магрур
Одам эди, сўради: «Хўш, қандай хизмат?»
«Қўлланмани ўқишиб Иркутскда
Нерчинскка йўллашга бергандилар сўз?..»
«Қолиб кетгандир йўлда, бўтам, бир ерда!»
«Бир нусхаси ўзимда, мана кўринг сиз!..»
— «Нусха эмиш, у паққос қўлга туширас!»
«Мана подшоҳимнинг рухсати жаноб!»
Французча билмасди, бу тентак, ўжар
Ишонмади.— Кулардик, чекардик азоб.
«Мана подшоҳ имзоси, кўринг: Николай»,

Имзо нима? У билан қандай иши бор?
Ҳозир Нерчинскийдан қоғоз ҳойнаҳой,
Бориб олиб келмаклик бўлади даркор...
Аммо ўзи боришин қилди у баён,
Эрта билан бу ерда бўлармиш қоғоз.
«Бу аниқми?» — Чин сўзим, қилманглар гумон,
Сиз ётиб дам олсангиз бўларди кўп соз!..
Эртамизнинг орзуси ёнаркан дилда,
Етиб бордик бир кичик деҳқон уйига.
Слюдадан ойнаси, мўрисиз кулба,
Аранг сиғдик, хонанинг эну бўйига.
Эшикка тегар оёқ, деворга бошим,
Зотаи, не ҳам сиғарди у чоқ кўнгилга,
Бу тахлит икир-чикир элитмас ҳушим.
Не қунларни солмади фироқ бошларга.
Биз биргамиз! Писандмас мушкуллик, қайғу,
Барисини енгишга қодирман бу кун!

Барвақт турдим, Катяни босганди уйқу,
Хунобликдан қишлоқни кездим бус-бутун:
Юзга яқин хонадон жар қучоғидан
Боқар бизнинг кулбадек гариб, беҳашам.
Панжарали гишт уйни кўрдим бир ёқдан
Соқчилар айғоғида сақланур маҳкам.
«Шу ерда эмасмикан жинояткорлар?»
«Шунда эди, кетишид!» — «Қаёққа?» — «Ишга!»
Мени бошлаб кетишиди дарҳол болалар,
Биз чопамиз, оҳ, юрак интиқ етишга!
Эримни тезроқ кўрмоқ муқаддас истак.
У узоқмас, у юриб ўтган шу жойдан.
— «Кўрасизми уларни?» — сўрайман бирдак,
«Ҳа, кўрамиз! — қўшиқни боплашар обдан.
Ана эшик, кўрдингми? — энди биз кетдик.
Хайр!..» дея жўнашди ёш ҳамроҳларим.

Қарайман, ер остига очилган эшик,

Соқчиси турар эди жиддият-ла жим.
Жиддий турар... Қўлида яланғоч қилич,
Ўйламанг, олтин қилди мушкулим осон.
Болажонлар! Олтин-зар суюмади ҳеч,
Гарчанд олтин тўймакни қилдим мен баён!
Балки қиссан давоми сизни этар жазм,
Сўз қушлари кўксимда учишга тайёр,
Сўзларман. Аввал айтай ташаккурларим,
Сизга, рус кишилари, минг қуллуқ изҳор!
Мен қаерда бўлмайин: йўлда, қувғинда,
Сургуналар уқубатин кечирган вақтим,
Оғир чидамсиз дардга бардош берганда
Сен ўзинг далда бўлдинг, жонажон халқим!
Қанча ҳасрат, ғам, қайғу тушди бошингга,
Ўзгалар аламига бўлдинг сен шерик.
Кўз ёшим тўкилажак пок тупроғингга,
Аллақачон тўкилган ёшлиаринг сенинг.
Бахтсизларга орқа пушт, рус халқим, сенсан,
Иккимизни бир азоб айлади ҳамдард.
Юртимда дегандилар: «Сизга сургунда
Ҳатто қонун ўзи ҳам қилмайди шафқат!»
Ҳаётнинг оғир, мушкул босқичида ҳам
Пок, меҳрибон дилларни учратдим ҳар он.
Ҳатто жинояткорлар бу ерда ҳар дам
Ўзича ҳурматини қилолди баён.
Мен ва содиқ Катяни ҳар жой, ҳар ерда
Қаршилашди самимий табассум билан.
«Сиз бизнинг фариштамиз!» — дея сафарда
Қўллаб-қўлтиқлардилар жон билан дилдан.
Тамғаланган бадарға неча бор ахир,
Картошка олиб келди менга яширин:
«Совимасин, енг, қўрдан чиқардим ҳозир»
Нақадар тотли эди, нақадар ширин.
Ҳозир эслаганда ҳам бағрим бўлиб қон,
Томогимга тиқилар алам ва ҳасрат.
Миннатдор юрагимдан йўллайман салом,

Сизга, сизга қашшоқлар ҳурматим беҳад!
Раҳмат, ўз меҳнатларин аямай зарра,
Оғир кунда бўлдилар бизларга дармон.
Халқ ичидан ҳеч кимса оғу ва заҳар
Ошимизга солмади, йўқ-йўқ, ҳеч қаҷон!

Кўз ёшимдан соқчи ҳам чекилди нари,
Тангрига топингандай унга топиндим.
Менга лутф-карам билан тутган фонари
Зиёсида ертўла томон отилдим.
Тушаман ҳамон қуийи, тушаман ҳамон,
Қоп-қоронғи йўлакдан бораман зийрак.
Зиналардан тушаман сим-сиёҳ ҳар ён,
Бораман, нафасимни бўғар дим йўлак.
Бир томонни қоплаган тўр каби мағор,
Бир ёқдан сув жилдираб оқади пастга.
Шарпа сезиб қоламан, кондаги девор
Нурамоқда, қарайман тушган кесакка.
Ўпирилган деворларни учратдим бесон,
Ҳар бири мудҳищ йўлга очади эшик.
Оёғим ерга тегмай чопаман чаққон,
Ваҳима, даҳшат унут, чопаман тетик.
Кимдир қичқирди бирдан: «Қайга, қаёққа,
Ахир! Ҳалокат сари борасиз, наҳот?
Аёлларга рухсат йўқ, хоним, у ёққа,
Қайтинг дарҳол, кутасиз шу ерда фақат!»
Шўрим қурсин, навбатчи келди эҳтимол,
(Қўрсангиз шўрли соқчи қўрқиб кетганин!)
Бақирап даҳшат солиб серзарда, қўпол.
Тез одимлар шарпаси дам сайин яқин.
Нима қилсам? Ўчирдим машъални чаққон,
Қоронғилик қўйнида чопдим сарсари.
Ярлақаса худойим асрайди омон,
Ииқилмай қолганимга ҳайронман ҳали,
Қандай қолди у ерда бошим саломат,
Тақдир ўзи сақлади оғатдан холи.

Қўрқинч ғор, чуқурлардан соғ, бежароҳат
Олиб чиқди бир тангри манзур толе.
Кўп ўтмади қаршимда нур бўлди пайдо,
Гўё чарақлаб кетди нурафшон юлдуз...
«Чироқ» дея қичқирдим тақдирдан ризо,
Шодлик қуши сингари отилди шу сўз.
Пўстинимни иргитиб, югурдим нурга,
Жонимни сақлаб қолди парвардигорим.
Балчиққа ботиб қолган от қуруқ йўлга
Худди шундай отилар, жон болажоним...

Нур кўринди! Ёришиб борар тобора,
Кўзларимга ташланди баландлик бир ер:
Қандайдир майдон... Унда қандайдир соя...
Ҳаф!. Ана болға товуши! Бунда иш қизир —
Ҳаракат... Одамлар... Оҳ, пайқаса шояд,
Қиёфалар кўринар дам сайин равшан...
Ана, балки кўрдилар мени ниҳоят,
Яқин-яқин чарақлар чироқлар ҳамон.
«Само фариштасими?» Қичқирди дарҳол
Шу ерда турғанлардан бири ҳайратда:
«Қаранг, ахир қаранглар! — Бир дўзахмисол
Шахтадамиз! Биз ахир эмас жаннатда!» —
Дея бошқаси кулиб келди қирғоқча,
Бир нафасда тутдилар чуқур лабини.
Шошқин чопиб бораман мен ҳам шу ёққа.
Ажабланиб шодлик-ла кутарлар мени.
«Волконская!» — кимдир бақирди. Шу дам
Трубецкой овозин танидим! Нарвон
Туширдирлар, мен ўқдай отилиб чиқдим.
Ҳамма таниш, ё раббий, ҳамма қадрдон:
Сергей Трубецкой, Артомон Муравьев.
Борисовлар ва князь Оболенский бор.*

* Артомон Захарович Муравьев (1794—1881), Андрей Иванович (1798—1854), Петр Исаакович Борисов (1800—1854), Евгений Петрович Оболенский (1796—1865) — декабристлар,

Самимий олқиши ёғди жасоратимга,
Ҳамма шодлик, севгисин қиласарди изҳор.
Мен мақтовга кўмилдим. Меҳрибон, ҳамдард
Юзларини юварди кўздан оқиан ёш...
«Қани Сергей?» «Айтгали кетиши. Faқат
Бахтдан юрак ёрилмай қилса бас, бардош!
Ҳар кун аҳвол шу бўлур: ҳа, ҳар биримиз
Уч пуддан Русияга йўллаймиз маъдан.
Кўрдингиз, меҳнат бизни қилмади ҳалок!..»
Чин сўз, қувноқликлари қиласарди ҳайрои.
Ҳазил қилишар, аммо шодликларида
Қайғунинг достонини ўқирдим равшан.
(Мудҳиш янгилик эди оёқларида
Мен илк бор кўрганим бу қуйма кишан.)
Дилдори Катясидан сўйлаб хушхабар
Трубецкой кўнглига бердим тасалло.
Бахтимга, она юртдан келтирган хатлар
Ёнимда экан. Этиб бурчимни адо
Салом билан топширдим эгаларига.
Бўлар эди офицер қўйида хуноб:
«Нарвонни қабул қилган ким ўзи? Нега,
Назоратчи ишидан кетади жўнаб?
Сизга айтаман, сизга, хоним афанди,
Ийқиласиз!.. Эй тушир нарвонни! Шайтон,
Тез-тез (ҳеч ким қўймасди унга нарвонни)...
Ийқиласиз, йиқилиб ўлмак ҳам осон!
Марҳамат қилиб тушинг тез, не гап ўзи?»
Биз-чи ҳамон кетамиз ундан узоққа,
Турма жаҳолатининг барча фарзанди
Мўъжизадан ҳайратда оқар шу ёқقا.
Шулар менга йўл очиб бордилар олдда,
Ўз замбилин қиласарди ҳар бири таклиф.
Ўнқир-чўнқир тепалик ва бутун жойда
Ётар кон меҳнатининг қуроли тўлиб,
Кишсанлар жаарангидаги иш борар қизғин,
Тубсизлик меҳнатига қўшиқдир ҳамдард.

Қоннинг метин кўксига урилар ҳоргин
Кончилар қўлидаги чўкич, белкурак.
Юк билан якка чўпдан маҳбус келаркан
Беихтиёр қичқирдим: «Бўлинг эҳтиёт!»
Миналар ўрнатишар ерга янгидан,
Тепада, ҳавозада ишлар бесаноқ
Одамлар... Оҳ, бу меҳнат қандайин мушкул,
Нақадар зўр мардлик бу!. Тураг ярқираб
Кондан қазиб олинган маъданлар мўл-кўл.
Товланар ваъда қилиб хирожин сероб..
Бирдан кимдир қичқирди: «Келаётир у!»
Атрофда олазарак кезар нигоҳим,
Илгарига отилдим, орада зовур
Ётар эди... Минг шукур, йиқилмай қолдим.
«Оҳиста, оҳистароқ юрингиз! Наҳот,
Минг-минг чақирим йўл босиб етиб манзилга
Шу чуқурга йиқилиб бўласиз ҳалок?
Ўз жағомиз етмасми, бу ҳам бор бизга?
Трубецкой тутган эди қўлимдан маҳкам —
Йиқилсангиз не қилар эдик, ё раббий?»
Сергей ошиқар, аммо юролмас илдам,
Кишани шақирларди мунгли ва ғамли.
Занжир! Унутмапти ҳеч нарсани жаллод,
Разил, қўрқоқ, қасоскор, ситамгар, жоҳил.
Юмшоқ кўнгиллик қилмиш гўё у безод
Боғлаб оёқларига занжир, кишан зил.
Сергей келар, ишчилар, соқчилар бари
Сукут ичра четланиб беришарди йўл.
Кўрган замон мен томон ёзиб қўлларин:
«Маша!» — дея қичқириб интиларди ул.
Мадори қуриганда, тўхтади бежон,
Суяди икки маҳбус уни шу муддат.
Оқарган юзларини ёш ювар чандон,
Узатилган қўллари титрарди фақат...
Меҳрибон, азиз овоз менга бир онда
Гўё бахш этди ҳаёт, янги жон, умид.

Бахш этди шодлик, орзу музлаган қонга,
Қайғу, отам дўқлари бўлганди унут.
Қўлларимни қутқариб дўстнинг қўлидан
Чопардим: «Боряпман» дея қичқириб,
Ўтиб чуқур устига тушган таҳтадан
Шу азиз товуш сари шошдим югуриб:
«Боряпман!» Товланар таниш табассум.
Жафо, ҳасрат, уқубат сарғайган юзда
Олдига чопиб бордим соғинган дилим
Муқаддас тоза туйғу тўлдирди бирдан.
Ўзимни кўрарканман шу мудҳиш конда,
Даҳшатли товушларни эшигтан маҳал,
Эримни кўрарканман темир кишандা,
Жафо-аламларини англадим тугал.
Жуда кўўп азоб чекди, дард тортди жасур,
Бош эгиб ҳузурига келиб тиз чўкдим.
Лекин уни бағримга босишдан аввал,
Темир кишанларини кўзимга суртдим!
Қўнгандай келиб сукут париси худди
Тинди ер ости конда бутун ҳаракат,
Тинди гап-сўз ва тинди меҳнат гумбури,
Тинмас, тинмас шашқатор кўз ёшлар фақат.
Ҳамма таниш, бегона кўзларида ёш,
Ҳамма ҳаяжон ичра жиддий ва рангсиз
Туради айланамда. Қайфимга йўлдош —
Титроқ оёқларида кишан жарангсиз;
Ҳавога кўтарилган болға ҳам қотган,
На қўшиқ янграр, на сўз: ҳар ёқда жимлик.
Гўё ҳар ким учрашув руҳига ботган —
Ғам-ҳасрату шодликка бўлганди шерик.
Муқаддас эди жимлик, муқаддас ғоят,
Чуқур қайғу ва ҳасрат бор эди унда.
Үйлар, фикрлар юксак эди ниҳоят,
Бир ажойиб тантана ётарди унда.
«Қайга ғойиб бўлдингиз! Қайга кетдингиз?»
Қуийидан эшитилди дарғазаб овоз.

Назоратчи кўринди: «Энди кетингиз,
Атай яшириниб турдим» — Кўзларида ёш:
«Кетинг энди, вақт етди, койишар, хоним,
Бешлиқларнинг ҳаммаси шундай бешафқат!..»
Болажонлар, мен гўё жаннатда эдим,
Яна дўзахга тушдим, дўзахга фақат.
Пастда ҳаяжон ичра кутган офицер
Ғазаб-ла русчасига қилди ҳақорат.
Баландда эрим туриб французча дер:
«Маша, кўришажакмиз қамоқда албат!»

ОЙ ТУТИЛГАН ТУНДА

Уч пардали фожиа

ИШТИРОК ЭТУВЧИЛАР

Оқийигит — 17 ёшда.
Зубаржад — 17 ёшда.
Тангабека — 50—52 ёшда.
Шафақ — 21 ёшда.
Девона — 30 ёшда.
Дарвеш — 55 ёшда.
Рисқул — 60 ёшда.
Эммирза — 11 ёшда.
Елчиқул — 30 ёшларда.
Биринчи оқсоқол
Иккинчи оқсоқол
Учинчи оқсоқол
Чопар — 25 ёшда.
Эркаклар аёллар.

БИРИНЧИ ПАРДА

Ез бени. Чўл. Утовлар тизилиб кетган. Тангабека ўтовининг олди. Ўчоққа катта қозон осилган. У ер-бу ерда палослар, гилам ва кигиалар осиб куритилмоқда. Ағтидан бу яйловга яқинда кўчиб келишган. Шафак қозон бошида уймалашиб юрибди.

Утвдан Тангабека чиқади. Қўлида қамчи, қаёққадир отланган.

Тангабека. Ёлчиқул келмадими?

Шафак. Йўқ, кўринмади.

Тангабека. У лалайганинг оғзидан сўзи чиққунча, бургут тухум очиб, учирма қилади. Келиб-келиб шуни юборибман-да...

Шафак. Қаёққа шошсин, онажон? Қўрада моли маъраб, уйда боласи йиғлаб қоляптими? Киши шодлик кутиб турган бўлса шошади-да.

Тангабека. Нима бало, ҳамманг ўша Ёлчиқул-нинг ёнини оласанлар!

Шафак. Бечорага ачинаман. Ёлғизгина бошига не савдолар тушмади шўрликнинг.

Тангабека. Бандаларга қисматни биз улашмаймиз, келин, ҳаммаси худодан! Пешонасига нима ёзилган бўлса, ўшани кўради.

Таёқни от қилиб минган Эшмирза қўшиқ айтиб киради.

Эшмирза.

Отам олиб берди от,
Эгарлатиб чоп, деди,
Хотин олиб бераман,
Қучоқлашиб ёт, деди.

Чух қамиш оёқ арғумогим, чух!..

Танга бека. Жим, эй, тилинг кесилмагур! Бунақа беадаб ашулани қаёқдан ўргандинг, тентак? Қамчим қани, бир таъзирингни бериб қўяй!

Эшмирза. Йўқ, ойи, бу куёвлар айтадиган қўшиқ.

Танга бека. Қамчи билан ачитиб куёвлигинги ни кўрсатиб қўймай! Йўқол кўзимдан. (*Шафаққа.*) Шу кунларда кўнглим шундай ғашки, келин, ичимга чироқ ёёса ёримайди. Урушга кетганлардан дом-дарак йўқ. Чопар келганига ҳам бир йилдан ошди.

Шафак. Мен-чи? Кундуз шамоллардан сўрайман, тунда осмонни тутган юлдузларга жавдираб, Йўлмирзамни ўйлаїман, сўрайман. Қиблага қараб тиз чўкиб, Йўлмирзамни ўз паноҳингда сақлагин, деб илтижо қиласман. Саҳарлар қонли ёшлар тўкиб, оқ тилаклар тилайман парвардигоримдан.

Танга бека. Кўз ёшларинг тупроққа сингса ҳам тилакларинг ерда қолмайди, келин. Ишноолло, фаришталарнинг оминига тушса ажаб эмас.

Шафак. Айтганинг келсин, илоҳим!

Эшмирза. Ойи. Девона осмондаги фаришталарни кўрганмиш. Худди ириб қолган сутдаги қуртлардай, гуж-гуж гивирлаб ётганмиш. Фаришта дегани қанақа бўлади, ойи?

Танга бека. Ҳали ҳам шу ердамисан, оёқ остида ўралашмай, бор, ўйна! (*Қамчисини ўқталиб қўяди.*)

Эшмирза. Булар Девона билган нарсани ҳам билишмайди-я. (*Кетади.*)

Танга бека. Эшмирза, бор, йилқичи Кўчарбойга айт, кўк дўннани тутиб эгарласин.

Эшмирза (*узоқдан*). Ҳўп, айтаман.

Танга бека. Мен чўпонларнинг олдига бориб келай... Вой, худойим, кўнглим шундай ғашки, нима бўларини билмайман.

Шафак. Уч йил! Уч йилдан бери кўзларим йўлда интизор! Муштоқликдан жигар-бағрим қон бўлди. Ўн тўққиз баҳоримда Йўлмирзамсиз сўлиб қолдим, худди кечки шафақдек сўниб боряпман, онажон!

Тангабека. Бўйингда ҳам бўла қолмаган экан. Ақалли фарзанд билан юпанардинг, овунчоқ бўларди.

Шафак. Ҳа, насиб бўлмади.

Тангабека. Шояд, тилакларимиз ижобат бўлиб, өқ подшо урушни тўхтатишга фармон берса-ю, бизни-килар ҳам эл-юрг қатори қайтиб келишса!

Шафак. Кошки эди ўша кунларга етишсан.

Тангабека. Ёлчиқул қалинни бир ёқлик қилиб келса, оқсоқолларни чақираман. Бор, келин, қора ўтводан хабар ол-чи, қимизни пишитишдимикин. Молни ўзим сўйдирааман.

Шафак. Хўп, ойи. (*Кета бошлайди.*)

Тангабека. Оқийигит қаёқса улоқди?

Шафак. Зубаржад келган эди, тоғ томонга от чоптириб кетишиди.

Тангабека. Ўн еттига киришиди-ю, ҳали ҳам бо-лаликлари қолмаган!

Шафак. Тўйларигача ўйнаб олишсин, даладаги тойчоқлардай яйрашсин. Зубаржад дунёда монанди йўқ қиз, бамисоли малика! Оқийигит бўлса, ҳуснда Юсуф пайғамбардан ўтади. Яна шоирлигини айтмайсами!

Тангабека. Қўй, келин, умматни пайғамбарга ўхшатма, гуноҳ бўлади.

Узоқдан овоз. Бойвучча, ҳой бойвучча, кўк дўнан далага қочиб кетибди!

Тангабека. Бир ками шу эди! (*Кетмоқчи бўлади.*)

Умалоқ ошиб Девона кириб келади.

Девона. Тангабека бойвучча опа, Тангабека бойвучча опа, бир қизиқ нарса кўрдим, айтиб берайми? (*Хахолаб кулади.*)

Тангабека. Ҳа, айт. Девона, айта қол, қизиқ нарса бўлса.

Девона (*сакраб ўрнидан туради*). Тақилган қоя чўққисида бир она бургут тўртта палапонини ўлдирди. Олдин кўзларини чўқиб ўйди, кейин қаноти билан уядан суриб чиқарди. Палапонлар матна бундай юмалаб-юмалаб (*қилиб кўрсатади*) жарга тушиб кетди... Шундай томошадан қолдинг, бойвучча опа. (*Хахолаб кулади, сўнг бирдан маъюс*.) Она бургут нега шундай қилди экан-да?

Тангабека. Сенга шундай кўрингандир, Девона, бургутнинг боласи атиги битта ёки иккита бўлади.

Девона. Уники тўртта әди, бойвучча. Иккитаси-ни бошқа уядан олган экан-да?

Тангабека. Келин, бор, айт, Девонага овқат беришсин, оч бўлса керак. Оч кишининг кўзига бир нарса тўртта бўлиб кўринаверади.

Шафақ. Юр, Девона.

Девона. Ҳалиги она бургут нега шундай қилди экан, бойвучча опа? Нега сизларнинг раҳмингиз келмайди, нега йигламайсизлар, бағри тошлар! (*Йигланча Шафақнинг орқасидан чиқиб кетади*.)

Тангабека. Мияси айниб қолибди бу тентак-нинг. Беҳуда гап! Қушларнинг маликаси саналган она бургут ўз палапонларини чўқиб ўлдирармиди? Ундай дессанг, ўз фарзандини ўзи нобуд қилган подшолар озми? Мансабга минган сари киши кўпроқ қонсиравар-миш. Ишқилиб, Девонанинг сўзлари яхшиликка кўринсин. Мен умримда бировга озор берган бўлсам, тангрининг ўзи кечирсин... Э худо, кўнглим шундай ғашки, шундай ғашки, ичимни ит тирнаяпти. Фол очдирмасам бўлмайди шекилли. Чўпонлар бирон ёқقا кетиб қолармиди, бугун бўлмаса, эртага борарман. (*Ўтовга киради*.)

Елчиқул киради. Тангабека нинг ўтови олдига ўтиради.

Ёлчи қу. Йиши битириб қайтсанг тўн кийдираман, деган эди бойвучча, кийдиради ҳам. Сўзининг устидан чиқадиган аёл. Аммо-лекин, янги тўнни кийиб, ясаниб қаёққа борардим?.. Ҳар қалай, кўнглим жойига тушди. Бир мағизни ёриб чиққан икки ниҳолдай Оқйигит билан Зубаржад бир умрга қовушади. Ана шунисига хурсандман. Оқйигитни ўн етти йил пуф-пуфлаб ўстирдим, ўз ўғлимдан ҳам азиз бўлиб қолди. (Қичқириб.) Ҳой, бойвучча! Уйдамисан, бойвучча, мен келдим!

Утодан Танга бека чиқади.

Танга бека. Келибди-ю, лалайиб ўтирганини қара! Ё ишинг унмадими? Ўғри-қароқчига учрамадингми? Молларни омон-эсон олиб бордингми ишқилиб?

Ёлчи қу. Ҳаммасини тўқис-тугал олиб бордим, бойвучча. Аммо Рисқулбекнинг кўнгли тўлинцирамади. Назаримда, моллар кўзига оз кўринди. Яна йигрма беш от, элликта қўй берсин, деди.

Танга бека. Шунисини билувдим-а! У очкўз тўйламиди! Отаси Элмирза тириклигига у билан кенгашиб, гапни бир ерга қўйган, «Оқйигит ўн еттига тўлганда, қалиннинг қолганини берасан», деб менга васият қилган эди, васиятини бажардим.

Ёлчи қу. Мен ҳам шундай дедим. Лекин Рисқулбек кўзини лўқ қилиб туриб олди. Биз бир-биримизга сўз берганда Элмирзабек тирик эди, энди бекнинг ўзи ҳам, мартабаси ҳам йўқ. У дунёда бандаларнинг ҳаммаси баб-баравар, деса бўладими? Мен ҳам бўш келмадим. Молларни қайтаришга буйруқ бердим. Шундан кейин бир оз шахтидан тушди.

Танга бека. Шундай дегин? Бундай гапга қандай тили борди у разилнинг? Бу муртадлиги учун шу бугуноқ яловга уруш очардимку-я! Ҳа, майли, болалар ҳаққи, гуноҳидан ўтаман. Худо хоҳласа, Йўлмирзам урушдан омон қайтса, ота шаъни учун курашадиган йигит у.

Ёлчи қул. Сассиқ алафдан асл гул очйлганига ҳайронман! Зубаржадни айтаман. Мен молларни ҳайдаб борсам, ўз қизимиздай олдимга чопиб келса бўладими.

Тангабека. Зубаржаднинг мақтовига сўз йўқ. Аммо Рисқул паст одам. У мол олишдан ҳам кўра, бизни камситиш, таҳқирлаш учун шундай деган. Бир кун қилмишига пушаймон еб қолар. Қаримталик дунё, қайтади.

Ёлчи қул. Рисқулбек, қизимга Соқмор чўлларининг ҳокими Қорахўжадан ҳам совчи келган эди, қайтардим, деб мақтанди. Элмирзабекка берган сўзимда турдим. Шуни бойвуччага алоҳида уқтириб айт, ихлосим баланд эканини билиб қўйсин, деди.

Тангабека. Гёё одамгарчилик қилибди-да, бизга! Такаббурлиги жонга тегди. Қўй, садқайи сўзим кетсин! Ёлчиқул, сен тезлик билан чўпонларга хабар қил, иккита яхши бўрдоқини сўйишин, таомилга тўғрилаб, ургуларнинг кўнглини олайлик.

Ёлчи қул. Хўп бўлади, бойвучча, ҳозир айтаман. (*Кетади.*)

Тангабека (орқасидан қичқириб). Ҳой, Ёлчиқул, янги тўнинг муборак бўлсин! Сўзидан қайтадиганлардан эмасман!

Ёлчи қул (саҳна орқасидан). Қуллуқ, бойвучча, қуллуқ!

Тангабека (ёлғиз). Рисқулни айтаман. Манман деган эркаклар урушда жон бериб, жон олаётган бўлса, у бу ерда қутуриб юрса! Ҳой, бу ерда ким бор? Гуллемиш! Мана бу палосларни оқ ўтовга олиб бориб сол, маълум ошини ўша ерда берамиз. (*Чиқади.*)

Бир неча дақиқа ўтгач, бир а ё л кириб, ёйиб қўйилган палосларни олиб чиқади, чўл томондан Дарвеш келяпти. Ўтов орқасидан Девона чиқади.

Девона (катта устихонни кемириб). Бунинг энг

маза жойини нега ичига солиб қўйишаркан? Ҳеч олиб бўлмаяпти! (Чалқанча ётиб, оғзига иликни қоқади.) Йўқ, тушмаяпти. Маҳкам ёпишириб қўйишипти... Қўя қол, еб тўймаган ялаб тўярмидинг! Бунинг ҳузурини бароқ кўради. (Итни чақиради.) Бароқ, бароқ, маҳ... маҳ... (Олди-ортига қарамасдан суюкни отади, суюк кириб келаётган Дарвешнинг олдига тушади.)

Дарвеш. Ё парвардигор, эшикдан кириб келган мусофирига ҳам тош отадиларми, ноинсофлар!

Девона. Тошмас, суюк! Кемиролмадим.

Дарвеш (суюкни кўриб, лабларини ялайди). Ўз ризқингга тупуриш нонкўрлик бўлади, эр йигит!

Девона. Менми эр йигит? Ҳа-ҳа-ҳа, мен девона-ман, девона! Ие, кулоҳинг аломат экан-ку! (Дарвешнинг кулоҳини олиб, айлантириб кўради.) Ит думига ўхшаган попуги ҳам бор экан! Думидан ушлаб киясанми? (Дарвешнинг атрофида юриб, уни кўздан кечира-ди.) Уккига ўхшаб ҳурпайган экансанми? Яна ўзингнинг ҳам думинг бўлмасин, а? (Шақиллаб кулади.) Сен нега кулмайсан?

Дарвеш. Мен олисдан келдим, худонинг бандаси, силлам қуриб, дармоним кетди. Бу ерлар қайси бекнинг яйлови бўлади?

Девона. Меники ҳам, бойвуччанини ҳам!

Дарвеш. Қирдаги қўйлар ҳам уникими?

Девона. Уники ҳам, меники ҳам. Ана у қоялар ҳам, ана у пода-пода булатлар ҳам меники. Ўша булатларга миииб олиб, сузиб кетсам ҳам бўлади, лекин бойвуччани қўзим қиймайди!

Дарвеш. Бойвуччанинг кими бўласан, ўзинг?

Девона. Девонаси. Бир замонлар Ҳозирқул деган исмим бўлган экан, энди исмим йўқ. Девона десанг ҳамма билади. Девонани ранжитманглар, гуноҳ бўлади, дейди бойвучча.

Дарвеш. (Девонага тикилиб қараб туради). Манглайнингда қора холинг ҳам бор эканми?..

Девона. Кўр бўлганмисан, хол эмас — фаришта мухри.

Дарвеш. Неча ёшдасан, худонинг қули?

Девона. Мен худонинг қули эмасман, Девона-ман! Сенинг ўзинг қулсан!

Дарвеш. Сен бечора, неча ёшда эканингни ҳам билмассан.

Девона. Менинг ҳеч қанақа ёшим йўқ, шумдай ём-пошсиз яшайвераман! Тўхта, сен кимсан ўзинг? Чопонингнинг барларини ит дабдала қилиб ташлабди-ку?

Дарвеш. Мен — дарвешман. Жаҳон кезиб, одамларга имон тарқатаман. Қани, Девона, бойвуччангнинг олдига олиб бор-чи мени. Тиззаларимда дармон қолмади, ҳолдан кетяпман: уч кундан бери туз тотганим йўқ.

Девона. Бойвуччанинг ўтови шу! Бойвучча опа, бойвучча опа! Дарвеш келди. Қел, томоша қил, кулоҳининг полуғи бор.

Елкасида меш билан ўтов орқасидаи Шафак чиқади.

Дарвешни кўриб тўхтайди.

Дарвеш. (*ўзича*). Субҳоноллоҳ, сув парисидай бу сулув қайдан пайдо бўлди? (*Кўксига қўлини қўйиб, эгилиб салом беради.*)

Девона. Тиззалирида дармон қолмаган Дарвеш шу бўлади, Шафақ.

Шафак ўтов томонга юради.

Дарвеш. Чарчаб, чанқаб келган мусофирга бир қултум сув берсанг, савобга қолар эдинг, сулув қиз!

Девона. У қиз эмас, келин. Йўлмирзанинг хотини. Йўлмирзанинг ўзи оқпошшо урушсида. Қелиб қолади! Кечаси, қулоғимни ерга тутиб, от туёқлари дупурини эшилдим. Ҳадемай келиб қолишади.

Дарвеш (*фотиҳа ўқийди*.) Фаришталар Девона-
нинг сўзига омин десин!

Девона. Оллоҳу акбар!

Шафақ ўтовга киради. Дарвеш сулувнинг орқасидан ҳавас
 билан қараб қолади.

Дарвеш. Тангрининг қудрати зўр. Кўҳликни
 ҳам, хунукни ҳам ўзи яратади. (*Ўтиради*.)

Девона. Сен кўҳликми ёки хунукми?

Дарвеш. Кўҳлик эмас...

Девона (*диққат билан қараб*). Хунук, хунук.

Шафақ катта товоқда қимиз олиб чиқади.

Шафақ. Ма, бобой, қимиз ич, ташналигингни бо-
сади.

Дарвеш (*косани олади, нималардир ўқиб, ба-
майлихотир ичади*). Раҳмат, сулув, муродингга ет!

Шафақ. Айтганинг келсин.

Тангабека кўринади.

Девона. Бойвучча! Дарвеш, дарвеш келди.

Дарвеш (*ўрнидан туради*). Ассалому алайкум,
 бойвучча, элу юртингни, молу жонингни худо ўз пано-
 ҳида асрасин, сиҳат-саломатлик, хотиржамлик бўлсин,
 бойвучча, бошингдан баҳт қуши аrimасин.

Тангабека. Раҳмат, мусоғир, айтганинг кел-
 син, сенинг ҳам ниятинг хайрли, қадаминг қутли бўл-
 син, хуш кўрдик.

Дарвеш. Қани, ўтириб бир ҳақингга дуо қилай-
 лик, бойвучча!

Фотиҳа ўқийдилар.

Девона. Мен иккинчи марта ўқишим бу фоти-
 ҳани.

Дарвеш. Такрорлашдан дуо қаримайди. (*Бойвуч-чага тикилиб-тикилиб қарайди.*)

Тангабека. Қани, сўзла, қаерлардан бўласан, мусофири?

Дарвеш. Мен пайғамбар элчиси, бойвучча, Мак-каю Мадинадан келяпман. Пайғамбаримизнинг муҳаддас қабр ташларига бошимни қўйиб, хокларини бу қўлларим билан кўзимга суртиб, оби замзамлардан татиб келган муборак зотман. Бу фоний дунёда осий бандаларига имон ато қилиб юришдан савоб иш борми?

Тангабека. Табаррук зот экансан, ниятинг эзгу, сафаринг хайрли экан, мусофири!

Дарвеш. Эзгу, бойвучча.

Тангабека. Оламда тинч-омонликми?

Дарвеш. Омонлик, бойвучча, сенга ҳам яхши хабар келтирдим. Оқпошонинг лашкарлари енгиб, сизнинг элингизда ҳам тинчлик қарор топади. Кутганларингизнинг йўли оқ, худо хоҳласа. (*Шафаққа қараб.*) Ҳадемай от ўйнатишиб келиб қолишади.

Девона (*Етиб, ерга қулогини қўйиб тинглайди*). Йўқ, бугун от дупури эшитилмаяпти.

Тангабека. Девона, жим бўл, мусофирининг сўзини бўлма! (*Дарвешга.*) Авлиё, хушхабаринг учун сенга уюrimдан энг яхши йилқини суюнчига бердим, танлаб ол!

Дарвеш. Қуллуқ, қуллуқ, бойвучча, менга бу дунёнинг мол-давлати керак эмас, мен худонинг қулиман. Тўярлик овқат, тунарлик бошпанга берсанг, зако-тинг шу менга!

Шафак (*ўзича*). Авлиё одам экан-а, тавба.

Тангабека. Майли, сенинг айтганинг бўлсин. Келин, дарров дастурхон олиб кел, мусофири овқатланаб, дам олсин!

Шафак. Хўп бўлади, ойи.

Тангабека. Яхши меҳмон ўз ризқи билан кела-ди, дейдилар, тўйнинг устидан чиқдинг. Уртанча ўғ-

лимнинг қайлиги учун бугун қалинни тўкин бериб бўлдим. Кечқурун оқ ўтовда маслаҳат оши бераман, уйимизнинг тўри сенини бўлади.

Дарвеш. Мени сийласанг, сени худо сийласин, гуноҳларингни тангрининг ўзи кечирсин, бегуноҳ бандаси йўқ...

Девона. Ие, бегуноҳ одам йўқ? Менинг ҳам гуноҳим борми, Тангабека бойвучча опа?

Тангабека. Сенинг гуноҳинг йўқ, Девона, сен бегуноҳсан!

Дарвеш (*ўзича*). Тангабека?..

Тангабека. Қани, ўтовга марҳамат, мусофир!

Дарвеш. Сенинг номинг Тангабеками, бойвучча?

Тангабека. Шу Девонадан бўлак ҳеч кимномимни тилга олмайди, Элмирзабек ўлганидан буён ҳамма мени бойвучча деб атайди. Назаримда, менинг номим сени ҳайратга солиб қўйди чоғи?

Дарвеш. Йўқ, бойвучча, жуда чиройли исм экан, бундай чиройли исмни энди әшитишим, шунинг учун ғалати туюлди. Элмирзабекнинг ўзини билмасам ҳам, донғини эшитганман. Қазо қилган экан, раҳматликнинг жони жаннатда бўлсин.

Тангабека. Ўтовга кир, мусофир, дастурхон муентазир. (*Ўтовга киришади.*)

Девона. Бу дарвешнинг кўзлари худди уккеникига ўхшайди, юм-юмалоқ, ўқрайиб туради... Ҳа, бориб қоя қаъридаги бургут палапонларини кўмиб келай, ҳамма ўликларни кўмишади-ку, ахир! (*Кетади.*)

Ўтовнинг икки томонидан Зубаржад билан Оқигит чопиб чиқишиб, ўзларини бир-бирларининг қучоқларига отадилар.

Иккиси ҳам суворий кийимида.

Зубаржад. Шу дақиқадан умримнинг охиригача қучоғингдан қўйма мени, шунқорим!

Оқигит. Энди бизни ҳеч ким ажрата олмайди, Зубаржадим, оқ каптарим!

З у б а р ж а д. Худо саховатли, Оқйигит, иккимиз-
ни бир тупроқда яратган. Туғилишимиз билан бизни
қовуштирган ҳам тангрим, шундай бўлгандан кейин,
бизни ким айрсин, шунқорим!

О қ յ и г и т

Қип-қизарган кунга боққанда
Йўқотаман ихтиёrimни.
У — қуёшми, ё муҳаббатдан
Ёниб турган ўнг ёноғингми?

Салқин тунда осмонда тўлиб,
Магрур болқиб боқар нурли ой.
Мени асир этган ой бўлиб
Чап ёноғинг сенинг ҳойнаҳой!

Яна тунда ой қўкка чиқиб,
Нури тутса яйловни, қирни,
Чап бетингдан ардоқлаб ўпиб,
Ухлатаман мен ўзим сени.

Тонг оқариб, чиққанда офтоб,
Шуъласига тўлганда жаҳон,
Ўнг бетингдан ўпиб беҳисоб,
Дейман: «Ёрқин қуёшим, уйгон!»

Сўнг боқарман жамолингга лол,
Кавсар лабинг бўсасидан маст.
Муродимга етганимдаш шод,
Ишқ шаҳиди бўлсан ажабмас!

З у б а р ж а д

Лабларимни лабларингга қўйиб,
Дарҳол яна бағишлайман жон.
Бахтнинг тотли ўтида куйиб,
Ўлсан ўпиб, сен тирилт шу он!

Сен ўпиб ўлсанг, мен ўпиб тирилтираман, мен ўлсан
сен ўпиб тирилтирасан! Бас, шундай әкан, биз ўлмай-
миз, Оқйигит. (*Яна қучогига ташланади.*)

О қ ӣ и г и т. Агар сен бўлак эл-юртда туғилсангу, умримда сени кўрмаган бўлсам, нима қиласр эдим, Зубаржад? Ӯшанда ҳам албатта сени излаб топар эдим, тоғлар ошиб, дарёлар кечар эдим, овозим борича: «Зубаржад, қайдасан?» деб сўроғлардим бутун борлиқдан. Албатта топар эдим сени, Зубаржад!

З у б а р ж а д. Мен товушингдан таниб ўзим сен томонга йўлга чиқар эдим, Оқийигит! Қўлимдаги ҳас-сам игнадай бўлиб, этикларимнинг ўкчаси япроқдай қолгунча ахтарар эдим сени! Ва излаб топар эдим! (*Яшнаб, шод куйлайди.*)

Мен, Зубаржад отлидирман,
Оқийигитнинг ёридирман.
Бир кўришга зоридирман,
Билган борми, бизнинг ёрни?

деб кетаверардим. (*Кулади.*)

О қ ӣ и г и т. Йўқ, йўқ Зубаржад, ундей мудҳиш тақ-дир бизга бегона!

З у б а р ж а д. Оқийигитим, айирмоқни ўйлаганлар бўлса, ўйига етмасин, илоҳим... Вой тавба, нималарни ўйлаяпмиз?..

О қ ӣ и г и т. Ҳеч ким айирмайди бизни. Мен сени ҳеч кимга бермайман!

Оқийигитман, орим бор,
Ёнгинамда ёрим бор.
Ҳеч ким енгмас қудрат берган
Танда қайноқ жоним бор.
Ор деганим — Зубаржад,
Ер деганим — Зубаржад,
Томиримда кезиб юрган,
Жон деганим — Зубаржад!

З у б а р ж а д (*бирдан кайфи ўзгариб*). Замон биз ўйлагандай тинч эмас, Оқийигит, оқподшо аканг сингари сени ҳам урушга олиб қўйса, нима қиласман?

О қ ү и г и т. Янгам Шафақдай сабр-тоқат билан кутасан мени!

З у б а р ж а д, Йўқ, Оқийигит, Шафақдаги тоқат менда йўқ, сенсиз бир кун ҳам яшашга сабрим йўқ. Овга борсанг ҳам, ёвга борсанг ҳам мен ёнингда бўла-ман.

**«Ор деганим — Зубаржад,
Жон деганим — Зубаржад» —**

дединг-ку, ор билан жон ҳамиша йигит билан бўлади. Ҳар қандай эркакдан яхшироқ от чопаман, ҳар қандай мергандан ўзид ўқ отаман.

О қ ү и г и т. Сен менга хотингина эмас, қанот бўла-сан, Зубаржад, қанотсиз учган шунқор борми? Сенсив йўлдан адашаман, сенсиз сафар бемаъно. Чиндан ҳам сен отда ботирлардай еласан, ҳали ҳатто мендан ҳам ўзид кетдинг-ку!

З у б а р ж а д. Сенинг ёнингда бўлсам ҳеч нарса-дан қўрқмайман... ҳатто, ҳатто...

О қ ү и г и т. Қўй, бундай гапларни. (Зубаржаднинг оғзини беркитади.)

З у б а р ж а д (шод, эркаланаб). Оқийигит, бирдан мени дев олиб қочиб кетса-чи? Мана бундай ғойиб бў-либ қолсам-чи? (Қаттиқ кулиб ўтov орқасига яшири-нади.)

О қ ү и г и т. Мен девга мана бундай ташланиб қувиб етаман-да, сени тортиб оламан. (Иккинчи томондан ўтov орқасига югуради. Бир дақиқадан сўнг ҳали-гидай икки томондан чопиб келиб бир-бирларини қу-чоқлаб оладилар.)

З у б а р ж а д. Вой-вой, жуда даҳшатли экан-ку, бу дев! Қучоғига қисиб жонимни олаёзди-я. (Оқийигит-нинг кўксига бошини қўяди.)

О қ ү и г и т. Юрагимнинг талпинаётганини эшитяпсанми? Худди қанотли қушга ўхшайди-я!

З у б а р ж а д. Мен бу қушни олтин қафасда сақ-

лайман, ҳамманинг ҳасадли назаридан узоқда сақлайман, эшитяпсанми, ҳеч кимга бермайман!

О қийигит. Берма, менинг суюклим, берма! Шу кунгача сен худди әгар кўрмаган ҳуркак тойга ўхшар әдинг, бугун бутун бошқасан, менинг Зубаржадим!

Зубар жад. Бугундан бошлаб бир умрга сенини бўлдим, Оқийигит!

О қийигит. Ўтган кечада даҳшатли бир туш кўрдим: учиб юрган кўк каптарни қалҳат олиб кетай деди. Қўрқиб уйғониб кетдим. Сени ўйладим.

Зубар жад. Қорахўжа уруғидан совчи келганини юрагинг сезибди-да! Совчиларни кўрибоқ менинг ҳам жоним ҳалқумимга келди.

О қийигит. Хайрият, отанг мардлик қилиби, Қорахўжага унча-мунча одам бас келмайди.

Зубар жад. «Менинг қизим ҳам, ваъдам ҳам битта, қайта-қайта узатадиган қизим ҳам, қайта-қайта бузадиган ваъдам ҳам йўқ» дебди отам. Совчилар жаҳл билан отамни яниб жўнашипти... Лекин отам нимадандир ташвишда.

О қийигит. Қорахўжадай мудҳиш бекнинг сўзини рад қилиш ҳазил эмас, Зубаржад, отанг жуда ҳам ботир одам.

Зубар жад. Отам менинг бахтимни тилайди. Менинг бахтим ёлғиз сеисан, Оқийигит.

О қийигит. Ойим бугун оқ ўтовда улуғларга зиёфат берса керак. Ёш-яланглар кўл бўйига чиқишиди, сен билан менинг шаънимизга ўйин қилиб беришиди. Давранинг ўртасида кўл юзидағи оқ нилуфарга ўхшаб сен турасан, Зубаржад! Мен севги тўлқинида сузгандай баҳтиёр сузиб бораману, шу нилуфарни узиб оламан.

Зубар жад. Уз, Оқийигит, узиб ол! Нилуфар сенини! (*Маъюсланади.*)

О қийигит. Нега маъюс тортдинг. Нилуфарим, ё кўнглинг бирор сўзимдан озор чөқдими?

З у б а р ж а д . Биз иккаламиз ҳам жуда нонкүр экамиз, Оқийигит, онанг олдида тиз чўкиб, миннатдорчилик ҳам билдирмадик. Фотиҳаларини олдигу, қуллуқни насия қилдик.

О қ ў и г и т . Зубаржаднинг қўлидан ушлаб ўтов эшигига келади. Иккиси ҳам тиз чўкишади.

О қ ў и г и т

Оқ сут бериб боққан ўғлинг қошингга келди,
Оқ ўтвдан чиқ, эй онажон!
Икки юрак бир ишқ билан сенга эгилди,
Оқ фотиҳанг бер сен, онажон!
Ўтвдамисан, онажон?

Ўтвдан соқолини силаб Дарвеш чиқади. Ёшлар саросимада.
Кейин Танга бека кўринади.

Танга бека (Дарвешга). Ўғлим Оқийигит билан келин бўлгуси Зубаржад шу бўлади! Ҳақларига дуо қилиб, фотиҳа бер, мусофири!

Дарвеш. Ё парвардигор, Оқийигит билан Зубаржад отли бу қулларингга ўзинг инсоф-тавфиқ бер, ҳамжиҳатлик ва аркон давлат ато қилгин, оллоҳу акбар!

Танга бека. Пайгамбар элчиси аталган муборак одам фотиҳа берди сизларга, болаларим. (*Дарвеш бош эгид туради.*) Ёзиқ бандаларига имон тарқатиб юришдан бошқа иши йўқ бунинг, бахтли бўласизлар.

О қ ў и г и т . Отам васиятига амал қилиб, бошимизни қовуштириб, савобимизга қолдинг, ойи, тиз чўкиб қуллуқ қиласмиш!

Танга бека. Васият, урф-одат биз учун муқаддас қонун, болаларим, сизлар ҳам унга хиёнат қилманг! (*Аввал Зубаржаднинг бошига ўнг қўлини қўяди.*) Кўкрак сути бериб ўстирмаган бўлсан ҳам, Зубаржад,

бағримга босиб фотиҳа бераман. Менинг хонадонимга болам бўлиб кирасан. (*Оқйигитнинг бошига қўлини қўяди.*) Яширмайман, энг суюкли ўғлим сен, Оқйигит! Ҳамиша баҳт, толе ёр бўлсин, омин!

О қийигит (*сакраб, оёққа босади, Зубаржад ҳам туради*). Онажон, сен мени ёруғ дунёга келтириб бир марта баҳтиёр қилган әдинг. Зубаржадим билан қовушибириб, менга бир олам толе ато қилдинг, одамга бундан катта баҳт ҳам, давлат ҳам бўлмайди, онажоним!

Қуёш, ойли кўким бор,
Қир, яйловли юртим бор,
Барини сен бердинг, онажон!
Оппоқ баҳтга мўл бўлдим,
Муҳаббатга қул бўлдим,
Барини сен бердинг, онажон!

Таңгабека. Аввало, болаларим, юрак қули бўлманглар, ақл қули бўлинглар! Кўнгил дарёдай бебош нарса, тўлқинланиб ҳар ёққа сени ураверади. Ақл тоғ чўққисидай юксак ва мустаҳкам бўлади. Ўнга суянган ийқилмайди, болаларим!

О қийигит. Ўгитларингга қуллуқ, ойножон! Яхши орзулар тўлқинингга солган юрак ёмонлик келтирмайди.

Таңгабека. Ҳали ёшсан, болам, ақл билан юрак ўртасидаги кураш жангини билмайсан. Мабодо бошингга тушиб қолгудай бўлса, ақлингга қулоқ бер!

О қийигит. Ёзмишдан дейдилар. Лекин мен учун она сўзи — тақдир муҳри. Сўзингдан чиқмаймиз, ойножон.

Дарвеш. Шундай... Шундай итоатли бўлинглар! (*Бир чеккага ўтиб, бошини әгиб ўтиради, ўзича.*) Буларни истиқболда турли-туман шодлик, баҳт, севги кутади. Орқаларида дилларига хиралик соладиган ҳеч нарса... Мен-чи, эй умр, эсиз умрим...

Та н г а б е к а. Аканг урушдан қайтиб келиши билап бутун яйловни чорлаб тўй қиласиз, катта улоқ чоптирамиз. Элмирзанинг зоти ҳали тирик! Боринглар, ўйнанглар энди, болаларим!

О қ յ и г и т. Кетаверайлликми, ойи?

Та н г а б е к а. Сабр қилинг! Ҳой, келин! Шафақ!

Ша ф а қ ўтовдан чиқади.

Ш а ф а қ. Чақирдингми?

Та и г а б е к а. Ҳа... Анави иккита хитой коса борку, ўша косаларга қимиз тўлдириб чиқ!

Ш а ф а қ. Хўп бўлади.

Та н г а б е к а. У вақтда икковинглар ҳам бешикдаги гўдак әдинглар. Худди мана шундай кўклам пайти эди. Отанг раҳматлик катта пойга берди. Зиёфатда зодагон, улуғлар нақ тумонат. Шу зиёфатда Рисқулбек билан Элмирзабек сизларни бешиккертти қилиб қўйиншди. Тўй яна уч кечачо кундуз давом этди. Оқмон шоир сизларнинг шаъннингизга қўшиқ тўқиди.

О қ յ и г и т

«Кўкка бокиб ўй сурдим,
Юлдузни ёндош кўрдим.
Ерда икки гўдакининг
Умрини йўлдош кўрдим...»

Шу қўшиқми, ойи?

Та и г а б е к а. Шу, Оқийигит, шу!

Косаларни кўтариб Ша ф а қ чиқади.

Мана шу косаларни тўлдириб икки бек қимиз ичишиди. Шундан бери ўн етти йил ўтди. Бу косаларда энди сизлар ўз бахтингиз учун ичинг!.. Шу лиммо-лим жуфт косадай толеингиз тўлиқ бўлсин, бахти бекам бўлинг!

Шафак косанинг бирини Зубаржад га узатади. Зубаржад косани лабига олиб бориб, тўхтаб қолади. Шафак косани Оқигитга тута туриб, кўзи Дарвеш назарига тушади.

Шафак косани ташлаб юборади. Ҳамма саросимада.

Тангабека. Сенга нима бўлди, келин?

Шафак. Билмайман.

Тангабека. Яхшиликдан башорат эмас, Шафак. Илоҳим, яхшиликка кўринсин!

Оқигит. Хафа бўлма, ойижон, коса бутун! Қимиз тўкилган бўлса ҳечкиси йўқ, оқлик!

Шафак. Куйинма, она, худо хоҳласа, уларга ҳеч нарса бўлмайди, нима келса ҳам менинг бошимга келсин, мен тўқдим.

Оқигит. Умр бўйи фолбин, прим-сиirimга то-пиндинг, ойи, бирон нарсани ўзгартиролдингми? Қуёш боягидай чарақлаб болқийди, майсалар боягидай ям-яшил. Шу хаёлларни итқитиб ташла, она, бугунги шодлигимиизга ташвиш, ваҳима кўланка солмасин! Бизга фотиҳангни бердингми, бас. Бир коса эмас, ўн коса қимиз тўкилса ҳам бизга ҳеч нарса бўлмайди. Қўш юлдуз осмонимизда порлаб тураверади!

Дарвеш. Қисматимиз пешонамизга ёзиғлиқ. Уни ҳеч нарса сидириб ташлаёлмайди. Таҳлика қилма, бойвучча, ёзилгани бўлади.

Оқигит. Ойи, мана биз иккаламиз бир косадан ича қоламиз, қайтага яхши бўлди, бир косадан ичсанг янада ширин татииди, ростми, ойи?

Тангабека индамайди.

Зубаржад. Хафа бўлма, бойвучча опа, косамиз лиммо-лим! Ма, Оқигит, аввал сен ич, ўтинаман!

Оқигит. Сен ич, Зубаржад, ўз улушкинги аввал сен ич, қолганини мен ичаман. (*Зубаржад ичади, кейин Оқигит охиригача ичади.*) Умримда бундай totli қимиз ичмаганман!

Тангабека. Насибангизни бутун ичмадинглар, болажонларим! Бахт толеингиз ярим-ёрти бўлмасин, илоҳим.

Оқигит. Иккимиз бир тан, бир жон бўлгандан кейин бир бахт кифоя әмасми, онажон!

Девона чопиб киради, орқасидан Эшмирза кўринади.

Девона. Бойвучча, бойвучча опа, суюнчи бер!

Эшмирза (*сакраб, сакраб*). Суюнчи, суюнчи! Суюнчига беш олтин, суюнганга ўн олтин!

Девона. Суюнчи, суюнчи! Ие, нега ҳеч ким суюнмайди?

Тангабека. Қувончли хабарингни айтиб, ҳали севинтирганинг-ку, Девона?

Девона. Ҳозиргина чопар ўтиб кетди. Урушдагилар қайтяпти, деди. Аскар йигитлар Кўктепага кўтарилаётган эмиш.

Эшмирза. Чопарнинг оти терга ботиб кетган. Уқ-ёйи обкашга ўхшайди. Акам келганда камонини мен ҳам тортиб кўраман.

Ҳамма кутиш ҳаяжонида.

Тангабека. Сени худонинг ўзи ёрлақасин. Девона, суюнчига сенга сарпо кийгизаман, Эшмирзага шойи яланг тўн қилиб бераман.

Девона. Суюнчига менга хотин олиб бер, бойвучча, ҳаммасининг хотини бор, фақат менинг хотиним йўқ, Эшмирзага ҳам хотин олиб бер!

Тангабека. Бу тентакка нима десам бўлади? Ҳамма ҳам хотинли бўлавермайди, ахир!

Шафак. (турган жойида гандиреклаб кетади). Бундай севинчга етар замон бор экан, тангрим! Юрагим, юраккинам шунқорга ўхшаб қинидан чиқа ёзяпти, онажоним! (*Тангабеканинг пинжига тиқилади*).

Тангабека. Катта шодлик, қайғудан оғир келади, болам, бардам бўл!

Девона (ётиб тинглайди). Отларнинг дупури эши-тиляпти. Биттасининг оти шатирлатиб чопиб келалапти, шу Йўлмирза бўлса керак?

Тангабека. Насибаси қўшилган бўлсин, боламнинг, насиба ҳайдаб келади.

Оқигит. Ижозат бер, онажон, Зубаржад иккавимиз акамизни қаршилагани чопайлик! Отларимиз тайёр, эгарланган!

Тангабека. Расми, ёвга кетганни узатиб бормайди, қайтганнинг йўлига чиқмайди, болаларим! Бурунгилар сабр, сабр деганлар.

Дарвеш. Мана, бойвучча, башоратимга таш бердингми. Тилакларингни худонинг ўзи қабул қилди.

Тангабека. Бизни сен хушнуд қилсанг, сенинг худо қувонтирсинг!

Шафак. Тоқатларим тоқ бўлди, ойижон, кўзим тиниб, ер-кўк айланадётгандай! Ижозат бер менга, истикболига югурай! Йўлмирзамни олиб келган отнинг ёлларини тараб ўнай, изларини кўзимга суртай.

Тангабека. Сабрсиз бўлма, келин!

Зубаржад (Шафак олдига келади). Шодлик сенинг мажнунтолдай эгиб қўйди, Шафак. Бошингни кўтар, овсин! Сенинг қувончининг ҳаммамизнинг қувончимиз, жонгинам!

Шафак. Кутиш йиллари бу қадар қийин туюлмаган эди, Зубаржад. Дилинг талпиниб, кўзинг кўрмагандан оғири йўқ экан!

Девона (узоқка қараб). Ана, тепага отлиқ чиқди... яна... яна бири чиқди... вой-вой, бунча кўп экан?

Ҳамма ўша томонга қарайди. Да ревеш гина жойидан
кимиirlамай ўтирибди.

Эшмирза. Олдинда келаётганинг учинчиси
акам... худди ўзи...

Тангабека. Йўқ, у эмас. Ўз ботиримни ўзим
танимайманми?

Оқийигит. Аnavи тўртинчиси акамга ўхшайди!

Тангабека (*Шафаққа назар ташлаб*). Келин,
ёдан ғолиб қайтган эрни шу тахлит кутадими?! Уст-
боингга қара! Эринг нима дейди?

Шафақ (*бирдан ҳушини йигиб*). Рост айтасан,
онажон! Эс-ҳушимдан ажраб қолибман. Нима қилай,
қайси кўйлагимни кияй, онажон, айт, нимани кияй?

Тангабека. Бугун ярашганини танлаб кий!

Шафақ. Тўй оқшоми кийган кўйлагимни кийиб
чиқсан-чи?! Бўладими, ойи?

Зубаржад. Ўшани кий, Шафақ, ўшани кий, ов-
син. Бугун ҳам тўйинг!

Шафақ шошилинч ўтовга кириб кетади. Бир дам жимлик.

Тангабека. Ҳалиги чопар нега бизникига кир-
май ўтди экан?

Девона. Суворисиз бир от етакда оқсаб келаяп-
ти-ю, лекин жуда қайсарлик қиляпти.

Оқийигит. Мен акамни кўрмаяпман, нега одам-
лар ичиди акам йўқ? Сен кўряпсанми, ойи?

Тангабека. Билмайман, болам, ҳамма отлиқ
кўзимга аканг бўлиб кўриняпти.

Оқийигит. Акам йўқ, ойи. Олдингилар яйловга
етиб келди. Акам юзбоши ахир, юзбоши олдинда кел-
майдими?

Девона. Ана, ҳалиги оқсоқ отнинг юганини олиб,
чўлга ҳайдаб юборишид... Йўқ, от кетмай яна бошқа-
ларга қўшилиб олди.

Ҳамма жим кузатади. Шафақ кийиниб чиқади.

Ш а ф а қ (ўзига). Мана, тўй кўйлагимни кийиб, сенинг билан қовушмоққа чиқдим, менинг Йўлмирзам! Сен отингга қамчи уриб нега елиб келмаяпсан? О, Йўлмирзам, менда заррача сабр-тоқат қолмади. (*Зубаржад билан Оқийигит ўртасига киради.*) Сизлар кўр япсизми? Нега мен кўрмаяпман, ё худо, мен ҳеч кимни кўрмаяпман, Йўлмирза қайси бири?

Ҳамма жим. Ўтов орқасидан отлиқлар ўта бошлайди.

Т а н г а б е к а (олдиндаги отлиққа). Бойиш, сенмисан? Нега ёнингда Йўлмирза кўринмайди? (*Отлик ўтиб кетади.*) Нега жавоб бермайсан, Бойиш?!

О қ ў и г и т. Бошини әгиб ўтиб кетди...

Т а н г а б е к а. Ҳой, Борлибой, юзбошингиз Йўлмирза нега орқада қолиб кетди? (*Ўша томонга интилади.*)

О қ ў и г и т. Бу ҳам бошини әгиб ўтиб кетди..,

Т а н г а б е к а. Ҳеч бўлмаса, сен жавоб қил, Қўлош, нега орангизда Йўлмирза йўқ? Менинг болам қаёқда қолди?

Д е в о н а. Бари ўтиб бўлди...

Т а н г а б е к а. Ҳаммасининг тили кесилганми, ни ма бало? Нега жавоб қилмай ўтиб кетишиди?!

Ёздан қайтаёттандардан бири келиб, Войвучча олдига юган билан кичик бир тугунча қўяди. Девона ютуриб келиб юганни олади. Тугунчани ушлаб кўради.

Д е в о н а. Бу тугунчада яна олтин бўлмасин, бойвучча?

Т а н г а б е к а. Тупроқ! Қора тупроқ! Йўлмирзамнинг қабр тупроғи! Оҳ болам, болам, болам!

**Шафак. Йўлмирза! Йўлмирзам! Ёнингга торт,
Йўлмирза! Торт мени ёнингга, Йўлмирзам! Бу тўй
кўйлагим кафаним бўлсин! (Қичқириб йиглаб, Оқийи-
гит билан Зубаржад ўртасига йиқилади.)**

Улар ўзларини четга оладилар. Шафакни ҳеч ким суюмайди.

**Тангабека. Мен сенга нима гуноҳ қилувдим,
э, худо! Мени жазолаганинг жазолаган! Умрим бўйи
ғазабингдан қутулмадим! Гуноҳим нима?! (Бирдан
жим қолади.) Болам... Ўғилгинам, болам!..**

Девона Шафак ёнига ўтириб, унинг соchlарини силайди.

**Девона. Йиғлама, Шафак, сен менга хотин бў-
ласан!**

ИККИНЧИ ПАРДА

Орадан бир неча кун ўтган. Тангабека нинг ўтови. Оқсоқоллар ўтирибди. Дарвеш ҳам шу ерда. Гўшт еб бўлиб, қимиз ичяптилар. Бир чеккада Шафак.

Тангабека. Қани, келин, чаққон, чаққон. Оқсоқолларнинг қўлларига сув қуй! Кейин бошқа ишларга қара!

Шафак дашибўй ва қумғон тутиб меҳмонларнинг қўлларини ювдиради.

Биринчи оқсоқол. Раҳмат, бойвучча, жуда катта зиёфат қилиб юбординг, феълингни худо ҳамиша шундай кенг қилсин!

Иккинчи оқсоқол. Хонадонингни Элмирзанинг саховати тарқ этмабди, келин. Давлатингга худо барака берсин. Сен бойвучагина эмас бек, бекасан.

Учинчи оқсоқол. Сахийнинг давлати камаймайди, дейдилар. Бу дунёни ким орқалаб кетибди. Еганинг, ичганинг қолади, ўйнаб-кулганинг қолади. (*Шафак қўлига сув қуйганча бармоқларини ялади.*)

Тангабека. Энди қимиздан тановул қилинглар.

Учинчи оқсоқол. Таомдан улуғ бўлмоқ гуноҳ! Тановул қиласиз, бойвучча. (*Очкўзлик билан ичади.*) Бай-бай-бай, бутун томирларимга майдай ёйилиб кетди-я.

Шафак кетади.

Тангабека. Рисқулбекка чопар юборган эдим.
Ҳанузгача дараги йўқ.

Учинчи оқсоқол. Элбошининг элда иши чиқиб қолгандир-да.

Иккинчи оқсоқол. Санқиб юрмагандир, албатта.

Биринчи оқсоқол. Келмас бекни кутмайдилар.

Учинчи оқсоқол. (*Қимиз ичади.*) Бу гап ҳам тўғри.

Тангабека. Нима қилсам—нима бўлади, деб тунлар мижжа қоқмай ўйлаб ўйимга етмайман. Сизларнинг маслаҳатингизга муҳтожман. Фозил ҳукмнингизни чиқариб беринг, оқсоқоллар!

Биринчи оқсоқол. Ҳа, бойвучча, бахтингга рахна кетди. Лекин уни тиклаш керак. Ўлган кетидан ким ўлибди?! Тириклар тириклигича кун кўраверади.

Учинчи оқсоқол (*қимиз ичуб*). Ейди, ичади, дунёдан ўтаверади.

Биринчи оқсоқол. Фалакнинг гардиши, бойвучча. Кўнмай иложинг қанча?

Тангабека. Шу фалак гардишини изига солиб юбормоқ керак.

Иккинчи оқсоқол. Кенгашлик тўй тарқамас деганлар, кенгашшиб кўрайлик.

Тангабека. Шафақ келин ўн гулидан бир гули очилмай, мана, әрсиз қолди. Уни уюр-уюр мол бешиб олганимдан хабарингиз бор. Оқийигит учун Рисқулга қалинни тўлаб бўлганиман. Энди нима қилай, йўлйўриқ кўрсатинглар!

Иккинчи оқсоқол. Ўтганлардан қолган одат ва таомил бор, васият бор, бойвучча, шариат шаръидан чиқиб бўлмас!

Учинчи оқсоқол. Кенжека ўғлингни ҳам ўйласмаслик инсофдан әмас. Кенжанг ҳам ўсиб бўйи етиб қолди. Неча ёшга борди?

Та н г а б е к а. Ҳали бола, энди ўн иккига тўлди.

У ч и н ч и о қ с о қ о л. Мен тўқиз ёшимда акамдан бева қолган янгамга уйланиб, унинг қўйнига кирганман.

Б и р и н ч и о қ с о қ о л. Бизни чақирганингдаёқ билгандим, бойвучча. Бу ҳақда бир сен әмас, бутун уруғ ўйлаяпти, сенинг ташвишинг уругнинг ташвиши. Юрсам ҳам, турсам ҳам ўйлайман. Мана бу қурдошимиз айтганидай, таомилга амал қилиб, удумимиэни тутайлик. Ўтганлар васиятини адо этайлик!

И к к и н ч и о қ с о қ о л. Эшмирзани янганинг қўйнига киритиб бўлмайди. Бу шариатга хилоф, негаки ўзидан катта тирик акаси бор, улуғлар!

Б и р и н ч и о қ с о қ о л. Буни ҳам ўйлаб келдим, ўйлаб ўтирибман. Бу ерда биргина йўл бор, бойвучча. Шафақ келин Оқийигитга бўлади. Рисқул олган қалини қайтариб беришга қурби етса, қизини Қорахўжа уруғига беради-қўяди. Янглишмасам, совчилар ҳам келиб юрган эди.

Д а р в е ш безовта.

Та н г а б е к а. Қалинни катта олган. Қайтаришга қурби етармикан? Бойнинг моли ҳам ҳисобли.

У ч и н ч и о қ с о қ о л. Қайтармаса, Зубаржадни кенжанг Эшмирзага унаштириб, икки тўйни бирга ўtkазасан. Уруғ ҳам еб-ичиб, кўнгилхушлик қилиб қолади. Эл орасида бундағанги тўйлар бўлмаганми?

Та н г а б е к а. Оқийигит билан Зубаржад нақ бир олманинг икки палласи! Бир-бирларини ўлгудай суюшади. Ўн етти йиллик ширин орзуларидан маҳрум этиш жуда қийин савдо.

И к к и н ч и о қ с о қ о л. Суюшмоқ—шайтоннинг макри. Бандаларни йўлдан оздирраб ҳаром-харишга бошлаган ҳам ўша ошиқ-маъшуқлик әмасми? Ўша! Ҳамма ўшаларнинг касрига учраяпти.

Та н г а б е к а (*сесканиб кетади*). Тўғри айтасан...

Биринчи оқсоқол. Ихтиёр бизда эмас, бойвучча, шариат шуни тақозо қилади. Рисқулдан қалин қайтмас, икки ўғлингни бирваракай уйлантирасан. Аммо, аввал Йўлмирзанинг қирқини ўтказиш керак.

Иккинчи оқсоқол. Бўлмаса шундай деб фотиҳа қиламиз, бойвучча.

Дарвеш. Эл оғалари, андак сабр қилинса. Мусо-Фирнинг ҳам бир қалима сўзини тингласангизлар.

Учинчи оқсоқол. Ҳа, пайғамбар элчиси нима демоқчи өқди, ашитайлим.

Дарвеш. Ўйлаб иш тутиңг-да, оқсоқоллар. Ни-коҳ ёшига етмаган, ҳали ўн иккига ҳам тўлмаган ўсмири ниқоҳлаш—бу шариатнинг муқаддас қонунига хилоф. Танангизга ўйлаб кўринг.

Учинчи оқсоқол. Яйловнинг ўз қонуни, ўз таомили бор, Дарвеш, биа учун ўша муқаддас!

Дарвеш. Йўқ, уламолар, бу ишингиз шариатга тўғри келмайди. Шафақ тақдирига тан бериб, тангрига имон келтириб, бегуноҳ туллигича ўтиб кетса, уруғингизнинг обрўси бўлади. Мана бу ҳақда фикр юритиб кўринглар.

Кексалар иккиланиб қолишади.

Тангабека. Эҳтимол, Дарвеш ҳақдир, ҳукм чиқаришга шошилманглар.

Иккинчи оқсоқол. Йўқ, бойвучча, яйловимизнинг урф-одатларию, таомили ўзингга маълум. Биз ҳам кўпни кўриб умр кечирган кишиларданмиз. Муқаддас таомилимизни оёқ ости қилган бандаларни оллоҳи-таолонинг ўзи жазоламай қўймайди.

Дарвеш. Гуноҳ иш қиляпсиз, қариялар, гуноҳ иш.

Биринчи оқсоқол. Мана бу тақсиrimиз айтгандай, бизлардан ҳам кекса таомилимиз бор, ўшанга амал қиламиз, Дарвеш.

Дарвеш. Маккаи Мукаррама билан онт ичиб айтаман, ҳукмингиз инсофдан эмас!

Учинчи оқсоқол. Каъба, Маккаю Мадина узоқда, Дарвеш, биздан олисда. Тавба, деб айтиш керакку-я, биз әркин, саҳройи одамлармиз. Саҳронинг ўз қонунлари бор. Сен билан бизнинг эътиқодимиз бир бўлса ҳам, йўриғимиз, таомилимиз бошқа.

Дарвеш. Ўзингиз ҳам ваҳший, таомилингиз ҳам! Сизлардан имон ҳам ҳазар қилади.

Биринчи оқсоқол. Шуни билиб қўйки, Дарвеш, биз ўзимизни камситишга ҳеч кимга йўл қўймаймиз, ҳатто сенга ҳам.

Иккинчи оқсоқол. Қани, тақсиrlар, омин денг, хайрли ишга фотиҳа берайлик.

Дарвешдан бошқалари фотиҳа ўқийдилар.

Биринчи оқсоқол. Бойвучча, бизга рухсат энди. Иzzат-ҳурматинг учун қуллуқ. Давлатингни худо зиёда қилсин.

Тура бошлайдилар.

Учинчи оқсоқол (*қимиз ичади*). Шошиладиган ёшдан ўтганмиз шекилли, қариялар, таомни ташлаб кетиш ярашармикан?

Иккинчи оқсоқол. Ярашади, ярашади. Овқатдан бошқа дардинг йўқ! Қани тура қолинглар энди.

Тангабека. Катта бошингизни кичик қилиб келдингизлар, улуғлар, савоб ишга бош бўлдинглар, тану жонингизни худо саломат қилсин.

Кетишади. Тангабека кузатиб чиқади.

Дарвеш. Лаънатилар! Йўқ! Барibir айтганимни қиласман. Тангабека менинг чангалимда-ку. Хоҳласам бўғаман, хоҳласам қўяман. (*Панжаларини юмиб очади.*)

Тангабека қайтиб киради.

Тангабека. Маслаҳатингни олмаганларига ранжима, дарвеш, бизнинг урф-одатни ҳазм қилишинг қийин. Менга ҳам осон тутма. Юракларим эзилиб кетяпти. Бу иш ҳали неча одамнинг қон-қон йиглашига сабаб бўлади. Лекин, одат ҳаммадан бешафқат, таомил ҳаммасидан кучли. Бунга сенинг тушунишинг қийин!

Дарвеш. Сизларнинг ваҳший таомилларингизни билмайман, бойвучча, буниси ҳақ! Лекин ўзимга нима кераклигини биламан!

Тангабека. Тилагингни бажо келтираман, мусофири!

Дарвеш. Ваъдани катта қилиб, кейин оғриниб ўлтирма, бойвучча.

Тангабека. Сўзларинг аллақандай ғалати кўриняпти. Гапларинг ҳам бир хил. Нафасингни иссиқ қили, меҳмон, ёт юртдан келган киши бўлсанг...

Дарвеш. Дин-эътиқод йўлларида қирқ йил кезиб чарчаган одамман, бойвучча. Мусофирилик ҳассасидан бошқани кўзим кўриб, қўлим тутгани йўқ. Мен ҳам тирик одамман. Бағримни тош деб ўйлайсанми?

Тангабека. Гапларинг ғалати, мусофири, бу сўзларнинг менга нима дахли бор?

Дарвеш. Сендан бошқа кимга гапираман, ахир, бойвучча?

Тангабека. Сен бир ёқдан келган одамсан, бандаларни ёзмиш етаклаб юради, дарвеш! Бу ерга олиб келган қисматинг йўлингни ҳам берар.

Дарвеш. Менинг ҳам шошиладиган даврим ўтиб боряпти, бойвучча.

Ташқарида от дупури эштилади. Бирор отдан сакраб тушади.

Тангабека. Отда бирор келди. Оти ҳансираяпти. Олисдан келган чопарга ўхшайди.

Рисқул киради. Бойвучча у томон бир неча одим юради.

Рисқул. Ассалому алайкум, эл-юртинг омон, мол-давлатинг зиёда бўлсин, бойвучча! (*Дарвешни кўриб*) Ассалому алайкум!

Дарвеш. Баалайкум ассалом, бек!

Тангабека. Айтганинг келсин, Рисқулбек, ҳани, тўрга ўт! Келмаганингга хавотирланиб, ўзим борай деб турган әдим.

Рисқул. Чопаринг борганда овда әдим. Хабар топишими билан орқамга қайтдим. Оқсоқоллар тарқалишипти-да?

Тангабека. Ҳа, сени анча кутишиди.

Рисқул. Ўтириб, фотиҳа қилайлик. (*Фотиҳа қиласди*.)

Тангабека. Овинг дуруст бўлдими, Рисқулбек?

Рисқул. Йўқ, бойвучча, овим юришмади, иккитағина карқур билан қайтдим. Овнинг мазаси йўқ, йил оғир келадиганга ўхшайди.

Тангабека. Ишқилиб, охири бахайр бўлсин...

Рисқул. Оқсоқоллар қандай ҳукмга келишди, бойвучча?

Тангабека. Бор таомилдан ўтиб қаёққа боришар әди, Оқийигит учун келин уйда бор. Олган қалинни тўла-тўқис қайтара олсанг, Зубаржадга яна ўзинг хўжасан, қайтара олмасанг, уйимизда кенжа ўғлим ўсяпти... (*Қимиз узатади*.) Қимиздан тановул қил, бек, гўштга насибанг қўшилмаган экан.

Рисқул. Тақдир шу экан, нима ҳам қиламиз, бойвучча, Зубаржадга ҳам совчи келган жоий бор. Қорахўжа оёғини тираб турибди. Ҳали яна совчи юборса керак, берган мол-жонингни қайтараман, қариндош бўлиш насиб қилмаган экан.

Дарвеш. Ё худованди карим, мол-мол дейсизлару, болаларингизни ўйламайсизлар-а!

Рисқул. Бу ҳақда сен ўйламасанг ҳам бўлади, Дарвеш! Шундай қилиб бойвучча, берган молингнинг ҳаммасини қайтариб юбораман, ҳаммаси ҳисобли.

Тангабека. Аввалги юборган молларимнинг урчишини ҳам ҳисобга олиб, санаб қайтаришни унутма!

Рисқул. Бўлмаса келишиб олайлик. Қанча урчиди деб тахмин қиласан? Аммо-лекин, бир оқсоқ така кам бўлса ҳам қўймайман.

Тангабека. Бошқа одамдан бирга бирни олар эдим. Сенинг беклил мансабингни инобатга олиб, икки бошга бир бош бўлса ҳам ризорман.

Рисқул (сакраб ўриидан туради). Овзингга қараб гапир, бойвучча, беклил мансабимни молга уриб, мени камситмоқчимисан?

Тангабека. Беҳудага қизишяпсан, бек. Сен бор, мансабинг бор, шунинг учун шаънингга қўшяпманда.

Рисқул (ниманидир эслаб). Ҳай, майли, бойвучча, қасосингни олдинг! Ҳазилимни чин билган экансан!

Тангабека. Дунё шунаقا, Рисқул, беклил умрлик бўлса ҳам, умр мангалик эмас. У дунёда ҳамма баб-баравар.

Рисқул. Вой-бў, кекинг зўр экан-ку!

Тангабека. Зиёфатга яраша фотиҳа дейдилар, бек!

Рисқул. Кўпайиши билан талаб қилиб, теримни шиласан-ку!

Тангабека. Сенинг теринг нимага ярап әди, ҳалол молимни сенга ҳаром қилиб қолдирсам, ҳурматсизлик бўлар, бек!

Рисқул. Шу орада молларга неча марта ўлат келди. Қанча мол қирилиб кетди. Қайси мол урчисин?! Мени қийин савдога қўйдиинг-ку!

Тангабека. Тўгри айтасан, бек, ўлатлар бўлди. Лекин қалин молига ўлим йўқ. Қирғин кишининг ўз молига келади.

Рисқул. Мени Рисқулбек дейдилар, бойвучча,

ади-бади айтишиб ўлтиришга тобим йўқ, бўладиган гапни айт!

Та н г а б е к а . Бўларини айтдим, бек!

Д а р в е ш . Бойвуччанинг нафси бузуқ эмас, бек, ортиқ сўраши ҳам мумкин эди...

Р и с қ у л . Сен дин аҳлисан, Дарвеш, бу дунё ишларидан узоқсан. Аралашмаганинг маъқул!

Д а р в е ш . Ихтиёринг, бек!

Та н г а б е к а . Майли. (*Кескин.*) Яхшилигимни унутмассан. Бештага биттадан қўшиб ҳам молни яйловга юбора қол!

Р и с қ у л . Ўнтарга битта бераман, вассалом!

Та н г а б е к а . Эй, қўй-е, сени бек деб ким айтади, хотиндан баттарсан...

Р и с қ у л . Сенга худо бас келсин, менга мол эмас, обрў қиммат. Бештага биттадан қўшиб ҳайдатиб юбораман молларингни... Лекин, бойвучча, сен билан қайта учрашишдан худонинг ўзи асрасин! Қизим сенинг домингга тушиб қолмаганидан жуда хурсандман. Шунни билки, Рисқулбек ҳеч нарсани унутмайди! (*Чиқиб кетмоқчи бўлади.*)

Ташқарида от дупури эшитилади. Биқинини чаңгаллаб чопар киради.

Ч о п а р . Хунук хабар, бегим, хунук хабар олиб келдим! (*Oғир нафас олади.*) Буйрагимни ўқ тешиб ўтди.

Р и с қ у л . Буйрагингни қўй, олдин хабарингни айт!

Ч о п а р . Ўтган кечаси узоқдаги подага қора булутга ўхшаб ёв ёпирилиб келди. Қорахўжанинг одамлари баримтага келган бўлса керак. Бутун молларингни ҳайдаб кетди.

Р и с қ у л (*чопарга қамчи ўқталиб*). Сенлар қараб туравердиларингми ёки қуёнга ўхшаб ин-инингга кириб кетдиларингми?

Ч о п а р . Туни бўйи олишдик, бек, ёқалашдик, кучимиз етмади, бек. Ҳамма йилқичиларинг, қўйбоқарларинг ўлган, қандай қилиб мен омон чиққанимга ҳайронман у жаҳаннамдан. Вой, ўламан, ичим қонга тўлди чоги, ҳолим ёмон, бегим, ўламан.

Р ис қ ү л . Ҳа, Қорахўжа шу йўлни тутдими ҳали! Энди у мендан баримтанинг қонли қасоси—қаримтани кутаверсин! Мени Рисқулбек дейдилар... (*Қамчи силтайди*.)

Т ан г а б е к а . Қаримтанинг устига қор ёғди деявер, Рисқулбек! Молсиз қолибсан-ку ё нотўғрими?

Р ис қ ү л . Тўғри, тўғри. Суюнавер, сенинг кунинг туғди.

Т ан г а б е к а . Нега суюнай, ахир, сенинг молинг билан меники ҳам кетгандир.

Р ис қ ү л . Молинг кетса, сенга келин қолади. Менинг на молим, на қизим қолди. Эҳ, муртад Қорахўжа! Қонингни томчилаб тўқмасам, Рисқулбек отим ўчсин, бутун зотимга қирғин келсин!

Т ан г а б е к а . Демак, қариндош бўлишдан бошқа чорамиз йўқ экан-да?

Р ис қ ү л . Яна сен ютдинг, бойвучча, яна айтганингни қилдинг!

Д а р в е ш (ўзича) . Ҳм-м... тақдир ўйини авжига чиқяпти...

Т ан г а б е к а . Очигини айтсам, Зубаржадни ўз қизимдай севиб қолганман. Қўлдан чиқариб юборгим келмаганди. Кўнглимга тортди.

Р ис қ ү л . Бу билан дардим енгил тортмайди. (*Чопарга*.) Тезроқ бориб отингга мин, одамларни йиф, у босқинчини қувиб борамиз, шояд етсак! Эй, отни олиб кел!..

Ч о п а р чолиб чиқиб кетади.

Т ан г а б е к а . Оқ йўл, бек. Ишингни худо ўнгласин.

Р ис қ ул. Қуллуқ, бойвучча! Фотиҳа бер, авлиё!
Д а р в е ш (*маккорона табассум билан пичирлаб ўқиб*). Худо ўз паноҳида асрасин, оллоҳу акбар.

Р ис қ ул б е к шиддат билан чиқиб кетади.

Т а н г а б е к а. Чўлдаги елни бостириб бўпсан, бек.
Қирғин дарахт бошида әмас, одам бошида юради!

Д а р в е ш. Мана, яна иккимиз қолдик, бойвучча.

Т а н г а б е к а. Бир ўзим танҳо қолсам, янада яхшироқ бўлар эди, дарвеш. Бир оз ўйлаб, хаёлимни йигиб олай.

Д а р в е ш. Ўйлайвер, мен шошмайман. Лекин хайрли иш ҳақида ўйламаяпсан. Оқийигит билан Зубаржадни бир-биридан айириб, әрнинг васиятига хиёнат қилипсан. (*Бошини эгиг чиқиб кетади.*)

Т а н г а б е к а. Бу Дарвеш ҳадеб гапни қаёққа бураверади, сира тушунмайман. Бизнинг ғам-ташвишимиз билан унинг нима иши бор? Ёки қилаётган бу ишларим чиндан ҳам раҳматли Элмирзанинг васиятларига хиёнатми? Бошимизга бундай балолар келишини ким билибди? Назаримда мени худди илон чаққанга ўхшайди. Ўзимни қўярга жой тополмайман. Тангрим, нима қилиш керак, нима қилай?!

П а у з а

Д е в о н а югуриб киради.

Д е в о н а. Бойвучча опа, бойвучча опа! Шундай Тол Қивиққа етиши билан Рисқулбекнинг оти мункиб кетиб, ўлди-қолди. Мана бундай юмалаб, ўмбалоқ ошиб кетди. (*Юмалаб кўрсатади.*)

Т а н г а б е к а. Бек тирикми?

Д е в о н а. Бек дарров сакраб турди-ю, от талаб қилди. Ёлчиқул бизнинг тўриқ йўргани тутиб, уни миндириб юборди.

Тангабека. Хайрият, жони омон қолибди бечоранинг.

Девона. Бекнинг дўпписи бир чақирим ерга учиб тушди, бошида мана бундай (*муштини кўрсатади*) ғурра.

Девона Тангабеканинг ёнига келиб ўтиради.
Тангабека унинг бошини силайди.

Девона. Бошимни силасанг бирам хуш ёқади, бирам хуш ёқади. (*Жилмайиб.*) Ҳамма вақт шундай қилиб тур, хўпми, бойвучча опа?

Тангабека. Бир бегуноҳ тириккина жонсан, Девона, сен билан сўзлашиб ўтирсам ўзим ҳам енгил тортаман.

Девона. Мени әркаласанг, йифлагим келиб кетаверади. Йўқ, бойвучча опа, мен йифламайман, мен йифласам, сенинг кўнглинг бузилади.

Тангабека. Йифлама, Девонам, сенинг йифингиз ҳам менга жуда қийин. Ҳамма ёқ алғов-далғов бўлиб кетди. Нима бўлишига ақлим етмай қолди. (*Девонанинг бошини силайди.*)

Девона. Сен билан иккаламиз бўлак яйловга кўчиб кета қолайлик, бойвучча опа? Эшмирзани ҳам олиб кетамиз. Майли, Шафақ ҳам кета қолсин биз билан! Майли! Оқйигит билан Зубаржадни ҳам қолдириб кетмаймиз, иккаласи бу ерда қийналиб қолади. Елчи-ҳул-чи? У ҳам яхши одам, уни ҳам олиб кетамиз. Дарвеш анави Рисқул яйловига кетаверсин.

Тангабека. Оҳ, Девона, қани энди сен айтган дай осонгина қутулиб бўлса? Кошки, кўргулик ва азобларимиз бу ерда қолса! Ҳаммаси орқамиздан қувиб боради.

Девона. Бароқни ҳам олиб кетамиз, бўлмаса суякларни ким кемиради?..

Тангабека. Ҳай, майли. Ана, қимиз қуайиб ич!

Д е в о н а (*қимиз қуя туриб*). Оқийигитлар оқ ўтов орқасида тоза ўйнашгандир-а!

Т а н г а б е к а. Кун кеч бўлиб қоптими?

Д е в о н а. Қуёш Тақилган қоя учиду турибди, худди осилиб турган кесик бошга ўхшайди...

Т а н г а б е к а. Бор, Оқийигитни бу ерга чақириб кел, кетмаган бўлса, Зубаржад ҳам келсин.

Д е в о н а. Шафақ Зубаржадга: бугун кетмайсан, менинг меҳмоним бўласан, деди, худди шундай деди, бойвучча опа.

Т а н г а б е к а. Шафақ билан Эшмирзани ҳам чақирип!

Д е в о н а. Йўргалаб бораверайми ёки шаталоқ отиб чопиб борайми, бойвучча?

Т а н г а б е к а. Чопиб бор, қанча тез битса бу иш, шунча яхши!..

Д е в о н а. Хўп бўлади, бойвучча опай. (*Чопиб кетади.*)

Т а н г а б е к а. Эй худойим, ўзинг мадад бер менга, иродато қил! Дилемни парокандалик ва кўнгилчанлик балосидан халос эт! Қисмат сингари бешафқат бўлишга ўзинг кўмак бер, парвардигор!

Д а р в е ш киради.

Д а р в е ш. Кечир мени, бойвучча, ибодат қилгани чиққан эдим, тасбеҳимни қолдириб кетибман, олгани кирдим. Ижозат бер, олай?

Т а н г а б е к а. Унутган бўлсанг ол, ҳаққимга дуо қил, худо менга шижаот ато қилсин! Болаларни чақиртирдим. Оқсоқолларнинг ҳукмини баён қилмоқчиман.

Д а р в е ш. Тушунаман, бойвучча, халал бермайман, кетаман. Аммо кечроқ олдингта кирмай иложим йўқ. Бир сўзим бор. Айтсам тилим, айтмасам дилим куяди.

Т а н г а б е к а. Эрталаб, хайрли соатда киравсан.

Дарвеш. Менинг сенга әрталаб әмас, оқшомги паллада айтадиган сўзим бор, бойвучча! (Бошини эгиб чиқиб кетади.)

Тангабека. Бу дарвеш менинг кўнглимни хира қилгани-қилган. Нима мақсади бор экан унинг?..

Оқийигит билан Зубаржад югуриб киришади, улар ниҳоятда шод.

Оқийигит. Ойи, чақирдингми бизни?

Тангабека. Ҳа, чақирдим, болаларим, чақирдим!.. Акангизнинг ҳали қирқи ўтгани йўқ, кўнглингизга қандай ўйин сифади, уялмайсизларми?

Оқийигит. Йўқ, ойи, нечоғлик ғам эзганидан...

Зубаржад. Оқийигит бугун акасига атаб қўшиқ тўқиди. Акаси учун жуда куяди, бойвучча, ўқиса кўзларимдан ёшим тирқираб кетди. Ўзининг ҳам кўзларида ёш кўрдим.

Оқийигит

Бу шивирлаб ёқсан ёмғир ёмғирми,
Акажоним, сенга тўқкан кўз ёшим.
Бу қорайган тошқин ювган соҳилми,
Аlam билан адо бўлган бардошим.

Тангабека. Бас, сен ҳам менинг ярамга туз сепма! Аканг ҳаммамизни орзу-умидларимизни, шодлигимизни ўзи билан олиб кетди! Оҳ, Йўлмирза, болагинам, Йўлмирзам, бошимизга қандай қора кунларни солиб кетдинг, болам?!

Оқийигит (*гангигандай, паришон*). Ундаи дема ойи, олдинда ҳали бизнинг бошланмаган ҳаётимиз бор. Ҳаёт бўлгач, шодлиги ҳам бўлади. Одам тирик экан унга умид ёр.

Еғоч отга миниб, Эшмира за чопиб киради.

Э ш м и р з а. Чух... қамиш оёқ аргумогим, чух! Ойи, ойи қўйчи Боймат мендан, хотин олганингда сен уни нима қиласан, деб сўради. Менми, мен уни қамчи билан боплаб савалайман, дедим. Тўғри айтибманми?

Т а н г а б е к а. Эсингни йиғ, тентак, алжирама! Қамчи билан хотин қалтаклаганни кўрганинг борми?

Э ш м и р з а. Кўрганим бор, ойи. Анави ғилай Йил-қибой хотинини кунда қамчи билан савалаб, ўласи қиласди.

Т а н г а б е к а. Одам эмас, ваҳший экан бўлмаса.

Ш а ф а қ, унинг кетидан **Д е в о н а** киради.

Ш а ф а қ. Чақирдингми, қайнанам?

Т а н г а б е к а. Чақирдим; ўтир, ҳамманглар ўти-ринглар. Сен, девона, эшитиб, жимгина ўтир.

Д е в о н а. Хўп бўлади, бойвучча.

О қ ё и г и т. Ойи, сен бизни жуда бемаҳалда тўпла-динг, ишқилиб, охири бахайр бўлсин.

Т а н г а б е к а. Огоҳлантираман, бу оқшом мендан яхши хабар кутмай қўя қолинглар. Ихтиёrim ўзимда эмас.

Ҳамма ташвишда, бир-бирларига қарашади.

Ш а ф а қ (ўзича). Худойим, наҳот ўйлаганларим олдимга кеяса? Бир балони сезяпман.

Т а н г а б е к а. Нимадан бошлишга ҳам ҳайронман. Бугун оқсоқолларни, яъни уруғларимизни ҳурматга сазовор улуғларини йиғиб, кенгаш қургандик. Ўйладик, кенгашдик. Ҳа, айтгандай, Зубаржад, Рисқул ҳам келиб кетди. Кенгашиб, фикрлашиб ота-боболаримиз удумини тутишга, ўтганлар таомилига амал қилишга қарор қилдик.

О қ ё и г и т (ҳаяжонда). Ота-боболаримиз таомили, васияти мен учун муқаддас. Бизнинг фотиҳамиз бор...

Та н г а б е к а. Таомилимиз, қонунларимиз авлоддан авлодга ўтиб келган қўҳна қонунлар, болаларим! Ундан ўтиб ҳеч қаерга боролмаймиз.

О қ ы ғ и т. Нима бўлди ўзи ойи, қийнамасдан тезроқ сўзла!

Та н г а б е к а. Акангнинг ўлими ҳамма ёқни остин-устин қилиб юборди, болам. Кўп умидларимиз пучга чиқди. Оқсоқоллар ёски удумимизни тутиб, шундай қарор қилдилар: Оқийигит, сен Шафакқа уйланасан. Эшмирза, сенга ана Зубаржад хотин бўлади, Аканғизнинг қирқини ўтказиб, сизларнинг тўйларингизга ҳаракат қиласмиш.

Ҳамма саросимада.

Э ш м и р з а. Менга хотин керак эмас, ойи, мен уйланмайман. Ана Девонага хотин керак. Мен ҳали тегишиб айтдим, менга хотин керак эмас. (*Ўтовадан чопиб чиқиб кетади*).

Д е в о н а. Қўй, қўй мени, бойвучча, ўз холимга. Менга хотин керак эмас, менга уйланиш гуноҳ. Хотиниз ҳам жуда яхши ухлайман. Ана, иккаласини ҳам Оқийигитга бер! Мени тинч қўй, бойвучча опа! (*Орқаси билан юриб ўтовадан чиқади*.)

З у б а р ж а д билан **О қ ы ғ и т** ҳамон саросимада, ҳайрон.

Ш а ф а қ ى. Истасанг ос, истасанг чопиб ташла, қайнанам! Лекин мени бундай жафоларга гирифттор қилма! Илининбургурган бир кузги етим япроқ сингариман. Тегма, қайнанам, ўзим узилиб тушаман. Сен мени учкишининг кўз ёшига сабаб қилма. Кўз ёши нималигини мен жуда яхши биламан! (*Хўнграб йиглайди*.)

О қ ы ғ и т (*қаҳқаҳлаб кулиб*). Эй, онажон! Тошдан тошга, қоядан қояга сакраб юрган кийикка: сен бундай қилма, деб ким буйруқ бера олади? Бу ерда унга қонун эмас... фақатгина ўқ ҳоким. Қўлинг борса, от биз-

ни. Биз Зубаржад иккаламиз бир жонмиз. Бизнинг тақдиримизни васият ва таомил билан ўзларинг қўшгансизлар!..

З у б а р ж а д . Ўлгунимча сенинг қулинг, хизматкоринг бўлишга тайёрман, бойвучча... Фақат бир илтимос, мени Оқийигитдан жудо қилма, менга Оқийигитими ни қўй!

О қ и г и т . Ундаи дема. Зубаржад, биз қул бўлиб эмас, ҳур бўлиб яшаш учун дунёга келганмиз. Қул бўлиб эмас, муҳаббат, аҳд-паймон асири бўлиб яшаш—бу буюк баҳт, Зубаржад! Ойижон, наҳотки сен унутдинг отам сўзларини? У ҳамиша, «Ҳурлик-баҳтиёрлик» дер эди... Хўш, нега жим бўлиб қолдинг? Айт, ойижон, сен бизнинг ирода ва садоқатимизни синааб кўрмоқчи эдинг, шундайми?

Т а н г а б е к а . Йўқ, болаларим, сизлар синовдан ўтгансизлар. Худойи таолонинг хоҳлагани бошқа экану, биз шошиб осийлик қилиб қўйған эканмиз, болаларим. Тақдирнинг ёзганига бўйсунмай иложимиз қанча?

З у б а р ж а д (Тангабеканинг оёғига йиқилиб). Бизнинг тақдиримиз сенсан, бойвучча! Сен кучли одамсан, ҳар нимага қодирсан, бизларни бир-биримиздан жудо қилма!

О қ и г и т (Зубаржадни ўрнидан турғизиб). Тур ўрнингдан! Бизнинг тиз чўкиб кечирим сўярлик нима гуноҳимиз бор, Зубаржад? Бизни туғилишимиз қовуштирган, фақат ўлимгина бир-биримиздан жудо қилиши мумкин!

Т а н г а б е к а . Тангримнинг қудрати чексиз.

З у б а р ж а д . Ундаи бўлса, нега унинг қудрати фақат ёвузликда чексиз экан, бойвучча?!

Т а н г а б е к а . Тавба деб гапир, Зубаржад. Бу сўзларингнинг турган-битгани гуноҳ!

З у б а р ж а д . Бир илдиздан кўкариб чиққан қўшалоқ ниҳолни томиридан қирқиб ажратиш гуноҳ

эмасмикин, бойвучча! Бизнинг кўз ёшларимиз наҳот сенинг бағрингни қон қилмаса, бойвучча! Бунча қаҳринг қаттиқ!

О қ и г и т. Она, агар сен бизни шундай жудолик доғига ташлайдиган бўлсанг, берган оқ сутларинг ҳаром бўлади! Йўқ, йўқ, она! Оёқ-қўлларимизга темир кишиан солсанг солгину, аммо дилларимизни озод қўй!

Тангабека. Тўлқин дарёдан чиқиб кетмайди, ўглим, қирғоқча урилиб яна изига қайтади. Тақдир дарёсининг қирғоқлари баланд ва серқоя. Ундан ҳеч ким ҳатлаб ўтган эмас!

О қ и г и т. Мана, биз тақдир дарёси тўлқинига ботмай, ундан ҳатлаб ўтамиз.

Зубаржад. Ҳаммаси сенинг қўлингда, бойвучча!

Тангабека. Мен тақдир қулиман, таомил, урф одат қулиман. Менинг эрким ўзимда эмас.

О қ и г и т. Оҳ, бу қуллик! Банда бандага қул, қонунга қул, таомилга қул! Қул, қул, қул! Одамлар ўзларига қонун ўйлаб чиқарадилар-да, ўла-ўлгунча ўша қонуннинг қули бўлиб яшайдилар. Қул, қул! Одат ва заифлик қули, гўллик ва ҳирсият қули! Инсоннинг бири шуҳратпастлик қули бўлса, иккинчиси молу дунё қули! Учинчиси нодонлик қули бўлса, яна бири ёвузликка қул! Нима учун шундай? Нима учун ҳар бир тирик жонни беҳуда тамоил ва урф-одат гўрига тиқасизлар? Биламан, эл-уруғимизнинг одат ва таомилига кўра мен Шафақча уйланишим керак. Бунга на Шафақ, на мен рози ахир! Ўт билан сув қандай қовуцсин?!

Тангабека. Бизда ихтиёр йўқ, бу олло-таолонинг хоҳиши.

Шафак. Бизнинг зоримиз, илтижоларимиз нега унинг қулоғига етмайди. У шунча узоқдами? Ахир, ўзи яратган бандаларидан нега хабари йўқ, ўша худой таолонинг!

Оқийигит. Оллоҳнинг қули бўлмоқ ҳам бир гўрку-я, янга! Аммо ўзимиз ўзимизга қул бўлиб яшаймиз. Мен сажда қиласидиган Оқмон шоир шундай деган эди:

Қуллар бўлиб яшашдан ҳам қуллик ёмон,
Еримизда қуллар битар бирон замон.
Қуллар битар! Руҳимизга подшо бўлиб,
Дилимизга тахтин қуриб қолар ҳамон...
О, руҳларни кишамлаган қуллик ёмон!..

Тангабека. Оқмон шоирим әлдан бадарға қилганинни ҳам унутма, ўғлим!

Оқийигит. Шоирни әлдан бадарға қилишга, юртдан ҳайдаб чиқаришга ёвузларнинг кучлари етади. Лекин унинг қўшигини ҳам, руҳини ҳам қувиб чиқариб бўлмайди әлдан!

Тангабека. Уруг унга лаънатлар ўқиди.

Оқийигит. Йўқ, уруғ ёвузларига, жоҳилларига у лаънат ўқиб кетди.

Тангабека. Мана, оз эмас, кўп эмас, эллик йиллик умримда кўпни кўрдим, ўғлим. Лекин таомилни оёқ ости қилган бирон қулнинг худо ғазабидан омон қолганини ҳали кўрганим йўқ. Мен буни жуда яхши биламан. Шунинг учун бутун ташвишу ҳаракатим — сизни шу ҳалокатдан ҳимоя қилиш.

Оқийигит. Ҳимоя қилма, она, бизни бир-бирамиздан жудо қилишнинг ўзи ҳалокат қаърига отишдир.

Шафак. Мен мисоли милтиллаб ёнаётган бир шамман, қайнанам. Йўлмирзам ҳаққи, унинг руҳи ҳурмати мени ўз ҳолимга қўй. Эрим доғида ўзим ёниб, ўзим сўнайин. Утинаман, қўй, мени ўз ҳолимга!

Тангабека (жаҳл билан). Тилинг чиқиб қолибди дейман, келин? Ҳаддингдан ошма! Сени уруғ пода-пода мол бериб олган. Сенинг хўжанг ҳам уруғ бўлади. «Севги, севги» дейсан ҳамманг. Мана, Йўлмир-

за билан севишиб қовушдиларинг, бахтинг кўпга бордими? Муҳаббатнинг турган-битгани ҳасрат.

Шафак. Муҳаббатнинг ҳасрати ҳам мен учун лаззат!

Тангабека. Етар, гапни бас қилларинг энди!.. Қиёматда худо олдида мен жавоб бераман. Қарор битта: оқсоқоллар қандай ҳукм чиқарган бўлса, шундай бўлади! Ҳадемай ҳаммангиз ҳам тақдирга тан бериб кетасиз.

Зубаржад. (*Оқийигитнинг чеҳрасига боқиб.*) О, тангрим, бу не ҳол, Оқийигит? Нега чакка соchlаринг бирдан оқариб кетди? Ё худойим!..

Оқигит. Қуллуқ, она, минг раҳмат! Шу дақиқалар ичida сен мени ўттиз ёшга улгайтирдинг. Ақлимни тиниқтиридинг. Ҳозир мен йигит эмас, кўпни кўрган эр киши бўлиб сенга айтар сўзим бор. Мен Зубаржадсиз бир кун ҳам яшай олмайман. Жонимиз ҳам, танимиз ҳам бир ерда бўлади. Бутун севган уруғим мени лаънатлаш эмас, оғимга йиқилиб ёлворса ҳам, айтганимдан қайтадиган эмасман. Мен муҳаббатим билан ўзимни жуда қудратли ҳис қиляпман, она! Сен бутун дунёни қоронғиликка кўмдинг, мана шу қоронғиликда мен учун биргина юлдуз — Зубаржад ярқираб турибди. (*Зубаржаднинг қўлидан ушлаб Тангабека олдига келади.*) Бизга берган фотиҳангни такрорла, она жоним!

Зубаржад. Мен Оқийигитсиз бир кун ҳам яшай олмайман. Мен сўнгги нафасимгача Оқийигитни кимас, бойвучча! Бизни қовуштирган фотиҳангни такрорла, бўлғуси қайнанам! Такрорла фотиҳангни, бўлғуси она жоним!

Тангабека. Мен фотиҳамни такрорлаш учун эмас, қайтариб олиш учун чақиртирдим сизларни! Мана, кўз олдингизда оламан уни. Оқсоқолларнинг ҳукми ҳукм! Бугундан бошлаб бир-бирингиз билан кўришишингизга мен розилик бермайман!

О қ и г и т . Сен қүёш нуридан маҳрум этсанг, она, бизнинг йўлимизни ой нури ёритади, бахтимизга паноҳ бўлади! Юр, Зубаржадим, кетдик!

О қ и г и т билан З у б а р ж а д чиқади.

Т а н г а б е к а . Кунимиз серқайғу, эртамиз қоронғи!

Ш а ф а қ (*саҳроға термилиб*). Ҳамма ёқ симсиёҳ, қора туман қоплаган атрофни... (*Кета бошлиайди.*)

Т а н г а б е к а . Бир оз сабр қил, Шафақ, кетма.

Ш а ф а қ . Овқат пиширишим керак.

Т а н г а б е к а . Улгурасан. Гап бор.

Ш а ф а қ . Айтилмаган нима қолди, қайнанам?

Т а н г а б е к а . Қайнана-келин бўлиб эмас, икки тенг аёл бўлиб гаплашайлик.

Ш а ф а қ . Даражамиз тенг эмас-ку, қайнанам.

Т а н г а б е к а . Ҳамма хотинлар бир хил, Шафақ. Мен ҳам бир вақтлар ёш бўлганман.

Ш а ф а қ . Сен ҳозир ҳам қари эмассан!

Т а н г а б е к а . Сен эндигина дараҳтдан узиб олинган етук мевасан, Шафақ! Заҳа бўлмаган, шарбатга тўлиб, тирсиллаган мева! Чиройлисан, қадди-қоматинг келишган жувонсан. Сенинг чекингга йигитларнинг сараси тушди. Менга қанча оғир бўлишига қарамай, сенга маслаҳатим шу: фурсат ғаниматлигига ўзинг ҳақингда ўйлаб қол.

Ш а ф а қ . Ёшлигимни уриб кетди қора гармсел.

Т а н г а б е к а . Мен ҳам севги лаззатига тўйиб қонмай бўлиб қолдим тул. Неча марта ўлдирмоқчи бўлдим ўзимни. Лекин ҳаёт устун чиқди. Инсон ҳамма нарсага кўникади.

Ш а ф а қ . Мен кўника олмайман, бардошим етмайди.

Т а н г а б е к а . Ўзингни кўниктири, Шафақ, Оқийигитга кўнгил бер, бошқа иложимиз йўқ! Ой булутлар

чодирига кирганда сен ҳам секин унинг оқ ўтовига кир!

Шафак. О, қайнанам, худодан қўрқ, мени ёмон йўлга йўллашдан! Мен ундаи хиёнатни хаёлимга ҳам келтиромайман. Биронинг бахтини ўғирлаб киши бахтли бўладими? Зубаржаднинг кўз ёши қимни тулади?

Тангабека. Зубаржад ҳақида биз ўйлаймиз, сен ўзингни ўйлайвер!

Шафак. Йўқ, мен бу йўлга юрмайман, қайнанам! Мен ўз оёғим билан унинг оқ ўтовига кириб боролмайман. Мени бу шармандалиқдан қутқар! Мен гуноҳдан қўрқаман. Анави Дарвеш аллақандай ёвуз назар билан мени кузатиб юради. Қаерга борсам, ўша ерда у...

Дарвеш киради.

Дарвеш. Кечки ибодатни ҳам адо этиб келдим, бойвучча... Нимагадир ҳамма ёқни қуюқ туман босиб келяпти, бамисоли қора булут! Ишқилиб яхшиликка кўринсин!

Тангабека. Қора туман хайрлик келтирмаслигини пайғамбар элчиси билса керак?!

Шафак сездирмай чиқиб кетади.

Дарвеш. Ер гуноҳга тўлиб-тошган, бойвучча!

Тангабека. Ерда бандалар яшайди. Банда бўлган жойда ҳар нарса ҳам бўлади.

Дарвеш. Хўш, бойвучча, ёшларни қўндира олдингми?

Тангабека. Мен уларга уругнинг ҳукмини айтдим, кўниш-кўнмасликка уларда ихтиёр йўқ.

Дарвеш. Шундай дегин...

Тангабека. Шундай... Мен сенга анчадан бери айтмоқчи бўлиб юрган эдим. Сенинг қилиқларинг мени

борган сари ҳайратга солиб қўйяпти. Авлиё бўлсанг ҳам, бошқа бўлсанг ҳам, ўзингта, биз учун сен бегонасан... Балки...

Дарвеш. Нима «балки?»

Тангабека. Балки кетарсан дейман... Сенсиз ҳам ҳаётимиэ нотинч. Нима истасанг шуни олда, жўнаб қол!

Дарвеш. Менга мол керак өмае, менга бир қароргоҳ керак. Жаҳон кезиб чарчадим, қўним керак.

Тангабека. Ундай бўлса, ўзингга бир қароргоҳ излаб топгин!

Дарвеш. Бир умр излаган қароргоҳимни топдим, бойвучча, жаҳонгашталикка алвидо дедиму, кексалигимни сенинг қароргоҳингда ўтказишга келдим.

Тангабека. Бу ернинг бекаси мен! Менинг қароргоҳимда сенинг ризқинг тугади, энди Йўлингга равона бўл!

Дарвеш. Қуллуқ, бойвучча. Лекин мен бир дайди ит әмасманки, олдимга бир суюк ташлаб, алдаб, ҳайдаб юборсанг. Фаҳмладингми?

Тангабека. Нималар деяпсан ўзинг? Ҳеч нарса тушунмаяпман.

Дарвеш. Тушунмасанг, тушунтириб қўяман.

Тангабека. Йўқ, тушунтирмай қўя қол, керак әмас. Аммо кет бу ердан. Нима керак бўлса шуни олгину, кет!

Дарвеш. Керагини албатта оламан, бойвучча, леким кетмайман. Негаки, кетиш учун келган әмасман!

Тангабека. Йўқ, кетасан! Меҳмондўстлигимни кўрдинг, лозим бўлса ҳаҳримни ҳам кўриб қоларсан! Яхшиси, нима кераклигини айт, буюраман, ҳосир беришади!

Дарвеш. Менга Шафақ керак, бойвучча. Шуни бер. Мен қолган ҳаётимини шу ерда, Шафақ билан ўтказаман... Ҳа, нега ўқраясан? Мен ҳали қариганим йўқ, энди эллик бешга кирдим.

Тангабек а. Тўхта, тўхта! Бу куёв алаҳсирашини ўнгимда эшитяпманми ё тушимда? Ҳалиги авлиё Дарвеш сенмасмидинг?

Дарвеш. Авлиёликни тарк этганимга кўп бўлди, бойвучча. Бу гуноҳкор ери тарки дунё қилиб, ўзимни дин, худо йўлига бағишладим. Дину имон, рўзаи рамазон, тоату ибодат кўчаларида қирқ йил адашдим, ҳақиқат истаб, нима топдим? Хулё топдим, хулё! Ҳаммаси риё, ҳаммаси беҳуда гап, бойвучча. Нимага сажда қилдим, нимага топиндим? Қўша-қўша хотин қучиб, олтии саройларда бу дунёning роҳатини кўрган олий зотлар имонининг саломатлиги учунми?

Тангабека. Худо сени охиратда ўзи ёрлақайди.

Дарвеш. Охират ҳозир ер устида, бойвучча! Охиратнинг жаннати ҳам, дўзахи ҳам — Шафақ! Уни кўрдиму, диндан чиқдим, имондан айрилдим, бойвучча. Мевасиз дарахт ва уясиз қуш сингари сўққабош бўлиб дунёдан ўтиб кетаётганимга афсусланиб қолдим. Шафақ мени кўқдан ерга туширди. Менда ернинг нозу неъматларидан, роҳат ва лаззатларидан баҳраманд бўлиб яшаш иштиёқини уйғотди. Ёз қуёши ботаёттанд ҳам ёниб ботади... Музлаб қолаётган қоним түғёнга келиб, мудроқ ҳирсу ҳавасларим исён кўтариб, менга омон бермаялти. Мен кўмилган вулқонга ўхшайман, бойвучча! Менга Шафақни бер! Бу гуноқ, ҳозироқ бер уни менга!..

Тангабека. Эй, ақлдан озмадингмикан, Дарвеш, эсингни йиг!

Дарвеш. Эсимни йифиб олганим учун ўзимга тегишлигини талаб қиляпман, бойвучча.

Тангабека. Ҳозироқ кет бу ердан, дарвеш, бўлмаса тумонатни бошингга тўплайман, қамчи остида қоласан.

Дарвеш. Пўписангни қўй, бойвучча, мен қўрқмайман. Ҳаёт ўз қамчисини қаттиқ босган менга. Қа-

ра-я, одамларга имон тарқатиб юрган одам, бу ерга келиб имондан чиқиб қолса. Имонсиз одам қўрқоқ бўлмайди.

Тангабека. Яна бир сўз дейдиган бўлсанг, оёқ-қўйлингни боғлатиб, чўлга чиқариб ташлатаман, оч бўриларга ем бўласан.

Дарвеш. Ташлатишдан бурун бир ҳикоя эшит...
Бу бўлган воқеа.

Тангабека. Керак эмас ҳикоянг, ҳикоя эшитадиган бўлиб ўтирганим йўқ.

Дарвеш. Ҳикоям жуда қизиқ... кўнглинг очилади.

Тангабека. Керак эмас...

Дарвеш. Ихтиёринг... Бундан ўттиз йиллар чоғи муқаддам... ҳа, ўттиз йил бўлиши керак.

Тангабека (*ўзича*). Ўттиз йиллар...

Дарвеш. Олислардаги яйловлардан бирида эри урушга кетган чиройли бир ёш жувон бўлган. Чиройли жувон бошида эри билан ўтган ширин ишқли тунларни, қувончли кунларни эслаб соғинган, юраклари интилган... Отилиб чиққан чашма ўз оқимига йўл топади, дейдилар. Қўшни қароргоҳдан келиб-кетиб юрган келишган бир йигитга жувон ошиқу беқарор бўлиб қолади. Шундай қилиб, ҳислар тўфонида маст жувон ўйнаш орттиради. Йигит неча бор оқ ўтовга кириб чиққан. — бўсағадан бошқа ҳаммага сир. Кундузларни эри хаёли тузогида, тунларни йигит қучогида ўтказади бу жувон... Орадан йил ўтмаёқ хуфия учрашувлар ўз мевасини инъом қиласди — ўғил бола дунёга келади. Бу сирдан ерда киндик кесган доя кампиру кўкда ҳайрон чақнаган юлдузларгина воқиф бўлади. Лекин сир ҳам қил устида эди — болани нима қилишлари, қаёқ-қа яширишларини билмасдилар... Худонинг марҳамати кенг, бойвучча... Худо бандасига бераман деса, улушкини йўлига ташлаб қўяр эмиш. Шу бола туғилган кунда яйловда қўлида ҳасса, юрагида ғусса бир ёш

дарвеш ўтиб қолади. Худонинг меҳрибонлигига қара... Доя кампир дарвешнинг йўлини тўсади. Қўрқа-писа бўлган сирни айтиб: тилаганингни сўра, мол дейсанми, олтин дейсанми — қанча хоҳласанг ол. Лекин мушкулимизни осон қил, бизни балодан қутқар, дейди. Болани олиб чўлга кет, эрталаб қайтариб кел, келганингни ҳамма кўрсин. Кейин халққа: чет яйловдан шу болани топиб олдим, дегин. Халқ сенга болани катта ўтовга бекнинг хотини олдига олиб боришини маслаҳат беради, дейди кампир. Дарвеш йигит доя кампирнинг ҳамма айтганларини бажо келтиради. Болани дарҳол подачининг эмизикли хотинига берадилар... Дарвеш ваъда қилинган пулу олтин, қўю отлардан кечиб, фаяқат мудҳиш сирни кўнглига кўмади-ю, ҳу, деб жўнаб кетади... Мана, бор ҳангама... Ҳа, нима бўлди, бойвучча, рангинг ўчиб кетди?

Тан га бека . Ҳа, жаҳонгашта одамларнинг эртаги шунаقا кўп бўлади.

Дарвеш . Эсимда... ҳалиги бузуқнинг исми Тангабека эди... Ҳали ҳам дарвешнинг қулогида ўша исм жаранглаб турибди.

Тан га бека . Ҳа, саҳроларда бунақа исмлар жуда кўп учрайди.

Дарвеш . Арзимаса яна бир нарсани айтай... Ўша гўдакнинг манглайида катта холи бор эди. Худди сенинг Девонанг пешонасидагига ўхшаган... Ўтмишингдан қочиб, бошқа даргоҳларга кўчиб кетибсан. Аммо ўтмиш кўзга кўринар-кўринмас бўлиб кишининг изидан юраверади, бойвучча! Мана, мен ҳам топиб келдим изингдан...

Тан га бека . Ҳассанг билан бирга қўшиб худурсин сени, Дарвеш! У вақт Хизр деганим, ёвуз иблис бўлиб чиқди. Шу иблис келиб энди мендан товон талаб қиляпти. Олмай кетган олтин ўрнига — ёш хотин эмиш! Менинг ўз кўрган азобларим каммиди?! Бир гуноҳга минг жазо... бўйимда эканида кундуз одам-

лардан яшириниб, тунларни изтироб ва кўз ёшида ўтказиб, ақлдан оза ёзган эдим. Шунинг учунми, боланинг эси паст бўлди. Ўттиз йилдан бери унга қараб хуфия изтироб чекаман. Яширин лаззатнинг неъмати жуда аччиқ келди менга.

Д а р в е ш . Ўкин, бойвучча, ўкин. Кейинги пушаймон ўзингга душман, дейдилар.

Т а н г а б е к а . Ўкинаман. Шу гуноҳим учун худо мени қирққа етмай тул қолдирди. Мана энди ўғлимни тортиб олди. Қаҳри ғазабига дучор қилди худо. Қани айт-чи, Дарвеш, дунё тарозисининг мезони борми ёйўқ? Ҳақиқат қаёқда??

Д а р в е ш . Ўкин, бойвучча, ўкин! Мана мен шу ўттиз йил гуноҳ қилмаганимга ўкинаман. Севгидан қўрқдим, хотинлар билан айш-ишратдан ҳазар қилдим. Хуллас, бу дунёning лаззатидан бебаҳра яшадим... Йигирма беш йил аввал Бағдодда бир давлатманд савдогар мени куёв қилмоқчи бўлди. Мен у дунёning жаннатини бу дунё лаззатига алиштирамадим. Ҳозир пушаймонман!.. Яқиндагина, бундан ўн йил муқаддам бир тул даҳри хотин мени увалло ўз қучогига тортди — тоб бердим, яқинига йўламадим. Энди ачинаман! Ундан кейин Бухорода... Саройлида... Ўкинаман, бойвучча, ҳаёт чақириғига кар-кўр яшаганим учун ўкинаман! Лекин бефойда!

Т а н г а б е к а . Сен одам эмассан, иблиссан, девсан!

Д а р в е ш . Иблис бўлсам жуда құдратли бўлар эдим. Мен бўлсам заиф, аянч бир дарвешман... Ўттиз йилдан бери мудраб ётган иблис мана бугун уйғонди, сарфланмаган кучим, аланга олмаган чўғим бугун юрак-бағримни ёндиряпти.

Т а н г а б е к а . Совуш топ, дарвеш, энди ёниб қаёққа борар эдинг.

Д а р в е ш . Рост айтасан, мен лаззат оладиган ҳаёт дарахтининг мевалари анча сийраклашиб қолган.

Шундай бўлса ҳам ўз улушимни олмай қўймайман.
Энг охиргиси бўлса ҳам узиб оламан мевамни. Бўйим
етмаса, шохини синдириб оламан!

Танга бека. Нақадар мудҳиш вабосан, дарвеш!

Дарвеш. Тўғри айтасан, бойвучча, сенинг тақдиринг
менинг қўлимда. Ҳамма сирларнинг калити —
Шафақ. Шафақни менга қолдирсанг, олам гулистон!

Танга бека. Йўқ, қасамёд қилиб айтаманки,
уни сенга бермайман! Бутун бир уруг шаънига иснод
келтирасан! Ё парвардигор, ўзинг мадад бер менга!

Дарвеш. Худо оҳ-зорингни эшитмайди, буни мен
яхши биламан. У ҳеч кимга жазо ҳам бермайди, на-
жот ҳам. Эзгулик ҳам, ёвузлик ҳам худодан әмас,
одамларнинг ўзларида. Одамларнинг ўзлари бир-би-
ларини жазолайдилар. Сенинг жазонг — мана мен!
Уша вақтда олтинингни олмаган эдим, бойвучча, қар-
зингни тўла!

Танга бека. Йўқ, дарвеш, бир гуноҳимни ювиш
учун яна гуноҳ қилишни хоҳламайман! Кет, бу ердан,
тезроқ кет!

Дарвеш. Мен кетмайман. Агар танбаллик қила-
версанг, бошингга тумонат уруғингни йиғиб, сени ер
билан яксон қиласман. Даилим — ана, Девона!

Танга бека. Қанча ёвуз бўлсанг ҳам ваҳшийлик
қилмассан! Ҳар ҳолда сен эр кишисан-ку, ахир?!

Дарвеш. Мен ҳозир ҳеч ким эмасман, на фа-
ришта ва на иблис! Мен учун муқаддас ҳеч нарса йўқ!
Менга Шафақни бер, бўлмаса шарманда бўласан, эски
ўқинчларингга янги пушаймон гуз сепади.

Танга бека. Қўй, қўрқитма мени, дарвеш, мен
қўрқинчларнинг ичидан бутун чиққан одамман. Лекин
мен ҳозир ўзимни әмас, болаларимни ўйлаяпман. Тао-
милни оёқ ости қилишса, худонинг разабига учрайди-
лар. Тирик эканман, мен бунга йўл қўймайман. Бор,
эл олдидা мени фош қилсанг қиласвер! Лекин бир нар-
сани унутма! Мен қаттиқўл ва тошбагирман.

Д а р в е ш. Йўқ, қўрқиб кетганингдан шундай деяпсан, бойвучча, қўрқасан...

Т а н г а б е к а. Мен ҳозир сендан заррача ҳам қўрқмайман. Териси шилинган бўри қўрқинчли бўлмайди.

Д а р в е ш. Кўп кутдим, энди ози қолди. Лекин шуни унутма, бойвучча, сен менинг кўланкамсан. Мен қаёққа борсам, ўша ёққа ўрмалайсан. Сенинг ўзингнинг на танинг, на жонинг бор! Ҳозирча холи қолдираман, лекин хотиржам бўл, Шафақни олмагунча қўймайман. (*Чиқиб кетади.*)

Т а н г а б е к а. Ё раббий, қандай мудҳиш ҳақиқат бу?! Бошимга не балолар ёпирилиб келяпти? (*Осиглиқ ёй билан ўқни кўриб.*) Мана бу ўқларнинг ҳаммаси менга ўқталган! Ана, ана ёйи тортиляпти... (*Орқага чекинади.*) Тортил, тортил! Менинг юрагимга қадал! Қадал менинг юрагимга! Қандайин даҳшат бу! Мени қандай қилиб ер кўтариб юрибди экан, худойим!.. Эй, одамлар!.. (*Қичқиради, аммо шу заҳоти қўли билан оғзини беркитиб, ўриндиққа йиқилади.*)

УЧИНЧИ ПАРДА

Шафак билан Оқийигитнинг ўтови. Оқшом тушмоқда. Узоқдан «Зулҳижжа» куйини хотирлатадиган мунгли куй ёшитилади. Ўтовда Оқийигит билан Шафак.

Шафак. Узоқларда юракни эзадиган бирам мунгли куй қуайиляпти.

Оқийигит. Бизнинг етим юракларимиз йиглаяпти. Сарсон-саргардон қилишди шўрли юракларимизни!..

Шафак. Қисмат дейдилар. Пешанамиз шўр экан!

Оқийигит. Йўқ, пешанага, ёзмишга йўйиб, аслида одамлар ўз ҳукмларини ўтказадилар.

Шафак. Ўзимни гирдобга отсам ҳам омон қолдим-а, ана у Ёлчиқул қутқармаса, кўлга ботардиму, қутулардим бу дунёнинг ташвишларидан. Қаёқдан найдо бўла қолди у Ёлчиқул?..

Оқийигит. Сен ўзингни ўлдирганинг билан биз бахтиёр бўлармидик? Сен тушган қабрнинг совуқлиги бизни исишга қўярмиди? Минг раҳмат Ёлчиқулга!

Шафак. Шўрли Зубаржаднинг кеча-кундуз тортган оҳ-зорларини ёшитиб, шунқор йигитнинг қаноти қайрилиб бораётганини кўриб туриб яшаш осонми, Оқийигит? Шундоққина суратинг қолди...

Оқийигит

Суйганимни олдилар,
Жонимга ўт солдилар.

Қўкрагим тўла тутун,
Ўти сўниб кул қолди,
Кундуз сўлиб тун қолди,
Толеим бунча забун?
Дил кишанин олинглар,
Қўлларимга солинглар,
Қўйинг, юрагимни ҳур!!

Шафак. Узоқларда юракни әзадиган бирам мунгли куй қуайиляпти...

Оқийигит. Зубаржадга қўшилиб бутун саҳро йиғлаяпти.

Тинглашади. Пауза.

Шафак. Мана, эр хотин бўлиб бир ўтовга кирганимизга ҳам уч ой бўляпти, Оқийигит. Лекин кўзларингнинг турлари ҳали бирон тунимни ёритгани йўқ.

Оқийигит. Кечир, Шафақ, нима қиласай?!..

Шафак. Бундан бу ёқ ҳам шу бўлармикан қисматим...

Оқийигит. Умр бўйи... Лекин умр узоқ бўлмас.

Шафак. Менинг ҳам танамда жоним, томиримда ёш қоним бор... Уч ой... Наҳот уч ойда ақалли уч марта ёстигимга бош қўймасанг?..

Оқийигит. (*Шафақ ёнига ўтириб, бошини силайди.*) Кечир мени. Ихтиёр менда эмас, Шафақ, ихтиёр юрагимда. Юрагим ўзганинг ёстиги тепасида пиририаб юрибди.

Шафак. Бахтли бўлсин, десалар, отимни Шафақ қўярмидилар. Оқшомги шафақдай бир ярқираб сўнсин, деган эканлар...

Оқийигит. Эр бўлиб сени эркалаб юпатишга тайёрман, аммо қандай қилиб! Қай сўз, қайси кўнгил билан? Кечир, хотин... ўзимнинг ҳам ичим тутун, устим бутун.

Шафак. Эҳтимол, тақдирга тан бериш керак-дир?.. Биздайлар оз бўлганми дунёда?..

Оқигит. Тақдирга тан бериб ҳам кўрдик, янгам иккимизни икки қўзидаи бир ўтовга қамадилар. Мен ҳам кўнишиб кетаман деб ўйладим, бўлмади. Муҳаббат мендан устун келди. Кечир, Шафак, сен жуда гўзалсан, лекин мен Зубаржадники, ўшаникиман!

Шафак. Менинг заррача ҳам улушим йўқмикан сенда?

Оқигит. Юракни улушларга бўлиб бўлмас экан, Шафак. Аччиқ бўлса ҳам ҳақиқатни айтдим сенга, кечир мени!

Шафак. Оҳ, Оқийигит, айтмасанг ҳам ҳаммасини биламан.

Оқигит. Нимани биласан?

Шафак. Бутун тунларингни у билан биргаликда оппоқ нурли саҳарга улайсан.

Оқигит. Нима, таъқиб қилиб юрасанми?

Шафак. Таъқиб қилмайман сени, Оқийигит, кўнглим сезади. Тунлар бўйи мижжа қоқмай чиқаман. Хотин бўлганимдан кейин эрим ўз тунларини қаёқда ўтказишини билмайманми? Лекин эҳтиёт бўл, Оқийигит, кейинги кунларда уруғ орасида сизлар тўғрингизда гап-сўз юрибди.

Оқигит. Агар Зубаржадим бўлмаса, сенга энг садоқатли эр бўлар эдим, Шафак. Бошингдан тирногингача ақл. Нима қилайки, мен сеники әмас!

Шафак. Сен менини әмас... шунинг учун ҳам хотин бўлиб эрни рашк қилишга ҳаддим сифмайди.

Оқигит. Биздан ранжима, Шафак, бизга ҳам қийин!

Шафак (*хўрсинади*). О, қани, энди ранжишга ҳаққим бўлса! «Менинг ҳеч нимага, ҳеч нарсага ҳаққим йўқ!.. Умуман, ҳеч нарсам йўқ менинг!.. (*Йиглайди*.)

Оқигит. Йиғлама, Шафак! Бизнинг зору фионларимизни кўкдагилар барибир эшилмайди, кўз

ёшимиизни кўришмайди... Қани энди, уруш бошланиб қолса-ю, кета қолсам, бирданига ҳаммамиз бу жафолардан қутулар эдик...

Шафақ . Оҳ, ундай дема, жоним, ёв чиқмай ҳасратда ўтсин! Сен жуда кераксан бизга, Оқийигит, менинг қора бахтим!

Оқийигитнинг кўкрагига бошини қўяди.

Оқийигит . Икки ўт орасида куймоқ ўлимдан ҳам оғир, Шафақ . Сени юпатишга сўз тополмайман, ақллигим, нима деб сени юпатай?..

Елчиқул киради. Оқийигит билан Шафақни бу суратда кўриб шошиб қолади.

Елчиқул . Ўтовингизга аҳиллик, ҳамжиҳатлик дориганини кўриб хушвақт бўлдим, хушвақтлик ари масин!

Оқийигит . О, Елчиқул, оғай! Ҷел, қадрдон, ксл! Йхши келдинг. Шафақ , меҳмонга қимиз олиб кел!

Шафақ . Ҳозир келтираман. (*Меҳмонга пўстин тўйшайди.*) Ўтири, Елчиқул оғай.

Елчиқул . Мен қулингизни фақат бир ўтвода одам санаб меҳмон қиласардилар. Ўша ўтов мана шу. Раҳмат сизларга, минг раҳмат.

Оқийигит . Сен қул эмас, мана бизлар қул, Елчиқул оғай.

Елчиқул . Ҳаммамиз ҳам қул, укаларим. Қуллик мана бу еримизни (*кўкрагини кўрсатади*) босиб ётибди. (*Шафақ қимиз олиб келиб унга узатади. Қимиз ичиди.*) Раҳмат, Шафақ , барака топ. Юзингга қизил югуриб, уйингга бахтиёрлик дориганидан хурсандман.

Шафақ . Бизга аталган бахтиёрлик Қоф тогининг орқасида эмиш, Елчиқул оғай!

Елчиқул . Келади. Шафақ , мавриди билан келади. Иккингизни жуфт кўриб, қувондим.

Шафак. Бизни қувонч эмас, қайғу яқин қилади, баҳт эмас, ҳасрат жуфтлайди, оғай.

Оқигит. Зорланганинг билан зор нари кетмайди, Шафақ!

Ёлчиқул. Бир иш билан келган әдим, ўтовингизга бундай рўшнолик билан қут дариган экан, айтмай кета қоламан.

Оқигит. Гапиравер, Ёлчиқул оғай. Бизнинг ўтов — ўша-ўша, унда на қут бор ва на ўт!

Шафак. Қут билан ўт ҳам Қоф тоғининг орқасида эмиш, Ёлчиқул оғай..

Оқигит. Гапир гапинингни, Ёлчиқул оғай, нима демоқчи әдинг?

Ёлчиқул. Шафақ әшитарлик хушхабар эмас, балки Шафақ...

Оқигит. Шафақдан яширадиган сирим йўқ, сўзлайвер!

Шафак. Мен қора ўтовга чиқиб турға қолай!

Оқигит. Чиқма, Шафақ. Қанча оғир гап бўлса ҳам бизнинг кўргулиқдан мудҳиш эмасдир.

Ёлчиқул. Онанг уч ойдан бери ўтовдан чиқмайди.

Оқигит. Касал эмасми?

Ёлчиқул. Касал ҳам эмас, соғ ҳам. Олдига бир кириб чиқ!

Оқигит. Ўзи чақирмайди-ку!

Ёлчиқул. Чақирмаса сен кир, у — она ахир сенга!

Оқигит. Ҳаммамизнинг қаддимизни букиб қўйди... Ҳа, гапнинг учини чиқардингу нарёғини айтмаяпсан, Ёлчиқул оғай!

Ёлчиқул (Шафаққа узр сўрагандай бир қараб). Илонга ўхшаб ҳамма ёқда совуқ гаплар ўрмалаб қолди, Оқийигит, ҳамма гап сен билан Зубаржад устида. Оқсоқоллар ғазабга минган. Никоҳни бузиб, номаҳрам

билин кўнгилхушлик қиляпти деб, иккалангизнинг бошингизга лаънат ёғдиришяпти.

Оқийигит. Мени лаънатлашга фақат биргина одам ҳақли — у ҳам бўлса — Шафак! Бошқанинг лаънати бир пул менга.

Елчиқул. Улар өл оталари, Оқийигит, сўзларига қулоқ солмай бўладими?

Оқийигит. Ҳамма оқсоқолдан менга Зубаржад муқаддас!

Елчиқул. Йил ёмон келаётганга ўхшайди. Ют, очарчилик яқин әмиш... Оқсоқоллар ҳаммасини сизларга йўйишяпти,

Шафак. Бу гаплар Оқийигитнинг оқ кўнглига туҳмат! Элга оғат келтирадиган қандай ножӯя ишқилди?

Елчиқул. Бунинг устига, анави Дарвеш уккига ўхшаб ҳурпайиб уруғ орасига ғулув солиб юрибди. Гуноҳга ботганларни әлдан ҳайдамасангиз, ўлат босади, деб ваҳимага соляпти халойиқни.

Шафак. Нима учун бойвучча у дайдининг шармандасини чиқариб, ҳайдаб юбормайди?

Елчиқул. Ҳамма шунга ҳайрон. Бутун элатни зир титратган бойвуччанинг бир дарбадарга кучи етмай ўтиrsa.

Оқийигит. Ойимнинг бир тил қисиқлиги борга ўхшайди.

Елчиқул. Хунук хабар билан таъбларингни хира қилдим, кечиринглар мени.

Шафак. Хушхабарни кутмай ҳам қўйганмиз, орай. Хушхабар Қоф тоғининг орқасида чоги...

Елчиқул. Яна шуни айтиб қўймоқчи эдим, Оқийигит. Агар, мабодо бу яйловдан бош олиб чиқиб кетиш хаёлинга келиб қолса, менинг икки отим эгар-лоғлик!

Оқийигит. Қаёққа от солма, бу жафолар орқангдан етиб боради.

Ёлчи қул. Киши нима бўлишини билиши қийин, қариндош!

О ёй и гит (кеескин ўрнидан туриб). Тоқатим тоқ бўлди! Ойим олдига бораман. Йигсин оқсоқолларини, бу иш бир ёқлик бўлиши керак, албатта бир ёқлик бўлиши керак! Тушунишлари лозим! Оқсоқоллар ҳам одам қабиласиданми, ахир! (Чопиб чиқиб кетади.)

Жимлик. Яна ўша мунгли куй эштилади.

Шафақ. Нега, нега сен ўшанда мени гирдобдан тортиб олдинг, Ёлчиқул оғай! Бу дунёning оловида ёнмай, муздек қабр қучогида тинчгина ётган бўлар эдим...

Ёлчи қул. Қуёшнинг бутунлай сўнганидан, булут орқасидан бўлса ҳам, сочиб тургани яхши, Шафақ!

Шафақ. Сенинг сўзларингни ҳам туман босди чоги, оғай, ҳеч нарса тушунмадим.

Ёлчи қул. Бу дунёда танҳо, ёппа-ёлғизман, менинг кўнглимни овлайдиган фақат Оқийигиту сен бор. Булут орқасидаги менинг қуёшим шу сиз, иккингиз!

Шафақ. Дарду алам номли қора булут остидамиз, Ёлчиқул оғай.

Ёлчи қул. Сен менга худди ўз синглимдайсан, Шафақ. Ғамингни енгиллатиш учун ўтга ҳам, сувга ҳам киришга тайёрман. Назаримда, сени гирдобдан тортиб олганимда сен билан бирга ўз бахтимни қутқариб қолгандайсан, ўзинг қувончдан маҳрум бўлсанг ҳам мен гарининг кечаларини ёритган қувонч чироғисан!

Шафақ. Одамлар бир-бирига азоб бериш учун туғилганларми, деб ўйлайсан киши. Лекин мен биламан, агар уларнинг ўз эрклари ўзларида бўлса, фақат бир-бирларига қувонч бағишлиар эдилар.

Ёлчи қул. Айбга буюрма, Шафақ, сенинг учун

жонимни беришга тайёр әканлигимдан огоҳ қилиб қўяй, деб айтдим.

Шафак Қуллуқ, Ёлчиқул оғай!

Ёлчиқул. Хуш қол, Шафак, худо сенга сабр-қаноат берсин. (*Кетади.*)

Шафак. Эй дунёи бевафо... Мен бечора Ёлчиқулни айтаман. Саҳродаги якка дарахтга ўхшайди. На бутогида қуш уяси, на соясида кўкат майсаси бор. Мевасиз дарахт, сўққабош!.. Нима, менинг ғуссали тақдирим униқидан яхшироқми? Менинг нимам бор! Бир эрим бор, у ҳам бировники! Эрсиз ҳам тул эдим, эрли ҳам тулман. Уч ойдан бери илҳақман. Йўқ, ёстиғимга бошини ҳам қўйгани йўқ! Нима, илҳақликка ҳаддим йўқми? Ахир у менинг ҳалол эрим-ку, чиройда Юсуфдан афзал эрим-ку, ахир!..

Дарвеш киради.

Дарвеш. Ассалому алайкум, хўжанг уйдами?

Шафак (*ўзини четга олиб*). Йўқ, у уйда эмас!..
Хайр, йўлингдан қолма, дарвеш!

Дарвеш. Менинг унда ишим йўқ, ҳамма ишим сен билан битади.

Шафак. Беҳуда гап! Бу уйнинг хўжаси бор. Лекин у ҳозир уйда эмас, кет, қайтганда келасан.

Дарвеш. Бу уруғда хўжа йўқ!

Шафак. Нега бўлмасин, бу уйнинг хўжаси эрим, ургунинг хўжаси қайнанам!

Дарвеш. Қайнана, қайнана! Қайнанангни қўй!
Мен сенинг олдингга келдим, сенга яхшилик қиласман деб келдим.

Шафак. Менга ҳеч ким, ҳеч нарса керак эмас...
Жўна бу ердан! Менинг камчилик жойим йўқ, баҳти тўқисман.

Дарвеш (*кулади*). Баҳти бекам эмиш? Ҳаётингиз ҳалокат остида, бошларингга бало ёпирилиб келяпти,
уругнинг қирғин келяпти! Фатарат топяпти!

Шафак. Бекордан-бекорга уруг фатарат топмайди. Алжирама!

Дарвеш. Сен ўзингни лақмаликка солма, ҳамма нарсани биласан, уруг сенларнинг касрингга қояпти! Эринг таомил ва никоҳга хилоф иш тутиб, бузуқлик йўлига кириб кетди. Тунларни бошқанинг қучогида ўтказади. Сенга бир йўл бор: халойиқнинг олдига чиқиб, ёстиғингга бош қўймаган эрингдан кеч. «Мен гуноҳкорнинг гуноҳига шерик бўлмайман, мен эримдан кечаман!» де!

Шафак. Ҳамма сўзинг туҳмат, Оқийигит менга содик!

Дарвеш. Кечалари Эшмирза бола ширин уй-қуга кетганда, Зубаржаднинг қайноқ оғушига ким киради? Балки мен киарман, балки Девона киар? (*Кулади.*)

Шафак. Мен айгоҳчи эмасман. Менинг эрим — менинг тӯшагимда. Бошқасини билмайман.

Дарвеш. Сенда на хотин юраги, на аёл ғурури бор, бутун эл билганини сен билмайсан.

Шафак. Менинг эл билан ишим йўқ. Менинг жаннатим ҳам, дўзахим ҳам шу ўтов. Сен бу ўтовдан нари юр, дарвеш, алангасида куйиб ўласан.

Дарвеш (*ўзича*). Одам суюгидан кўприк солсам ҳам мақсадимга эришмай қўймайман. (*Шафақقا.*) Мен тангрининг амру иродасини айтяпман, Шафақ, гуноҳга ботма, Оқийигитдан кеч! Бировнинг гуноҳини хас-пўшлашдан оғир гуноҳ йўқ бу фоний дунёда! Қани, айтичи, садоқатли эринг ҳозир қаерда?

Шафак. Кўнгли қаёқقا бошлаган бўлса, оёғи ўша ерда! Сен жўна бу ердан, бўлмаса, шовқин солиб одамларни бошингга йигаман.

Дарвеш. Мен одамлардан қўрқмайман. Мен ҳеч нимадан қўрқмайман. Чунки мен авлиёман! Авалиё ҳатто ўлимдан ҳам қўрқмайди. Унга на ўлим, на жазо бор! Мен кучли одамман, қўлимни қаёқقا узат-

сам етади. Истасам ойни сўндираману, ер юзига қабр зулматини чўктираман. (*Қўйнидан китоб олиб, узоқ қарайди. Сўнгра ўзича.*) Ҳа, бугун... ой тутилади... Бугуноқ ойни тутилтира оламан... Шошилиш керак... Шошилиш керак...

Шафақ. Шошил, шошил, дарвеш... Шошилинч жўнаб қол бу ердан!

Дарвеш. Мен сенга шошиламан, Шафақ, ёлғиз сенга шошиламан! (*Шафаққа интилади.*)

Шафақ. Вой-дод!..

Девона киради.

Девона. Шафақ, Шафақ, ўтов ёнида ҳали бир қоп-қора илон изғиб юрган эди. Тағин ўрмалаб бу ерга кирмасин, әҳтиёт бўл! (*Дарвешни кўриб.*) Илон бир юмалаб дарвеш бўлиб қолган бўлса-я?

Дарвеш. Нима деб алжираяпсан, манглайига шайтон муҳр босган махлуқ! Мана бу таёқ билан бошинингга солайми?

Девона. Мени уриб бўлмайди, дарвеш, гуноҳ бўлади... Менга қара, нега сен тун бўйи ўтовлар орасида ўрмалаб юрасан? Сен илондан тарқагансан. Менга фаришталар айтди.

Дарвеш. Күф-суф десам тошга айланасан-қоласан. Кейин онангнинг гўри устига қабр тоши қилиб қўйишади... Ҳар нима, қабрга асқотган бўлардинг!

Девона (*маъюс*). Менинг онам йўқ. (*Фазаб билан.*) Тош бўлсам сени босиб-янчиб ўлдирад эдим, сен одам эмас, қора илонсан-ку! Та-та-та-та. Қара, думинг илонга ўхшаб жилпанглайди. Кўлаҳлик бошинг ҳам, нақ илоннинг боши.

Дарвеш. Лаънат бўлсин сенга! Ҳозир сен махлуқни итга айлантираману, товонимни ялатаман.

Девона. Йўқ, йўқ! Мен товонингни яламайман,

ўзингни чайнайман. Мана бундай, мана бундай қилиб чайнаб кемираман. Вов...вов...вов... (*Ит бўлиб вовилаб Дарвешни қувиб чиқаради.*)

Шафақ. Уф, қутим учиб кетди-я, Девона. Яхши ҳам сен кириб қолдинг.

Девона. Қўрқма, Шафақ. Шунчаки ёлғондан ит бўлиб вовилладим. Қоровул итига ўхшаб вовиллаб ҳайдадим.

Шафақ. У одам қиёфасига кирган ит, сен бўлсанг, ёлғондан ит бўлиб акиллаган инсон!..

Девона. Шафақ!

Шафақ. Нима, Девона?

Девона. Мен сира уйланмайман.

Шафақ. Нега, Девона?

Девона. Оқийгит билан Эшмирза уйланмаслари-дан бурун ҳандай яхши одамлар эди-я, ҳеч қачон йифлаганини кўрган әмасман. Ҳозир бечораларга жуда қийин. У ўтовда Зубаржад йиглайди, бу ўтовда сен йиглайсан. Бойвучча ҳам менинг бошимни силаб ўтириб, менга билдирмай йиглайди... Фақат Эшмирза йигламайди, холос. Куни бўйи ёғочдан от қилиб чопиб чарчайди-да, кечалари ухлайди. Йигламанглар, йигламанглар, Шафақ! (*Ўзи ўқраб йиглаб юборади.*)

Шафақ. Е худойим! Девонанинг юраги бир балони сезаётганга ўхшайди.

Девона. Ҳозир кўкда фаришталар ҳам кўринмай қолди... Кўк юзи қоп-қора.

Шафақ. Қўй, хафа бўлма, Девона, очилиб кетар.

Девона. Очилмайди, Шафақ, фаришталар узоқ ёқларга учиб кетишган...

Шафақ. Вор энди, Девона, ўрнингга бориб ёт, ташқарига қоронги тушди.

Девона. Баҳоргача уйғонмасдан ухласанг... қишининг совуғи жондан ўтиб кетяпти...

Зубаржад киради. Шафақ саросимада. Узоқ жимлик.

З у б а р ж а д. Бевақт келганим учун кечир, Шафақ! Ёлғиз ўзим жуда қўрқаман, куни бўйи ўйнаб чарчаган эрим донг қотиб ухлаб қолди.

Ш а ф а қ. Кел, уйим тўри сенини, овсин, юқорига ўт!

Д е в о н а. Икки келин, келиндош, бири ялқов, бири ёш... Икки келин, келиндош, бир-бирига...

З у б а р ж а д (сўзини бўлиб). Бор, Девона бизнинг ўтовга бориб, Эшмирза ёнига кириб ёт, уйғониб кетса, бир ўзи қоронғида қўрқиб йиглаб беради.

Д е в о н а. Икки келин, келиндош, бир-бирига кундош... (*Кетади*.)

З у б а р ж а д. Мен сенинг оёғингга бош уриб келдим, Шафақ. Шунча вақт кўзингга кўринишга журъат қилмай яшириниб юрдим. Әнди бўлмади, тоқатим, қолмади, нима қилсанг — қил мени! Ихтиёр сенда, Шафақ!

Ш а ф а қ. Сенинг изминг менда эмас, Зубаржад!

З у б а р ж а д. Йўқ — сенда... Оқийигитнинг ҳалол хотини — сен!

Ш а ф а қ. Қўй, ярамга туз сепма!

З у б а р ж а д. Кечир, Шафақ, ҳеч чорам йўқ. Бошимга лаънатлар дўлини ёғдир, юзларимни қамчилар билан тилиб ташла, шармандаю шармисор қилиб,ostonangdan ҳайдаб чиқар, лекин чорам йўқ, Шафақ! Мен Оқийигитни кўрмасам телбаман, жинниман! Мен уч кеча кўрмадим уни, Шафақ, уч кеча!..

Ш а ф а қ. У мени уч ойдан бери кўрмайди. Қўзи кўрса ҳам кўнгли тусамайди. Менинг аҳволим — тирик мурданинг ҳолидан оғир. Жонли, тирик Шафақнинг қисмати — мурда қисмати.

З у б а р ж а д. Ҳаммамиз ҳам шарпаларга ўхшаймиз... Жонсиз шарпаларга. Жонимизни танимиздан сугуриб олганлар. Биз ҳаёт кечираётганимиз йўқ, Шафақ, қимиirlab юрибмиз, холос...

Ш а ф а қ. Қимиirlashga ҳам мажол тугаб боряпти...

З у б а р ж а д (*Шафақ оёғига тиз чўқади*). Оёғинга бош уриб, изларингни ўпид ёлвораман, Шафақ, Оқийигитимни менга қайтариб бер! Усиз бир кун ҳам яшашга мажолим йўқ. Менинг олдимда фақат икки йўл бер: ё Оқийигит ёки ўлим! Йўқ, йўқ, Шафақ, менинг ўлгим келмайди, яшашни истайман. Оқийигитни менга бер. Жоним Шафақ, менга бер!..

Ш а ф а қ. Тур ўрнингдан, Зубаржад, ўзингни хўрлама. Агар мен сен сингари севимли бўлсанм, барча дарду азоблар тутундан ҳам енгил туюлиб, бошим осмонга етар эди. Шу баҳт қанотларида паға булутлар устида парвоз қилиб, баҳтиёрлигимни дунёга жар солиб яшар әдим. Ҳеч нарсани, ҳеч кимни ўйламас әдим. Севимли бўлмоқ — тирик жонли бўлмоқ, демак — Зубаржад!

З у б а р ж а д (*турмайди*). Фақат сен лаънатламасанг бас, Шафақ. Мен бошқа ҳеч кимниңг қарғишидан қўрқмайман, менинг тақдирим сенинг ҳукмингда! Ризолик бер, Шафақ. Оқийигит менини эканлигини тан олиб, менга ризолик бер! Мен Оқийигитим билан қовушай! Ризолик бер, Шафақ, оҳ Шафақ!

Ш а ф а қ (*Зубаржаднинг қўлтиғидан ушлаб турғазади*). Сизни бир-бирингиздан айирганларида бирор сизнинг ризолигингизни сўраганмиди? Йўқ, ҳеч ким сўрагани йўқ! Нега энди севганинг билан қовушиш учун тиз чўкиб, из ўпид ризолик сўрайсан? Менини бўлмаган кишига мен хўжайин әмасман, Зубаржад!

З у б а р ж а д. Оҳ, нақадар олижаноб, саховатлисан, Шафақ. (*Шафақни қучоқламоқчи бўлади*.)

Ш а ф а қ. Менга яқинлашма, мен ўлим қучоғидан чиққан одамман, сени ҳаёт оғуши муштоқлик билан кутади.

З у б а р ж а д. Мурувватинг учун қуллуқ, Шафақ!

Ш а ф а қ. Мурувватли бўлмай нима иложим бор?

Мен ҳам ўз эримни биронга ўз қўлим билан бериб қўярмидим? Тиш-тироғим билан унга ёпишиб олмасмидим. Ўлсам ҳам биронга бермасдим... Менинг эрим йўқ! Йўқ менинг эрим! У сенинг қайлифинг, ўйнашинг, эринг — ким бўлса ҳам сенини Оқийигит! Ҳозирги ҳолимиизда барибир сен — эрсиз, мен әса ҳамон — тул! Ичкимиз ҳам ўз йўлимиизга баҳти қоралармиз.

О қийигит киради. Зубарждад билан бир-бирларига интилганларича қотиб қоладилар, Шафак жимгина чиқиб кетади.

Зубарждад. Оҳ, Оқийигит!

О қийигит. Зубаржад! Зубаржадим!

Зубарждад. Соғиниб, юракларим узилиб кетди, Оқийигит. Чидай олмадим, ўзим келдим.

О қийигит. Зубаржадгинам, қафасдаги оқ каптарами!

Зубарждад. Соғиниб юракларим узилиб кетди, шунқорим!

О қийигит. Битмас қайгум, битмас шодлигим менинг, Зубаржадгинам.

Зубарждад. Сен ёнимда бўлсанг, тунларим ҳам кундуздай нурга тўлиб кетади, Оқийигит. Ҳатто девдан ҳам қўрқмайман. Сен бўлмассанг, атрофимни зулмат қоплагандай симсиёҳ.

О қийигит. Дев деганингга, у куни худди девдан қочгандай, мендан қочиб юрганинг әсимга тушди, хотирингдами?

Зубарждад. Вой, вой... ўша дев яна келиб қолибди-ку... қўрқаман... (орқага тисарилади.)

О қийигит (отилиб келиб қуучоқлаб олади). Мен яна мана бундай қилиб сени девдан тортиб оламан. Ҳеч қандай қароқчиға бермайман!

Зубарждад. Ҳали кечагина бу гапларнинг ҳаммаси ҳазил эди! Қайда қолди беташвиш ёшлигимиз?

О қ и г и т. Ёшлигимиз ўзимиз билан, ҳеч ким айнира олмайди бизни!

З у б а р ж а д. Айирдилар-ку!

О қ и г и т. Мана яна биргамиэ-ку, Зубаржад. Энди ҳеч ким айролмайди бизни. Онамнинг олдига кириб, бундан кейин усиз бир кун ҳам яшай олмайман, дедим. Иккимиз бир ўтовда яшаймиз, дедим.

З у б а р ж а д. Чинингми Оқийигит? Эр-хотинлардай бехавф, бекўрқув? О, баҳт, нақадар Оқийигитимдай ёрқинсан!.. Ҳа, ойинг нима деди?

О қ и г и т. Ўйланиб ўтириб, чуқур хўрсинди-ю, ҳеч нима демади.

З у б а р ж а д. Кел, Оқийигит, узоқ-узоқларга кетайлик бу ердан!

О қ и г и т. Ўз ерингдан топмаган баҳтни қаердан топасан, Зубаржад? Ҳамма ёқ бўри увиллаган чўл!

З у б а р ж а д. Иккимиз бир ерда бўлсак ҳар қандай қийинчиликни енгиш мумкин. Одамлар бордирку, одам одамга раҳм қилмайдими? Отамни қонхўр Қорахўжанинг жаллодлари ўлдирмаса, биз шу кунга қолармидик?

О қ и г и т. Айтиш қийин, Зубаржад!

З у б а р ж а д. Қочайлик бу ердан тезроқ... Бошимизга жудолик болтаси тушмасидан қочайлик!

О қ и г и т. Ҳеч қаерга кетмаймиз, Зубаржад, шу ерда яшаймиз. Бутун ургунинг кўз олдида иккаламиз бир ерда яшаймиз! Шундай дедим онамга!

З у б а р ж а д. Нима деди қайнанам? Ҳеч нарса демадими?

О қ и г и т. Ҳеч нарса демади... Олдига оқсоқоллар келиб қолди, чақирган бўлса керак.

З у б а р ж а д. Балки оқсоқоллар ҳаққоний ҳукм чиқариб, бизни қовуштириб қўйишар?

О қ и г и т. Қовуштирумайдилар. Уларда жон йўқ, инсон юраги йўқ, Зубаржад!

З у б а р ж а д. Ахир ўшалар ҳам қачонлардир ёш
бўлган-ку!

О қ ў и г и т. Ёшликларини юз йил аввал унугиб
юборишган, Зубаржад! Улардан яхшилик кутма! Ўз
йўлимиизни ўзимиз топишимиз керак! Биз ўзимизга
ўзимиз ҳоким!

Ташқарида ғовур-гувур әшитилади.

З у б а р ж а д. Бу нима шовқин, нима тўполон,
Оқийигит? Яна қандай таҳлика, ё худойим!

О қ ў и г и т. Қўрқма, Зубаржад, молларни ҳайдада-
шаётган бўлса керак.

З у б а р ж а д. Унақага ўхшамайди, ғалаён вақти-
даги шовқин бу! Даҳшатдан музлаб кетяпман, Оқийи-
гит. (*Оқийигит пижига киради.*)

О қ ў и г и т. Қўрқма, жоним, ёнингда мен бор,
қўрқма!

Шовқин-сурон билан ўтовга **Д а р в е ш**, уч оқсоқол,
Тангабекава яна икки-уч киши киради.

Д а р в е ш. Элнинг номус-ори бўлган оқсоқоллар,
ўз кўзингиз билан кўринг! Уятни билмаган орсизлар
яна бирга. Булар бузуқлигининг чегараси йўқ!

И к к и н ч и о қ со қ о л. Уят, уят-э, бутун уруг-
нинг номусини ерга буқдиларинг! Сизлардан худо
юзини тескари қилсин.

У ч и н ч и о қ со қ о л. Уруғимиз тарихида кўз кўр-
маган, қулоқ әшитмаган шармандалик бу!

Б и р к и ш и. Ҳароб бўлдик, элдан қут-барака
кетди.

Д а р в е ш. Ҳаром-хариш—уруғ томирни кесадиган

болта, дейдилар. Неча ойдан бери ўша болта қирқяпти томирингизни! Икки бузуқ бутун уруг бошига ҳало-кат келтиряпти, қирғин босиб келяпти.

Б и р и н ч и о қ с о қ о л . Дарё-ю жилгаларда сув қурияпти.

И к к и н ч и о қ с о қ о л . Бия ва сигирларнинг ели-нида сут қурияпти.

У ч и н ч и о қ с о қ о л . Ёз бўйи томчи ёмғир кўр-мадик, далаларда япроқлар сарғайиб, ўтлар қуриб кетди.

И к к и н ч и о қ с о қ о л . Устимизга офат ёпирилиб келяпти!..

Б и р к и ш и . Одамларни ўлат ютиб, уруғга қирон келяпти!

Д а р в е ш . Бу ҳам кам. Уруғингизда бунақа ҳаром-харишлар яшар экан, қуёш куйиб, ой ҳам сў-нади.

О қ и г и т . Эл оталари! Бизнинг тақдиримиз сизнинг қўлингизда. Аммо шуни ёдингизда тутингки, далаларни бизнинг кўз ёшларимиз қуритди, япроқларни бизнинг ҳасратларимиз сарғайтирди. Бизни бу кунга солган ким? Сиз эмасми? Бизни шунча азоб-уқубатга согланингиз учун худо сизнинг бошингизга офат ёғдиряпти!

Б и р и н ч и о қ с о қ о л . Тавба деб гапир, Оқийигит! Сени шайтон йўлдан оздирибди. Бутун қонун-таомилимизни оёқ ости қилдинг, имонсиз, тавба қил!

И к к и н ч и о қ с о қ о л . Тавба қилдим, де!

О қ и г и т . Сизлар тавба қилинглар, улуғлар! Хато қарорингиздан воз кечинг. Мен отам васиятига со-диқман, сиз уни буздингиз. Васиятга хилоф иш қилмоқ — катта гуноҳ. Сизлар тавба келтиринг.

У ч и н ч и о қ с о қ о л . Бундай сафсалаларни эши-тишнинг ўзи катта гуноҳ, қариялар!

Б и р и н ч и о қ с о қ о л . Сен нега индамайсан, бой-вучча! Сен ўз оналик сўзингни айт!

Иккинчи оқсоқол. Ўзинг туққан бола учун ўзинг жавоб бер, бойвучча!

Учинчи оқсоқол. Рисқулбек ўлиб қутулди бу шармандаликтан. Бўлмаса аиави оқпадари (Зубаржадни кўрсатиб) учун ҳозир у ҳам изза бўлиб турар әди. Яхшидан туғилган ёмон, деб шуни айтадилар.

Оқиғи. Зубаржадга тил шеккизма, улуғ! Унинг виждони покиза. Сен мен билан сўзлашавер!

Иккинчи оқсоқол. Покиза әмиш? Унда виждон нима қилсин? Иккаланг бир гўр!

Биринчи оқсоқол. Айт ўз сўзингни, бойвучча, ўғлинг гуноҳини ёпиб, ўзинг гуноҳга ботяпсан...

Тангабека. Тоғ бағрида кўз очган булоқ суви оқиб тушгандан кейин — водийники бўлади... Ўғлим энди вояга ётган, мендан кетиб — элники бўлган. (*Маъюс ва таҳликада*.) Эл нима қилса, ихтиёри! Сўзим шу!

Дарвеш. Сен ўзингни қуруққа олиб, элга солма, бойвучча, болаларинг учун сен масъул. Учаласи устида ўз ҳукмингни чиқар. Учала ўғил ҳам сеники-ку! (Тангабекага маккорона жилмайиб қарайди.)

Иккинчи оқсоқол. Учаласи дедингми?

Учинчи оқсоқол. Уч ўғил?

Дарвеш. Ҳа, ун ўғил!

Биринчи оқсоқол. Урушда ўлган Йўлмирза шаҳид кетган. У бойвуччага шуҳрат келтирди, холос.

Дарвеш (ўйлаб тургач, бир қарорга келиб). Тўғри айтасизлар, қариялар, ёвда ўлган — шаҳид!

Иккинчи оқсоқол. Нимага қараб ўтирибмиз, оқсоқоллар! Гуноҳкорлар тезроқ тавба қилсинглар. Буларнинг касрига элни қора вабо босиб келяпти. Тангабека, айтадиган сўзингни айт, қариялар сенга мунтазир!

Биринчи оқсоқол. Сўз сенга, бойвучча!

Тангабека (изтиробда.) Якка отнинг чанги чиқмас, дейдилар. Ўғлим, қадимдан қолган қонун ва таомилга якка ўзинг бош кўтариб нима орттиридинг? Сен таомилга хиёнат қилдинг. Йўлдан озган бандасига тангрининг қаҳри газаби чексиз, болам! Умр бўйи тириклайн дўзахда куйдиради. Буни бир гуноҳ қилиб, минг жафо тортганларгина билади, болам. Кўнгилнинг бир эрки учун ақл умр бўйи уни қийнайди. Ақл-ҳушингизни йигиб, оқсоқоллар олдида тавба қилинглар! Тавба қил, болам!

Оқийигит. Мен тавба сўзини билмайман, онажон!

Тангабека. Уруғнинг улуғлари олдида тавба қилиб, бир-бирингиздан кечинглар... Кейин мен Зубаржад билан Эшмирзани олис яйловга кўчириб юбораман. Одам бераман, етадиган мол бераман.

Оқийигит. Йўқ, она, тавба фурсати эмас, биз бир жон, бир тан бўлиб қолганимиз энди.

Зубаржад. Оқсоқоллар! Мени дунёнинг нариги бурчига ҳайданглар, мен эмаклаб бўлса ҳам Оқийигитга етиб келаман. Бизни туғилиши қовуштирди, ўлимтина жудо қиласди.

Иккинчи оқсоқол. Ана, кўрдингизми?! Аёл боши билан тилини тиймайди-я?

Учинчи оқсоқол. Сенга уруг мол тўлаганими — уруг молисан!

Зубаржад. Мол билан тенг кўрсанглар, молдай бўғизлаб ташланглар қўйинглар. Молни ҳам қийнашмайди-ку!

Бир киши. Бўғизлаш ҳам кам, осиш керак буни!

Оқийигит. Мол билан тиллашиб ўргангансиз, оқсоқоллар, биз сизнинг сурувингизда, осасизми, чопасизми, ихтиёр сизда! Танларимиз сизники, лекин руҳларимиз-чи? Руҳларимиз таомилнинг темир қафасларини бузиб чиққан. Улар кенг ҳавода, сизнинг фисқу фужур, урфу одатларингиздан юксакда эркин парвоз қилади. Бу икки ҳур қушга қанча ўқ отманг, ҳаммаси беҳуда!

Иккичи оқсоқол. Амр этинглар, уламолар! Бундай қабиқ сўзлар учун бурунги замонда одамларнинг тилини кесар әдилар! Бетавфиқлар, биздан қўрқмасанглар, тангридан қўрқинглар!

Оқийигит. Менинг тангрим битта. Бизни қовуштирган бир ўша тангри, бошқа тангрини мен билмайман. Имоним эса — муҳаббатим!

Иккичи оқсоқол. Бандалар, эшитяпсизларми? Бу одам әмас, иблис, иблисдан тарқаган! Одам боласидан чиқмайди бундай сўзлар! Булар ҳаммага қирон келтиради, қирон!

Тангабека. Оёғингга бош уриб ўтинаман, ўрлим, улуғларнинг юзига оёқ тирама! Тавба қил, Оқийигит, қон-қариндошларингни қирондан сақла!

Оқийигит. Менинг тавба қиладиган гуноҳим йўқ, она! Қон-қариндошларни биз ҳалок қилаётганимиз йўқ. Сизлар ҳаммангиз ўзингизни ўзингиз ҳалок қиласиз! Таомил, қонун деган ўлик жонлар тирикларни кемирияпти.

Биринчи оқсоқол. Биттагина йўл бор, оқсоқоллар! Бу икки имонсизни уруғдан қувиш керак!

Товушлар. Қувиш керак, ҳайдаш керак!

Иккичи оқсоқол. Иккаласининг қўлларини бир арқонга боғлаб, чўлга ҳайдаш керак!

Товушлар. Ҳайдаш керак! Қувиш!

Дарвеш. Тўрт томонга чопар юборилсин, уларни ҳеч ким яқинига йўлатмасин, «Улар мохов, улар қайси уруғга борсалар, ўша ерда вабо қўпади, қирон келади!» деб хабар қилинсин!

Товушлар. Вабо келади, қирон келади!

Девона чолиб киради.

Девона. Бойвучча опа, Тангабека бойвучча опа, галати иш бўлди, осмонда қизиқ ишлар бўляпти, ойнинг бир бўлаги четидан узилди-ю, тушди-кетди.

Иккинчи оқсоқол. Овозингни ўчир, Девона, бўлмаган гап!

Девона (эшикка чолиб бориб). Ишонмасанг, ана ўзинг чиқиб қара, ойнинг бир чеккаси кемтик. Ойингизни шайтон кемириб кетди!

Учинчи оқсоқол (эшикка бориб). Айтганимиз келди. Охир замон бўляпти. Яъжуж-маъжуж ойни кемириб кетди. Анави бузуқларнинг касри бу!

Дарвеш. Башоратимга шак келтирдингларми? Ойсиз қолиб, зулматга ботасизлар демабидим?!

Биринчи оқсоқол. Ё тангрим, ой сўниб боряпти.

Далада молларнинг маъраши, итларнинг ҳуриши эшитилади, ўтвода йиги-сиғи.

Товушлар. Ой сўняпти!

Иккинчи оқсоқол. Ер гуноҳга ботган, ер юзида бузуқлик кўп, бузуқлик!

Товушлар. Бузуқлик кўп... Ҳаммаси ўшаларнинг касофати. Ҳалок бўляпмиз. Худо, ўзингнинг раҳминиг келсин!

Дарвеш. Оқсоқоллар, такбир айтинглар, такбир айтинглар!..

Халойиқ такбир ўқиб чиқади.

Оллоҳу акбар, оллоҳу акбар,
Ло илоҳа иллоллоҳу,
Валлоҳу акбар, оллоҳу акбар...

Дарвеш билан Тангабека орқароқда қолади. Оқийигит билан Зубар жадидка четда.

Дарвеш. Кунинг битди, бойвучча, бошингга қора кун туғди. (*Менсимай, буйруқомуз.*) Айтиб қўйӣ, Шафаққа кўз-қулоқ бўлиб туришсин. У — меники. Ҳали сен билан мен ора очиқ бўлганимиз йўқ. Кўр япсанми, бойвучча, ҳамма нарса менинг кўнглимдагидай хотима топяпти. Шафақ меники, эшитяпсанми?

Тангабека. Сен аждаҳоссан! Минг йил ер тагида захлаб ётган қора илонсан, девсан!

Дарвеш. Уртамиизда таънага ўрин йўқ, бойвучча!

Тангабека. Оҳ, худо, жонимни ол, менга ўлим бер! (*Гандираклаб чиқиб кетади.*)

Дарвеш (*кулади*). Энди ўзим ҳам шунга ишондимки, жаҳонда иблисдан кўра қудратли тангри йўқ!..

Қоронгилик.

Оқигит. Бизнинг ойимиз ҳам сўнди. Ҳамма ёқ симсиёҳ.

Зубарждад. Кўзларимиз кўрмаса, товушлари миздан таниб топиб оламиз бир-биримизни, Оқигит. Нафасингни сезиб турибман, Оқигит. Мен вулматдан қўрқмайман.

Оқигит. Ҳамма қўрқинчлар орқада қолиб кетди, Зубаржад!

Зубарждад. Овозингдан ёрқин нур сочилади, Оқигит!

Оқигит. Нумки сен умид каби порлаб турган қуёшимсан, Зубаржад!

Секин бир-бирларига яқинлаша борадилар.

Зубарждад

(эслаб)

Мен Зубаржад отлидирман,
Оқигитнинг ёридирман,
Бир кўришга зоридирман,
Кўрган борми, бизнинг ёрни?

(Уксив ииглаб юборади.)

Оқигит. Зубаржадим, менинг асл зумрад тошим! Барибир сени ҳеч ким қора тошга айлантиrolмайди. Шунинг учун истиқболимдан миннатдорман, оқ каптарим!

Зубарждад (ийги аралаш). Мен ҳали ҳам умид

узганим йўқ. Ажал албатта бизни четлаб ўтади. Ажал-
нинг шафқати йўқми? Ажал одамларга ўхшаган тош-
бағир әмасдир? (*Оқийигитнинг пинжига сүқилади.*)

Дарвеш Шафақ ни ўтовга итариб киритади.

Зубар жад. Ким бу?!

Шафақ. Мен!

Зубар жад. Шафақ?!

Шафақ. Мен ҳали ҳам тирикман...

ХОТИМА

Ой тўла тутилган тун. Ўтov олдидаги майдон. Қаердадир машъал кўтарган одамлар шовқин-сурони эшитилади. Ўтov олдида қўлида машъал тутган Ёлчиқулу. У соқчилик қилиб турибди.

Ёлчиқулу. Дарвеш менга мана бу қабрни қўриқ-лаб турипни топшириб кетди. Бу гўрдан бирор қочиб қутулармиди? Қаёқка қочади?.. Эй ёшлар-эй, ёшлик қилишди-да... Ҳали яқиндагина қулунтойлардай ўйнаб юрган бу болалар шу кунга тушиб қолади, деб ким ўйлабди дейсиз? Ҳой, Оқийигит, отларни эгарлаб қўйдим, мининглару қочиб қутулинглар бу жаҳаннамдан, дедим, кўнмади! Одамлар бир-бирларини тириклай гўрга тиқишади, бир-бирларининг териларини шилишга тайёр... Мана булар (*ўтога ишора қилиб*) тақдирга бўйсунишни истамайдилар! Ўзларича кун кўришни истаган эканлар, яшайверсинлар! Бирорлари тегармиди?.. Йўқ, одамлар бешафқат! Уларнинг юралари тошдан.

Девона киради.

Девона. Вой, Ёлчиқулми? Ҳа, Ёлчиқул, отларни менга тутқазиб, ўзинг ғойиб бўлдинг-қўйдинг? Мен

юганларини олиб, отларни далага ҳайдаб юбордим.
Керак бўлса тагин тутиб оларсан!

Ёлчиқул. Шовқинлама, Девона, энди отларнинг кераги йўқ.

Девона. Энди нима бўлади, Ёлчиқул?

Ёлчиқул. Жуда ёмон бўлади.

Девона. Бу ёмонлардан ҳам ёмонми?

Ёлчиқул. Ёмондан ҳам ёмон.

Девона. Ёмондан ҳам ёмон бўлса нима бўлади?

Ёлчиқул. Оқийигит билан Зубаржаднинг қўлларини боғлаб чўлга қувадилар, оқсоқоллар бошлаган ишни оч бўрилар ниҳоясига етказади.

Девона. Нима учун бўрилар бир-бирларини емайдилар?

Ёлчиқул. Йиртқич ҳайвонлар ўз жинсларига шафқат қилишади. Лекин одамларда шафқат йўқ, бир-бирларини ейишади.

Девона. Мени ҳам еб қўйишса-я?

Ёлчиқул. Оҳ, Девона, сени аллақачон ейишган... Сенинг ҳатто исмингни ҳам ейишган...

Девона. Ким еган мени?

Ёлчиқул. Униси менга қоронги. Лекин сени ейишган.

Девона. Бўлмаган гапни гапирияпсан... Мана оёқларим, қўлларим бутун, мана бурним, бошим бор... Бошимда дўпим бор...

Ёлчиқул. Сен билан менинг баҳтимни ейишган, Девона.

Девона. Ҳа... а... а...

Ёлчиқул (қулоқ солиб). Ўтовдагилар жим бўлиб қолишиди... Фақат Шафақ ўқсиб-ўқсиб йиғлаляпти... Эй, дунё-ей...

Девона. Эртага қуёш чиқмаса нима қиласиз?
Қанақа қилиб уйқудан уйғонамиз, Ёлчиқул?!

Ёлчиқул. Қуёш чиқар, чиқару аммо қора қуёш чиқар.

Девона. Бошқа қуёш чиқадими энди?

Елчиқул. Нега бошқа бўлсин, ўша қуёшнинг ўзи. Лекин ҳасратдан куйиб, унниқиб чиқар.

Девона. Жуда ёмон бўлар экан, бўлмасам...

Машъал тутган одамлар яқинлашади.

Елчиқул. Биз томонга келишяпти.

Девона. Мен улардан қўрқаман, тагин мени ҳам тутиб еб юборишмасин?! (*Ўтова кириб кетади.*)

Елчиқул. Бундай тунда яхши одамлар молни чўлга ҳайдамайди, булар одамни ҳайдагани келишяпти.

Эркаклар, хотинлар қўлларида машъаллар билан киришади.

Иккинчи оқсоқол. Бу бузуқлар тупроғимизни тарқ этмаса, бошимиз фалокатдан чиқмайди. (*Қўлида арқон.*) Ҳайдаш керак буларни!

Учинчи оқсоқол. Фурсатни бой бермай, тезроқ қувиш керак!

Товушлар. Қувиш керак, қувиш керак!

Виринчи оқсоқол. Боринглар, олиб чиқинглар у юзсизларни!

Иккинчи оқсоқол. Одамлар кўрсин, билиб қўйсин: бузуқнинг ҳоли шу бўлади, ибрат олишсин!

Товушлар. Ибрат, ибрат бўлсин!

Бирор. Шуларнинг касрига уруғимиз оғир кунга қолди.

Учинчи оқсоқол. Эй, бандалар, буларнинг ҳолини кўрининг, юз ўгириш улардан...

Бир киши Оқиғит билан Зубаржадни олиб чиқади.

Биринчи оқсоқол. Сиз уругнинг юзига оёқ қўйдингиз, уруғ бундан буён сиздан юз ўгиради!

Иккинчи оқсоқол. Кўрдингизми, шайтоннинг йўлига кирганларнинг ҳоли шу бўлади!

Дарвеш. Қилмиш — қидирмиш!

Иккинчи оқсоқол. (*Ёлчиқулга арқонни узатиб.*) Ма, Ёлчиқул, бу арқон билан иккаласининг қўлини боғла, қовушишни орзу қиласар эдилар, қовушинлар!

Елчиқул. Қуллуқ, оқсоқол, мен бу буйруғингни бажаролмайман.

Иккинчи оқсоқол. Бу муртад қайдан чиқди?! (*Бир кишига.*) Кўчарбой, ма, чаққон-чаққон боғла!

Кўчарбой. Мен от тушовлаганману, оқсоқол, одам тушовлаган әмасман. Менинг қўлим бормайди, ўзинг боғлайвер!

Иккинчи оқсоқол. Нима бало бўлган буларга, бири биридан танбал?

Биринчи оқсоқол. Ўзинг бошлаганни, ўзинг бошқар, қурдош!

Иккинчи оқсоқол. Уругимиз осойишталиги учун жонимни фидо қилишга тайёрман! (*Оқиғигит билан Зубаржаднинг қўлларини орқага қилиб боғлайди.*) Мана, бундай бўлади... Мен қонун йўлида ўз фарзанддимни ҳам аямас эдим.

Бир хотин. Бечораларни бундай қийнагандан кўра жонидан жудо қилиб қўя қолинглар!

Товушлар. Боглаб нима қиласизлар, қўйворинглар, шундай кетаверсинглар!

Иккинчи оқсоқол. Шовқин солманглар! Бу нимаси?!

Ҳолдан тойган, оғир изтиробда Т а н г а б е к а киради.

Т а н г а б е к а . Оқсоқоллар! Сабр қилинглар, шошманглар, менинг сўзимга қулоқ беринглар!

Б и р ҳ о т и н . Онага йўл беринглар!

Одамлар четланиб Т а н г а б е к а га йўл берадилар.

Т а н г а б е к а . Мен она, онаман, халойиқ. Сизнинг олдингизда ҳам, худо олдида ҳам, у дунёда ҳам, бу дунёда ҳам мен жавоб бераман. Болаларни қўйинглар, оқсоқоллар, менинг устимдан ҳукм чиқаринг. Мен гуноҳкорман, халойиқ, жуда гуноҳкорман. Мени лаънатланг, қарғанг мен гуноҳкорни! Лекин болаларни қўйинг, тегманг уларга, оқсоқоллар!

Д а р в е ш . Йўқ, бойвучча, улар сенинг қўлингдан кетган. Сен ҳали ўз гуноҳинг учун жавоб берадиган вақтинг келади.

Т а н г а б е к а . Унинг сўзларига қулоқ солманг, бизнинг тинчимизни бузган ёвуз — шу!

Д а р в е ш . Сен бир оз ўйлаб гапирсанг дуруст бўлар эди, бойвучча!

Т а н г а б е к а . Ҳозир мен сендан заррача ҳам қўрқмайман! Элатлар! Бу дўзахи одам, бу мудҳиш зот. Бу авлиё эмас, худодан қайтган ёвуз!

Д а р в е ш . Бу бойвучча ақлдан озди чоғи??!

Т а н г а б е к а . Ҳа, ақлдан оздим, озмай кўр-чи ақлдан бу қиёмат қойимда! (*Оқийигитга*.) Үғлим, кечир мени... Тавба қил, таомилга бўйсун, ўғилгинам! (*Оқийигит жим*.) Ахир тошбагир эмассан-ку, болам?!

Е л ч и қ у л Үзинг тошга айлантирдинг, бойвучча!

Т а н г а б е к а (*Зубаржадга*). Ҳеч бўлмаса сен тавба қил, Зубаржад. Сен аёлсан-ку, аёл кишига тошкўнгиллик ярашмайди!

З у б а р ж а д жим.

Б и р и н ч и о қ с о қ о л . Кечикдинг, бойвучча, ке-
чикдинг! Ҳукмимиз қатъий, уни олло таолонинг ўзи
қабул этди. Энди ўзгартириб бўлмайди.

Яна ўша тўй либосида Ш а ф а қ ўзовдан чиқади, бир чеккада маг-
рур жим туради. Одамлар ҳайрон ва ҳабратда унга қарайдилар.

Б и р хотин . Астагфирулло! Бу нимаси?

Тангабека . Шафақ? Бугун тўй либоси кияди-
ган кун эмас-ку, болам? Жин-пин урмадими? Эринг
ажал излаб кетялти-ю, сен тўй либосида чиқасан?

Ш а ф а қ жим.

И к к и н ч и о қ с о қ о л . Ҳа, худо йўлига, қон-қар-
дошлар! Қани, фурсат ўтмасин, видолаш боланг билан,
бойвучча!

Тангабека . Хайр, ўғлим, алвидо, Оқийигитим!
Оқ исмингга қора кунлар йўлдош бўлиши ёзилган экан
пешонангга, болам! Жувонмарг бўлган ўшлигинг учун,
сен кўрмаган шодликларинг учун узр сўрайман сен-
дан, болагинам! Кечир, мен ёзиқ онангни!.. Адалот-
сизлик, қандай оғир адолатсизлик бу!.. Бир нарса
де, болам, охирги марта овозингни эшитиб қолай,
биргина сўз айт бу гуноҳкор онангга, оқ шунқорги-
нам!...

О қ и й и г и т . Қулоқ эшитмаган айблар эшитилиб,
айтиладиган сўзлар айтилиб бўлди, она! Сенга эмас,
мен туғилиб ўсан азиз даргоҳга, она тупроққа айта-
диган сўзим бор:

Алвидо, тупроғим, сувлар, тогларим,
Алвидо, дилимнинг иссиқ даргоҳи.

Бахтиёр ёшлигим, хушиуд чоғларим,
Ҳурлигим, ишқимнинг сўнгги паноҳи!
Қалбим жароҳати оғир, дард оғир,
Ўлимдай қоп-қора йўлга чиқаман.
Сенда куним битмиш, Она юрт, ахир,
Қул эмас, ҳурликча, ишқ-ла кетаман!..

Алвидо, Ёлчиқул оғай, алвидо, Девона... Алвидо, Шафақ, менинг бечора хотиним! Мен гуноҳкор бўлсам, фақат сенинг олдингдагина гуноҳорман, Шафақ! Сен оқилассан, кечир мени, қарғама, Шафақ!

Шафақ бош эгади. О қийигит, Зубар жад иккаласи одамларга таъзим қилиб, қоронғилик томон кета бошлайдилар.
Тангабека қотиб қолгандай.

Иккинчи оқсоқол. О, худойим, ниҳоят бу гуноҳкорлардан бизни халос қилдинг!

Учинчи оқсоқол (қўйл силтаб). Ҳамма бало, ҳамма вабо улар билан даф бўлсин!

Бирор. Ана, эшитяпсизми, ризқини сезиб, оч бўрилар увиллаяпти.

Бир хотин. Вой худойим-эй, ҳеч қайсингизда шафқат йўқ! Бўридан ҳам баттарсизлар!..

Шафақ кескин бурилиб иккинчи томонга йўл олади. Дарвеш унинг йўлини тўсмоқчи бўлади. Ёлчиқул Дарвешни четга итариб, ўзи Шафақ орқасидан кетади.

Иккинчи оқсоқол. Ҳаммаси йўлдан озган, ҳаммаси ҳам иблиц қуллари, бузуқлик қуллари! Йўқолсин ҳаммаси, даф бўлсин! Қароргоҳимизга осойишталик дорисин!

Учинчи оқсоқол. Осойишталик бўлади, худо хоҳласа! Бу бузуқлик қулларига ўлим!

Девона (*кутилмагандага ўртага чиқади*). Қуллар! Қани қуллар! Ким қул?

Учинчи оқсоқол (*кетганларни кўрсатиб*). Ана, қуллар, ана!

Девона (*хахолаб кулади*). Мен ҳеч қандай қул кўрмаяпман. (*Кетувчилар изига тикилиб*.) Қуллар, қуллар дейсан! У ерда мен қулларни эмас, тўртта фариштани кўриб турибман, тўртовининг бошида тўрт олтин тож ярқираб турибди, улар ҳур-ку! Қуллар қаерда? (*Қаттиқ кулади*.) Мана бу ерда қуллар! (*Биринчи оқсоқолга*.) Ана, сенинг пешонангда қулликнинг муҳри қоп-қора бўлиб ёниб турибди, қоп-қора бўлиб турибди!. (*Иккинчи оқсоқолга*.) Сенинг эса, ичингда шумшайиб гариб қул ўтирибди, ана букур қул ўтирибди. Унинг елка-яғринларидаги қамчи изларини мен кўриб турибман... (*Учинчи оқсоқолга*.) Қуллик сенинг қорнишгда. Худдичувалчангга ўхшаб хушомадгўйлик, лаганбардорлик қули ётибди. Сен аянч, қўрқоқлик қулисан!. (*Дарвешга*.) Қани, менга қара-чи, сен авлиёнинг қора юрагида нима бор экан?! Сенинг ичингда қул йўқ! Ана, томоша қилинглар, бу авлиёнинг ичидабуралиб-буралиб илон тўлғаняпти. Илоннинг иккитили ва иккита думи бор... Авлиё қиёфасидаги иккижузламачилик қули бу! (*Тангабека олдига келиб тўхтайди*.) А, Тангабека бойвучча! Менга қара, ие, бўйчинингдаги нима? Маржонми? Бу кумуш маржон эмас, кумуш арқон! Қуллик сиртмоғи. Ўз сиртмоғинг ўзингни бўғяпти... бўғяпти, ана бўғяпти! Қизил кўзли бургут сен эмасмисан? Нега сен ўз болаларингни чоҳга итариб юбординг, Тангабека?! Энди улар орқасидан

ўзинг ҳам чоҳга ташлан, бойвучча! Ана, у чоҳнинг қаърида сен ўлдирғанларнинг суюклари оқариб кўриниб турибди, ана, қара, оқариб турибди! Мен бориб уларни кўмай, ахир ўлганларни кўмишади-ку. Ўтова тугилганми, қоянинг чўққисида тугилганми, ўлгандан кейин барибир тупроққа кўмишади...

(Кетади.)

Та н г а б е к а турган жойида йиқилади. Узоқда, кетганлар томонда ёрқин нурли катта йўл кўринади. Кетувчиларнинг ўша нурли йўлга чиққани кўринади...

П а р д а.

МУНДАРИЖА

ДОСТОНЛАР

Уни Фарҳод дер әдилар	7
Икки ўртоқ :	18
Мушоира :	25
Водил юлдузлари	31
Сўроқлайди шоирни шеърим	35
Қуёшли қалам	42
Зайнаб ва Омон (<i>Либретто</i>)	69

ТАРЖИМАЛАР

Н. А. Некрасов. Рус аёллари. (<i>Достон</i>)	131
М. Карим. Ой тутилган тунда. (<i>Уч пардали фожиа</i>)	207

На узбекском языке

З У Л Ь Ф И Я

СОЧИНЕНИЕ В 2-Х ТОМАХ

ТОМ 2.

ПОЭМЫ, ПЕРЕВОДЫ

Редактор Муҳаммад Али

Рассом Р. Халилов

Расмилар редактори Н. Холиков

Техн. редактор В. Барсукова

Корректор М. Аҳмедова

Босмахонага берилди 4/II—75 й. Босишга руҳ-
сат этилди 7/IV—75 й. Формати 70×108 $\frac{1}{32}$. Бос-
ма л. 9,26. Шартли босма л. 12,95. Нашир
л. 12,0+0,17 (5 вклейка). Тиражи 25000. Гафур
Гулом иомидаги Адабиёт ва санъат нашириёти,
Тошкент, Навоий кӯчаси, 30. Шартнома 142—74.

Узбекистон ССР Министрлар Советининг Наш-
риётлар, полиграфия ва китоб сандози ишлари
бўйича давлат комитетининг Тошкент полиграф-
комбинатида 1-қоғозга босилди. Тошкент, На-
войй кӯчаси, 80. 1975 йил. Заказ № 240. Ба-
соси 98 т.

Зулфия.

Асарлар. 2 томлик. Т., Адабиёт ва санъат нашриёти, 1975.
2-т. Достонлар, таржималар.
296 б.

Узбекистон халқ шоири, Ҳамза, Нору ва «Нилуфар» муроффотлари лауреати Зулфия «Асарлар»ининг иккинчи томига шоиранинг «Мушоира», «Уни Фарҳод дер әдилар», «Қуёшли қалам» ва бошқа достонлари, шунингдек, таржималаридан намуналар киритилди.

Зульфия, Сочинение в 2-х т. Т. 2.

Уз2